







IO. GOTTLIEB
HEINECCIUS,
POTENTISS. PRUSSORVM REGIS
quondam a Consil. Sanctior., Iur. ac Philosoph.
in ill. Academ. Frideric. Professoris publ. ord.
OPERV M

AD

VNIVERSAM IVRIS PRVDENTIAM,
PHILOSOPHIAM ET LITTERAS HVMANIORES

Pertinentium,

TOMVS OCTAVVS:

Continens,

PRAELECTIONES ACADEMICAЕ

IN HVG. GROTIVM

DE IVRE BELLII ET PACIS:

ET

IN SAM. PVFENDORFFIVM
DE OFFICIO HOMINIS ET CIVIS.



GENEVAE,

Impensis FRAT. CRAMER, ET CL. PHILIBERT.

CICICCCXXXXVIII.

I O. G O T T L I E B
H E I N E C C I I ,
IC. ET ANTECESSORIS,
P R A E L E C T I O N E S
A C A D E M I C A E
I N
H V G O N I S G R O T I I
D E
I V R E B E L L I E T P A C I S
L I B R O S I I I .

E D I T I O T E R T I A .
P R I O R I A V C T I O R M V L T O E T E M E N D A T I O R .



G E N E V A E ,
I m p e n s i s F R A T R V M C R A M E R , E T C L . P H I L I B E R T .

c l o I c c x x x x v i i i .

BENEVOLO ET AEQVO LECTORI.

S. P.



I vmquam post hominum memoriam lucem vidit opus, quod non solum doctis viris, verum integris gentibus acceptum fuit, sine dubio est viri vere magni, HUGONIS GROTIJ *de iure belli et pacis*, libris tribus comprehensum. Adeo ille veritati litasse credebatur, vt ab omnis sectae hominibus gentibusque, plane a se alienis inuicem gratus acciperetur. Maximi reges atque imperatores tum suum cuique tribuisse sibi persuadebant, quum id praestarent, quae magnus vir praeceperat. Vt adeo *doctor gentium* optimo maximo iure dicendus sit, cuius arbitrio earum res stant caduntue. Inde quoque factum, vt praestantissimi quique viri immortalitatem nominis non magis consequi posse, nec immerito, statuebant, quam si in opus tale commentarentur, quod ad saeculorum finem esset perduraturum. Immo triariis quoque haec ad immortalitatem via placuit, quamvis successu non adeo felici, quum equidem illorum scripta adhuc supersint, verum quotidie risu ab harum rerum intelligentibus excipiantur. Quis fuerit GROTIUS, quaeque ingenii reliquerit monumenta, superfluum esset hic enarrare, quum omnia, quae dici possunt, iam dederit vir doctissimus, LEHMANNVS in *Hugonis Grotii manibus ab iniquis obtrectatoribus vindicatis*, vt taceam, quae hinc inde ab historiae iuris naturalis scriptoribus prolata sunt, quae vero cum laudato libro comparari vix merentur. In numerus fere numerus eorum est, qui vel praeclarum opus illustrare, vel interpretari, vel augere, vel denique hinc inde confutare voluerint: qui vero eorum rem acu tetigerint,

runt, nostrum non est diiudicare. Id certum firmumque manet, optimam consilii rationem esse, aut nullos plane, aut paucos legere prius, quam ipsum opus quasi edidiceris. Inter eos, qui critice ac philologice illustrare Grotium sunt aggressi, eminet criticorum superioris saeculi facile princeps, Io. FRID. GRONOVIVS, cuius animadversiones plerisque editionibus iungi solent, at interpolatas saepe vel spurias esse, conquestus est gloriae auitae heres dignissimus, ABR. GRONOVIVS. At quoque fuerunt, qui rebus explicandis vacarent, inter quos reliquis non solum praerogativam reddet dubiam, verum quoque longo post se intervallo relinquet viri post fata quoque celeberrimi HENRICI de COCCII, commentarius in idem opus absolutissimus, quem propriis animadversionibus auctum propediem quam splendidissime dabit illustrissimus filius, SAM. de COCCII, litterarum firmissimum praesidium, qui non contentus eruditionis omnis tutelam gerere, ipse aliquid dare constituit, quod admirationi potteris esset tamdiu, quam diu eruditioni suus constaret honos. † Verum fuere quoque, qui id tantum agere voluere, ut quae Grotius late disseruit, vel in breves quasi theses contraherent, vel denique vim argumentorum ostenderent, inter quos palma sine dubio debetur viro post fata quoque magno, Io. GOTTL. HEINECCIO. Fecit id in *praelectionibus*, quas iam vides, benevole lector, quasque ad palatum tuum, si sapias, fore nulli dubitamus. Atque certo adfirmare possumus, earum ope Grotium et faciliorem intellectu fore, et solidiorem, si argumenta spectes, quae iam una serie exhibentur. Nihil iam superest, quam ut gratias publice agamus viro integerrimo Rudigero, nouo hoc beneficio sibi insigniter obligauit rem publicam litterariam, et in posterum quoque grata exhibere officia non intermittet. Vale, nobisque faue Dab. Berol. a. d. x. lul. clbcccxxxiiii.

IO,

† Tribus Volum. edidit Vratislau. 1746.



I O. G O T T L.
H E I N E C C I I
P R A E L E C T I O N E S
I N
H V G O N I S G R O T I I
D E
I V R E B E L L I E T P A C I S
L I B R O S I I I.

A D P R O O E M I V M.



D G R E D I M V R opus, quo nullum unquam
sol vidit illustrius, et quod vivet, quamdiu
studiis praeclaris honos inter mortales erit.
Maximi semper eam magni G R O T I I lucubra-
tionem fecere eruditi, in quibus P A V L V S
C O L O M E S I V S in *Operib.* pag. 459. scribit, Gro-
tium omnes ingenii vires in hoc opus inten-
disse, eumque de libris his dicere potuisse,
quod C A S A V B O N V S scripserat de *Commentario*
suo in *Persium*: in *Persio* omnem ingenii co-
natum effudimus. Nec male iudicavit C O L O M E S I V S. Ipse enim
H E I N E C C I I *Prael. Grot.* A G R O -

GROTIUS de hoc opere suo in *Epist.* 196. scribit: *mitto tibi libros de iure belli et pacis, cum non exigua accessione. Horum curam tibi et amicis commendo, ut inter mea opera, si quid video, EMINENTIVM.*

Antequam ad prooemium perueniamus, quaedam praemittere iuvabit, quae ad libri huius historiam pertinent. Scripsit illum Grotius iam exsul, quum magna invidiae tempestate adversus se excitata, ob novas, quarum insimulabatur, in sacris opiniones, et factionem Oldenbarneveldianam, ex carcere ingenioso vxoris commento exportatus in Galliam profugisset. Id enim ipse indicat in *proem.* §. 30. In Gallia enim reperto praesidio, Nicol. Peirescius id egit, ut rex hoc nouo hospite ad rem magnam et illustrem vteretur, et hinc facile obtinuit, ut Grotio istud opus *de iure belli et pacis*, quale nondum exstabat, conscribendum daretur. Praestitit hoc ipsum egregie, et hoc opus edidit anno 1625. quumque primum consilium cepisset, illud inscribendi *ius gentium*, postea id consilium abiecit, et operi praefixit titulum *de iure belli et pacis*, ut hoc titulo inuitati et summi rerum administri in aulis, et duces bellici librum legerent, neque illum tamquam opus vmbatile et scholasticum adspernarentur. GROTI. *Epist.* 78. *ad Gall. COLOMES. Epist. claror. viror. epist.* 3.

Ceterum immortale hoc opus aliis bilem mouit, ab aliis cum summo plausu receptum est. Nemini id minus placuit, quam pontifici Romano. Quum enim Grotius iura principum et rerum publicarum aduersus perniciosas sacerdotum doctrinas grauius vbique adferat, et fundamenta ponat genuinae doctrinae ciuilis, quae papae admodum exosa, et regno tenebrarum parum proficua sunt: librum in *indicem librorum prohibitorum* referri iussit anno 1627. Vnde ex omnibus Romanensium academiis exsulat. Vid. BOECLER. in *praefat. Commentar. ad Grotium.*

Deinde et ex Protestantibus permultis hoc opus displicuit ob varias a receptis ecclesiae doctrinis discrepantes sententias, quas saepe inspergit. Et profecto eodem fere tempore duo magna ingenia turpiter se dederunt, quum se rebus alienis immiscerent; Grotius, dum theologicae eruditionis; Salmasius, dum iuridicae laudaream adfectaret. Et hinc est, quod tot theologi notas scripserunt ad Grotium, de quibus paullo post erit dicendi locus.

Quo magis autem opus ob naeuos quosdam displicuit, eo magis se probauit viris ciuilibus prudentiae gnaris: eoque factum est, ut nullus vnumquam auctor classicus tot commentariis illustratus sit, ac Grotii libri *de iure belli et pacis*. Sed illam commentatorum turbam nos in certas classes, ac veluti in tribus quasdam, describemus.

I. Fuere, qui id egerunt tantum, ut textum Grotii interpretarentur, et genuinum eius sensum eruerent, in eoque genere reliquis omnibus palmam praeripit Io. FRIDER. GRONOVIVS, cuius notae ad intelligendum Grotium sunt vtilissimae, et bonae frugis plenae.

II. Fuere, qui Grotium magis illustrarent, quam de eius doctrinis disputarent, eoque in genere regnat Io. HENR. BOECLERVS, qui conquisit ex omni antiquitate exemplis et testimoniis Grotium illustrat, Sed nec multum vtilitatis extra scholam hi commentarii adferre solent, nec integri lucem adpexerunt. Peruenit enim Boeclerus tantum ad caput vsque septimum libri II. Eiusdem generis et commentarius GVIL. VAN DER MVELEN, operosus et eruditus, sed eadem methodo conscriptus, VLRICI OBRECHTI, professoris et postea praetoris regii Argentoratensis, Boecleri generi, et IOANNIS TESMARI, professoris Marburgensis.

III. Fuere, qui Grotii doctrinas vel a philosophia scholastica, vel a recepta ecclesiae doctrina dissentientes potissimum refellere in suis commentariis studuerunt, id quod fecerunt, Io. a FELDEN, Io. ANDR. OSIANDER, VELTHEMIVS, et Io. REINHARDVS HEDINGERVS. Verum ex his parum proficit studiosus iuris naturalis et gentium; qui Grotium non eo fine tractat, ut inde theologiam et philosophiam addiscat, sed ut iuris naturalis et gentium genuinis principiis imbuatur. Nec tam periculosae sunt illae Grotianae theologiae scintillae, ut inde metuendum sit incendium, ad quod extinguendum istis commentariis absonis opus videatur.

III. Denique fuere, qui Grotii doctrinas cum genuinis iuris naturae et gentium principiis contulerunt, ea, quae recte posita erant, inde demonstrarunt, errores modeste indicarunt, quae deerant, suppleverunt. Et horum tres potissimum sunt, qui omnes reliquos Grotii interpretes longo post se intervallo reliquisse videntur, CASP. ZIEGLERVS, prof. Wittebergensis, cuius *Notae in Grotium Wittebergae 1666.* prodierunt, HENR. HENNINGES, qui *observationibus suis politicis et moralibus* in Grotium 1673. editis aulae Brandenburgicae innotuit, a qua negotiis grauissimis, maxime legationi ad comitia Ratisponensia, adhibitus, ubi non ita pridem mortuus magnum desiderium principi et toti Germaniae reliquit: ac denique BARBEYRACIVS, qui et versione sua, et notis de Grotio bene mereri studuit. Prae omnibus tamen ZIEGLERVS et HENNINGESIVS commendari merentur.

His de opere Grotii praemissis, iam ad ipsa Grotii prolegomena pogredimur, quae ad duas partes possunt reduci. Nam

1. Prior est generalis, in qua *de iure naturali generatim* disputat, a §. 1. ad 27.

A 2

2. Po-

2. Posterior specialis, in qua *consilium suum* exponit. §. 28. ad fin.
 Parte priorē agit 1. de iuris *naturalis praestantia*, §. 1. 2.
 2. de *eiusdem existentia*. §. 3-27.

Ad §. 1. 2.

Praestantia huius iuris argumentis quam plurimis potest demonstrari, quamvis multi sint, qui eam in dubium vocent, et iuris prudentiam naturalem plane inutilem ac infructuosam esse rei publicae existiment, et in his HENR. REBHANN, Ictus Argentoratensis, qui, cum Boecleri laudibus inuideret, programma anno 1663. edidit, quo id studium plane inutile dixit, et auctor anonymus libelli, Halae editi, sub titulo *Vrim et Thummim*, qui eandem inflat tibias.

Rationes vterque duas potissimum vrget. 1. Quod rationes iusti et iniusti commodius ex scriptura sacra, quam ex ratione petantur, 2. quod ad causas quauis decidendas, promendamque iustitiam, sufficiat ius civile humanum.

Sed rationes longe ponderosiores, vt ita dicamus, huius iuris praestantiam docent. Nam, vt Grotius §. 1. dicit, *est ius commune, quod inter omnes omnino populos intercedit.*

1. Ius civile Romanum magnum vsum in multis gentibus obtinuit, sed non vbique: numquam in fora Daniae, Sueciae; Poloniae, Russiae, nunquam in Aliam et Africam penetrauit. At ius hoc naturae vere est ius gentium omnium. Quum enim ex ipsa ratione fluat: non potest non omnibus gentibus commune esse, quae ratione pollent: adeoque siue cum Turcis, siue cum Iapanensibus, siue cum Scythiis agas, non magis possunt negare iura naturalia, quam veritates arithmeticas, his duo esse quatuor, quia illa aequae ex ipsa ratione fluunt, ac hae positiones arithmeticae.

2. Ius gentium, inter gentium rectores intercedit. Ius Romanum ciues tenet, non ipsos principes et res publicas. Principes enim solutos esse legibus, ipsam ius Romanum fatetur l. 31. *D. de legib.* Hinc vsum habet ius civile in causis priuatis, non publicis, quae ex solo iure naturae et gentium decidendae sunt. Rem illustrabo exemplo. Quum Philippus III. rex Hispan. anno 1665. obiisset, Ludouicus, Galliae rex, Belgium Hispanicum inuadebat. Causa bello praetexebatur IUS DEVOLUTIONIS. Brabantini enim eo iure vtuntur, vt viri ad secunda vota transeuntis bona maneant liberis ex priore susceptis matrimonio, exclusis liberis ex se-

secundo matrimonio genitis. Quum itaque Philippus III. ex priore matrimonio suscepisset Mariam Theresiam, Ludouici vxorem; existimabat, ei iure deuolutionis deberi Belgium. Inde bellum. Vid. ANDR. AUBERT *Traité des Droits de la Reine très-chrétienne sur divers Etats de la Monarchie d'Espagne*, à Paris 1667. 12. Sed absurda erat ea defensio. Nam ius deuolutionis est ius ciuile Brabantinis proprium, et quo soluti sunt principes. Controuersiae autem inter gentes non ex iure ciuili huic vel illi genti proprio, sed ex communi omnium gentium iure decidendae sunt. Rectores ciuitatum possunt iure ciuili vti quoad subditos, sed non inter se.

3. Ius naturae ab ipsa natura profectum ex diuinis legibus constitutum est. Legislator est Deus, modus promulgandi dictamen rectae rationis. Ergo est certum, quum ius ciuile saepe incertum sit. Est immutabile, quum ius ciuile saepiuscule mutetur. Est sanctum et diuinum, quum de iure ciuili vsurpari possit illud TACITI, *Aunal. lib. XIII. cap. 44. habet aliquid ex iniquo omne magnum exemplum, quod contra singulos utilitate publica rependitur.*

4. Ius naturale et gentium, vti Grotius ait §. 2. versatur in foederibus, pactionibus, conditionibus populorum, regum, exterarumque nationum, in omni denique belli iure et pacis. Quam praeclarae hae res sunt! Non hic agitur de stillicidiis et tribus capellis, vti Martialis in ius ciuile ludit, sed de negotiis publicis gentium cum gentibus, de foederibus, bello, pace, controuersis illustribus, praetensionibus, ceteris. Est ergo haec scientia fere regnatricis. Et si quis Bartolum vel Baldum mitteret ad comitia pacis causa Cameraci instituta, vniuersa scientia iuris ciuilis non tantum proficeret, quantum vnus Grotius, vel Henningius, vel Pufendorfius, in hac disciplina versatus.

Hinc quamuis paradoxum videatur, Euripidem hoc ius rerum diuinarum humanarumque cognitioni praesferre, (vid. §. 2.) id tamen rationem habet, quia eo magis prodest rei publicae, quam omnis philosophia theoretica, eiusque magis interest, pacem seruari, bella componi, quam reperiri circuli quadraturam vel perpetuum mobile.

§. 3. 4. 5.

Sequitur altera quaestio, quam demonstrata iuris huius praestantia, tractat Grotius. Quum vero duplex hic occurrat error, quum

1. alii negauerint, ius aliquod exsistere, alii 2. ius belli esse: utrumque errorem profligare nititur.

I. Qui ius negarent, haud pauci reperti sunt. Ipse GROTIUS §. 3. allegat EYPHEMVM apud THVCYDIDEM, qui nihil iniustum esse ait quod vtile, et §. 4. CARNEADEM, philosophum Platonicum, qui Romam missus, se de omnibus rebus in utramque partem disputare posse, conuocatis ciuitatis proceribus vno die laudauit iustitiam, et iustum aliquid natura esse polita oratione demonstrauit: altero die ipse argumenta sua destruxit, et nihil natura iustum, nullum ius naturae exsistere defendit, Catonis suasu ideo Roma expulsus. Vid. LACTANT. *Inst. diu. lib. V. cap. 16.* vbi plurima eius argumenta occurrunt.

Sed his adiungi possunt alii, veluti ARISTIPPVS Cyrenaeus, qui nihil natura iustum bonestumque esse statuit, sed lege et consuetudine, addiditque, sapientem et furtis, adulteriis, et sacrilegio daturum operam, quum tempestiuum fuerit. Neque enim horum quidquam natura turpe esse, si auferatur vulgaris opinio. DIOGEN. LAERT. lib. II. *segm. 93.* Non absumilis fuit Epicuri sententia, quam ita expressit Horatius, lib. I. *sat. 3.* ipse Epicureus:

Non natura potest iusto secernere iniquum:

Sola est utilitas iusti prope mater et aequi.

II. Hi ergo omnes in vniuersum aliquid iustum esse negarunt, sed fuere etiam, qui saltim belli aliquod ius esse inficiarentur: eoque pertinent loca ENNII, HORATII, MARII, TERTVLLIANI, quae auctor §. 3. 4. adducit: quaeque eo redeunt, quod leges ficeant inter arma, bellumque, quod vi et fraudibus geritur, nullum ius admittat.

Sed hos auctores vtriusque generis praeclare refellit auctor, et contra priores demonstrat, esse ius naturae. §. 6-24. contra posteriores, esse etiam ius belli §. 25-27.

Esse ius naturae, septem argumentis demonstrat, quae ordine perlustrare iuuabit.

§. 6.

Primum argumentum hoc est: cui natura est appetitus societatis tranquillae, ei est ius. Homini natura est eius modi appetitus societatis. Est itaque ei ius. Ergo datur ius aliquod naturale et commune omnibus hominibus. Resoluimus illud in formam syllogismi, vt eius vis et neruus eo magis adpareat.

Pri-

Prima propositio est: cui est adpetitus societatis tranquillae, ei est ius: eaque certissima, quia societas nulla sine iure consistere potest. Societas enim consistit in coniunctione animorum, ea sit per pacta, pacta non profunt nisi seruentur. Quis vero pacta seruet, nisi iure aliquo se ad id obligari credat? Fingamus, decem latrones coire in societatem. Iniustissima haec societas est, et tamen sine iure consistere nequit. Coeunt enim per pacta, stipulantur sibi inuicem mutuum auxilium, mutuam taciturnitatem, commune lucrum: si isti homines in se iniustissimi haec pacta non seruant, dissoluetur societas. Hinc recte CICERO *de offic. lib. II. cap. 11. Iustitiae tanta vis est, ut nec illi quidem, qui maleficio et scelere pascuntur, possint sine vlla particula iustitiae viuere, cet.* Est ergo certissimum, societatem sine iustitia consistere non posse: quumque iustitia nulla sit sine iure, certissima quoque est propositio: cui est adpetitus naturalis, ei est ius.

Propositio secunda non minus certa est. Hominem enim natura adpetere societatem tranquillam, experientia docet, nec facilius potest, iste adpetitus probari, quam si consideremus hominem vel in solitudine, vel ad gentem barbaram et feris truculentiorum deportari. An non mori illi suauius videbitur, quam vel extra societatem hominum, vel inter homines sine securitate in perpetuo periculo viuere? Sequitur itaque, ut et conclusio sit certissima. Ergo est aliquod ius commune, quod ex societate fluit, id est, ius naturae.

§. 7.

Sed priusquam ad secundum argumentum progrediatur: objectionem remouet, §. 7. Argumentatus erat a naturali adpetitu, quo homines ad societatem feruntur, ad existentiam iuris. Posset obuerti, et bruta ad societatem sui generis ferri, veluti columbas, formicas, et praecipue apes, adeoque et his ius naturae esse, quod quum sit absurdum, absurdam quoque esse consequentiam, quod, qui natura ad societatem feruntur, ius naturae habeant.

Sed respondemus, distinguendum esse inter desiderium et impetum naturalem. Desiderium est affectus voluntatis tendens in aliquem finem, et adpetens simul media, quae ad hunc finem simul idonea sunt. Et tale desiderium est in solo homine, quia solus voluntate gaudet, et ratione, qua media inueniat.

Impetus vero est naturalis tendentia sine ratione et conscientia:
Sic

Sic e. g. lapis tendit deorsum, sed nec voluntate deorsum cadendi instructus, nec sibi conscius est, se deorsum tendere, nec de medius, quae ad hunc motum requirantur, sollicitus est. Et talis impetus est in brutis.

Iam facile hac distinctione observata respondebimus argumento: Quicumque desiderio naturali fertur ad societatem tranquillam, illi ius est: Bruta huius modi desiderio ad societatem tranquillam non feruntur, sed impetu quodam et instinctu naturali ad eam tendunt: Ergo non habent ius.

Non autem voluntatem cum ratione coniunctam brutis inesse, inde probat Grotius:

1. Quod actiones eorum non sint vniiformes, et sibi similes. Nam canes e. g. tuentur catulos, eosque defendunt aliquamdiu: mox illos mori abigunt, et plane obliuiscuntur, illos esse ex se natos.

2. Quia et infantes simili adpetitu tenentur, etiamsi non ratione vtuntur. Adeoque potest in brutis esse impetus sine voluntate, quia et in infante est, qui clamat, si ab hominibus solus relinquitur.

3. Quia destituuntur praecipue instrumento societatis, nempe sermone vel oratione. Nam quia homines desiderio societatis tenentur, de medio cogitarunt hanc societatem tuendi. Hinc inueniunt sermonem, quo sibi inuicem sensa animi communicarent, et quo non esset opus, nisi vivere cuperemus socialiter. Quum ergo bruta, tametsi iisdem instructa organo, tamen non sermocinentur, nec desiderio societatis ea teneri patet, sed solo impetu ad societatem aliquam ferri. Conf. *de oratione societatis conciliatrice* Cic. *de legib. lib. 1. cap. 9.*

§. 8.

Ex hoc primo argumento colligit Grotius principium iuris naturae et gentium esse SOCIALITATEM.

Itaque ea in re convenit Grotius cum Hobbesio et Pufendorfio. Omnes enim hi auctores ius naturae et gentium deriuant ex principio socialitatis. Posito enim homine, qui mecum in societate vivit, ponitur ius. Sed in eo differunt hi auctores, quod quisque eorum principium hoc diversis fundamentis inaedificat. Secundum Grotium enim socialiter est vivendum, quia id congruit naturae humanae, et naturali eius desiderio: secundum Hobbesium vivendum est

est socialiter, quia alias nasceretur bellum omnium in omnes. Secundum Pufendorffium socialiter est viuendum, quia ita iussit Deus. Ita facile conciliabimus diuersa horum auctorum principia.

At reieciimus iam hoc principium socialitatis in *Praelectionibus Pufendorffianis*, quia quidem verum est, et euidens, sed non adaequatum, idque tum inde probauimus, quia officia erga Deum et se ipsum ex societate non fluant, ad quae quippe praestanda obstricti sumus, tametsi soli essemus in hoc mundo. An itaque et hic reiciemus Grotii doctrinam?

Resp. in Grotio laudandum esse, quod culpauimus in Pufendorffio. Et, ne id mirum videatur, rationem statim reddemus. Pufendorffius tractat ius naturae et gentium. Ad ius naturae etiam officia erga Deum et proximum pertinent, quae quum ex societate non fluant, principium eius est inadaequatum, adeoque reiiciendum. At Grotius non tam ius naturae tractat, quam ius gentium; iura belli et pacis. Haec vero omnia omnino societatem humanam supponunt, adeoque eius principium est adaequatum.

Paucissimi hoc recte capiunt; et hinc, quia audiunt a tot auctoribus principium Pufendorffianum reiici, statim existimant, eodem modo reiiciendum esse principium Grotii: quos tamen toto caelo errare iam vidimus.

Ex hac ergo societate omnia iura hominum aduersus homines fluunt. Posito enim, me societatem inire cum contubernali: statim sequetur, 1. vt abstinere debeam ab eius rebus, 2. vt, si damnum ei fecerim, restituam, 3. vt pactum, quod cum eo ini, seruem, 4. vt eum feram, nec illi vllam faciam iniuriam. Si quid horum omitto, societas dissoluitur. Idem in maioribus societatibus, veluti ciuili, immo in maxima illa societate generis humani obtinet.

§. 9.

Haftenus primum Grotii argumentum, quo existentiam iuris naturae et gentium probat, sequitur alterum:

Quicumque instructus est iudicio et delectu boni et mali, is et iure aliquo obstringitur.

Homo huiusmodi iudicio et delectu instructus est.

Obstringitur ergo iure.

Consequenter maioris propositionis haec est. Deus nihil fecit frustra. Dum ergo hominem eo iudicio instruxit, vt possit bonum et malum,

Heineccii Prael. Grot.

B

lum,

lum, non solum physicum, sed et morale, discernere, et ea voluntate, quae in bonum fertur, et malum auerfatur; procul dubio voluit, vt bonum faciat, malum fugiat, non vt illud imitetur Medae,

*Video meliora proboque,
Deteriora sequor.*

Si Deus hoc voluit, peccat, dñm id non facit. Si peccat, iniustus est, si iniustus est; etiam ius esse debet. Ergo est ius.

Possumus ex eodem fundamento ita ratiocinari. Deus nos instruxit iudicio et delectu boni et mali. Ergo voluit, vt nobis bene, non male, sit. Ergo possumus malum omne a nobis amoliri. Ergo nemini ex voluntate Dei fas est, nobis malum inferre. Ergo et nobis nefas est, aliis inferre malum. Ergo est ius.

Minor propositio denuo nititur conscientia cuiusque, et experientia. Ratione enim homo instructus est et iudicio, clarissimam et distinctissimam habet ideam boni et mali. Bonum est, quod durationem nostram promouet; malum, quod nos destruit. Experientia et ratiocinatio illum quotidie docet, quid hominis durationem conferuet, quidue eundem destruat. Ergo gaudet iudicio et delectu boni et mali.

Hoc argumentum post Grotium praecipue vrget doctissimus Anglus, RICHARDVS CUMBERLANDVS *de legibus naturae, cap. 2. §. 4.* vbi simul docet, has praeclaras facultates, homini concessas, nihil aliud fore, quam gladium in manu furiosi, nisi accederet ius, quod illas dirigit.

§. 10.

Duobus his argumentis Grotius probauit dari ius naturae proprie dictum, quod alias ius perfectum, item iustitia expletrix vocatur: iam demonstrat etiam dari ius imperfectum, vel iustitiam attributricem. En tertium argumentum:

Si discrimen est boni et perfectionis maioris et minoris, est etiam naturale aliquod iurium discrimen.

Verum est prius.

Ergo et posterius.

Iustitia enim attributrix respicit ad meritum vel indigentiam personae. Prout illud vel haec maius minusue est, ita et iura differunt.

runt. E. g. maius bonum nobis sunt parentes, quam alii conciu-
ues; ergo iis plus debemus obsequii et honoris, quam illis. Maior
est perfectio hominis docti, quam indocti. Ergo illi plus praemio-
rum debetur, quam huic. Quum itaque ea facultate instructi si-
mus, ut possimus discernere, quid altero sit melius et perfectius,
vel peius et imperfectius, sequitur, ut et iure aliquo obligemur
singulis tribuendi, quod eorum perfectiones et qualitates exigunt.

§. II.

Sequitur quantum argumentum, quod tamen omnium primum
esse debuisset. Argumentatur enim:

*Si omnes agnoscimus Deum aliquem, sequitur, ut et eius prae-
ceptis parere sentiamur.*

Si praeceptis eius tenemur, obligamur.

Si obligamur, etiam ius aliquod est, quod nos obligat.

Meretur totus §. ponderari, ex quo sequentes quaestiones fluunt:

1. An recte dixerit Grotius, ius aliquod fore, si vel maxime
non sit Deus?

2. Vnde sciamus, nos praeceptis diuinis obligari?

3. Quomodo ad notitiam horum praeceptorum perueniamus?

1. Quod ad quaestionem primam attinet: non solus Grotius
ita loquitur, sed et scholastici omnes, qui miro consensu docent,
ius naturae fore, etiamsi non sit Deus, vel aliquid iustum esse an-
tecedenter ad Deum.

Dicunt enim 1. ipsam rectam rationem docere, societatem
humanam consistere non posse, si unicuique liceret furari, adulte-
ria committere, occidere. Hinc etsi Deus numquam dixisset: ne
furare, ne occidere, tamen vnumquemque, qui rationem sequi velit,
secum cogitaturum, sibi ab his facinoribus abstinendum esse. Ex
quo sequi putant, ut ius aliquod futurum esset, etsi non esset
Deus.

2. Idem probant experientia. Nam si consideremus atheos in
re publica viuentes, ii plerumque ciuilitate boni sunt, et id de ple-
risque atheis ostendere conatus est BAILLVS in *Dictionario historico
et critico* sub articulis: *Spinoza*, *Zenon*, et aliis. Cur vero? quia
ratio eos docet abstinendum esse ab his criminibus, etsi non esset
Deus. Inprimis vrgeri posset exemplum Sinensium. Maximi hi
sunt Spinozistae, nihilque eorum philosophia differt a dogmatibus

Spinozae : et tamen LEIBNITIVS in *praefatione nouissimis Sinicis* praemissa docet, non esse ullam gentem iustitiae studiosiorem Sinenſi. Quis itaque dubitet, iuri naturali locum fore, etiamſi non ſit Deus ?

Sed falſiſſima nihilominus haec eſt doctrina. Nullum enim ius eſt ſine obligatione, nulla obligatio ſine lege, nulla lex ſine legiſlatore. Si ergo ponamus, non eſſe Deum, nec legiſlator eſſet, nec lex, nec obligatio : adeoque nec ius.

Ad argumenta in contrarium allata facile poteſt reſponderi. Obligatio vel proprie ſumitur, vel improprie. Proprie accepta eſt iuris vinculum, quo a ſuperiore obſtringor ad aliquid faciendum, vel omittendum. Et huius effectus eſt ius. Qui enim obligationi ſuae non ſatiſfacit, iniuſtus vocatur, et poena aſſicitur.

Improprie vero obligari dicimur, quoties nos proprii commodi contemplatione ad aliquid faciendum vel omittendum ferimur. Et huius effectus non eſt ius, ſed prudentia. Qui enim nec id facit, quod ſibi vtile fore animaduertit, iſ imprudens, non iniuſtus dicitur, nec poena aſſicitur, ſed damnum ſua culpa ſentit.

Res exemplo fiet clarior. Miles obligatus eſt parere duci ſuo. Id legiſlator iubet : niſi illi pareat, tamquam iniuſtus punitur. Eſt ergo haec obligatio propria. At et aegrotus exſtinat ſe obſtriſtum eſſe, vt pareat medico. Nulla lex id iubet, ſed propria vilitas ſuadet. Si non pareat, non iniuſtus habetur, ſed imprudens. Nec punitur, ſed damnum ſentit.

Iam facile patet, cur et vtilitas publica iſſis atheis perſuadeat, vt vitent grauiora facinora. Non haec obligatio propria eſt, ſed impropria, non omittunt peccata, ne contra ius peccent, ſed ne damnum patiantur. Itaque ſi Deus non eſſet, poſſet quidem contingere, vt homines ea facerent, quae ius naturae iubet, ſed non ea facerent, vt iuri naturae pareant, ſed vt proprio commodo veſſicentur.

II. Quaestio ſecunda eſt, vnde intelligamus, nos eſſe obſtriſtos, vt Deo pareamus ? Reſp. ex dependentia noſtra. Contemplantur enim nos iſſos, animaduertimus, 1. nos non eſſe a nobis iſſis, quia nihil a ſe iſſo eſt, niſi quod aeternum eſt : 2. Deum non ſolum exiſtentiam nobis dediſſe, ſed et illam conſeruare, quum ne per momentum quidem iſſi durationem noſtram continuare poſſumus.

Quum

Quum ergo Deus et existentiam nobis dederit, et eam conseruet: sequitur sane, ut et eius voluntati parere teneamur. Nam is, a quo dependemus, est superior. Qui superior est, inferiori potest leges praescribere. Qui leges praescribere potest, ei parere tenemur. Itaque Deo parere tenemur.

§. 12.

III. Sed vnde intelligimus hanc voluntatem Dei? Tertia haec est quaestio, paucis expedienda.

Resp. Deum posse bifariam voluntatem suam promulgare: vel per rationem, vel per reuelationem.

Per rationem, quoties ratiocinando adsequi possumus, quid Deus velit fieri; e. g. nos non debere occidere, debere contra pacta seruire, cet. Per reuelationem, quoties ratiocinando id sane non possumus, sed ex verbo quodam diuino vel ore prolato, vel scripto. Sic ratiocinando numquam intellexisset Abrahamus, sibi opus esse circumcisione, nisi Deus id ei reuelasset. Nec hodie possemus intelligere, Christianos esse baptizandos, nisi S. S. id doceret.

Ex eo sequitur, ius diuinum duplex esse, naturale, et voluntarium.

Naturale, quod ex ratione addisci posset; etiam si non existeret decalogus, vel S. S. e. g. non esse occidendum.

Voluntarium, quod non nisi ex reuelatione addisci potest, veluti leges V. T. de sacrificiis, et quae hodiernum obtinent leges de gradibus consanguinitatis et affinitatis prohibitis.

Quod vero ius naturale ex ratione intelligi possit, ius voluntarium intelligi non possit, id exinde est; quod illud naturalem connexionem habet cum natura humana, hoc non habet. Conf. de hac distinctione infra *lib. I. cap. 1. §. 13.*

Notetur falsa deriuatio vocabuli *IVS* sub finem paragraphi proposita. Non enim ius dicitur a *Ioue*, sed a *iubendo*. A iubendo est *iustum*, a iusso, *iur.* Vid. *ГРОМОВ. Not. ad h. §.*

§. 13.

Docet ea occasione Grotius, cur Deus leges suas naturales, quae iam ex ratione innotescunt, reuelatione veluti de nouo promulgarit, e. g. in decalogo?

B 3

Factum

- Factum id est, 1. quia non omnes homines ea ratiocinandi facultate pollent, vt possint sine reuelatione speciales quasvis leges scire.
2. Quia adfectus saepe abripiunt homines, vt non ratiocinentur, e. g. dum libido hominem vrit, parum ratiocinatur; iustum iniustumue sit quod agat, sed commisso demum delicto, tum conscientia ratiocinari incipit.

§. 14.

Vt ad ius naturale redeamus: quomodo id ex recta ratione iam satis innotescat, magnum tamen robur ei ex historia sacra accedere ait. Ea enim docet nos, ab iisdem omnes primis parentibus descendere. Ex hoc vero sequitur, 1. vt cognatio quaedam sit inter homines omnes, 2. vt socialiter viuere debeant, 3. vt omnes se agnoscant aequales, 4. vt nemo alterum laedere debeat, cct.

Sed hoc argumentum inter Christianos tantum robore quodam pollet, vnde magis illustrat, quam probat.

§. 15.

Sed superest vltima quaestio, quae occasione huius argumenti tertii tractatur: quid opus sit iure ciuili, quum habeamus ius naturae et gentium ab ipso Deo datum, et vnde oriatur ius ciuile?

I. Necessarium fuit ius ciuile, 1. quia naturale caret medio cogendi et coercendi. Vetat e. g. homicidia, sed non addit, supplicio affectum iri, qui occiderit. 2. Quia in societate humana multi sunt actus indifferentes, qui ob communem rei publicae salutem restringendi sunt, sic e. g. venari, piscari, donare, testari, sunt actus indifferentes, in se nec boni, nec mali. Sed interest tamen societatis ciuilis, ne omnes promiscue venentur, piscentur, ne pro lubitu donent, legent, testentur. Ergo opus fuit legibus ciuilibus.

II. Vnde vero leges ciuiles originem habent? Ex pactis, respondet Grotius. Homines enim in statu et libertate naturali viuentes non potuere aliter in res publicas coalescere, quam per pacta. Pacti enim primo sunt, se rem publicam constituturos: pacti sunt, se hac vel illa imperandi forma vti velle: pacti denique, se huic vel monarchiae vel concilio se voluntates suas submissuros. Ex eo ergo pacto nascitur obligatio, et iuri ciuili parendi. Et

catenus

eatenus recte veteres definiere, legem esse communem spon-
sionem ciuitatis. *l. 1. et 2. D. de legib.*

§. 16. 17.

Sequuntur quintum et sextum argumentum, quibus demonstra-
tur, ius aliquod esse, quorum alterum ab indigentia humana, al-
terum a relatione gentium inter se desumitur.

I. Ex indigentia humana ita argumentamur :

*Si Deus nos voluit esse multarum rerum indigos, sequitur, ut
voluerit hominem homini subuenire.*

At homo homini sine iure quodam cogente non subueniret.

Ergo voluit esse ius quoddam.

Consideremus infantes : quam indigi sunt auxilii humani ? et quis
infans ad iustam aetatem perueniret, nisi essent, qui iis victum,
amictum, et reliqua necessaria suppeditarent ? Quis autem suppe-
ditaret, nisi ius cogeret parentes, propinquos, tutores ? Ergo
Deus, qui non voluit infantes perire, omnino ius aliquod consti-
tuit, eoque certas personas obligauit, ut eis subuenirent. Ergo
est aliquod ius.

II. Ex relatione gentium inter se argumentamur :

*Si gens sine gente subsistere non potest, sequitur, ut inter eas
ius sit commune.*

At verum est prius.

Ergo et posterius.

Gentem sine gente subsistere non posse, probat experientia. Opus
enim est commerciis, quibus vnius indigentia alterius copiis sup-
pleatur. Opus est auxilio gentium aduersus adgressores, opus est
foederibus, legationibus, cet. Atqui haec omnia non essent, nisi
communi aliquo iure continerentur. Ergo est ius gentium omni-
bus commune, adeoque datur ius aliquod naturale. Conf. §. 2.
*Inst. de iur. nat. gent. et cin. verb. ius autem gentium omni humano
generi, cet.*

Sed an a iure gentium recte argumentari licet ad ius naturae ?
Licet omnino. Nam *ius gentium* proprie nihil aliud est, quam ius
naturae negotiis gentium adplicatum. Adeoque non sunt diuersa
iura, sed vnum idemque, quod a diuersis obiectis, quibus adplica-
tur, diuersa nomina sortitur.

§. 18.

§. 18.

Antequam ad vltiora progrediatur auctor, duas obiectiones euertit, quarum altera est CARNEADIS, altera HORATII.

CARNEADES stultitiam dixerat iustitiam, idque ita probauerat. Stultus est, qui vtilitatem suam negligit, et alii potius, quam sibi prodest. Atqui, qui iustitiam colit, propriam vtilitatem negligit, aliisque potius, quam sibi prodest. Ergo, qui iustitiam colit, stultus est.

Minoris veritas in oculos incurere videtur. Nam e. g. iustus, etiam si altero pauperior sit, tamen non furatur, dum iustitiae causa a furto abstinet, propriam vtilitatem negligit, et alteri potius, quam sibi prodest. Et hinc Carneadi stultus videtur.

Sed resp. 1. distinguendum esse inter vtilitatem veram et adparentem. Qui furatur, non veram, sed apparentem vtilitatem secutatur. Quae enim haec est vtilitas, aliquot numis fieri ditiores, et eo ipso amittere bonam existimationem, excidere hominum consortio, omnis fidei et securitatis iacturam facere? Deinde 2. distinguendum inter vtilitatem praesentem et futuram. Qui enim iustitiam colit, vtut praesentem vtilitatem negligat, eo ipso tamen in futurum sibi consulit, dum tranquilli animi est, dum non metuitur, sed amatur, dum nec alios metuere tenetur. Ergo negamus, eum, qui iustitiam colit, vtilitatem propriam negligere.

§. 19.

Altera obiectio est HORATII ex *Sermon. lib. I. sat. 3.* Eius sunt verba:

Iura inuenta metu iniusti, fateare necesse est.

Existimat itaque Horatius, ius non tam ideo inuentum esse, quod aliquid sua natura iustum iniustumue sit, sed ex metu hominum iniquorum. E. g. adulterium non ideo prohibitum, quod id rationi vel naturae humanae repugnet, sed quod metuerint homines, ne parum tuta futura sint matrimonia, nisi prohiberentur. Quaeritur itaque, an haec sententia sit admittenda?

1. Distinguit Grotius inter ea inilituta, quae connexionem cum natura humana habent, et quae ad executionem iuris reperta sint. Priora non praecipuntur aut prohibentur, ob metum iniuriae; sed quia sua natura iusta vel iniusta sunt, vt, pacta esse seruanda, neminem laedendum. At posterora omnino ex metu reperta,

perta, e. g. ne quis armatus ad iudicium veniat, ne milites vigiliis deferant.

2. Sed magis perspicuae huius thesae falsitas potest demonstrari inde, quod quaedam iura locum haberent, etiamsi nulli alii essent homines, e. g. hominem teneri colere Deum, hominem debere se ipsum conservare. Sane haec iura ex metu non possunt esse profecta, quia locum etiam haberent, etiamsi nullus esset in mundo homo, quem metuas.

§. 20.

Reliquum est septimum argumentum, quo demonstratur, esse aliquod ius naturae, quod Grotius ex conscientia humana petit. Ita enim ratiocinatur:

Si sunt morsus conscientiae in male agentibus, tranquilla contra conscientiam in probis, sequitur, ut sit aliquod ius omnibus hominibus commune.

At verum est prius.

Ergo et posterius.

Antecedens tam certum est, quam quod certissimum. Neque enim experientia nos ignorare patitur, tranquillum esse animum, recti sibi conscium, contra laniatus sentire, qui male egit. Et hae furiae ita saepe agitant maleficos, ut malint sibi manus inferre violentas, quam ista tormenta persentiscere.

Consequentia autem paullo adcuratius demonstranda. Eam demonstramus ex ipsa definitione conscientiae. Conscientia est ratiocinatio vel syllogismus de nostris actionibus, quo ad liquidum perducere conamur, iustae an iniustae sint. Si ergo homines natura ratiocinantur de actionibus, iustae an iniustae sint, oportet aliquod ius esse. Nam hoc nisi esset, nihil vel iustum vel iniustum posset adpellari.

Sed obiciunt athei, inprimis TOLANDVS in *Tiro Linio* vel tractatu *de superstitione*: conscientiae morsus non tam ex consideratione iuris naturalis proficisci, quam ex iure civili, ex metu nimium poenae. Nam homicidam non ideo angere, et stimulis conscientiae lauciari, quod hominem occiderit, sed quod sciat, hunc micis imminere supplicium capitale.

Sed resp. id falsum esse, idque inde probamus, quod illos conscientiae stimulos et ii persentiscant, qui non possunt metuer

Heineccii Prael. Grot.

C

uppli.

supplicium, e. g. summi imperantes. Exemplum est in Nerone apud SYETON. in *Neron. cap. 34.* Accedit, quod conscientiae tormenta et illi senserunt, quorum facinora non poena, sed praemia manebant. Sic Iudae, Christo tradito, non vlla imminabat poena, sed praemia amplissima. Et tamen tam saeuos conscientiae cruciatus perferibat, vt suspensio vitam finire mallet, quam diutius ferre conscientiae morsus.

Quis ergo ius esse negauerit, ab ipsa conscientia conuictus? Conf. WESTENBERG. *de causis obligat. Diss. II. §. 2. seqq.* vbi hoc argumentum vterius persequitur.

§. 21.

Finita hac demonstratione aliquot consectaria inde elicit Grotius, quibus insignem iuris vtilitatem demonstrat.

Plerique homines optime sibi consultum fore existimant, si sine lege essent, sine iure viuerent. Hinc iura et leges vulgo odio habentur. Sed contrarium probat auctor.

1. Quia nemo sine iure securus esset. Nullum est animal magis improbum homine, qui ambitione, avaritia, libidine in quaeuis praecipitia rapitur. Huic impotenti hominis libidini frenum nulla alia re iniicitur, quam iure. Sine iure et lege vita piscium viueretur, maior deuoraret minorem. Conf. versus elegantes HESIODI, quos auctor infra adfert *lib. I. cap. I. §. 11. 1.*

§. 22. 23.

2. Quia nec gentes sine iure securae essent. Quamuis enim gens sit potentissima, et opulentissima, carere tamen non potest commerciis et foederibus. Haec vero nulla essent sine iure.

3. Quia ne societas quidem humana sine iure subsisteret. Societas enim omnis per pacta coalescit. Pacta vero essent frustranea, nisi ius esset, quod pacta seruari iuberet. Hinc Grotius ad hunc §. eleganter obseruat ex Aristotele, quod nos supra ex Cicerone obseruauimus, ne latronum quidem societatem sine iure posse contineri. Quanto minus societas totius humani generis?

§. 24.

4. Quia nec pax securae esset sine iure. Pax enim est pactum: nulla autem pacti sine iure esset obligatio.

Elegans

Elegans est apophthegma, quod hac §. refert Grotius, quidam rex Spartanorum dixerat, beatissimam esse rem publicam, cuius fines hasta et gladio terminarentur, id est, quae quam latissime circumferret arma victoricia. Pompeius id corrigens dicebat, beatissimam esse rem publicam, quae iustitiam pro finibus habeat. Et recte. Nam

1. Arma sine iustitia sunt latrocinium.
2. Fortitudo nulla est sine iustitia : is enim est fortis ; qui pro aequitate pugnat.
3. Res publica quae arma iniusta expedit, omnibus exosa est.

§. 25. 26. 27.

Diximus supra ad §. 3. 4. 5. auctori nostro rem esse cum duorum generum hominibus. Alios enim negasse, ius aliquod esse : alios id concessisse quidem, sed negasse tamen, ius belli esse. Quum itaque priorem errorem iam satis profligarit Grotius : interesse sua existimat, etiam posteriorem refellere, quia alias absurde scripsisset IVS BELLII ET PACIS, nisi ius aliquod in bello esset.

Quinam auctores ius in bello negent, iam supra vidimus §. 3. 4. quae hic conferri possunt. Eos errare his argumentis demonstramus.

1. Quia bellum est loco iudiciorum. Duo enim sunt status hominum, naturalis et civilis : ille inter hos, qui non subsunt communi imperio, hic inter eos, qui sub vno imperio viuunt. In statu civili controuersiae a iudice iure definiuntur : in statu naturali iudex nullus est, ergo opus est bello, adeoque bellum est loco iudiciorum. Quemadmodum vero norma iudiciorum ius est, ita nec bellum sine iure intelligitur. Hinc Alexander M. quum omnibus promiscue bellum inferret, non quod iusta belli causa esset, sed quod utile putaret, gentes subiugare : dictus est a Scythis *latro generis humani*.

Obiicere quis posset vulgatum illud : *silent leges inter arma* : nec non illud Pompeii, qui a Mamertinis legatis ex legibus conuictus : *armatus*, inquit, *leges ut cogitem* ? PLVTARCHVS in *Vita Pompeii*. Sed respondetur

1. Silere in bello leges civiles, non naturales. Nam e. g. omnino absurdum esset, si hostis putet, se aduersus hostem iniungere posse actionem legis Aquilliae, quod ille sibi damnum intulerit :

rit : at nihilominus recte dicitur hostem peccare aduersus ius naturae, si virgines confupret, infantes animi caussa occidat, homines multis cruciatibus adficiat. Hae leges iuris naturae non silent inter arma.

2. Quia et in bello conscientia docet aliquod ius esse. Nam milites conscientia iustae causae fortius pugnant, ciues libentius conferunt sumtus belli : hostes contra sceleris sibi conscii plerumque facilius despondent animum. Hinc Atheniensium fortitudo in bello Marathonio. Vid. CORN. NEP. in *Vit. Miltiad.* Hinc Iugurthae metus in bello aduersus Romanos, de quo Sallustius refert; eum nec in duce, nec in milite habuisse fiduciam, ac omnia tuta metuisse. Si ergo tanta conscientiae vis etiam in bello est : sequitur sane, vt et belli aliquod ius sit. Nam paullo ante probauimus, ex conscientia humana demonstrari posse existentiam iuris naturae.

§. 28. 29.

Hactenus pars generalis : sequitur specialis, in qua auctor exponit,

1. *Consilium suum*, §. 28-31.

2. *Partitionem operis*, §. 32-35.

3. *Eius necessitatem*, §. 36-38.

4. *Subsidia, quibus usus*, §. 39-55.

5. *Leges quasdam, quas sibi in toto opere dixit*. §. 56. *ad fin.*

1. Consilium suum auctor exponit hac §. 28. Ait enim, se expositurum esse ius inter populos commune, quod et ad bella, et in bellis valeat. Quod nullum aliud est, quam ius gentium, id est, ius naturae diuersis gentium negotiis adplicatum. Vnde facile animaduertimus, quid intersit inter Grotium et reliquos scriptores iuris naturae.

PVFENDORFFIUS non modo ius gentium tractat, sed et ius naturae. Nam et hominum, et ciuium officia erga Deum, se ipsos, et proximum late exsequitur. Idem consilium est HOBBSII in libello *de ciue*, et in *Leuiathane*. Sed Grotius potissimum tractat iura belli et pacis, id est, iura gentium.

Equidem multa hinc inde occurrunt, quae ad ius naturae pertinent, veluti *lib. II. a cap. 2-17.* de acquisitione rerum, de contractibus, de promissis, et praecipue de iureiurando. Sed haec omnia Grotius non tractat tamquam negotia hominum et ciuium, sed tamquam negotia gentium.

Cetez

Ceterum consilii sui scribendi ius gentium duas causas allegat Grotius, quarum prior his §§. posterior duabus sequentibus tractatur.

Prima est, quod circa bellum duas esse animaduerterit plane contrarias sententias. Nimirum

1. Alii peccant in excessu, ut omne ius in bello cessare existiment partim in eo suscipiendo, partim in eodem gerendo.

2. Alii in defectu, ut omne bellum iniustum putent, et Christianis indignum. Eius sententiae patroni fuere olim TERTULLIANVS in libro *de resurrectione carnis*, IOANNES FERVS, monachus Franciscanus saeculi decimi sexti, vir admodum moderatus in *Commentariis ad SS. paene omnis*, ERASMVS ROTTERODAMVS in *Militie Christianae*, et ex ipsis commentatoribus Grotii Io. a FELDE in *notis ad b. §. ubi absurde vir ille argumentatur, quia ius naturae inter homines magis exigit iudicia, quam bella, multo minus inter se bella gerere debere Christianos, quasi in statu naturali locum habeant iudicia.*

Quum itaque utraque sententia falsa sit, Grotius dicit, se medicinam utrisque voluisse adhibere, tum ne nihil, tum ne omnia licere crederentur. Adeoque egregie defendit, licere bellum gerere, sed et praeclare docet, in bello non promiscue omnia licere.

§. 30. 31.

Altera causa, quae Grotio persuasit, ut huic operi manum admoeret, haec erat, ut iuris prudentiae etiam exsul consulere.

1. Notum est, iuris prudentiam constare ex iure naturali, gentium, et civili. l. 1. §. 2. *D. de instit. et iur.* Itaque non potest non egregie consulere iuris prudentiae, qui haec confusa digerit, et naturalia, et gentium iura a reliquis seiungit. Ita enim, quae certa sint, quae immutabilia, quae ubique eadem facile addiscere licet.

2. Ex iure naturae pleraeque fluunt etiam civilium iurum rationes. Quae utilitas denuo egregia est. Sic e. g. tota lex Rhodia de iactu, et maxima pars doctrinae de quasi contractibus ad ius quidem civile pertinet, sed ratio tamen eius iuris repetenda est ex iure naturae, quod docet, neminem debere cum alterius damno locupletari.

3. Inprimis egregie Grotius consuluit iuri publico vniuersali. Id enim quum ante Grotium paene ignoraretur, eius opera primum caput exseruit tenebris. Hinc vere dici potest, Grotium plus iuris prudentiae profuisse, quam centum leguleios vel rabulas, qui magna commentariorum, systematum, decisionum volumina reliquerunt.

Ceterum quod Grotius §. 31. optat, vt plures singularibus materiis huius iuris manum admouerent, id postea contigit. Nam

1. *De iure circa sermonem* scripsit VFFELMANNVS tractatum plane incomparabilem.
2. *De iuribus maiestatis* CASP. ZIEGLERVS, cuius liber omnibus eruditis in deliciis est.
3. *De iudicio officio* idem edidit libellum egregium, quem vocat *Dicaſticon*.
4. *De legatis* multa praeclare collegerunt WICQVEFORT et MARSELAER.
5. *De foederum iure* WAHRMUND ab EHRENBURG in *Meditamentis*.

Alios huius generis auctores infra suo loco passim laudabimus.

§. 32-35.

II. Sequitur iam operis totius partitio, quam hoc versiculo complecti solent interpretes.

Quid bellum? belli causae? quae iuraque belli?

Habemus tres libros Grotii. Nam

Libro primo agit de bello generatim, et quaerit, quid bellum sit? an liceat gerere bellum? quid bellum publicum et priuatum? et denique qui bellum gerere possint?

Libro II. de belli causis, quales sunt ex mente Grotii 1. defensio rerum nostrarum, *cap. 1.* 2. exactio eius, quod nostrum est, vel reparatio iniuriae, *cap. 2-15.* 3. poena. *cap. 16. ad fin.*

Libro III. de iuribus belli 1. in laedendo hoste *cap. 1-5.* 2. in acquirendo res hostiles *cap. 6-18.* 3. in pactis cum hoste initis. *cap. 19. fin.*

§. 36.

III. Necessitatem huius scriptionis suae inde demonstrat Grotius, quod huius modi opus nec a recentiore compositum, quod suis numeris absolutum sit. ARISTOTELIS enim liber *de iure belli* perit.

periit. CICERONIS liber *de officiis* magis ad iura priuata, quam publica pertinet. AMBROSII libellus *de officiis* magis catechesin aliquam refert, quam opus politicum. Quin LVD. ELLIES du PIN dans la *Bibliothèque des Auteurs ecclésiastiques* obseruat, in codicibus mss. hunc libellum inscribi *de officiis clericorum*.

Optat Grotius, veterum Christianorum aliquem huius modi quid scripsisse, patrem nimirum aliquem ecclesiasticum. Sed, si video quid video, parum vtilitatis ex huius modi scriptione caperemus. Nam 1. patres ecclesiae tantum non omnes fere expertes fuisse principiorum moralium, egregie docuit BARBEYRACIUS in *praefatione Pufendorffio praemissa*, §. 9. pag. 22. 2. Eosdem plane ignaros fuisse rerum ciuiliū, res ipsa docet.

Vnde nec multum iuuant caluistae. Qui enim casus conscientiae definiunt, id faciunt ex S. S. Iura vero belli non modo ex S. S. sed et praecipue ex recta ratione et principiis moralibus petenda. Vnde omnino necessarium fuit huius modi opus, cui solus par erat Grotius.

§. 37 - 38.

Ex recentioribus quibusdam de belli iure scripserunt theologi aequae ac Icti, quos recenset §. 37.

FRANC. de VICTORIA, theol. Hispanus, Salamanticae professor, scripsit librum *de Indis et iure belli*, vbi disceptat, an iure Indis occidentalibus bellum intulerint Hispani? Sed facile patet, quam egregium quid ea in re potuerit ab Hispano homine expectari?

Similia sunt scripta HENR. GOCICHEMI, WILH. MATTHAEI et IO. CARTHAGENA, pontificiorum theologorum, qui iura belli ex falsissimis theologiae scholasticae et iuris canonici principiis explicant: quemadmodum IO. LVPVS, FR. ARIVS, IO. de LIGNANO, et MART. LAVDENSIS Icti ex iure ciuili et legibus Corporis iuris. Hinc absurdissimas conclusiones defendunt, e. g. potuisse Hispanos Americanis bellum inferre, quia fuerint Barbari, ethnici, *ἀθέμιτοι*. Posse Christianos Turcis bellum perpetuum inferre, quod sint infideles, et sepulcrum sanctum possideant. Iustum fuisse bellum Hispanorum cum Elisabetha, Angliae regina, quia fuerit haeretica. Quid ab hisce hominibus sani expectandum? Durior procul dubio fuisset auctoris censura, nisi in Gallia inter pontificios scripsisset. Sed sic modelle eos notat ex duabus tantum causis:

1. Quod

1. Quod confuderint iura naturae, gentium, ciuilia, et canones.

2. Quod lumine historiarum caruerint. Hinc reliquis scriptoribus praefert tres Ictos,

a) PETRUM FABRVM, Cuiacii discipulum, sed in Graecis doctiorem ipso magistro, cuius egregia plane exstant *Semestria*, quae, libris III. constant. Est opus miscellaneum, sed in quo plura iuris gentium, publici, et priuati capita praeclare illustrauit.

b) BALTH. AYALAM, Antwerpensem, et postremo in suprema Mechliniae curia senatorem, qui obiit 1584. Scripsit librum *de iure, officiis bellicis, ac militari disciplina*. Nam ipse aliquamdiu practorem vel iudicem bellicum egerat in exercitu Hispanorum. Vid. FRANC. SWERTII *Athenas Belgicas*.

c) ALBER. GENTILEM, cuius exstant *Aduocatus Hispanicus*, libellus *de iure maris*, et alia. Sed in his tamen haud pauca desiderantur. P. Faber non scripsit iustum systema, sed hinc inde quasdam materias illustrauit: Balth. Ayala non egit de causis belli iustis: Alb. Gentilis nec ordinem seruat, nec iura naturalia et positia discernit, nec omnes quaestiones tractat, et magis exemplis et auctoritatibus nititur, quam rationibus. Vnde hi non obistere potuerunt Grotio, de iure belli et pacis scripturo.

§. 39.

Postquam, quid sibi consilii sit, explicauit auctor, quaestio sequitur, ex quibus fontibus Grotius ius naturae et gentium deduxerit? Resp. ex rationibus et principiis huius modi, quae non magis possunt in dubium vocari, quam quae sensibus percipiuntur, e. g. triangulum includi tribus lineis.

Est hoc ipsum principium: *socialiter est viuendum*, de quo §. 8. Ex hoc enim per iustam ratiocinationem omnes deinde fluunt doctrinae reliquae. Quum itaque socialitatis desiderium omnium peccatoribus tam alte insideat: facile patet, cur ius naturae dicatur omnium cordibus inscriptum. *Rom. 2.* non actu, quasi haec omnia nobiscum nascantur: sed potentia, quia hoc principium tam clarum est, ut, nisi obbrutescat homo, is statim conclusiones omnes peruidere possit quam facillime. Non nasci nobiscum ius naturae, demonstratur 1. exemplo infantum, 2. ex natura embryonis, qui nec respirat in utero materno, nec cogitat, 3. exemplo eorum, qui ita obbrutescunt, ut plane negare audeant principia iuris naturae, e. g. adulteria, furta non esse peccata.

§. 40. 41.

§. 40. 41.

Et hoc in principio adquiescere debuisset Grotius. Sed praeter socialitatem et testimoniiis philosophorum, historicorum, poetarum, et oratorum ius gentium probari posse putat. Dicit enim ius gentium esse ius a multis gentibus receptum. Quid a multis gentibus receptum sit, ex his auctorum testimoniis liquere; ergo ex his auctorum testimoniis liquere ius gentium.

Sed hoc in Grotio permulti reprehenderunt, et maxime ipse Pufendorffius. Nam

1. Non recte definitur ius gentium, quod apud multas gentes receptum sit, sed quod naturalis ratio inter omnes peraeque gentes constituit. Illud pertinet ad mores gentium; hoc ad ius gentium.

2. Mores quidem gentium probari possunt ex testimonio auctorum: sed non ius gentium, quod naturalem rationem habet. Illa quaestio est facti, quae testimoniis probatur, haec iuris, quae rationibus soluitur.

3. Falsum est, quod ubi multi diuersis temporibus ac locis idem pro certo adfirmant, id ad causam vniuersalem referri debeat, id est, ad rectam illationem, ex naturae principiis procedentem, uti auctor loquitur §. 40. Nam sic et idololatria, et *maladitae* referri deberet ad ius naturae et gentium quam multi diuersis temporibus ac locis defendunt.

Improbanda itaque haec methodus Grotii, quod ius gentium e testimoniis veterum arcessit. Testimonia enim veterum non probant, sed illustrant. Et hinc quod §. 41. promittit, non praestat. Promittit enim,

1. Se accurate distinguere ius naturae et gentium: sed non distinguit. Ius enim naturae ipsi est, quod ex ratione fluit, ius gentium, quod ex libera gentium voluntate. Quod falsum. Iam supra enim docuimus, non dari ius gentium a iure naturae diuersum; nec haec iura aliter differre, quam adplicatione. Quod tam luculenter docuit PUFENDORFFIUS *de iur. nat. et gent. lib. III. cap. 3. §. 23.* ut nihil scrupuli reliquerit.

2. Se accurate distinguere ius ciuile et ius nat. et gentium, ius perfectum et imperfectum. Saepe enim ad iura gentium refert, quae sunt iuris ciuilis, cuius rei exemplum infra in successione testamentaria videbimus.

Heineccii Prael. Grot.

D

§. 42.

§. 42. 43.

Iam ad ipsos auctores, quos in consilium adhibuit, pergit, ubi inter philosophos primum locum concedit Aristoteli, sed ita, ut facile pateat, eum renitente quodammodo conscientia scribere. Eo tempore tyrannidem quamdam adfectauerant Aristotelici, sola haec philosophia vbique dominabatur. Ne crabrones irritaret, principatum hunc philosopho relinquit, sed ita, ut quaedam cordate moneat.

1. Non principatum hunc degenerare debere in tyrannidem, sed cuique relinquendam esse prudentem *ἐλευθερίαν*, ut ex omnibus sectis, quod optimum, eligat. Et haec methodus ecclesiastica vere optima est, quamvis in eam inuehantur et Aristotelici, et Cartesiani. Nam 1. methodus sectaria homines perducit ad praeiudicium auctoritatis. Praeiudicia vero omnem intellectus aciem obtundunt. 2. Methodus sectaria homines fingit infallibiles, et qui errare non potuerint, quum tamen id repugnet conscientiae. Quia itaque nec omnes veritatem vidisse verolimile est, nec nullos: opus est selecta, adeoque philosophia ecclesiastica. Vid. ARN. WESSENFELDIUS *de philosophia sectaria et ecclesiastica*.

2. Quod non adcurate definiuerit virtutem, quod consistat in mediocritate. Quid vero in reliquis doctrinis moralibus sperandum esset ab homine, qui ne virtutis quidem ideam claram et distinctam animo concepit? Falsam vero hanc esse definitionem multis probat.

1. Quod inde sequatur, ut liberalitas et parsimonia sint eadem virtus.

2. Quod inde sequatur, vitia quaedam dici, quae non existant,

e. g. irae vacuitas.

3. Quod iustitiae nullus reperitur excessus et defectus.

4. Quod quaedam vitia ex mente Aristotelis non sint vitia,

e. g. adulterium ex libidine, caedes ex ira.

5. Quod non ipse excessus virtutis vitia facit, sed modus in eius usu non adhibitus, e. g. non qui Deum nimium colit, superstitiosus est, sed qui perperam colit, non qui nimis liberalis est, vitiosus est, sed qui properam liberalis, cet.

§. 46.

Philosophos sequuntur historici, ex quibus duplicem utilitatem capi posse putat Grotius, 1. exempla, et 2. iudicia. Vtraque autem prodesse putat ad demonstrandum ius gentium. Sed hunc errorem

rorem iam 'profligauimus, diximusque, ius gentium aequae ac ius naturae demonstrandum esse ex recta ratione. Exempla autem et iudicia ex historicis non probant, sed illustrant. Et hunc usum habet historia temporum mediolorum, id est, Romana ante bellum Punicum, Graeca ante bellum Peloponnesiacum. Nam postea, inquit VELLEI. PATERC. *lib. II. cap. 1.* non gradu, sed praecipiti cursu a virtute descitum ad vitia transcursum, cet.

Sed quamobrem historiae non probant ius gentium? Id ita demonstrat. Nec exempla probant ius gentium, quia ius non spectat, quid factum sit, sed quid fieri debeat: nec iudicia, quia gentes de vno eodemque facto diuersimode iudicant. Ergo plane ex historia ius gentium non demonstratur.

E. g. Tarquinii superbi filius Aruns constuprauerat Lucretiam; quae sibi ideo ipsa manus violentas inferebat. Hinc Brutus et vniuersus populus regem eiiciebant regno. Si exempla ius faciunt: hoc et similia exempla complura probabunt, posse legitimos reges eiici ob sola liberorum delicta. Si iudicia ius faciunt, idem dicendum erit. Nam Graeci Romanique scriptores omnes hoc Bruti facinus collaudant, tamquam egregium: et tamen egerunt Romani contra ius gentium, ut infra demonstrabimus, et praeclare iam demonstrauit BYDDEVS in *Specim. iuris prudent. hiflor.* quod exstat in *Select. iur. nat. et gens.* Halae editis.

§. 47.

Vfus est Grotius et testimonio oratorum et poetarum; sed ipse agnoscit, eorum testimonia illustrare magis, quam probare, quin vix iis vllum inesse pondus. Nam *I.* oratoriae hoc est calliditatis, ut cum opus sit, eisdem rebus ab vtraque parte, vel a contrariis vtantur. *CIC. orat. pro Cluent. cap. 21.* Poetae fingunt, et *HORATIO* iudice:

- - - *pietoribus atque poetis*
Quidlibet audendi semper fuit aequa potestas.

Si ergo ex poetarum relationibus iudicandum esset, et adulteria, et incestus defenderentur, ac si essent iuris gentium. Talia enim de diis, heroibus, et hominibus optimis referunt. Sin ex eorum sententiis et iudiciis, et vitia horrenda ex iure gentium defenderentur.

§. 48.

Pergit ad libros V. T. et iis quoque se usum fatetur. Qua
D 2 occa-

occasione primo quaeritur, an ex libris V. T. peti possit ius naturae et gentium?

Adfirmat Io. Bodinus in *Colloquio heptaplomere* satis prauo *, ubi ius V. T. ipsum ius naturae esse contendit. Sed eum recte refutat Grotius. V. T. enim res innumeras inculcat, quae non nituntur ratione naturali, e. g. vt Iudaei se circumciderent, vt non vterentur vestibus mixtis, vt vno tantum loco sacrificarent, cet. Ait quidem Bodinus, quamuis harum legum rationes non intelligamus, tamen inde non sequi, vt nullae sint. Sed resp. idem est ac si quis diceret, et bruta loqui, quamuis non audiamus. Et, si istas rationes non intelligere possumus, quomodo dici possunt esse iuris naturae, quum naturae ius ab omnibus percipi debeat.

2. Deinde obseruat, ius diuinum positium et ius naturae non pugnare. Possent exislitari, id falsum esse, quum plane alia inculcet ius diuinum positium, quam naturale, immo ea, quae ius naturae plane ignorat, e. g. gradus prohibitos, circumcisionem, cet. sed resp. distinguendum inter aliud et contrarium. Alia inculcat ius naturae, sed non contraria. Sic medicina et iuris prudentia non pugnant, quamuis alia doceat illa, quam haec.

Sed obiiciunt quidam, leges diuinas posituias etiam contraria docere, e. g. ius naturae docet, non esse furandum, et tamen Deus dixit Israelitis, *abite, et mutua a vicinis vestris accipite vasa aurea et argentea*; ius naturae prohibet parricidium, et tamen Deus iussit Abrahamum immolare Isaacum. Hic varia comminiscuntur interpretes. Sed rectissime Grotius dicit, distinguendum adcurate esse ius Dei, quod Deus per homines interdum exsequitur, a iure hominum inter se. Leges naturales et positivae diuinae ea in re consentiunt, quod non sit furandum, vel occidendum: sed haec officia homines tantum inter se seruare tenentur, nec ideo sequitur, vt Deo non sit ius homini vel bona, vel vitam eripere. Si id ius Deo est, potest etiam ex iustis causis idem ius exsequi per homines. Iam facile patet, cur Deus iusserit ab Aegyptiis vasa argentea et aurea accipi: quia id debebant Aegyptii Israelitis pro laboribus: ergo hic tamquam iudex Israelitas immisit in bona Aegyptiorum. Deinde potuisset Deus Isaac vitam eripere, quam dederat,

* *Colloquium* istud *heptaplomeres* adhuc in manuscripto latet, et est colloquium inter septem personas dispersarum

religionum de religione. Habetur in bibliotheca Thomasiiana, qui et excerpta quaedam cum orbe erudito communicauit.

derat, potuisset et per patris manus eripere: sed noluit tamen, et Abrahamum iussit id facere tentationis et typi causa. Vnde hoc exemplum huc plane non pertinet.

3. Postremo remouet errorem, quod antiqui foederis in nouo nullus usus sit. Id quidem recte fecit, sed cauendum tamen, ne omnia promiscue recepta putemus. Distinguenda enim praecepta, quae nullam habent rationem, nisi typicam, e. g. vt abstineant Iudaei a certis animalibus impuris, vt ne vestibus ex lino et lana mixtis vtantur, vt leprosi certo modo expientur, cet. Nam de his demum vera sunt, quae dicit Grotius: *nos contra censemus*, cet.

§. 49.

Quia itaque saepe usus est V. T. libris: aequum etiam putauit; libros Hebraeorum adhiberi in subsidium, quia mores et sermones patrios habuere percognitos. Sed rabbini isti parum conferunt ad hanc scientiam. Nam

1. Fuere homines, qui clauem genuinam ad explicandam S. S. non habent, dum mysterium Christi ignorant, adeoque non possunt docere, quid in lege habeat rationem typicam, quid rationem moralem.

2. Omnes rabbini destituti sunt scientia morali et politica, sine qua Jeges interpretari velle, est nihil agere.

3. Omnes abundant fabulis et traditionibus absurdis, ex quibus tamen conclusiones suas eliciunt.

Quid ergo sani ex horum hominum scriptis discamus? Grotio id ab omnibus iure imputatur, quod iusto magis iudaizet. Primus tamen et fere solus inter rabbinos desipere desit rabbi MOSES MAIMONIDES, de quo ideo fertur prouerbiū: *a Mose usque ad Moſen, non fuit, sicut Moſes*. Scripsit hic librum sub titulo: *Morē nebuchim*, id est, *Doctrinā dubitantium*, qui et Latine exstat a Buxtorffio versus. Hic satis multa egregie disputat de moribus, quae ad illustrationem iuris naturae faciunt. Reliqui rabbini numerus sunt, et fruges consumere nati.

§. 50.

Pergit ad libros N. T. quibus ideo se usum dicit, vt doceret; quid Christianis liceret. In his duo fugienda sunt extrema.

1. Ne existimemus sufficere Christianis, si secundum ius natu-

D 3

rae

rae et gentium uiuant. Sane ita non differrent a paganis. Maiorem a Christianis sanctimoniam exigit Deus, e. g. ius naturae permittit, vt hostem vlciscamur vel per iudicia in statu ciuili, vel per bella in statu naturali: at libri N. T. docent, eum et amandum, eique benefaciendum esse. Ius naturae et gentium docet damnum datum refarciendum esse: in libris N. T. laudatur Zacharias, qui septuplum reddiderat.

2. Ne existimemus, omnia esse praecepta in N. T. Plura enim sunt consilia tantum euangelica, quae sub certis circumstantiis vtiliter possumus exsequi, sed non absolute tenemur. Tale 1. *Cor. VII.* de coelibatu.

Vt paucis dicamus: ex libris V. et N. T. non demonstratur ius naturae et gentium, sed ostendi potest, qui termini sint naturae et gratiae: quousque progrediatur recta ratio, quidque noui accesserit per reuelationem.

§. 51.

Sequuntur conciliorum et synodorum canones, nec non scripta patrum. Vbi quaeritur:

1. An aliqua sit synodorum auctoritas?

2. Quae vtilitas inde capienda ad illustrationem iuris naturae?

3. Quid ex patribus vtilitatis sperandum?

1. Quod ad quaestionem primam attinet, videndum, quid sit *synodus*? Est ea nihil aliud, quam congregatio virorum ecclesiasticorum et doctorum, in qua de controuersis et moribus disceptatur. Ergo 1. synodus constat ex hominibus, adeoque nulla ei tribui potest diuina auctoritas. Constat 2. ex hominibus ecclesiasticis et doctoribus, quumque et hi ab affectibus non sint immunes, possunt et hi labi, errare, decipi. 3. Conuocantur ad decidendas controuersias, et disceptandum de moribus: qua in re quum non alia norma sit, quam S. S. sequitur, vt non sit synodorum alia auctoritas, nisi quatenus earum decreta conueniunt S. S. Hinc si conueniunt, synodorum canones non minus valent, quam scripta doctoris vnius, qui recte docet: sin discrepant, non magis valent, quam scripta vnius pseudo-doctoris, qui falsa inculcat. Multitudo enim errantium non praestat errori patrocinium. Hinc synodum 1. Nicaenam recipimus, non ob auctoritatem et multitudinem

dinem PP. qui synodo interfuerunt, sed quia S. S. conuenit: Nicaenam 2. reuicimus, quamuis plures interfuerint ei synodo, quia pugnat cum S. S.

Dicunt: plus videre oculos, quam oculum: credendum esse tot viris doctis, qui vnanimiter hoc decreuerint. Sed resp. oculos centum caecos vel catarrhis offusos non plus videre, quam oculum vnum sanum, et viros etiam doctos adfectibus abreptos falli et fallere posse, ceu exemplo concilii Tridentini adparuit.

2. An ergo aliqua ex synodis vtilitas ad ius naturae redundat? Adfirmat Grotius, quia ostendant, quid veteres Christiani singulis saeculis crediderint, quique mores apud eos fuerint recepti. Sed quid tum? An ergo, quod Christianis visum, quodque apud eos fiebat, est iuris gentium? V. G. Multi exstant synodorum canones, ex quibus patet, nuptias olim ante saeculum nonum prohibitas fuisse vsque ad septimum gradum computationis canonicae. Exstat alius canon, ex quo patet, Innocentium pontificem nuptias permisisse post gradum quartum: an ideo hoc iuris gentium? Sic ius gentium admodum erit mutabile?

Accedit, quod et synodi et patres saepe vtuntur rationibus factis absurdis, e. g. nuptias prohibendas vsque ad quartum gradum; quia sint quatuor elementa, et quatuor humores in corpore humano. *cap. vlt. X. de consangu.*

3. Patrum quanta sit auctoritas, nemo ignorat. Nam quamuis omnes concedunt, eos saepe errasse, tamen et largiuntur, eosdem testes esse idoneos circa quaestionem facti, quid Christiani singulis saeculis crediderint? Modo 1. omnes vel plures consentiant, 2. propius abfuerint a saeculis primis, 3. nullius conuicti sint haereseos; nam quidam patres, vt Tertullianus et Origenes pro orthodoxis non habentur.

Sed ad ius naturae et gentium probandum exiguum adferunt momentum, partim quia vix philosophiae moralis elementis imbuti fuerunt, partim quod non quaeritur in iure naturae et gentium, quid factum sit, sed quid fieri debuit. Perpetuus est hic Grotii error, vt ius gentium ex plurium gentium consensu probet, et ideo omnia conuassare studeat, vnde huius modi consensus posset elici.

§. 52.

Sequuntur scholastici, quos Grotius ab ingenio et modestia laudat, sed naeuos eorum temporum infelicitati adscribit, ut satis adpareat, eum in Gallia scripsisse, ubi, quam male eruditis cedere soleat censura Aristotelico-scholasticae philosophiae, vel Petri Rami fata docent. Vid. IO. LAVNOII *de var. Arist. fortuna in acad. Parisiensi* libellus elegantissimus.

Ceterum quam male de iure naturae et gentium meriti sint scholastici, paucis demonstrabimus.

1. Non solum ducem elegerunt Aristotelem, sed et scriptores Arabes Mahumedanos, Aristotelis interpretes, qui totam philosophiam moralem maxime obscurarunt.

2. Omnia sine ordine tradunt.

3. Principium supponunt obscurissimum, sanctitatem diuinam.

4. Ius naturae et gentium probant inepte ex Aristotele, iure canonico, civili.

5. Proponunt quaestiones absurdissimas, e. g. an ob alapam intentatam aliquis possit occidi? An possit adorari hostia, de qua dubites, an sit consecrata? an sacerdos ebibere teneatur calicem, si vermes venenati inciderint? Hae scilicet sunt quaestiones egregiae iuris naturae et gentium, haud absimiles illi disputationi stolidi magistelli Wittebergenus, qui decano facultatis philosophicae offerebat disputationem iuris gentium, *de dolore dentium*, quumque decanus eam reiiceret, mutabat titulum: *Anniente summo Ente, Facultate concedente, de dente dolente, morbo noto in omni gente, praesidente, M. Dente, disputabitur a Respondente, Carolo Ente*.

Accedit 6. quod scholastici immiscent principia impia de probabilismo, de methodo dirigendi intentionem, de reservatione mentali, et de peccato philosophico, de quibus conferri meretur LVD. MONTALTIUS in *Epistolis ad Prouincialem*, et Theol. Lugduno-Batauus, HOORNBEKIUS, in *praef. tom. II. Theol. moral.*

§. 53.

Sequuntur denique IC. quos in tres ordines dispescit Grotius, 1. veteres, quorum fragmenta in Pandectis occurrunt, 2. medii aevi, qui glossas scripserunt, ut BARTOLVS, BALDVS, AC-CURSIVS, et 3. nouos, qui iuris prudentiam a vetere barbarie reput-

repurgarunt. De prima classe agit §. 53. de secunda §. 54. de tertia §. 55.

Antiquos laudat, quod multa iuris naturalis et gentium capita traſſent, et rationes perquam elegantes adferant: ſed et naeuos quosdam in iis notat, veluti 1. quod confundant ius naturae et gentium, 2. quod, quae paucis gentibus communia fuerunt, pro iure gentium venditent, 3. quod omnia immiſceant iuri Romano.

Sed non potuiſſe non doctiſſimos illos viros in deſcribendo iure gentium ſaeppiſſime falli, inde colligimus.

1. Quod ne ſciuerint quidem, quid ſit ius naturae et gentium. Illud enim dixerunt eſſe, quod natura omnia animantia docuit, quum in bruta non magis cadat ius, quam in horologia, vel alias machinas.

2. Quod ius gentium recte quidem definiunt, quod naturalis ratio inter omnes homines conſtituit: ſed multa referunt ad ius gentium, quae ſunt voluntaria, e. g. teſtamenti factionem, manuſſiones, ſeruitutem captiuorum, cet.

3. Quod in pleriſque ſequuti ſunt Stoicos, quorum philoſophia moralis multis erroribus reſerta eſt. ICtos veteres Stoicos eſſe, docet EV. OTTO. *Orat. de Stoica ICtorum philoſophia*. Errores autem Stoicorum morales ſingulari tractatu detexit IO. FRANC. BVDDVS.

§. 54.

Gloſſatores fuere homines ſatis ingenioli, ſed barbari, et ab hitoriae ac litterarum praefidiis deſtituti. Hinc et in iure gentium ſtolide errant. Nam

1. Id probant ex iure Romano et canonico.

2. Inde formant ius publicum, tum vniuerſale, tum particulare Germanorum. Hinc egregiae doctriinae iuris gentium in gloſſatoribus obuia, imperatorem Germ. eſſe mundi dominum: reges apud illum poſſe accuſari, principes electores eſſe praefectos praetorio: ſupremam maiestatem conſiſtere in iure gladii.

3. Fuere pontificii. Hinc vbique regnant in eorum ſcriptis principia papatus, vero iuri naturae quam maxime repugnantia, e. g. papam eſſe ſupra principes, cet.

Heineccii Prael. Grot.

E

§. 55.

§. 55.

Iuris prudentiam primus barbarie purgavit ALCIATVS. Hinc sequuti CUIACIUS, FABRI, BUDAËVS, BALDVINVS, HOTOMANVS, et alii, maxime in Gallia. Sed quum hi operam tantum dederint iuri ciuili priuato : hinc parum illustrant ius naturae et gentium.

Excipit tamen auctor duos Hispanos, et duos Gallos. Ex Hispanis COVARRVVIAM et VASQVIUM, ille scripsit *Varia*, hic *Controuersias illustres*. Ille modeste : hic, vt ait auctor, liberrime, adeo vt et principes delinquentes deponi statuatur, quam sententiam refutat auctor infra *lib. II. cap. 1. §. 9. num. 2. sequ.*

Ex Gallis laudat IO. BODINVM, cuius exstant *libri de re publica*, in quibus tamen multa sine ordine et iusta demonstratione traduntur, et FR. HOTOMANVM, cuius *quaestiones illustres* elegantes sunt, nisi quod auctor fuit Monarchomachus, ceu ex eius opere, quod *Franco-Galliam* inscripsit, adparet.

§. 56.

Reliquum est vltimum partis specialis membrum, in quo leges quasdam explicat, quas ipse sibi in hoc opere elaborando praefcripserit.

1. Primo sibi hanc legem dixit, vt omnia demonstraret euidenter, proponeret ordine, et quae diuersa sunt, distingueret. De duobus posterioribus nihil est, quod moneamus, nisi quod paullo scrupuloser distinxit iura naturae et gentium, quum tamen, vti diximus, vnum ius sint. At in primo saepe defecit. Multa enim iuris gentium esse, demonstrauit testimoniis et exemplis, quod quam periculosum sit, supra exemplo idololatriae docui.

§. 57.

2. Secunda lex est, ne quid, quod ad rem non pertinet, immisceret. Quod religiose praestitit. Alii enim auctores immiscent philosophiam moralem, vt Cicero ; alii theologiam et casus conscientiae, vt scholastici ; alii politicam, vt Bodinus. At hae disciplinae omnes differunt.

1. Philosophia moralis tradit, quid bonum vel malum ; ius naturae

turae, quid iustum vel iniustum : politica, quid vtile vel noxium. Ista perducit ad felicitatem internam vel tranquillitatem animi ; illud ad iustitiam ; haec ad prudentiam.

2. Omnes hae disciplinae conclusiones suas ex recta ratione petunt. Theologia ex reuelatione, ex qua etiam casus conscientiae decidendi.

§. 58.

3. Tertia lex, *se nolle immisceri controuersis nostri saeculi*, inter pontificios puta et Protestantes. Hinc protestatio elegans sub finem §. *vere enim profitor, cet.*

Et sane potuisset id Grotius, si ex sola recta ratione, quae apud pontificios et Protestantes est eadem, disputasset. Quia autem multa ex S. S. immiscuit, quam aliter saepe pontificii, aliter alii coetus et sectae explicant, fieri non potuit, quin modo huic, modo alteri sectae fauere videretur. Vnde et ab omnibus vapulat vir bonus, et, quasi Arminianis et aliquando Socinianis iusto plus faueret, accusatur.

§. 59.

4. Quarta lex, *ut dicendi genus seclaretur breue et concisum, quia id ad docendum sit aptissimum*. Et sane nec elegantia, nec breuitas, nec pondus et grauitas deest Grotii stilo. Inprimis enim hac virtute eminuit vir doctissimus, ut varios stili characteres exprimeret. In *Historia Belgica* Tacitum expressit ; in his libris non infeliciter imitatur Ciceronis libros philosophicos.

§. 60.

5. Quinta lex ; *ut verba auctorum ipsa non allegaret, nisi quid ponderis vel elegantiae insu*. Fuit eo tempore is gustus eruditorum, ut huius modi auctorum testimoniis delectaretur, uti patet ex scriptis Grotii, Seldeni, et aliorum.

Sed iam alii monuerunt, sic quidem eruditione multiplici referum esse Grotii opus, at minus perspicuum, quam si allegationes has, quae nihil ad demonstrationem iuris naturae et gentium faciunt, omisisset. Hinc tantum applausum meruere Hobbes

sus et Pufendorffius , quod ille in suo libello *de cine* ; hic in libello *de officio hominis et civis* non nisi suas meditationes proponerent , nullaue allegarent veterum testimonia. Nos in posterum parum solliciti de his corticibus , ipsum nucleum ex Grotii opere quaeremus.

§. 61.

Postremo paragrapho imitatur pontificios , inter quos scripsit : et ne forte libri impressio prohiberetur , addidit sollemnem protestationem , ut si quid bonis moribus et pietati contrarium a se dictum sit , id ne dictum esset. Sed haec protestatio facto procul dubio contraria visa est pontifici Romano , qui , ut iam supra monui , et Grotii opus in *indicem librorum prohibitorum* referri iussit.



LIBER I.

* * * * *

LIBER I.

CAPVT I

QVID BELLVM? QVID IVS?

§. 1.

QUum hoc opus inscribatur de iure belli et pacis, prius Grotius de bello agendum putauit, quia illud propter pacem geritur. Vt autem titulus eo rectius intelligatur, explicat hoc capite 1. quid bellum sit §. 2. 2. quid et quotuplex ius sit §. 3. *ad fin.*

§. 2.

Quod ad belli definitionem attinet; ante omnia tenendum; illud bifariam accipi, vel 1. pro ipso hostium certamine, vel ^{num. 1.} 2. pro statu hostili. E. g. quando bellum Marathonium describunt historici, intelligunt ipsum illud memorabile certamen vel proelium, quo Miltiades maximum Darii exercitum confecit. Si vero dico bellum de successionem Hispanica, non intelligo sola proelia in Italia, Hispania, Germania et Belgio facta, sed totum statum hostilem, qui tot annos durauit inter Gallos et imperia vicina confederata.

Iam si quaero, quid sit bellum priore sensu acceptum? definitionem suppeditabit Cicero: *bellum est certatio per vim*. Si de posteriore sensu quaestio est, definitio Grotiana obtinet: *bellum est status per vim certantium*. Vnde et bellum inter paucos, immo inter duos esse potest, idque auctor illustrat vocabulo Latino et Graeco. Latinis olim bellum dictum est ^{num. 2.} *duellum*, quia duo ad minimum certant per vim: Graecis *πολεμος* a *πολλος* *multus*, quia multi inter se digladiantur. Ex quo collegit auctor, quamuis vsu obtinuerit, vt bellum hodie non ^{num. 3.} vocemus statum, quo duo vel pauci inter se certant, sed quo iusti

iusti exercitus inter se concurrunt, tamen re ipsa perinde esse; siue multi, siue pauci certent.

Haec Grotius noster. Sed quamuis ea omnia facile admittamus, dici tamen non potest, definitiones vel Ciceronis vel Grotii iustas et adcuratas esse. Nam 1. ante omnia distinguendi sunt status, naturalis et civilis. In statu civili qui communi magistratui subfont, illi non possunt inter se per vim certare, sed iudicium implorare auxilium. Qui vero in statu naturali viuunt, iis per vim certandi ius est, adeoque hi soli gerunt bellum: quis enim dixerit, ciues Franequeranos inter se bellum gerere, si quando iis furor arma ministrat? Rixae hae sunt et iurgia, vel singularia certamina a magistratu punienda; non bella. 2. Si vera est definitio vtraque, etiam ii, qui ludos equestres instituunt, quos veteres *torneamenta* vel *tournois* vocant, bellum gerunt, quia et ipsi per vim certant: quod tamen nemo dixerit, quum non sint in statu hostili, sed virtutis exercendae causa concurrant.

Quum itaque definitio suo definito paullo latior sit, ea ita erit emendanda: *bellum est status hominum vel societatum liberarum, (id est, in statu naturali viventium) de iure controuerso per vim certantium.*

§. 3.

Sequitur iam altera pars capitis de iure, vbi quaeritur:

1. Quotupliciter ius accipitur? §. 3-8.

2. Quotuplex sit? §. 9. *ad fin.*

Ius accipitur vel pro iusso, vel pro attributo personae: NUM. 1. Primo sensu ius generatim vocatur, quod iustum est, vel quod non est iniustum, id est, quod leges permittunt. Et hoc sensu VLPIANVS in l. 1. pr. D. de iust. et iur. dicit *ius a iustitia descendere, non grammatice, (nam ita, vt supra monuimus, a iusso dicitur,) sed moraliter, quia ius est, quod iustum est.*

Quumque supra probatum sit, homines socialiter viuere debere, et hunc esse vniuersi iuris fontem: sequitur, vt id demum ius vocetur, quod naturae societatis ratione vventium non repugnat; quod variis exemplis illustrat ipse Grotius. Sic ius est, neminem alteri detrahare, ius non est, alterum alteri infir-

insidiari, furari, occidere, falsum testimonium dicere; quia haec omnia naturae repugnant.

Haec prima est vocis acceptio, quando ius dicitur pro lege. *num. 2.* Et tunc ius dividitur in *rectorium* et *aequatorium*.

Rectorium est, quod intercedit inter inaequales, id est, superiores et inferiores, e. g. Deum hominesque, inter patrem et liberos, imperantem et subditos.

Aequatorium, quod intercedit inter aequales, e. g. foederatos, res publicas vicinas, fratres, concives.

Effectus vtriusque iuris sunt diversissimi. Nam *rectorium* non habet mutuas praestaciones, e. g. princeps iure exigit tributa a subditis, sed non subditi a principe. Pater iure castigat liberos, sed non liberi patrem. Contra ius *aequatorium* exigit praestaciones mutuas et reciprocas, e. g. foederatus alteri debet auxilium, cuius cuius officia humanitatis ex utraque parte.

§. 4.

Altera vocabuli iuris acceptio est, quando sumitur pro attributo personae, et tunc est qualitas moralis personae competens, ad aliquid iuste habendum vel agendum, e. g. ius huic personae est piscandi, venandi, navigandi, cet. Hic ius non pro lege, sed pro qualitate quadam personae, non physica, (quia in natura hominis nihil mutatur,) sed morali, sumitur.

Et ita acceptum ius a Ictis dividitur in *ius in re* et *ad rem*. *Ius in re* est facultas homini in rem competens, sine respectu ad certam personam, e. g. dominium, servitus, pignus, hereditas.

Ius ad rem est facultas competens personae in personam, ut haec aliquid facere vel dare teneatur, e. g. ius ex contractu vel delicto natum, quod et obligatio dicitur.

Illud dat actionem aduersus quemcumque possessorem, quia ipsa res mihi obstricta est: hoc tantum aduersus eum, quocum mihi negotium intercessit, quia persona mihi obligata est.

Hoc ius, quod pro attributo personae accipitur, Grotius denuo dividit in *facultatem* et *aptitudinem*, vel, quod perinde est, in *ius perfectum* et *imperfectum*, de eoque agitur §. sequ.

§. 5.

§. 5.

Facultas seu *ius perfectum* est *ius*, quod ex legibus nascitur, eoque pertinent omnia iura in re, vt dominium, hereditas, pignus, seruitus; et omnia iura ad rem, vti obligationes ex contractibus, delictis, et diversis causarum figuris.

Aptitudo autem est *ius*, quod ex virtute, ex honesto et decoro nascitur, vt liberalitas erga pauperes, officia humanitatis, cet.

§. 6.

Facultas iterum diuiditur in *vulgarem*, et *eminentem*. Illa competit priuato cuius, haec summo imperanti. Sic domino est *ius* in re sua, sed dominium *eminens* penes imperantem. Patri est *ius* in filium, sed *eminens* potestas apud summum imperantem. Sed hic notandum,

1. Illud *ius* *eminens* magis imperium esse, quam dominium aut patriam potestatem, cet.

2. Illud locum non habere, nisi 1. in casu extremae necessitatis, et 2. in poenam ob satisfactionem rei publicae.

3. Si ob necessitatem huius modi *ius* exerceatur, reliquos ciues teneri ad indemnitate praestandam. Vnde Icti hic concedunt actionem vtilem ex lege Rhodia de iactu. Elegans exemplum de ciuitate imperiali Sueuica, quae caesis ad Hostetum Gallis et incendium minantibus menstruum tributum pro tota Suecia soluere fuerat coacta, et aduersus reliquas ciuitates instituebat actionem vtilem ex lege Rhodia de iactu, et victoriam reportabat.

§. 7.

Hactenus de iure perfecto vel facultate: sequitur *aptitudo* vel *ius imperfectum*, quod Aristoteles dignitatem vocat. Per illud intelligimus *ius* ex sola honestate vel virtute natum, quod nullam producit actionem.

Rationes iam reddimus. Nam 1. nec virtus potest cogi, nec 2. subiectum aliquod determinatum hic adest, quod huius modi officia solum debeat.

Iam id addimus, ex aptitudine fieri posse facultatem, ex officio imperfecto perfectum, 1. in extrema necessitate, et 2.

si princeps vel imperans lege lata, et poena proposita hoc officium inculcet. E. g. nemo cogitur ex fonte suo etiam pati hauriri aquam: sed cogi potest, si vrbs obsessa alium fontem non habeat. Non cogitur quis, dare pauperibus et famelicis panem: sed si princeps poenali edicto id iubeat, cogitur, quia iam obligatio non ex sola virtute, sed ex lege est.

§. 8.

Ex hac distinctione iuris in perfectum et imperfectum noua nascitur distinctio *iustitiae* in *expletricem* et *attributricem*: illa suum cuique tribuit, quod iure perfecto debetur; haec, quod iure imperfecto.

Vt autem, cur Grotius hanc distinctionem inuenerit, pateat: sciendum est Aristotelem iam iustitiam distinxisse in *συλλαβτικήν* seu *commutatiuam*, et *διανεμητικήν* seu *distributiuam*, quam distinctionem Icti in omnibus compendiis repetunt. Sed Grotio haec distinctio non satis adcurata visa est, atque hinc nouam et meliorem substituit, in *expletricem* et *attributricem*.

- Videbimus itaque
1. quomodo Aristoteles hanc distinctionem explicet.
 2. Quomodo alii doctores illam emendare conentur.
 3. Quid in illa desiderandum sit.

1. Aristoteles ait iustitiam commutatiuam seruare proportionem arithmetica, eamque locum habere in contractibus; distributiuam contra seruare proportionem geometricam, eamque locum habere in praemiis et poenis.

Proportio autem arithmetica seruari dicitur, quoties ad rem ipsam respicitur, non ad personae dignitatem et merita, e. g. pistor panem eodem pretio vendit et nobili et plebeio. Proportio autem geometrica, quando non respicitur ad solam rem; sed ad personae dignitatem et merita, e. g. princeps in distribuendis officiis inter duos ciues ambientes munus iure praeferebat doctum indocto, bene de re publica meritum ei, qui nullo sibi merito rem publicam obstrinxit.

Heineccii Prael. Grot.

F

2. In

2. Ita Aristoteles. Quia autem haec non usque quaque recte se habent: ideo alii, nempe HORNEIUS, professor Helmstad. *Ethic. lib. III. cap. 11. §. 24.* rem paullo aliter explicat, et iustitiam commutativam versari dicit circa res singulorum, contra distributivam circa res communes. e. g. aerarium est commune. Ex eo non singuli concives, milites, ministri idem accipiunt salarium, sed pro sua quisque dignitate et merito: itaque in eo servatur proportio geometrica, id est, iustitia distributiva. Contra panis est res propria pistoris, in eo vendendo non servatur alia proportio, quam arithmetica, adeoque iustitia commutativa.

3. Sed quaeritur, quid in his omnibus desideretur? Resp. 1. Vocabula rem non satis exprimunt, nam *συμβαλλετική* dicitur a *συμβαλλόμενος*, a contractu, quum tamen etiam in restitutione damni dati locum habeat, ubi nullus contractus praecessit. Hinc Grotius rectius dixit iustitiam esse vel expletricem, vel attributricem.

2. Definitiones quoque falsae sunt: nam falsum est in solis contractibus servari proportionem arithmetica, siquidem iam vidimus, eam locum habere etiam in restitutione damni. Falsum etiam, in solis delictis et praemiis locum habere geometricam, siquidem et in testamentis, legatis cet. locum habet.

3. Falsum est, commutativam versari in rebus tantum propriis, nam et res publica debetrix non plus ex communi aerario solvit creditoribus, quam debet; falsum quoque distributivam versari tantum in rebus communibus, nam et testator de suo legat cuique, quantum mereri videtur.

Quum itaque haec Aristotelis doctrina falsa sit, praeclare Grotius eam emendavit, dixitque iustitiam vel expletricem esse, vel attributricem, et illam cuique tribuere, quod ipsi debetur iure perfecto, hanc, quod iure imperfecto.

§. 9.

Haecenus prior pars, articulus de iuris diversa acceptione; sequitur alter de divisione iuris.

Dividitur autem ius in naturale et voluntarium: de naturali agitur §. 9-12. de voluntario §. 13. *ad fin.*

Divisio haec pertinet ad ius pro lege acceptum. Hinc quaeritur, quid sit lex?

Resp.

Resp. Grotius, *legem* esse regulam actuum moralium, obligantem ad id, quod rectum est.

Dicitur itaque *lex regula*, quia ad eam actiones componimus, *actuum moralium*, vel humanorum, id est, qui ab intellectu et voluntate pendent, quia actionibus naturalibus leges non praescribuntur, *obligans ad id, quod rectum est*.

Sed quaeritur hic, 1. an haec definitio recte se habeat ?

2. An et *lex permissiva* sit *lex* ?

1. Ad prius respondemus, non adeo adcuratam esse legis definitionem, ob verba postrema: *obligans ad id, quod rectum est*. Ita enim sequitur, ut aliquid sit rectum ante legem; quod absurdum, quia nisi *lex* esset, nec rectum aliquid esset, nec prauum. Sed non aliter potuit Grotius definire, immersus scholastico praeiudicio, quod aliquid sit iustum ante legem, adeo ut ius naturae futurum sit, etiamsi non esset Deus, uti vidimus *proleg. §. 11.* Hinc dicimus, *legem esse regulam actuum moralium a superiore praescriptam subditis, et obligantem ad id, ut actiones secundum hanc legem instituant.* Non enim *lex* obligat ad id, quod rectum est, sed ideo aliquid rectum est, quod *lex* ad id obligat.

2. Qu. an *lex permissiva* sit *lex*? e. g. *studiosis gladiatis interdere licet*. Resp. Grotius, non videri, quia proprie non obligat. Sed recte se ipsum deferit: lege enim permissiva obligantur omnes ciues, ne alterum in exercitio iuris sui turbent. Ita etiam de privilegiis recte dicitur, quod sint leges, non quidem privilegiatos obligantes, sed alios, ne illos in exercitio privilegii sui turbent.

Iam itaque ad ipsam divisionem iuris progreditur auctor. Ius vel naturale est, vel voluntarium, illud Hebraei vocant *Mizuvoh*, hoc *Chiikkim*; illud *ius*, hoc *praecepta*.

§. 10.

Ius naturale est, quod ex ipsa recta ratione fuit, e. g. ne ^{num. 1.2)} occidito; *voluntarium*, quod ex sola legislatoris voluntate, e. g. ne comedere carnem suillam.

Huius ratio itaque est honestas ac turpitudine naturalis. Et hinc hoc ius est necessarium, quatenus Deus nihil velle potest

F 2

tur-

turpe, nihil quod rectae rationi repugnet. E. g. si lex vetat homicidium, eius legis nexus tam manifestus est cum natura rationali, ut unusquisque, cui sana ratio est, facile intelligat, id vetitum esse. Qui enim non vult, ut alteri sit libertas se occidendi, is nec sibi eam licentiam debet arrogare. At, quod non licet ducere fratris filiam, quod Deus vetat *Leuit. 18.* et quod non liceat merces inferre provinciae sine vectigali, quod impetrantes constituunt: eius rei ratio naturalis nulla est. Illud itaque ius est naturale, hoc voluntarium.

nam. 3. Quaeritur, quotuplex sit ius naturale? respondet auctor; quaedam iuris naturae esse proprie, quaedam minus proprie. Sed rectius dixeris, quaedam esse iuris naturae *permisui*, quaedam *praeceptiui*.

1. Iuris naturae *permisui* sunt, quae recta ratio nec praecipit, nec vetat, e. g. pacta facere, bellum gerere, testamentum condere.

2. Iuris naturae *praeceptiui*, quae vel praecipit sana ratio; vel vetat, e. g. pacta servare, bellum iniustum non gerere, testamento nemini ius suum auferre.

Haec iura *permisiva* et *praeceptiva* maxime inter se discrepant. Illa enim producant tantum impunitatem, haec poenam vel praemia. Illa obligant non eum, cui quid permittitur, sed alios, ne illum impediatur; haec obligant omnes. In illis aliquid licet summis imperantibus, e. g. ut pacta nuda non valeant, sed certis ritibus inita, ut testari non liceat de bonis immobilibus, feudalibus, &c. sed nihil licet in his. Nam nullus imperans potest prohibere, ut pacta plane nulla valeant, ut possit alicui ius suum auferri.

nam. 4. Novam divisionem reperimus *nam. 4.* quod ius naturae verifetur vel circa actus, qui citra humanam voluntatem existunt, vel circa ea, quae voluntatis humanae actum consequuntur. Sed quum haec paullo obscuriora sint, dici potest, ius naturae esse vel *absolutum*, vel *hypotheticum*.

Absolutum est, quod nihil ponit ad obligationis effectum; quam aliquem esse hominem, e. g. neminem laedere, damnum datum refunde, &c.

Hypotheticum, quod supponit certa instituta humana, iisque non introductis non valeret. Sic e. g. furtum non esset iure natu-

naturae prohibitum, nisi introductum ab hominibus esset dominium.

Talia instituta humana, vti ex Pufendorffio meminimus, sunt quatuor, sermo, dominium, rerum pretium, et ciuitas.

Ceterum probe obseruanda est diuisio, partim quia eius neglectus viros maximos in errorem induxit, e. g. Salmasium, qui negauit, furtum repugnare iuri naturae, partim quia et natura et effectu haec iura quam maxime differunt. Nam

1. Absoluta sunt pura, hypothetica conditionata. Pacta serua, pura est propositio, adeoque semper et omnes obligat. Ne furare est propositio in se conditionata, si dominium introductum. Nam eo non introducto cessat lex. Sic e. g. nec Adamus nec Eva inter se furtum committere potuerunt.

2. Iura absoluta ab initio mundi valuerunt, hypothetica non. E. g. neminem laedite, et protoplastis dictum, iis vero dici non potuit: parete imperantibus, quia tunc nullae adhuc erant res publicae.

Post diuisionem auctor agit de attributo iuris naturae primario, quod sit immutabile. Id probatur ex duplici eius fonte. num. 5.6.
Alter est Dei voluntas: atqui quum in Deo nihil sit mutabile, nec eius voluntas mutari potest. Alter fons est reſta ratio: quum vero impossibile sit, vt, quod semel rectae rationi conuenit, eidem repugnet, impossibile quoque est, iuris hodie naturae aliquid esse, quod cras ei repugnet.

Obiici posset, Deum esse omnipotentem, adeoque posse eum et ius naturae mutare. Sed resp. omnipotentia est facultas Dei infinita faciendi, quod vult. Ergo, quod non vult, non potest. Hinc non potest mentiri, vt ait scriptura, quia non vult. Non potest facere, vt bis duo sint sex, quia non vult. Non potest mutare ius naturae, quod non vult. Non vult autem, quia nihil absurdum vult.

Obiici posset, 2. nonnunquam tamen Deum mutasse ius naturae, e. g. iubentem, vt Isralitae vasa auferrent ab Aegyptiis, vt Abrahamus mactaret filium. Sed resp. 1. non ius mutatum esse, sed rem: nam non Deus iubebat furari, sed auferre, quod iam Isralitis debebatur: non iubebat Abrahamum occidere filium, sed tentabat, an occisurus sit. 2. Furtum est, si homo homini quid aufert, non, si Deus homini: homicidium est, si homo homini vitam aufert, non, si Deus homini.

- num. 7. Accedit adhuc monitum. Quaedam non simpliciter iuris naturae esse, sed pro certo rerum statu, quamvis non sint officia hypothetica. Et talia sunt omnia praecepta affirmatiua, quae tantum obligant data occasione, vel positis circumstantiis habilibus, e. g. cole Deum cultu externo, puta, si id fieri potest. Hinc non obligabantur eo praecepto Iudaei obfessa vrbe, cet. Hominibus aliis inferui, si occasio sit. Hinc vitio veriti non potest medico, quod neminem sanet, si desint aegroti.
- Ex quo etiam sequitur, vt omnia haec praecepta cedant necessitati, e. g. nemo pauperi dare tenetur id, quo ipse indiget; nemo alium seruare tenetur, quum ipse sit in periculo.

§. 11.

- num. 1. Haftenus actum de iure naturae: iam quaerit, an discrimen, quod in legibus nostris inter ius naturae et gentium occurrat, recte se habeat?

Definit Vlpianus ius naturae, quod natura omnia animalia docuit: ius gentium, quod naturalis ratio inter omnes homines constituit. Iuste enim viuere, Stoicis erat secundum naturam viuere. Natura vel communis erat hominibus et brutis, vel illis propria. Ergo et ius vel vtrisque commune erat, vel proprium, illud naturale, hoc gentium ius vocabant. l. 1. §. 3. 4. D. de iust. et iur. Quaeritur itaque, an haec doctrina recte se habeat?

Negat Grotius, 1. quod bruta non possunt obligari. Obligatio enim supponit rationem, vel intellectum et voluntatem liberam. Vtraque brutis deest.

- num. 2. 2. Quod bruta omnia agunt ex impetu instinctuque naturali, sine ratione et conscientia, vti iam supra ad Prolegom. §. 7. docuimus.

Obiici potest: at et brutis quaedam tribuitur iustitia et iniustitia. Multas historiolas huius generis narrat Aristoteles, Plinius, et Aelianus, veluti quod canes grati fuerint aduersus dominos, quod aspis catulum suum, qui hospitem interemerat; necauerit, quod equus noluerit coire cum equa, ex se nata, cet. Sed 1. istae narratiunculae fabulam sapiunt. 2. Si quid huius modi factum, id ex impetu, non ex proposito aliquo aut obligatione legis factum.

§. 12.

§. 12.

Quum itaque haftenus, quid ius naturae sit, fuerit explicatum, quaerit, quomodo probetur, aliquid iuris naturae esse? Respondet, vel a priori, vel a posteriore.

A priori per rectam rationem: si conveniat aliquid naturae hominis rationali, et sociali, e. g. si probo, neminem laedendum, quia alias homo cum homine in societate vivere nequeat.

A posteriore per inductionem, si plures gentes huius modi ius sequutae sint. Posterius hoc inde probat, 1. quia vniuersalis effectus requirat vniuersalem causam, talis autem nulla excogitari possit alia, quam sensus communis. Hinc multas adducit sententias veterum, quae idem inculcant.

Sed primo falsam esse hanc illationem, iam in prolegomenis demonstrauius exemplo idololatriae et *πολθείτης*.

Deinde falsum quoque est, consensus istius causam non aliam excogitari posse, quam sensum communem. Vera enim causa, ut ipse GROTIUS in libello *de veritate religionis Christianae* fassus, est traditio, quia gens a gente mores adsumsit. Sic e. g. clarissimum est, nullam esse causam naturalem, cur septem dies numerentur in hebdomade, quum aequae facile cyclum octo, nouem, vel decem dierum seruare potuissent: itaque per traditionem id ad omnes gentes manauit. Ita etiam quod homines numerant vsque ad decem, quum et ad quatuor numerare potuissent, nullam habet rationem naturalem, causa enim quod decem sint digiti, quam Artes allegat, admodum diluta est. Est itaque traditio. Et sic in reliquis se res habet.

Vnde sane sequitur, non esse alium genuinum ius naturae probandi modum, quam a priori, ex recta ratione.

§. 13.

Haftenus actum de iure naturali: iam sequitur voluntarium, idque Grotius noster in *humanum* et *diuinum* recte dispescit. Humanum a voluntate humana, diuinum a diuina proficiscitur. E. g. humanum ius voluntarium est; qui *furtum fecerit, suspendio adficiuntur*; nulla enim est ratio naturalis, cur praecise fur suffocandus, et non alia poena adficiendus sit.

Diui-

Diuinum a voluntate diuina est, e. g. *qui sanguinem humanum fuderit, eius sanguis fundatur.*

§. 14.

num. 7. Humanum denuo diuidit auctor in *ius ciuile*, siue arctius patens, et *ius gentium*, siue latius patens. Illud singulae gentes sibi ipsae constituunt, vel nomine gentium suprema maiestas. Hoc vel omnibus, vel multis gentibus commune est. Addit, *multis gentibus*. Vix enim praeter ius naturae vllum ius commune omnibus gentibus esse fatetur.

Sed multipliciter hic labitur auctor, vt a Pufendorffio, Zieglero, aliisque obseruatum est. Nam

1. Falsum est, ius gentium esse voluntarium: si enim voluntarium est, aut a Deo est, aut ab hominibus: si a Deo, falsum est, illud non omnibus esse commune; si ab hominibus, est mutabile, et singulae gentes illud possunt abrogare.

2. Falsum est, ius gentium esse, quod apud multas gentes receptum. Nam ita et iuris gentium erit, quod pilum detrahimus salutes; quod absurdum.

3. Falsum est, esse humanum. Nemo enim hominum potuit gentibus leges praescribere. Nec gentes vmquam pacto huius modi quid statuerunt.

Vt itaque error pateat, obseruandum est, ius gentium diuersimode accipi.

1. Pro attributo diuersarum gentium, seu facultate morali; per quam gentes aliquid licite agunt, et tunc ius gentium ex ipso iure naturae est, e. g. ius bella gerendi, mittendi legatos, cet.

2. Pro moribus plurium gentium, e. g. quod olim omnes captiui in seruitutem detruderentur, quod bella declarentur sollemni ritu. Hoc ius plane arbitrium est, et a singulis abrogatur gentibus, immo vix ius dici potest.

3. Pro iure ciuili, a multis gentibus recepto, vti hodie ius Romanum vbique viget. Hoc improprie dicitur ius gentium, quia vere et proprie ciuile est.

4. Pro iure quodam omnes gentes obligante, necessario, et perpetuo. Et hoc negamus differre a iure naturae, nisi sola adplicatione. Hinc a) quum Grotius dicat, hoc ius esse voluntarium,

tarium, nobis est naturale; b) quum Grotius illud dicat multis gentibus commune, nobis illud omnibus commune est; c) quum Grotio sit ius humanum, nobis illud diuinum est.

Vnde nec admittimus probandi modum, quem commendat Grotius. Nam quum ius gentium sit ipsum ius naturae: non aliter probari potest, quam a priori, ex ipsa ratione naturali. num. 14

§. 15.

Progreditur auctor ad ius diuinum voluntarium. Id ex solo Dei arbitrio vel voluntate liberrima descendit, cuiusque nulla alia reddi potest ratio, e. g. gradus in matrimonio prohibiti. num. 15

Illud auctor diuidit in *vniuersale*, et *particulare*. Vniuersale omnes homines obligat, particulare populum vnum, veluti Iudaicum. num. 16

Vniuersale aliqui negant reperiri, vti Thomasius, et quidem, 1. quia nullus excogitari possit modus promulgandi, 2. quia iustitia Dei non ferat, vt quis puniatur, cui lex non publicata sit.

Sed praeuidit hanc obiectionem Grotius, dixitque, omnino esse modum promulgandi. Nam ter esse ius vniuersale promulgatum a Deo, 1. per Adamum; quod vero Adamo dictum, id vniuersis dictum esse; 2. per Noachum post diluuium, cuius familia denuo genus humanum vniuersum repraesentauit, et 3. per Christum. Sed quamuis haec omnia concedantur, tamen non concipi potest, quomodo promulgatae sint leges de gradibus prohibitis, a Mose quippe praescriptae. Enimuero, quamuis postremum fateamur, de prioribus tamen promulgationibus nihil constat: adeoque tutissimum erit dicere, leges illas non fuisse vniuersales, antequam Christus illas vniuerso orbi publicauit.

§. 16.

Iam de voluntario particulari, quod datum Hebraeis. Iis leges dedit Deus partim caerimoniales, partim forenses, quae solos Iudaeos obligabant. Id probatur

1. Ex locis a Grotio allegatis *Deut. III. 7. Ps. CXXXVII.*

2. Ex ratione typica. Ritus enim Iudaici erant typus Christi exhibendi, adeoque non pertinebant ad gentiles, quibus illa promissio ignota erat.

Heineccii Prael. Gros.

G

3. Ex

3. Ex ratione legum ciuiliū. Lex forensis erat lex ciuilis. Lex ciuilis non obligat, nisi ipsam ciuitatem.

num. 2. Querit autem Grotius:

1. An et alienigenae ad Iudaismum transeuntes legibus his obligati? n. 2-7.

2. An et nos teneamur? n. 8.

3. Qualem vsum hae leges praestare possint? §. 17.

1. Alienigenas ad Iudaismum transeuntes non obligatos fuisse legibus caerimonialibus, probat inde,

a) Quia iis lex non promulgata, sed Israeli: *aud Israel*. Sed obici potest, 1. etiam decalogo haec verba praemissa: *audi Israel*. 2. Promulgatis quidem has leges non fuisse gentibus, sed tamen iis, qui ad Iudaismum transierint.

num. 3. b) Quia et inter Iudaeos vixerint circumcisi pii et timen-
tes dominum. Eoque refert exempla Syrophoenissae, Corne-
lii, Graecorum.

num. 4. c) Quia et extraneis licebat adorare in templo.

d) Quia nec Elisaeus Naamani, nec Ionas Niniuitis le-
ges has imperauit.

num. 5. e) Quia lege circumcisionis soli Abrahami posterii tene-
bantur. Vnde et coniecturam profert, gentes circumcisas, qua-
rum meminit HERODOTVS, ab Abrahamo ex Cethura descen-
dere. Quamuis autem verum sit, solos Abrahami posteros obli-
gatos esse circumcisione: falsum tamen est, gentiles circumcisos
ab Abrahamo descendere. Aegyptios enim a Chamo, Noachi
filio, descendere ex ipsa S. S. constat. MARSHAMVS igitur in
Canone chronico, et SPENCERVS in libro erudito de *legibus ri-
tualibus Hebraeorum* existimant, Iudaeos circumcisionem ab Ae-
gyptiis didicisse: sed id falsum esse docuit WITSIVS in *Aegyptia-
cis*. Tutissime itaque dixeris, Aegyptios imitatos esse Hebraeos
inter se viuentes, eosque circumcisione non vfos tamquam si-
gno et sigillo foederis, sed tamquam curatione physica, quem-
admodum etiamnum Aethiopes, qui Abissini vocantur, cir-
cuncidantur, quum tamen sint Christiani. Qua de re erudite
egit IOB. LVDOLFFVS in *Historia Aethiopica*.

num. 6. f) Quia gentibus data sit lex naturalis tantum, id quod
probat ex *Rom. II. 14*. Vbi non obscure prodit sententiam suam,
quod gentiles et per legem iuris naturae Deum propitium ha-
bere potuerint, quod veteres patres statuerunt, CLEMENS ALEX.

ORI-

ORIGENES, et IUSTINVS MARTYR. Sed hanc opinionem iure reiciunt theologi: quum extra christum nulla sit salus, nec lex naturae vlli mortalium ostendat medium propitiandi Deum. Lex ergo naturalis data est gentilibus, non tamen, vt per illam iusti fierent, sed vt ea seruata lumine augustiore digni haberentur.

Quum itaque haec argumenta pro parte vix admittenda sint: *num. 7.*
an recte inde intulit Grotius, *gentiles alienigenas obligatos non esse lege Iudaeorum particulari?*

Resp. distinguendum esse 1. inter *profelytos iustitiae*, et *profelytos*, quos *peregrinos* vocabant. Illi in Iudaeorum numerum recipiebantur, et hinc opus erat circumcisione et impletione legum omnium. Hi tantum baptismo initiati satisfecisse credebantur, si seruarent septem praecepta Noachi.

2. Distinguendum inter leges caerimoniales et forenses. Illis non nisi profelyti iustitiae tenebantur: his, quicumque in ciuitate viuere vellent cum Israelitis.

II. Quum itaque certum sit, profelytos non omnes legibus *num. 8.*
Iudaicis fuisse obligatos: quaestio altera nascitur, *an nos Christiani teneamur?* Haud obscure id negat Grotius. Dicit enim, Christum non tam nos a lege Mosaica liberasse, quam sepimentum sustulisse, vt Iudaei et gentes in vnam ecclesiam coalescerent. Sed omnino nos liberatos esse ab hoc iugo, patet inde, 1. quia, quoad caerimoniale, cessat ratio legis typica: cessante vero ratione legis, cessat quoque ipsa lex. 2. Quia Paullus in tota *epistola ad Galatas* grauiter disputat aduersus illos, qui circumcisionem, aliasque caerimonias etiam Christianis obtrusas vellent. 3. Quia, quoad legem forensensem, certum est, illam esse tantum civilem, qua non tenetur, nisi ciuitas, quae sibi hanc legem tulit.

§. 17.

III. Reliqua est tertia quaestio: *quem vsus leges istae Iudaicae num. 1:*
habere etiamnum possint? Eam enim plane inutilem esse, credere vix licet. Grotius itaque triplicem assignat vsus.

1. Primum, quod ea, quae illa lege praecipuntur, non sint *num. 1:*
iniusta. Deus enim non potest sibi esse contrarius, adeoque lege voluntaria quid statuere contra legem naturalem. Sed tamen distinguit inter leges praeceptiuas et permissiuas, et de

illis solum intelligendum monet, quod scripserit. Nam e. g. Iudaeis permilla erat polygama: permillum duortium ob quamcumque causam: quod tamen non ideo iustum arbitramur.

Sed nec haec Grotii distinctio rem conficit. Nam addenda erat altera inter leges caerimoniales et forenses. Illae iustae erant, nec repugnabant iuri naturae pro statu et conditione illorum temporum: repugnant autem hodie.

num. 3. 2. Alterum in eo consistere putat Grotius, quod et inter Christianos possint similes ferri leges. Sed recte excipit leges caerimoniales: nam illae hodie rationi repugnarent, Christo iam exhibito, adeoque non ferenda esset hodie lex, quae iniungeret circumcissionem, sacrificia, cet. Vnde et papismo grauis dica scribitur, quod Christianismus huius modi caerimoniis, ex parte e V. T. adsumtis oneraret.

nam. 4. 3. Virtutes Iudaeis praeceptas nos Christianos eo magis obligare, 1. quia promissiones nobis maiores factae, 2. quia nobis vires gratiae maiores sunt. Sed quamuis haec recte se habeant: distinguendum tamen inter virtutes morales et ciuiles. De moralibus nemo dubitat: at quod Grotius in hunc censum etiam refert decimas sacerdotibus dandas, id indicio est, Grotium etiam ad leges forenses et caerimoniales respexisse. Quis vero praeceptum de decimis morale putet? Quis illud Christianos obligare putet? Sed est hoc inuentum papatus, huius modi leges ad Christianismum torquere, ceu ex ipsis pontificiis fassus est PAVLLVS SARPIVS, (vulgo FRA PAOLO) in tractatu elegante de reatibus ecclesiasticis.

C A P V T II.

AN BELLARE VMQVAM IVSTVM SIT?

EXpenso generatim titulo, propositisque iis, quae generatim ad definitiones belli et iuris pertinent, sequitur iam altera quaestio: *an bellare vmquam iustum sit?* Haec ita tractat auctor, vt

1. Probet, bella geri posse, §. 1-6.

2. Argumenta aduersariorum refellat. §. 7. ad fin.

§. 1;

§. 1.

Quaestio ipsa est, *an bellare vmquam iustum sit?* ea enim nisi expediatur, frustra disputabitur de iure belli. Quemadmodum frustra quis disputaret de iure furti, quum ipsum furtum iniustum sit. Et sane quum plerumque bellum cum cladibus innocentium, cum furtis, rapinis, alisque coniunctum sit delictis: facile quis existimare posset, omne bellum iuri repugnare, idque plures statuerunt, veluti Anabaptistae, Mennoistae, et Socinianis Christophorus Ostorodus, et alii, contra quos auctor contrarium demonstrat ex iure naturae, §. 1. ex historia, §. 2. ex consensu et iure gentium, §. 3. 4. ex iure diuino voluntario §. 5. 6.

Quod ad ius naturae attinet, prima argumentatio Grotii num. 1. haec est:

Quae congruunt ei primis naturae, et post cognitis, illa sunt iuris naturae.

Bellum illis primis naturae congruit.

Ergo est iuris naturae.

Quaeritur itaque, 1. quid sint *prima naturae*, (*πρῶτα τὰ φύσιν*;) quid *post cognita*? Respondemus, esse *prima naturae* propositiones quasdam practicas, quarum veritatem humana ratio statim agnoscit, simul ac ratiocinari incipit, quaeque adeo non ab aliis nobis inculcandae sunt, sed sponte incidunt. Vnde eleganter CIC. in *orat. pro Milon. cap. 4.* est haec nūc scripta, sed nata lex, quam non didicimus, accepimus, legimus, verum e natura ipsa arripimus, hausimus, expressimus, ad quam non docti, sed facti, non instituti, sed imbuti sumus. Perinde enim est, ac siliceret, esse quaedam *prima naturae*. Rationem vero, cur istae propositiones, quae *prima naturae* vocant philosophi, statim nobis innotescant, hanc assignat CICERO *de finib. lib. V. cap. 6.* quod ipsae per se inuiteni ac alliciani appetitum animi. E. g. vt incolumitatem nostram velimus, et conseruationem omnium partium, vt abhorreamus a dolore, et quae sunt huius generis alia. In haec enim omnia et sine ratiocinatione ita fertur appetitus noster, vt nihil antiquius nobis sit illa nostrum conseruatione. Elegans locus SENECAE *Epist. 121.*

Vnde facile patet, quid sint *post cognita*, quae Cicero a num. 2.

mis naturae distinguit. Ea enim sunt conclusiones de virtute, vitiis, de honesto et vititate vera, quae ex veris principiis per ratiocinationem eliciuntur. Haec non sunt prima naturae. Nuntur enim huius modi fundamentis, in quae non fertur appetitus humanus, e. g. quod virtus sit praefenda vititati propriae, quod voluptates sint fugiendae. Has enim propositiones non omnes homines veras putant, natura adducti, et quod eae adpetitui sui congruant, sed profundiore instituta meditatione de natura et beatitudine humanae mentis.

num. 3. Quum itaque quid honestum sit, id ex post cognitis pateat: porro quaerit auctor, quotuplex sit honestum? et resp. id vel *strictè*, vel *latius* accipi.

Honestum strictè dictum consistit in puncto, id est, ita comparatum est, ut si a lege vel minimum decedas, id degeneret in vitium.

Honestum latius dictum, quod admittit aliquam latitudinem.

Res illustrari potest similitudine. E. g. inter lineam rectam et curvam nihil interest medium. Tam strictè enim accipitur rectitudo, ut si ab ea linea vel minimum defleat, illa statim fiat curva. At album et nigrum admittunt aliquam latitudinem, e. g. si colori albo addas guttulam nigredinis vel attramenti, color quidem paullo minus albus est, sed non statim fit niger.

Eodem modo se res in honesto habet. Quaedam tam strictè honesta sunt, ut si vel minime a lege defleas, statim fiant inhonesta, e. g. neminem laede. Quaedam aliquam admittunt latitudinem, e. g. moderamen inculpatae tutelae. Nam si quis adgressorem occidit, quem repellere poterat, abscissa manu, non ideo statim poena dignus est, vel contra iustitiam egit, quia hic ad vitium omnia resecari nequeunt in tanta animi perturbatione.

num. 4. Hisce itaque praemissis, iam demonstrat auctor, 1. bellum congruere *primis naturae*, num. 4. 2. idem convenire *post cognitis*. num. 5. 6.

Quod congruat primis naturae, inde demonstrat, 1. quod omne animal sui conservationem et defensionem intendit, et appetitus eo maxime feratur. Id non solum in hominibusprehendimus, verum etiam in ipsis brutis, etiam tenerimis. Quo pertinet locus elegantissimus GALENI, a Grotio hoc n. 4. allegatus.

2. Quod

2. Quod omne animal rationale et irrationale facultate quadam sese conferuandi defendendique instruxit natura, vel Deus potius, qui nihil frustra fecit. Hinc alia cornu petunt, alia calcitrant, alia dentibus, alia ungulis, alia aculeis pro armis vtuntur: hominibus autem ingenium et manus ad defensionem data. Quis itaque neget, velle Deum, vt quisque se conferuet ac defendat aduersus omnem vim? Quare inde argumentari licet:

Quod conuenit appetitui sese conferuandi defendendique, ab ipso Deo nobis insuo: id conuenit primis naturae:

Bellum huic appetitui sese conferuandi defendendique diuinitus insuo conuenit,

Congruit itaque primis naturae, adeoque, quod inde consequitur, est iuris naturae.

Iam porro Grotius demonstrat, bellum congruere post cognitum vel honestati: idque argumento societatis humanae. num. §. 6.

Societas humana in eo consistit, vt alter cum altero honeste et comode viuere, et iure suo perfrui possit. Quumque in prolegomenis §. 6. demonstratum sit, voluntati Dei, ipsique naturae humanae consentaneum esse, hominem viuere socialiter: sequitur sane inde principium: *quidquid societatem destruit, est contra ius naturae, quidquid eandem conseruat, est iuris naturae.*

Iam consideremus statum hominum, qualis futurus esset; si non liceret vim vi repellere. Tunc nemo suo iure tutus perfrueretur, tunc nec vitae, nec bonorum vlla esset securitas, tunc vita piscium viueretur, maior deuoraret minorem.

Quia itaque sine huius modi defensione non consisteret societas, defensio autem, qua vim vi repellimus, nihil aliud est: quam bellum: hinc planum est alterum Grotii argumentum: 3

Vim vi repellere consentaneum est iuri naturae.

Vim vi repellere est bellum gerere.

Est ergo bellum gerere consentaneum iuri naturae.

§. 2.

Sic Grotius bellum geri posse demonstrat ex iure naturae. num. 1.
Sequitur altera eiusdem demonstratio ex historia. Quamuis enim

cx

ex historia non iura, sed facta probari posse, supra observatum sit: aliud tamen dicendum de eo casu, si ex historia sacra demonstrari potest, Deum bella non improbasse. Id vero probat,

1. Exemplo Abrahami, qui debellatis regibus quatuor benedictionem impetravit: a Melchisedecho. *Genes. XIII. 22.* Vbi quidam obiciunt, Abrahamo tamquam priuato ius belli gerendi non fuisse. Sed alii addunt, illum non fuisse priuatum, sed cum familia sua quasi singularem rem publicam constituisse: unde et foedera eum fecisse legimus, quod non est priuati. Saltem inde patet, bellum in se Deo non improbari.

2. Exemplo Israëlitarum, qui Amalecitas vim sibi inferentes profligarunt, Deo hoc factum probante. *Exod. XVII.*

num. 2.

3. Ex legibus, quibus Deus iura belli praescripsit. *Deut. XX. 10. 15.* quod in istis legibus de belli causis nihil sanxit.

4. Quod Israëlitaë, Deo probante, fines suos tuerentur sub Iephtha, *Iud. XI.* quod Dauides bellum, Deo probante, gereret ob violatos legatos. 2. *Sam. X.*

5. Quod bellicae actiones *Hebr. XI. 33. 34.* tribuantur fidei. Ex fide autem nihil, nisi bonum, proficisci potest.

6. Quod Dauides praeliatus est praelia Domini. 1. *Sam. XXV. 28.* Addi potest

7. Quod nec Io. Baptista venientes milites, nec Christus accedentem ad se centurionem Capernaiticum nuncium mittere militiae iussit.

8. Quod et Cornelius centurio Deo placuit, quum militiae adhuc vacaret. Quae omnia locum non habent, si bellum in se iniustum esset.

§. 3.

num. 1.

Tertium argumentum Grotius desumit ex consensu gentium. Eumque consensum probat, 1. ex testimoniis Ciceronis, Florentini et Cui Ictorum, nec non Iosephi, historici Iudaei.

2. Ex iure illo ciuili, quod et in quadrupedibus distinguit inter vim, quae infert iniuriam, et quae illatam propulsat: Vid. *L. 1. §. 8. 11. D. si quadrup. pauper. fecisse dicat.*

Sed hoc argumentum 1. non est necessarium, quia, postquam semel probatum, bellum iure naturali et diuino positum licitum esse, parum ad rem facit consensus gentium. 2. Magis illu-

illustrat, quam probat, quia saepe gentes in ea consenserunt; quae non sunt iusta. 3. Non sufficiens: Ciceronis enim et duorum ICtorum testimonia bellum consensu omnium gentium probatum esse non euincunt. Nec 4. sequitur, ut bellum consensu gentium probatum sit, quia ius civile Romanorum in quadripedibus quoque distinguat, quae alteram adgressa sit.

§. 4.

Iam ad *ius gentium*, quod duplex esse ait Grotius, *diuinum*, et *humanum voluntarium*. Prius et nos agnoscimus, et num. 1. 24 illud non aliud est, quam ius naturae: posterius supra exploramus. Priori non repugnare bellum, iam probauimus: iam itaque videbimus, quomodo id de posteriore probet.

Nimirum bellum ipsum, inquit, iuris naturae esse, formam autem belli ex iure gentium. Nam gentes

1. Statuisse constat, quibus armis utendum sit. Hinc hodie bella non geruntur bestiiis, veluti Elephantis, non utuntur gentes honestiores falcibus, aliisque instrumentis, non sagittis venenatis, cet.

2. Iura quaedam introduxisse arbitraria, e. g. ne capti fiant ferui, ne incendiis absque necessitate grassetur in terra hostili.

3. Bella distinxisse in *sollemnia* et *minus sollemnia*: sollemne esse voluerunt, quod indicitur sollemniter. Haec omnia quum non fluant praecise ex iure naturali, Grotius deriuat ex iure gentium, eoque refert omnia loca ICtorum, veluti l. 5. D. de *inst. et iur.* ubi bella dicuntur ex iure gentium esse.

Sed nemo non videt, Grotium confundere ius gentium, et mores gentium. Illud ex lege est, hi ex arbitrio: illud obligatorium, hi minime. Omnia haec moribus inualuerunt, quia cum humanitate conueniunt, sed non ideo contra ius gentium peccant Russi et Turcae, quod captiuos in seruitutem detrudent, cet.

§. 5.

Iam Grotius magno cum adparatu sese accingit ad expendendam quaestionem: *an et iure diuino concessum sit bellum?* num. 25 Poterat haec quaestio videri superuacua. Nam si probatum est, Heinzeii *Prael. Gros.* H bel-

bellum esse iustum iure naturae: non sane potest iure diuino voluntario iniustum esse, quum Deus velle non possit contraria.

Sed recte resp. Grotius, iam supra ostensum esse (*lib. I. cap. I. §. 17. n. 2.*) regulam hanc quidem valere in iure praeceptiuo, sed non in permissiuo. Nimirum sunt quaedam, quae iure naturae permittuntur, et tamen a Deo prohibentur lege positiva, e. g. iure naturae potest quisque orare, ubicumque velit: sed iure diuino orandum erat Hierosolymis. Iure naturae licet vlcisci hostem: at iure positivo Deus dicit: *amate inimicos, benefacite oñibus vestris, precamini pro iis, qui vos laedunt, sic eritis filii patris coelestis. Matth. V. 44.*

Quum itaque et bellum non sit iuris diuini praeceptiuum, sed permissiuum: non sequitur, vt prohiberi non potuerit iure diuino voluntario.

Sed nihilominus tamen demonstrat auctor, et iure diuino voluntario bellum permitti, et ante omnia obiectiones quasdam remouet.

num. 1. Prima obiectio desumi solet ex *Genes. VIII. 5. 6.* Ex eo enim loco quidam colligunt, absolute prohiberi sanguinis humani effusionem: quumque bellum sine sanguinis effusione geri nequeat, etiam bellum prohiberi. Et quamuis eodem loco dicatur, qui sanguinem fuderit, eius sanguis fundetur: respondent tamen, hic non adesse praeceptum, sed comminationem, non velle Deum, vt homicidae interficiantur, sed praedicere, quid iis immineat. Sed respondet Grotius, vtrumque falsum esse.

1. Prohibere Deum effusionem sanguinis iniustam, vt praecepto illo sexto: *ne occidito*, non autem iustam, de qua hic quaestio sit.

2. Non minari tantum Deum, sed et praecipere, vt sanguis homicidae fundatur, id enim Deum postea lege Mosaeica clarius ostendisse, quum iuberet homicidas gladio feriri.

Sed deuiuo obiciunt, ex historia sacra adparere, initio mundi conditi homicidium non fuisse capit le, idque probant exemplo Caini, qui admissio parricidio tamen a Deo non fuerit morti addictus.

Vt itaque Grotius hanc obiectionem funditus tollat, totam histo-

historiam huius supplicii homicidarum explicat operose *num.*
3-10.

Nimirum 1. supponit, non iniustum esse, homicidam sup- *num. 3.*
plicio affici, ob ius talionis, quo nihil est iustius.

2. Concedit quidem, Deum Caino pepercisse, sed causam fuisse existimat, 1. hominum raritatem, 2. quia nondum tam frequentia fuerint homicidia, ut exemplo opus fuerit. Hinc et alias gentes quam plurimas homicidium non morte, sed multa puniuisse. Cuius rei argumentum est in legibus *Alamannicis* a LINDENBROGIO editis, ex quibus adparet, nullam gentem origine Germanicam homicidis supplicium capitale irrogasse.

3. Hoc factum Caini aliquamdiu instar exempli fuisse, et *num. 4.*
hinc primos mortales existimasse, non debere homicidas gladio feriri. Quam in rem allegat exemplum Lamechi, *Gen. III. 24.*

4. Quum autem iam ante diluvium nascerentur gigantes, *n. 5. 6. 7.*
genus hominum ferox et improbum, quod omnes promiscue adgressum sit: Deum permisisse, ut homicida et quilibet delinquens occideretur, idque probat exemplo Abrahami, *Gen. XIII. 11.* Moïsi, qui Amalecitas aggressus sit bello, *Exod. XVII. 9.*

5. Denique Deum et leges tulisse de homicida plectendo, *num. 8. 9.*
Leu. XVIII. 24. seqq. Num. XXXV. 31. 33.

6. Easque leges deinde imitatas esse gentes alias. Vnde fere *num. 10.*
vbique locum habuerit supplicium capitale.

Inde ergo colligit Grotius, non absolute Deum prohibuisse effusionem sanguinis, sed secundum quid, nempe eadem iniustam, adeoque hunc locum non adplicari posse bello, quod iustam causam supponat.

Sed sunt quaedam in hac Grotii tractatione, quae animadversionem merentur. Nam

1. Quod Caino pepercit Deus, non ob paucitatem hominum factum, sed quod poena et supplicium supponunt magistratum civilem, qualis nondum erat Caini temporibus: nec antea lex erat lata de supplicio homicidae.

2. Quod Grotius existimat, primos mortales non summisse supplicium capitale, id non probari potest. Quum enim mundus ante diluvianus steterit annis 1657. quumque tam longo

temporis spatio variae floruerint res publicae : quis dubitet , quin et poenae suppliciumque locum habuerint.

3. Ex Lamechi exemplo non constat , nullum tunc locum habuisse supplicium capitale. Nam Lamechus tantum minas spargit , vt ille medicus apud COMINAEVVM *Hist. Franc. lib. X.* qui Ludouico XI. regi minabatur , illum post discessum suum non octo dies victurum.

§. 6.

Sequitur alterum argumentum contra bellum ex N. T. vbi Praemittuntur quaestiones , 1. *an omnia praecepta in Evangelio habeant naturalem rationem. n. 1. 2.*

2. *An Christus sit nouus legislator. n. 3 -- 5.*
- num. 1. Quod ad prius attinet , 1. succenset Grotius iis , qui in Evangelio praeter articulos fidei et sacramenta quidquam contineri negant , existimatque , eo etiam leges et praecepta proprie sic dicta contineri , e. g. *ama Deum , diligite vos inuicem , nouum hoc praeceptum do vobis , vt vos inuicem diligatis. 2.*
- num. 2. Deinde agnoscit quidem , nihil continere Euangelium , quod aduersetur rectae rationi : sed ideo non sequi docet , vt Euangelium nihil vltra inculcet , quam quod ex ratione fluat.

- num. 3. Posterius Grotio facile vnusquisque concedet. Multa enim docet Euangelium , ad quae ratio non pertingit , e. g. fidem in Christum , beneficentiam aduersus hostem , vitiationem concupiscentiae , de qua ipse Paullus : *ignorassem , concupiscentiam esse peccatum , nisi lex dixisset , ne concupisce.*

At de priore thesi obseruandum : distinguendum esse , vtrum Euangelium opponatur legi , vt *Ioann. I. lex per Mo'en lata , gratia per Christum facta* ; an accipiat pro libris Noui Testamenti , adeoque litris V. T. opponatur. Priori sensu Euangelium nulla complectitur praecepta proprie sic dicta , sed est doctrina de gratia per Iesum Christum. Posteriori agnosci potest , multa in libris N. T. praecepta occurrere , a Christo repetita et explicata.

- num. 4. Maioris momenti est quaestio altera : *an Christus sit nouus legislator ?* Adfirmant Romanenses et Sociniani , quumque eandem sententiam ex Arminianis plerique tueantur , non mirum est , Grotium quoque easdem inflare tibias.

At negant Protestantes omnes , Christum non esse nouum legilla-

legislatores, sed ad officium eius propheticum tantum pertinuisse, ut leges interpretaretur. Rationes satis praegnantibus sunt.

1. Opponuntur officia Moysis et Christi, lex et gratia. *Ioann. 1.*
2. Officia Christi non alia commemorat S. S. quam regium, sacerdotale, et propheticum. Regium exercet in statu exaltationis, sacerdotes non ferunt leges, nec prophetae est leges ferre, sed interpretari.
3. Christus notanter dicit *Matth. V. 5. non veni solvere legem*, (aliaque novas substituere,) *sed implere.*

Iam videbimus, quomodo contrarium probet Grotius. 1. Prouocat ad verba *Matth. V.* toties repetita: *audistis dictum fuisse veteribus: ego vero dico vobis.* Sed resp. Christus ibi nullum nouum proponit praeceptum, sed Mosaica vindicat a falsa Phariseorum interpretatione, et interpretatur.

2. Dictum fuisse veteribus: *diliges proximum tuum, et odio habebis inimicum tuum.* Sed *Leu. XVIII. 21.* ubi hoc praeceptum occurrit, nihil legitur de odio inimicorum. Est itaque additamentum Phariseorum, quod merito Christus data meliore interpretatione sustulit. Obiicit Grotius: at ipse Deus praeceperat inimicitiam cum Amalekitis, *Exod. XXV. 11.* et cum septem populis Cananaeis, *Exod. XXXIII. 11.* Sed resp. distinguendum inter odium morale, et inimicitiam politicam.

3. Legem sumi vel pro praecepto carnali, quod actiones tantum externas dirigit, vel pro spirituali, quod internam inculcat puritatem et sanctimoniam. Prioris generis fuisse Mosaicam ex interpretatione Phariseorum: posteriorem Christum restituisse. Sed resp. 1. Ex intentione Dei lex Moysis non fuit carnalis, sed spiritualis. Dixit enim Deus: *diliges Deum tuum de toto corde, de toto animo, ex omnibus viribus*: quid magis spirituale et internum? 2. Christus itaque legem non nouam dedit, quae sit spiritualis, sed eam interpretatus est ex mente primae legislationis.

4. A Christianis virtutem exigi maiore gradu, quam ab Ebraica gente. Resp. maius et minus non variant speciem. Eadem ergo lex est Mosaica et Christi, adeoque non Christus fuit nouus legislator, sed interpret legis Iudaicis glossis deprauatae. De quo plura theologi.

§. 7.

His praemissis probat, Euangelio non sublatam esse bellandi facultatem.

num. 1. I. Ex 1. *Tim. II.* 1. 2. 3. Exinde colligit, 1. Deum iubere esse leges et magistratus, 2. eosdem subditis praestare debere vitam tranquillam. Idque sit ita, ut subditi sint securi vel inter se, vel ab aliis exteris.

num. 2. Inter se id aliter fieri nequit, quam iudiciis et iure gladii, quod probat Paullus *Rom. XIII.* 4. Quumque iudicia inter gentes diuersas locum non habeant: consequens est, ut bello sint compescendae. Atque hinc ita argumentare licet:

Si fas est gladio coercere subditos, tranquillitatem turbantes: fas etiam est bello coercere gentes turbantes tranquillitatem humanam.

Prius verum est,

Ergo et posterius.

Consequentia inde patet, quia alias plus liceret extraneo, quam ciui, et quod alias principi liceret minus periculum a nobis auertere, non autem maius, quod absurdum.

num. 3. 4. II. Ex eodem *Rom. XIII.* vrget, quod PAVLLVS iubeat honorare et obsecundare magistratui, tamquam ordinationi diuinae. Quo sensu autem est ordinatio diuina? Non ratione permissionis tantum, qualis etiam in actibus vitiosis est, quos Deus permittit, nam sic non esset honorandus magistratus, sed tantum ferendus, verum ratione institutionis et voluntatis diuinae. Deus vult, ut sint magistratus, Deus adprobat eorum officium. Si obiciatur, atqui tempore Paulli fuisse imperatores et magistratus ethnicos, crudeles, tyrannos: respondemus, tanto magis inde sequi, ut Deus adprobet magistratuum officium, quia ne gentilibus quidem et crudelibus imperatoribus honorem et obsequium detrahi voluit. Eleganter Grotius sub finem n. 4. *sicut ergo olim pia erant sacrificia, cet.*

Ex his ergo iam ita argumentum ducimus:

Si Deus probat magistratus officium, probat etiam defensionem a magistratu per bellum susceptam.

At verum est prius.

Ergo et posterius.

Co-

Consequentiam inde probamus, quia ob id praecipue in ciuitates coaluere, et principes constituere gentes, vt defenderentur ab aliorum insultibus.

Tertium argumentum petitur ex *Luc. III. 14.* quod Ioannes ^{num. 5.} militibus ad se venientibus non iniungit, vt nuncium mittant militiae, sed vt militares leges obseruent.

Potest obici, Ioannis doctrinam a doctrina Christi potuisse discrepare. Sed recte respondet Grotius, 1. eadem praedicasse Ioanuem et Christum, poenitentiam et fidem. 2. Ioan-nem fuisse ministrum Noui Testamenti, *Matth. XI. 13.* et Euangelii. *Luc. III. 18.*

Quartum argumentum inde generatim ducitur; quod tota ^{num. 6.} S. S. abhorreat a turis, caedibus, rapinis, alisque sceleribus, quae Deus omnino vult omitti, et impediri. Iam vero non omitterentur, nisi ius gladii et aduersus subditos, et aduersus externos haberet magistratus. Ergo voluit Deus, vt ius gladii haberent. Itaque sic argumentatur Grotius:

Qui vult finem, vult etiam media.

Deus in tota S. S. vult finem, ne furta, caedes, rapinae fiant.

Vult itaque et medium, nempe ius gladii et belli.

Esse vero id vnum medium, inde probatur, quod scelera etiam nunc vix omittuntur, postquam id ius gladii magistratibus relinquitur. Quid fieret, si nullum esset ius gladii?

Quintum argumentum desumitur exemplo Iudaicae rei publi- ^{num. 7. 8.} cae, in qua ius gladii viguit, quamdiu nondum excisa esset res publica. Quamuis enim ius gladii non esset penes Iudaeos, vt fatentur ipsi *Ioann. XVIII. 31.* quum municipia non haberent merum imperium, vt singulari dissertatione docuit ZACH. HYBLER. *Diff. Part. I. diff. 1.* fuit tamen apud Romanos.

Iam Christus iam ante excisam urbem officium suum inchoauerat et absoluerat. Quum itaque venisset, vt nos liberaret a iugo legis, omnino etiam docere debuisset, iam legem de iudiciis, de suppliciis capitalibus, de iure gladii cessare debere. Quum itaque id non docuerit, omnino voluit, vt essent, et hunc ius gladii non repugnat doctrinae N. T.

Immo tantum abest, vt Christus docuerit, ius gladii cessare debere, postquam aduenerit, vt potius tum ipse, tum apo-
stoli

stoli eius re ipsa docuerint, et factis ostenderint; sibi placere iudicia et ius gladii.

1. Dum ipsi se stiterunt coram tribunalibus, Christus coram Pilato, apostoli coram synedrio, Paullus coram Anania. *Actor. XXIII. 3.*

2. Dum homines remiserunt ad iudices. Hinc Christus ei, qui rogabat, ut familiae erescundae inter se et fratrem praecisset, respondit: *homo, quis me iudicem constituit?*

Obiici posset, Christum tamen prohibuisse ultionem, *Matth. V. 38. seqq.* Sed resp. distinguendum esse inter legem et consilia. Consilium istud exsequi recte possumus, sed non ideo peccat, qui iure suo utitur, nec iudex, qui secundum legem animaduertit.

num. 9. *Sextum* exemplum Cornelii centurionis, iam aliquoties vrsimus. Conuersus enim ad Christum non legitur mutasse militiam, immo nec id ei imperatum a Petro, quum tamen diceret Cornelius: *iam adsum auditurus, quaecumque tibi praecepta sunt a domino. Actor. X. 33.*

Obiiciunt, Lucam quidem non meminisse missionis a Cornelio flagitatae, sed credibile tamen est, eum flagitasse missionem. Sed resp. 1. id nec probari posse, nec 2. verosimile esse, quum alias Lucas huius modi quid narrare soleat. Sic cum magi conuerterentur, refert Lucas, eos nuncium misisse huic vitae generi, et combussisse libros magicos. *Actor. XVIII. 19.* An hic praetermisisset, quod Cornelius deseruerit militiam, si prauum hoc esset vitae genus?

num. 10. *Septimum* argumentum Grotius petit ab exemplo Sergii Pauli, procos. Cypri a Paulo conuersi, et vnde plerique dicunt apostolum nomen Pauli adsumsisse, quum antea diceretur Saulus. *Actor. XII. 6. seqq.*

Proconsul habebat ius gladii et militiae; *l. 8. D. de offic. procos.* Si itaque hoc iniustum esset, non potuisset non post conuersionem magistratu se abdicare. Quum vero se abdicasse non legatur: omnino ius gladii nihil iniusti complectitur.

num. 11. *Octauum* est a Pauli exemplo desumptum, qui et 1. insidias Iudaeorum ad tribunal detulit, et 2. praesidium militare ab eo accipere non dubitauit. *Actor. XXIII. 18-23.* An id passus esset Paullus, qui omni occasione veritatem praedicandam dicit. *2. Tim. III. 2.*

Notum

Nonum argumentum. Qui probat media, is et finem pro-^{num. 11.}bat. Iam nemo dubitat, tributa dari, ut magistratus haberet, quo tueretur bonos, coerceret malos. *Rom. XIII. 3. 4. 6.* Quum itaque probet tributa, procul dubio etiam approbat eorumdem finem, puta bellum.

Decimum argumentum e verbis Paulli *Actor. XXV. 11.* de-^{num. 12.}sumtum non magni momenti est. Nam non sequitur, Paullus non recusat mori, ergo probat iudicia, quae supplicium capitale infligunt. Posset quis ad latrones quoque dicere: nisi tibi dederò omnia, non recuso mori.

Vltimum argumentum rectissimum est, si recte proponatur.^{num. 14.} Christus non sustulit politias, ergo non sustulit bellum. Quod non sustulerit politias, inde patet, quod nihil de ea re sanxit, nihil praecepit, nihil vetuit. Immo quod statum rerum publicarum, qualis tunc erat, non improbavit, sed ipsi Pilato dixit: *non haberes potestatem vitae et necis in me, nisi tibi caelius data fuisset.*

§. 8.

Sequitur iam altera pars capitis, quo aliorum argumenta bello opposita refutantur, et quidem octo

1. *Primum* obicere solent verba *Iesaiæ II. 4. dominus iudica-*^{num. 1.2.}*bit inter gentes, et animaduertet inter populos. Tunc gladios mutabunt in ligones, et lanceas in falces. Neque enim populus gladium euaginat, neque discunt amplius bella gerere.*

Respondet Grotius: 1. aut id intelligendam esse hypotheticè, si omnes homines essent Christiani veri, neminem alteri facturum iniuriam, adeoque omnino cessatura bella, aut 2. pure, et tunc implementum vaticinii adhuc inflare eo tempore futurum, quo laetior futurus sit status ecclesiae. Inde ergo non sequi, ut bellum temporibus N. T. cessare debeat, aut ut repugnet Euangelio.

Sed neutra responsio vera videtur et sufficiens. Non prior, quia Dominus absolute praedicat id futurum, non, fieri id posse, si omnes essent Christiani veri. Non posterior, quia, ut ex versu antecedente patet, Iesaias non loquitur de vltimo illo, et laetiore statu ecclesiae, sed de eo, quo gentes dicturae sint, *venite, camus in montem Domini, ad domum Dei Iacob, ut nos doceat vias suas, ut ambulemus in eius semitis.* Loquitur de eo

Heineccii Prael. Grot.

I

tem-

tempore, quo lex exitura esset ex Sion, et verbum Domini ex Hierosolymis. *Tunc*, inquit, *Dominus indicabit inter gentes*, cet. Id omne impletum est, quum apostoli exeuntes Hierosolymis Euangelium annuntiarent vniuerso orbi. Ergo ab eodem tempore impletum fuisse oportet vaticinium de gladiis confusis in ligones.

Quid ergo? Totum caput est spiritualiter intelligendum, non secundum litteram. Nam *v. 2.* dicitur, eo tempore altiorum fore montem Domini omnibus reliquis montibus. Quod secundum litteram intelligi nequit. Itaque verba nihil aliud significant, quam Christum allaturum pacem spiritualementem, pacem illam omni ratione eminentiorem. Adeoque inde nihil inferri potest contra bella.

Alterum argumentum, *Matth. V. 38.* Sed resp. Grotius; non magistratibus haec dici, sed ipsis laevis, vt potius concoquant iniuriam, quam vltionem spirent. Consilium sane optimum et saluberrimum, sed non lex.

Simile sane quid reperimus in *1. Cor. VI. 1. seqq.* vbi Paulus reprehendit prurum litigandi coram magistratibus ethnicis, non quod id iniustum esset, aut quod officium magistratus improbareret, quod sane maxime aestimat, vti supra vidimus, sed quod lites hae scandalum praeberent gentilibus. Consilium ergo et hoc est, non lex.

Simile quid dicendum de verbis sequentibus: *qui velit tecum litigare*, cet. Nam *1.* non magis hic improbantur iudicia, quam si amicus amico suaderet, ne ob rem leuem tribunalia fatigare velit. *2.* Loquitur Christus procul dubio de iis persecutionibus, quas tamquam Christi discipuli laturi essent. Iis omnino non resistendum. Et hinc primi Christiani condemnati quotidie ad gladium, ad viuicomburium, ad bestias, bonisque omnibus propter Christum spoliati, non resisterunt persequutoribus, sed omnia animo tranquillo, et patientia plane inuicta pertulerunt. Sic sane qui iis eripiebat tunicam, ei et pallium concessere. *3.* Ipse *VLP. IANVS l. 4. §. 1. D. de alienat. iudie. mutand. causis. fact.* non improbandum dicit eius factum, qui tanti habuit re carere, ne propter eam saepius litigaret, hanc enim verrecundam cogitationem eius, qui lites execratur, non esse vituperandam. An ideo Vlpianus iudicia execratur?

Eodem

Eodem modo intelligenda verba sequentia : *qui angariabit* num. 5.
te ad milliare unum , abi cum eo duo. Recte respondet Grotius,
 Christum velle , vt leuem potius iniuriam ferant Christiani ,
 quam litigent. Hinc non dicere : *abi cum eo centum* , quae
 grauior esset iniuria ; sed *abi duo* , quia non tam incommoda
 futura sit haec deambulatio , quam lis molestissima.

Sed simul obseruandum , angarias , fuisse publicam prouin-
 cialibus impositam onerum vehendorum baiulandorumque necessi-
 tatem. l. 7. l. 18. §. 4. 21. *D. de muner. et honor. l. 10. §. 2. D. de va-*
cat. et excusat. muner. Dum itaque iis non resistendum , sed ali-
 quid indulgendum esse monet Christus , qui nos angariat ,
 perinde est , ac si diceret , ne resistite summis imperantibus et
 magistratibus , vt adeo nec iudicia , nec bella improbet.

Sequuntur verba : *petenti abs te dato* , cet. Sed miror haec num. 9.
 verba adduxisse Grotium , quum nihil inde inferri possit aduer-
 sus iudicia. Si enim vel maxime petens mutuam repulsam a me
 ferat , non tamen habebit aduersus me actionem. Sed et verba
 ipsa ita comparata sunt , vt saluis iudiciis et saluo iure bellandi
 vnusquisque alteri dicere possit , petenti abs te dato. Nam idem
 est , ac si diccret , officia humanitatis alteri ne negato.

Ex eodem capite inferri posset : Christum tamen prohibere num. 7.
 ius talionis : *oculum pro oculo , dentem pro dente* ; adeoque et
 omnem talionem , propulsionem violentiae violentam esse
 prohibitam.

Sed resp. 1. Falsum est , Christum prohibuisse ius talionis.
 Nam et ipse statim cap. 7. inculcat v. 2. *quo iudicio iudicabitis ,*
eo iudicabimini , qua mensura metimini , eadem metientur vobis.

2. Sed , vt recte Grotius obseruat , Iudaeis permissam fuisse
 priuatam talionem , e. g. vt laesus posset alterum similiter
 laedere , immo vt si quis occisus esset , eius proximus agnatus
 vindicem ageret , et homicidam ultore ferro persequeretur. Hanc
 ultionem suis inhibet Christus , quippe permissam Iudaeis ob
 duritiem cordis , vt diuortium , et alia.

3. Nihil ergo sibi vult Seruator , quam ferendam potius to-
 lerabilem iniuriam , quam vt statim ad vindictam prorupamus.

Obiici posset : sed absurdum tamen esse , percutienti alteram num. 8.
 maxillam sponte offerre , et ita patiendo nouam prouocare in-
 iuriam.

Sed elegans est Grotii observatio, *maxillam praeberere* esse phrasin Hebraeam, quae nihil aliud significet, quam patienter ferre iniuriam. Id quod eleganter probat loco *Is. L. 6. ubi* Christus dicitur *maxillam praeberuisse percutientibus*.

num. 9. Tertium argumentum ex eodem *Matt. capite V. 43. 44. au-*
10. 11. *distis dictum esse*, cet.

Respondet Grotius 1. proximum hic significare Hebraeum, et tamen inter Hebraeos ipsos viguisse iudicia et ius belli. *Iud. XXXI. 2.* Christum id praeceptum porrexisse ad alios homines, adeoque non minus amorem hunc tollere bella, quam amorem Iudaeis praeceptum erga Iudaeos. 3. Amorem hunc nobis praecipi exemplo Dei patris caelestis, qui quum omnes amet, non tamen ideo non iustitiam exercet in puniendis coercendis-que malis. Ita et nobis facere non nefas est.

num. 13. Quarta obiectio petita ex *Rom. XII. 19.* Respondet Gro-
13. tius, 1. eo tempore, quo haec dixit Deus, *meum est ultisci & ego rependam. Leu. XVIII. 18. Deut. XXXII. 35.* iam et iudicia capitalia fuisse, et bella, adeoque non obitare haec verba posse bellis. 2. Et hostes iubentur diligi, *Exod. XXIII. 4. 5.* nec tamen eo tempore cessabant supplicia capitalia et bella. 3. Quia verba sequentia statim docent *cap. XIII. 1.* verba haec intelligenda esse cum exceptione. 4. Distinguendum ergo esse inter ultionem boni publici causa exactam, et ultionem priuatam. Illa non prohibetur, sed haec.

num. 14. Obiectio 5. ex 2. *Cor. X. 3.* Sed 1. Paullus non loquitur de imperantibus Christianis, sed de apostolis, qui Christianos non faciebant armis carnalibus, sed spiritualibus. 2. Non carnalia dicuntur arma, quasi mala et vetita, quo sensu peccata vocantur opera carnalia: sed ut opponantur armis spiritualibus, qualia sunt preces, lacrymae, verbum Dei.

3. Inprimis Paullus in hoc textu alludit ad potestatem illam Apostolis concessam miraculose puniendi refractarios, cuius plura exstant exempla. Sic Petrus verbis occidit Ananiam, eiusque uxorem Sapphyram. *Act. V. 5.* Sic Paullus incesti reum Satanae tradidit. *1. Cor. V. 5.* Sic idem excœcavit Elymam. *Act. XIII. 11.* Eleganter haec extraordinaria et miraculosa potestas vocatur *virga apostolica*, *1. Cor. XIII. 21.* deque ea praedare egit scriptor Anglus GUIL. CAVE in *Antiqu. apostol. in-*
vita.

vita Petri. Dicit ergo apostolus, haec arma non esse carnalia, sed spiritualia. Eis opus erat, quamdiu nulli erant magistratus Christiani. Postea id donum miraculosum defecit.

Sexta obiectio ex *Ephes. VI. 2.* Sed resp. 1. Pugna vel lucta contra diabolum, mundum, et carnem non tollit luctum et bellum aduersus hostes, nam Paulus dum dicit: *non est nobis pugna*, tantum difficultatem huius belli spiritualis describit, non prohibet bellum. 2. Christiani et vt Christiani, et vt homines ciuesque considerari possunt. Tamquam Christianis incumbit lucta cum hostibus: iisdem tanquam hominibus adimi nequit ius gerendi bellum.

Septima obiectio ex *Iac. III. 1.* Sed 1. distinguendum inter iustas causas belli et iniustas. Qualis causa est, talis effectus. Si belli causa iniusta est, ipsum bellum iniustum habetur. Et de huius modi bello iniusto loquitur apostolus. 2. Scripta est haec epistola, vti PEARSONIVS et MILLIVS probant, eo tempore, quo bellum Hierosolymis fatale gerebatur. Hinc de eo potissimum loquitur, illudque ex voluptatibus et concupiscentiis prauis constat testatur. Ergo non de omnibus loquitur. 3. Quemadmodum si quis dicat: vnde aegritudo, rixae, crapula, nisi ex vino? ideo vinum non omne reiicit: ita nec hic apostolus omnia reiicit bella. Sunt enim quaedam, ex huius modi voluptatibus haud nata. 4. Denique et alios auctores ita loquutos esse docet Grotius, qui numquam bellum pro iniusto habuere.

Octauum argumentum aduersarii desumunt ex verbis Christi *Matth. XXVI. 52.* Sed 1. Petrus tunc non bellum gerebat, sed resistebat magistratui. Id Christus prohibet. 2. Sensus idem est, ac verborum: *qui sanguinem fuderit, eius sanguis fundetur.* 3. Specialis hic est ratio, cur Christus nollet defendi a Petro, quia eius regnum non esset de hoc mundo. Quale regnum, talis defensio. Regnum Christi spirituale est, ergo defendendum armis spiritualibus. Hinc Christus: *Vigilate et orate, ne incidatis in tentationem. Matth. XXVI. 41.*

§. 9.

Porro haud parum momenti situm est in testimonio veteris ecclesiae. Nam 1. ea ab apostolis et viris apostolicis regebatur, qui

eam fideliter, quid Deo placeret aut displiceret, docebant. 2. Non probabile est, ecclesiam statim defecisse. 3. Tum maximus erat pietatis verae feruor. Eleganter HIERONYMVS ad Demeir. *Tom. I. pag. 68. tunc domini nostri adhuc caluisse cruorem, et serbuisse in credentibus fidem.* Quis ergo negauerit, operae premium fecisse Grotium, dum in veterum Christianorum inquisitione sententias.

I. Et quidem multi fuere, qui bella improbant: Nam

1. Id fecit ORIGENES *aduers. Celsum lib. VIII. pag. 426.* ubi Christianos ait bella non gerere, nisi precibus.

2. Idem sensit TERTULLIANVS alicubi, et iudicia capitalia et bella reicere videtur libro *de idololatria*, et libello *de corona militis*, cuius historia narranda.

num. 3. II. Christiani haud raro detestabant miliciam. CELSVS *apud ORIG. lib. VIII.* Et notabile est legionis Barbaricae exemplum, quae missionem flagitabat, quod esset Christiana, et recusabat praelium inire, martyrio hinc adfecta a Diocletiano et Maximiano Augustis. ADO Viennensis *Martyrol. ad 10. Kal. Octobr.*

num. 4. III. Christiani abhorrebant fere a muneribus et officiis publicis, veluti praetura, TATIANVS in *Apol. pro Christianis*; ab aedilitate, TERTULLIANVS; a militia, et navigatione, LACTANT. *lib. III. cap. 18.*

Sed resp. I. Non vniuersalis haec erat ecclesiae sententia, sed quorundam patrum, quorum nemo non suos passus est naeuos. Vid. DALLAEVS *de usu patrum.*

2. Origenes et Tertullianus fuere suspecti de falsa doctrina. Origenes Platonismo nimis fauit, in multis conciliis damnatus, et Tertullianus plane ad Montanistas, Fanaticos defecit.

3. Ipsi hi patres alibi admittunt iudicia capitalia et bella, vt ipse Grotius eorum verbis n. 2. adductis docuit. Vnde non aliter potest intelligi eorum sententia, quam bella in thesi iusta esse, sed in hypothesi a Christianis geri non posse. Nam

1. Imperatores gentiles sacramentum exigebant a militibus, quod Christiani salua iustitia praestare non poterant.

2. Bella ab iis saepe gerebantur iniusta, quibus interesse Christiani religioni sibi ducebant.

3. Multi erant ritus militares principiis Christianismi aduersantes, e. g. auspicia, veneratio signorum vel aquilarum, sacrificia, triumphantium introitus in Capitolium. Ab his abhorrebant Christiani, non ab ipso bello.

4 Mul-

4. Multi praeterea fauebant vitae theoreticae, quae deinde monastica dicta. Ei vero omnino repugnare videbatur militia.

§. 10.

Hinc iam porro demonstrat Grotius, doctrinam illam de belli iustitia non fuisse communem omnibus Christianis, et

1. Ex patribus antiquioribus. CLEMENS ALEXANDRINVS vixit saeculo II. et *Stromata* scripsit et *Paedagogum*, ibi vero diserte hoc concedit, et militare posse Christianos, et magistratum gerere. num. 1.

Constitutiones apostolicae nec apostolis vere debentur, nec Clementi Romano. Sunt saltim ex saeculo III. vt docuit GVIL. CAVE, Sed GVIL. WHISTON in Arianismum proclius has constitutiones tamquam vere apostolicas defendit, et quidem non Graecum, sed Arabicum textum putat authenticum.

2. Publicam ecclesiae sententiam bello non fuisse aduersam num. 2.
denuo probat,

1. Ex *Constitutionibus apostolicis*, quia illae saltim de quarti saeculi doctrina testantur.

2. Ex TERTULLIANI *Apolog. cap. 42.* quia ea publico Christianorum nomine scripta.

3. Ex historia de legione fulminatrice. Ita TERTULLIANVS, EUSEBIVS. Vid. WITSIVS et DAN. LARROQVIANVS de *legione fulminatrice*. Historia autem satis certa, 1. quia legio XII. multo ante fuit fulminatrix dicta. 2. Quia sub Antonino philosopho adhuc maxime ferbuit persecutio. 3. Quia ipse ANTONINVS in libris *ad se ipsum*, quos ex parte in bello Marcomannico scripsit, Christianos exagitat, odiumque prodit aduersus eos conceptum.

4. Ex historia martyrum, inter quos et milites fuere. Sed hic selectu opus: saepe enim fabulis indulgent martyrologia. num. 3.
Sed in dubium tamen vocari nequeunt omnia, quod visum HENR. DODWELLO in *Dissert. Cyprianic. de paucitate martyrum*, quem ex instituto refutauit THEODOR. RVINARTVS, Gallus, in *Actis genuinis martyrum*, in praefat.

Certa saltim est historia Laurentini et Ignatii, Aforum, quae non sola martyrologiorum auctoritate, sed testimonio Cypriani, qui saeculo III. floruit, patris fide dignissimi, et qui ipse inter martyres fuit, nititur.

Obiici

num. 4. Obiici posset, Christianos non libenter interfuisse supplicii capitalibus. Ita enim saepe Tertullianus et alii veteres.

Sed resp. 1. supplicia illa non damnabant in thesi, sed in hypothesi, ob eorum truculentiam. Nam 1. pleraque exercebantur aduersus Christianos. 2. Eriam poenas nouas et inhumanas inuenerant, e. g. tunicam molestim, dilanationem bestiarum. 3. Ipsa quaedam iura admodum truculenta erant, veluti SCtum Silanianum.

2. Non intererant libenter, quod suspicionem fugerent, ac si oculos pascere aliorum dolore et suppliciis.

3. Quod in thesi ea non damnarint, adparet ex eo, quod Constantinus M. bella gesserit, et iudicia capitalia exercuerit. Inquirendum hic, quid de historia sentiendum, quod viderit crucem cum verbis: IN HOC VINCES. Io. ALB. FABRICII singularis ea de re dissertatio laudatur.

num. 5. 4. Thesin suam Grotius confirmat inde, quia nullus parum sub imperatoribus Christianis dubitauit bella geri posse. Nam 1. EVSEBIUS scripsit libros *de vita Constantini*, in quibus eum ob fortitudinem laudat, eiusque bella sine omni censura refert. 2. LACTANTIUS exstat elegans libellus *de mortibus persecutorum*, in quo ex instituto docet, nullum principum, qui ecclesiam vexarunt, morte sua obiisse. In eo maxime laudatur Constantinus ob bella aduersus hostes ecclesiae gesta. 3. Addendus merito duplex locus AMBROSII, ab auctore adductus.

num. 6. At porro obiiciunt, 1. saepe episcopos deprecatos pro reis, 2. introduxisse Christianos ius asyli in ecclesiis, 3. ritum inter eos fuisse, vt tempore paschatis captiui soluerentur vinculis, l. 3. *C. de episc. aud.* Videntur itaque supplicia capitalia, et multo magis bella detestati.

Sed resp. 1. Episcopi eo ipso non tam iudicia damnarunt, quam clementiam suaserunt.

2. Asylorum ius *κρησιν* et intempestiua ethnicorum et Iudaeorum acmulatione receptum est, vt docuit RITTERSHVSIVS singulari tractatu *de iure asylorum*.

3. Ritus iste non arguit odium iudiciorum, sed erat signum gaudii paschalis, quale quid etiamnum saepe obseruamus in aulis principum, si vel princeps iuuentutis nascitur, vel coronationis festum celebratur. An id indicat detestationem iudiciorum capitalium?

Sed

Sed iam soluuntur bina argumenta paullo post difficiliora, ex quibus probare nituntur, a bellis abhorruisse ecclesiam. num. 7.

1. Primum est ex *canone XII. synodi Nicenae*, ubi agitur de iis, qui cingulum militiae deposuerunt, et postea eandem militiam repetierunt. Iis enim haec poena irrogatur, ut decem annos iaceant, tredecim audiant.

Quae poena ut intelligatur, sciendum, in veteri ecclesia fuisse quatuor gradus poenitentiae. Nam 1. dicebatur *deploratio*, quando peccatores extra ecclesiam iacentes cum luctu et lacrymis deprecabantur. 2. *Auditio*, quando admitterentur in porticum ecclesiae, ut possent audire verbum Dei. 3. *Submissio*, quando intra ecclesiam post suggestum stabant, sed egredi tenebantur cum catechumenis. 4. *Constitutio*, quando inter fideles stabant, sed nondum participes sacramentorum. IVSTELIVS ad *Cod. can. eccles. CAVE de Christian. primit. Part. 1. cap. 8. pag. 229. seqq.*

Quum itaque tam grauis iniungeretur poenitentia iis, qui ad cingulum militiae rediissent: videntur sane Christiani abhorruisse quam maxime a militia.

Sed recte respondet Grotius, hunc canonem ad idololatriam pertinere. Licinius enim, qui tunc tyrannidem affectauerat, milites Christianos iusserat sacrificare, et thus adolere diis. Hinc multi se abdicauerant militia. Postea, ut sit, lucri cupidi, militiam repetebant, immo pecunia data illam redimebant, quod fieri potuisse, ex *Nou. LIII. cap. 5. et l. 22. D. de legat. 2.* patet. Itaque deficiebant ad idololatriam, quo crimine nihil habebatur detestabilius. Quid mirum itaque, si poenitentia fuerit paullo durior? Refert illud Licinii scelus SVLPITIUS SEVER. *Hist. eccles. Lib. II. cap. 33.* num. 8.

2. Alterum argumentum est ex LEONIS papae *Epistol. contrarium esse ecclesiasticis regulis*, cet. num. 9.

Sed 1. loquitur ea de ascetis, monachis, qui vitae theoreticae studiosi a militia abhorrebant.

2. De episcopis et clericis, qui semel ecclesiae addicentes operam non debebant amplecti militiam.

3. Sane et hodie is videretur reprehendus, qui pallium clericale commutaret cum sago, et tamen hodie nemo damnat militiam.

4. Accedit, quod ne militem quidem admitterent ad officium. num. 10.

Heineccii Prael. Grot.

K

cium

cium ecclesiasticum, si post baptismum id vitae genuselegisset: non, quod improbarent militiam, sed quod ad ea munera proueherent viros pios et probos, quales raro esse solent milites.

Non parum etiam hunc rigorem auxit interpretatio peruersa verborum, quibus Deus prohibuit Dauidem sibi templum aedificare, quia fuerit miles, et sanguinem fuderit, quum tamen ea verba sint typica, et ideo Salomoni id referuauerat Deus, quia Messias veram ecclesiam N. T. conditurus, futurus sit princeps pacis.

num. 11.

Denique varia Grotius cumulat testimonia pro bello ex *Concil. Arelat. l. can. 3. AMBROSIO*, nec non exemplum legionis Thebaeae, eiusque orationem, ac denique testimonium Basilii.

Historia legionis Thebaeae exstat apud *SVRIVM Ad. sanctor. d. 22. Sept. CAVEVM. Christ. prim. part. III. cap. 4. pag. 714. seqq.*

C A P V T III.

BELLI PARTITIO IN PUBLICVM ET PRIVATVM, SVMMI IMPERII EXPLICATIO.

CAput hoc quantius pretii duas tractat res notatu dignissimas. Nam

I. Aliquot belli diuisiones exponit. §. 1-5.

II. Ea occasione expendit doctrinam de summo imperio vel potestate civili. §. 6-24.

Prior pars denuo constat articulis 2. Nam bellum diuiditur

1. In publicum et priuatum. §. 1-3.

2. Publicum denuo subdiuidit in sollemne et minus sollemne:

§. 4. §.

§. 1.

num. 1.

Prima ac summa belli diuisio est, quod aliud sit *publicum*, aliud *priuatum*, quibus Grotius et *mixtum* addit.

Publicum bellum est, inquit Grotius, quod auctore eo geritur, qui iurisdictionem habet: *priuatum*, quod aliter, *mixtum*, quod vna ex parte publicum est, ex altera priuatum. Sed Grotius

tius hic non proprie et ex arte loquitur. Iurisdicção enim proprie competit magistratui: hic vero iurisdicção ipsi est summum imperium vel maiestas, quo sensu et SENECA dicit saepe, penes principem esse iurisdiccionem, in libris *de clementia*.

Rectius itaque dixeris, bellum *publicum* esse, quod a summis imperantibus vel societatibus liberis geritur, e. g. bellum Carthaginiensium et Romanorum.

Privatum, quod a privatis geritur, vt bellum inter Marium et Sullam.

Mixtum, quod ex vna parte a summis imperantibus, ex altera a privatis geritur, e. g. bellum Catilinarium.

Quia autem exilimari posset, hanc diuisionem esse absconam, num. 2. quum bellum *privatum* sit latrocinium, non bellum: latius demonstrat Grotius, non omne bellum *privatum* iniustum esse, nec in statu naturali, *num. 2.* nec in statu ciuili. §. 2. *num. 1. 2. et §. 3.*

I. In statu naturali nullus est imperans, nullus subditus, sed vnusquisque in libertate naturali viuit, nemini obnoxius, nemini inferior, quia natura omnes homines aequales. Quum itaque inter aequales, et vbi superior nemo est, cessant iudicia: sequitur, vt in statu naturali cessent iudicia. Quumque cessantibus iudiciis liceat vim vi repellere: etiam in statu naturali libebit omnibus vim vi repellere, id est, bellum gerere.

Haec quidem clara sunt: sed obiici potest, saltim eam facultatem ademtam esse privatis in statu ciuili, quia hic introducta sunt iudicia. Quam in rem Grotius allegat l. 176. *D. de reg. iur. et l. 13. D. quod met. caus.*

Sed statim Grotius ostendit, et in statu ciuili id bellum *privatum* aliquando non esse iniustum, quamuis omnino non semper, nec omnibus concedendum sit.

§. 2.

Quando licitum sit, id iudicandum ex ratione, cur in statu num. 1. ciuili prohibitum sit bellum. Ratione enim cessante, cessat lex.

Iam ratio non alia est, quam quod in statu ciuili per iudicia consequi licet, quod alias in statu naturali per bellum consequeremur. Ea itaque cessante, id est, si non sit iudiciorum copia, et prohibitio belli cessat.

Vnde regula: *quotiescumque iudicii nulla copia est, toties et*

privatus in statu naturali bellum gerere licet. Iudiciorum autem copia non est, inquit Grotius

1. Vel *momentanee*, quum vis tam repentina est, et periculum tam praesens, ut iudicis auxilium expectare nequeam, e. g. in moderamine inculpatae tutelae, in furto nocturno, in latronum furore.

2. Vel *continue*, quod ipsum vel iure contingit, vel facto.

1. *Iure*, iis locis, qui deserti sunt, et hominibus vacui, e. g. in mari, ubi et privatus quisque aduersus privatos bellum gerit, quia numquam in mari sunt tribunalia.

2. *Facto*, siue subditorum, siue iudicum auctoritatem adspernentur, (ut olim in Israele: eo tempore non erat rex in Israel: et unusquisque faciebat, quod iustum erat. Sane in eo statu si quis se aduersus iniurias defendisset suis viribus, non peccasset. Siue ipsius iudicis, si denegat administrationem iustitiae. Sed bini posteriores casus cum grano salis accipiendi. Nam ille de subditis supponit meram *anarchiam*; quae rarissime datur: et alter de iudice denegante iustitiam nemini dat facultatem gerendi bella, nisi non adsit iudex superior vel imperans, ad quem huius modi querelam deferre possint. Quod denuo sine *anarchia* intelligi nequit.

num. 2.

Ceterum licitum eius modi bellum privatum alii negant, quorum sententiam antequam expendat auctor num. 2. sententiam suam demonstrat, ut §§. seqq. aduersariorum argumenta refellit.

Argumentum suum Grotius desumit ex lege diuina de furto nocturno, *Exod. XXII. 2.* quale quid et lege XII. tabb. ex legibus Solonis cautum nouimus. Immo PUFENDORFF. *de iur. nat. et gent. lib. II. cap. 5. §. 17.* demonstrat, omnium fere gentium leges caedem furis nocturni permisisse. Conf. HERTIVS *ad Pufendorff. l. c.*

Iam id ius furem nocturnum occidendi aut ex delicto, puta furto, aut ex iure se defendendi est. Non autem ex delicto; nam sic et diurnum occidere fas esset: ergo ex iure defendendi. Si in ciuitate hoc ius se defendendi cum alterius internectione saluum est, non omne sane bellum privatum erit prohibitum. Q. E. D.

§. 3.

Iam itaque ad argumenta aduersariorum progreditur, quae eadem fere sunt, quae opponunt bello publico. Vnde pleraque iam superiore capite expensa sunt. Breuitate utemur, et paucis argumenta recensēbimus.

Primum est ex iis dictis, quibus Christus et Apostoli prohibent, quo minus resistamus malo, *Matth. V. 39.* ne ultionem spiremus, *Rom. III. 19.* ne gladium sumamus, nisi gladio perire velimus.

Secundum desumitur ab exemplo Christi, pro inimicis mortui. *Rom. V. 8. 10.*

Tertium a testimonio ecclesiae primaeuæ, quae omnem defensionem priuatam inhibuit, etiam contra latronem armatum, *AMBROSIVS de offic. lib. III. cap. 3. AVGVSTINVS de lib. arb. lib. I. cap. 5.* Immo idem dogma migravit in ius canonicum, *c. ult. caus. 13. qu. 11.*

His argumentis alia opponit Grotius fortiora. Nempe

1. Quod Euangelium iubet amare proximum tamquam se ipsum. Ergo non magis, quam se ipsum. Vnde mihi sum proximus, meque potius conseruari ac tueri teneor, quam alium.

2. Quia et lex beneficentiae admittit exceptionem, nisi ipsi indigeamus. *2. Cor. VIII. 10.* Ergo et lex de conseruando proximo intelligenda cum limitatione, nisi ipsi periclitemur. Rectius res ita proponitur:

Leges sunt vel *adfirmatiuæ*, vel *negatiuæ*. De adfirmatiuis semper valet regula: *leges adfirmatiuæ admittunt exceptionem necessitatis*, e. g. lex de sabbatho, de beneficentia, de conseruando proximo. *Negatiuæ* vel *ad officia erga Deum* pertinent, vel ad officia *erga proximum*. Priora numquam admittunt exceptionem necessitatis; haec admittunt, si vel necessitas a Deo sit, vel a malitia hominis, mihi erepturi vitam. Iam lex: *conserua vitam proximi*, est adfirmatiua, ergo admittit exceptionem necessitatis. Lex: *ne occide*, est negatiua, et ad officium erga proximum pertinet, ergo exceptionem admittit ob malitiam hominis nos occidere volentis.

Obiici posset: non esse proportionem inter delictum et poenam; alterum mihi eripere velle vitam temporalem, me illum occidendo illi eripere vitam aeternam. Sed resp. 1. non hic esse poenam, sed defensionem; 2. non magis certum esse, an quis

in eo statu sit, vt moriatur cum spe salutis; 3. nec certum esse, an adgressor damnationem sit euitaturus, si conseruaretur; denique 4. non esse culpam damnationis penes occidentem, sed penes adgressorem.

num. 4.

3. Tertium Grotii argumentum est, quod ipsi apostoli videntur Christo vidente gladiis vsi: idque conicit 1. ex loco Iosephi, qui in Iudaeam proficiscentes ex Galilaea, gladiis et armis instructis iter fecisse ob latronum crudelitatem scribit. 2. Ex voce apostolorum *Luc. XXII. 36. hic sunt duo gladii*; quum nemo in eorum comitatu esset.

Hinc ita argumentatur Grotius cum Cicerone: *gladios habere certe non liceret, si vti illis nullo pacto liceret. Ergo vti licet gladiis.*

num. 5.

His praemissis ad superiora argumenta respondet. Et 1. quidem ad dictum Christi: *ne resistas iniuriam facienti*, respondet non loqui Christum 1. de omni iniuria, sed leuiore, qualis est alapa, angaria vnus miliarii, cet. 2. Nec de omni homine, sed de eo, qui persecutionem religionis causa patitur. 3. Legem hanc negatiuam admittere exceptionem necessitatis ob malitiam hominum.

num. 6.

2. Ad dictum PAVLLI *Rom. XII. 19. resp. non prohiberi defensionem*, (vti vult interpret Latinus, qui vertit *defendere*,) sed ultionem vel vindictam. Idque Grotius demonstrat, 1. ex perpetuo vocabuli vsu, 2. ex verbis proxime sequentibus: *ultio mea est, ego rependam*, inquit Dominus. Nos autem hic non loquimur de ultione, sed de defensione.

Sed quae differentia? 1. Ultio malum alterius pro fine habet, defensio conseruationem propriam. 2. Illa ex ira et odio, haec ex ordinato sui amore proficiscitur. 3. Illa et extra periculum intentatur; haec in extremo periculo suscipitur.

num. 7.

3. Ad verba: *qui gladium sumet, gladio peribit*, resp. 1. Verba haec intelligenda esse de praesente casu, nam nec volebat defendi Christus, quia oportebat eum pati, nec defensione ei opus erat, quia impetrare potuisset XII. angelorum legiones. 2. Defensio haec suscepta fuisset aduersus magistratum, iniustum quidem, sed tamen magistratum. 3. Verba illa: *qui gladium accipiet, gladio peribit*, videntur proverbium fuisse, desumptum ab eo, quod vt plurimum fiat, quia et alibi occurrit. *Apoc. XIII. 10.*

num. 8.

4. Ad exemplum Christi pro impiis et inimicis mortui, resp. alias

alias actiones Christi esse satisfactorias, alias ad legem diuinam compositas: vel, vt theologi loquuntur, alias pertinere ad obedientiam eius actiuam, alias ad passiuam. Quae ad actiuam pertinent, imitandae, quae ad passiuam, inimitabiles sunt. Hinc PAVLVS id factum dicit singulare *Rom. V. 7.* et ipsi apostoli nos non iubent mori pro inimicis, sed pro fratribus. *1. Ioann. III. 16.*

§. Patribus facile respondetur, 1. Eos adsectare disciplinam ipsa lege diuina superiorem, (*une morale outrée*,) 2. eos in philosophia et theologia morali errores admisisse grauissimos, 3. alibi patres contraria profiteri, in primis Augustinum sui esse dissimilem in *Quaest. 34. ad Exodum.*

§. 4.

Prima haec erat diuisio belli in publicum, priuatum, et mixtum. 1. tum. Sequitur 2. subdiuisio belli publici in *sollemne* et *minus sollemne*.

1. *Sollemne* vocatur, quod susceptum a summo imperante sollemni ritu indicitur.

2. *Minus sollemne*, in quo alterutrum deest, vel quod aut ab ipso summo imperante non suscipitur, aut non indicitur sollemniter.

Sollemne bellum dicitur etiam *iustum*, non sollemne *iniustum*: vbi tamen non respicitur ad iustitiam naturalem vel ius naturae, sed ad iustitiam quamdam, quae a moribus est. Quemadmodum enim testamentum iniustum dicitur, cui sollemnitas quaedam deest, nuptiae iniustae, si vel ciuis ducit peregrinam, vel in coniungendis personis sollemnitas quaedam omissa: ita bellum sollemne dicitur iustum, quia ritus quosdam et caerimonias inuenerunt et receperunt gentes paullo honestiores, quibus inter se uti solent.

Quaeritur itaque, *an magistratui liceat saltem bellum minus num. 2. sollemne gerere?* Resp. regulam esse: *magistratui id non licere.* Quam regulam inde probamus,

1. Quia magistratus non gaudet imperio absoluto, sed potestate restricta, adeoque nihil potest, nisi quod iussus superiorum iniunxit. Nemini autem magistratui ordinarie permittitur potestas bellum gerendi.

2. Quia bellum est res, quae totam rem publicam adducit in supremum periculum. Ergo gerendum non est iniussu summi imperantis.

3. Quia

3. Quia criminis perduellionis reus est, qui iniussu populi (vel alterius summi imperantis) bellum gerit. *L. 3. D. ad leg. Jul. maiest.* Ergo recte se habet regula Augulini *lib. XXII. adu. Fausl. cap. 27. ordo naturalis mortalium paci accommodatus hoc poscit, ut suscipiendi belli auctoritas atque consilium penes principes sit.*

num. 3. Sed ut regulæ morales tantum non omnes admittunt exceptionem necessitatis, ita et Grotius a magistratibus aliquando bellum minus sollemne geri posse putat,

1. Quoties vim facit eis, qui ei, quod extremum in iurisdictione est, id est, exsequutioni resistunt. Sed id proprie non est bellum, sed iurisdictionis effectus, si paucos cogat obtemperare sententiae. Sin res ad seditionem veniat, defensio permissa est, bellum autem non nisi iussu summi imperantis suscipitur.

2. Quoties periculum in mora est, vel

3. Ob longinquitatem loci non potest expectari iussus summi imperantis. Huc pertinet exemplum Pinarii, a Grotio allatum, et multo potius nobis exemplum gubernatorum prouinciarum Indicarum, qui sæpe bellum cum gentibus barbaris confecerunt, priusquam fama de eo suscepto in Hollandiam perueniret.

§. 5.

num. 1. Quum itaque superiore §. et magistratum, extrema virgente necessitate, bellum gerere posse demonstrauerimus: iam porro quaeritur, *an huius modi bellum dicendum sit publicum?*

Negant canonistae omnes ob *c. olim 19. X. de restit. spol.* Quorum est argumentum: Bellum publicum est, quod geritur ab iis, quibus est summum imperium. Bellum a magistratu susceptum non geritur ab eo, cui est summum imperium. Non ergo est publicum.

Adfirmat contra *AYALA de iure belli lib. I. cap. 2. n. 7.*

Grotius distinguit, si bellum publicum sumatur pro eo, quod a magistratu geritur, bellum hoc dici publicum: sin publicum sit idem ac sollemne, negat hoc nomen competere huius modi bello.

Sed haec distinctio petitionem principii inuoluit. De eo ipso enim est quaestio, an publicum sit, quod a magistratu geritur.

Nos aliter distinguimus, aut magistratus huius modi bellum sine necessitate suscipit, tum est priuatum, et hinc non bellum, sed latrocinium: aut id sit necessitate virgente, et vel generatim mandante summo imperante, vel factum ratum habente, et tunc

tunc est publicum, 1. quia generale mandatum et ad specialia pertinet, 2. quia, quod quis per alium facit, illud ipse fecisse videtur, 3. quia rati habitio retrahitur ad initium facti.

Hinc quum Hannibal obsideret Saguntum, id faciebat tamquam magistratus, nec id iusserant Carthaginenses. Hinc legati mittebantur Carthaginem, qui Hannibalis vrgerent deditionem. Quod quum negarent Carthaginenses, et factum Hannibalis ratum haberent, bellum inde fiebat publicum.

Contra si gubernator prouinciarum Indicarum bellum iniussu Batauorum suscipit aduersus barbaros: id bellum non est priuatum, sed publicum, quia generali mandato instructus est, pace belloque omnia agendi, quae e re societatis Indicae sint futura. Idque ipse agnoscit Grotius *n. 2.* ubi ait: *sed illud accidere potest*, cet. Respicit ad statum rei publicae Germ. Fredericus Barbarossa in Italia constituerat vicarios imperii, iisque plenam dederat potestatem bellum gerendi, faciendique pacem, prout e re imperii futurum sit. Ea sane bella suscepta a vicariis non erant priuata, sed publica. num. 2;

Altera quaestio est: *an, ubi tale mandatum non est, sufficiat* num. 3;
coniectura voluntatis?

Nimirum notum est, mandatum esse vel *verum*, vel *praesumtum*, e. g. in iudicio procurator habet mandatum verum, maritus pro vxore agens praesumtum; praesumitur enim vxor velle a marito defendi.

Ita Bataviae praefes habet mandatum verum et bellum gerendi et pacem faciendi cum barbaris, prout e re visum fuerit: contra praefes vel gubernator Belgii Austriaci non habet huius modi mandatum: quaeritur itaque, an non praesumtum saltem habeat, et velle censeatur imperator, vt bellum et iniussu suo suscipiat, si id e re sua videatur, et an non huius modi praesumtum mandatum sufficiat ad bellum gerendum?

Grotius id nullo modo existimat admittendum, 1. praesumptionem enim esse, imperantem id sibi reseruasse, 2. rem publicam ita exponi summo periculo, quod iniussu suo fieri omnino nolit summus imperans.

Hinc quum Fabius legatus missus ad Gallos tamquam legatus bello Hetruscorum aduersus illos interesset, et ducem ageret: Galli illum ibi desuper postularant. Ipsum Caesarem, qui iniussu populi bellum Germanis intulerat tamquam proconsulem Galliarum, Germanis dedi suscipit Cato, teste SVETONIO. Hinc et Cicerone.

Heineccii Praef. Grot.

L

cero-

ceronem reprehendit Grotius, quod Octavius et D. Brutus defendit, arma contra Antonium priuata auctoritate capientes: et inde simul infert, saepe non probanda esse exempla veteribus probata, qui affectui magis, quam iudicio obtemperarint.

Haec omnia Grotii argumenta breuiter recensui. Sed tamen in eo falsus est, vti iam Gronovius recte ostendit. Quaestio erat, *an mandatum praesumptum sufficiat magistratui ad gerendum bellum?* Grotius in vniuersum negat. Nos distinguimus 1. inter bellum *offensuum* et *defensuum*. Ad illud non sufficit mandatum praesumptum, quia res fert moram: ad hoc sufficit, quia moram non patitur. Hinc si Turca ex improviso irrueret in Hungariam, quis dubitaret, quin duces copias contrahere, et Turcam profligare possint, antequam Viennam nuncius peruenerit?

2. Distinguimus inter *dubias belli causas*, et iam *apertas*. Quamdiu res publica alterum hostem non decreuit, abstinendum est magistratibus a lacessendo altero. Et hinc male egit Cn. Manlius bellum gerens cum Gallis. Contra ubi res certa, et alter hostis declaratus est, quis neget, cuius fas esse hosti arma inferre? Sic non peccauit Brutus adducens copias aduersus Antonium hostem declaratum, quum videret eum aliter reprimi non posse.

Num. 7. Haftenus prior capitis pars de belli partitione duplici: sequitur iam altera, quae agit de summo imperio vel de summa potestate. Ratio connexionis satis manifesta. Quum enim bellum proprie gerant summi imperantes: quaerit iam Grotius, *quid sit summa potestas*. Rem partiemur, vt expediamus

1. Quid sit summa potestas? §. 6. 7.
2. Quid sentiendum de sententia monarchomachorum? §. 8. 9. 10. 11.
3. Quotuplex sit summa potestas? §. 12-16.
4. Quae partes sint summae potestatis? §. 17-20.
5. Quibus modis imminuatur? §. 21-24.

§. 6.

Num. 1. Quod ad primam quaestionem attinet, ea denuo solui potest in duas quaestiones,

1. In quo consistat? §. 6.
2. Quomodo definiri possit? §. 7.

De priore quaestione primo Grotius aliorum sententias recenset n. 1. deinde suam subiungit. n. 2.

I. THV.

1. THUCYDIDES eam ponit in legibus, iudiciis, magistratibus. E. g. Veneti suis vtuntur legibus, suis iudiciis, suis magistratibus. Ergo penes Venetos est summa potestas.

2. ARISTOTELES *Politicoz. lib. III. cap. 14.* tres facit species, *imperium, consultationem, et iudicia.* Ad imperium refert leges, tamquam inanimatum imperium, et animatum, id est magistratus; ad consultationem, senatum, comitia, consilia; ad iudicia, tum disceptationes de causis priuatis, tum de publicis.

Ita et 3. DIONYSIVS HALIC. modo tres facit summi imperii partes, nempe leges, magistratus, et bellum pacemque; alibi quatuor, dum addit iudicia; alibi quinque, addendo ius circa sacra.

Sed hic obseruandum, 1. Thucydidem et Aristotelem consentire, 2. Dionysium Halicarn. nusquam agere de iuribus summi imperii, sed tantum describere, quae iura maiestatis fuerint penes populum Romanum. 3. Recte ergo dici posse, omnia referenda ad tria illa, consultationem, imperium, et iudicia. Si itaque penes ciuitatem vel rem publicam est ius consultandi de negotiis publicis, in pace et in bello, ius imperii, id est, leges ferendi, magistratusque et ministros constituendi, et denique ius iudicia instruendi exercendique, penes eam omnino est summa potestas.

Nec alio reedit partitio Grotii. Dicit enim, qui ciuitatem re-mun. 2;
git id facit vel per se, vel per alios.

Si per se, tunc versatur

1. Circa vniuersalia, condendo abrogandoque leges circa res sacras, vnde *ius circa sacra*, circa res profanas, vnde *potestas legislatoria*.

2. Circa singularia, eaque
vel publica directe, vnde *ius circa bellum, pacem, foedera;*
vel ligalia, item *dominium eminens;*
vel priuata, vnde *ius exercendi iudicia*.

Si per alios, id facit

1. per magistratus, vnde *ius constituendi magistratus*,

2. per legatos, vnde *ius mittendi legatos*.

Hæc itaque sunt, quæ ex mente Grotii summam potestatem constituunt. Iam ergo quaeritur, quid nos ea de re sentiamus?

Nos summam potestatem vocamus etiam maiestatem, imperium summum, suprematum. Iura, ex quibus illa constata est,

vocantur *iura maiestatis*, partes summi imperii, regalia. Ea sunt vel

1. *Immanentia*, quae exercentur aduersus subditos, et quidem vel circa
 - a) *vniversalia*, vnde *legislatoria potestas*, *iura circa sacra*, *iura circa tributa*,
 - b) *singularia*, vnde *iudicia*.
2. *Transcuntia*, quae exercentur aduersus externos, et sunt
 - a) vel *publica*, spectantque vel ad bellum, vnde *iura belli*, vel ad pacem, vnde *iura foederum* et *legatos mittendi*,
 - β) vel *priuata*, vt *iura velligalia imponendi*.
3. *Mixta*, quo spectant *consulationes*, siue per comitia, siue per consilia et senatum, de bello, pace, legibus, tributis, cet.

Haec quae omnia habet ciuitas, ea gaudet maiestate summoque imperio.

§. 7.

Iam ergo ad definitionem. Grotius definit illam, quod sit: *cuius actus alterius iuri non subsunt, ita vt alterius humanae voluntatis arbitrio possint irriti reddi*. E. g. res publica Veneta, Belgica, collata cum Noribergica.

Sed hanc definitionem multi reprehendunt, 1. quia est negatiua. Negatiue autem nihil recte definitur, e. g. si dicam, me non esse Eliam, nemo sciret, quis sim: et, si dicam, animam esse substantiam immaterialem, nemo sciet, quid sit, sed quid non sit, nempe quod non sit materia.

2. Quia ea quadrat etiam Adamo, et homini in solitudine viuenti, qui tamen non est imperans.

Hinc rectius ita definiemus summam potestatem, quod sit *facultas eminens ordinandi ciuitatem cum omnibus suis partibus ad suum finem*. Conf. HERT. Elem. polit. Part. I. sect. 6. n. 3.

Illud autem summae potestatis attributum, quod Grotius in definitione posuit, nempe, *quod actus summae potestatis alterius iuri non subsunt, nec alterius humanae voluntatis arbitrio irriti fieri possint*, potius est axioma ex definitione fluens, quam ipsa definitio. Id tamen intelligendum

1. non de ipso imperante, nec
2. de eius successore, sed

3. de

3. de exteris.

Sed hic elegans oritur quaestio: *an successor possit mutare alius antecessoris?* Adfirmat Grotius, Sed id cum grano salis accipiendum. Nam 1. distinguendum inter successorem vniuersalem et singularem, qui per modum electionis rerum potitur. De hoc certum est, quod non teneatur stare actis antecessoris, et hinc omnia priuilegia, ipsosque contractus reuocare possit, quia resolutio iure dantis, resoluitur ius accipientis. Hinc quia hoc incommodum est: plerumque ordines regni vel prouinciae capitulatione quadam obstringunt nouos imperantes, ne quid immutent. Contra, quod ad successores vniuersales attinet: illi vel versantur circa actum vnilateralem, vel circa bilateralem. Circa illum omnia licent, e. g. leges abrogare, noua tributa imponere, cet. Circa hos non perinde, quia alteri iam est ius quaesitum. Hinc magnae turbae sequutae, quum rex Prussiae feuda mutaturus esset in allodia, et loco seruiturum militarium exigeret canonem annuum. Inter dominum enim et vasallum est contractus, a quo dominus inuito altero discedere, et huic ius quaesitum auferre nequit.

Ex eo iam patet, *quaenam ciuitates gaudeant iure summae potestatis?* Quae omnes partes rei publicae ordinare possunt ad communem finem. Si ergo quaeras, an Belgio foederato sit summa potestas? resp. esse: si vero quaestio sit de Belgio Austriaco, negamus.

Sed hic cauendum, ne summam potestatem negemus

num. 1:

1. Regnis sub vno capite confociatis, e. g. Hungariae, Bohemiae, Croatiae, Transsylvaniae. Quamuis enim in his regnis nihil fiat sine voluntate imperatoris: tamen non sunt prouinciae Germaniae.

2. Systematibus ciuitatum, e. g. Heluetiae, Belgio foederato. Quamuis enim in quibusdam reliquorum consensu opus sit: non tamen haec est subiectio, sed foedus.

Qu. porro, *quodnam sit summae potestatis subiectum?* Resp. illud vel commune est, vel proprium. *Subiectum commune* est totum, in quo attributum aliquod est: *proprium* pars, cui praecise inhaeret. Sic e. g. ratio est in homine tamquam in subiecto communi: sed praecise non est in toto homine, verum in mente; quae adeo est subiectum proprium.

num. 2:

Eodem modo subiectum summi imperii est ciuitas vel res pu-

blica a nemine dependens. Sic e. g. dico Galliam, Frisiam, Hollandiam gaudere summo imperio, sed quia tamen non omnes factores, tutores, et rustici illud exercent, hinc subiectum proprium in Gallia est rex, in Frisia et Hollandia ordines.

§. 8.

III. 1. 3.

Hic ergo incidit maximi momenti quaestio: *quid sentiendum sit de hypothesebus monarchomachorum?* De quibus nonnulla praetermittenda sunt generalia.

Vera politica et magistratus seu imperantes, et populum instruit, et utrisque praescribit sua officia: quemadmodum ethica omnibus hominibus. Sed saniores politicam, quae Christi verborum memor tribuit Caesari, quae sunt Caesaris, Deo, quae sunt Dei, duae turbarunt sectae pestilentissimae, quarum altera dicitur Machiavellismus, altera Monarchomachismus.

I. Machiavellismus ita dicitur a NIC. MACHIAVELLI libello *de principe*, quo ille docet, obligationem inter principem et populum non esse reciprocam. Populum enim obligatum esse principi, non principem populo, unde illi omnia licere in vitam; religionem, conscientiam, et bona subditorum, nec ullum scelus a principe committi posse, quantumvis princeps tyrannum agat, quia, quod velit princeps, id pro lege sit. Haec, inquam, docet Machiavellus, sed non tam ut haec principia proponat, quae detestanda sunt, sed ut conclusiones, quae inde fluunt, operose explicet.

Quamvis autem ab aliis, et a me observatum sit alibi, Machiavellum haec non serio scripsisse, sed ut principatum Florentinis exosum redderet, quum nemo plus pro libertate passus sit Machiavello, vid. BAEL. in *Dictionar.* voce *Machiavellus*: facile tamen reperti sunt, quibus illa principia vel in theoria, vel in praxi placuerunt. Sic observarunt viri doctissimi, Carolus VI. regem Galliae, et Philippum II. regem Hispan. nec non eius ministrum, ducem de Alba imperium plane ad has regulas composuisse. Immo postea eadem principia in crustavit et forma demonstrationis mathematicae in Anglia induit HOBBS in libellis *de ciue* et in *Leviatane*.

II. Hisce Machiavellistis sese opposuere plures viri docti: sed in his quibusdam contigit, quod ait Horatius:

Stulti;

Stulti, dum fugiunt viia, in contraria ruunt.

Nam dum refellunt Machiauellistas, principibus omnem summam potestatem eripuerunt, eamque soli concesserunt populo, et inde natus est Monarchomachismus, cuius praecipui promachi sunt :

1. FR. HOTOMANNVS in *Franco-Gallia*, ob quem librum ICTus maximus e patria profugere cogebatur.

2. STEPH. IVN. BRVTVS in *Vindictis aduersus tyrannos*, *Edinburgi in Scotia primum editis*, vt habet titulus : Nomen est fictum : hinc liber modo huic, modo alii tributus. Fuese, qui ipsum THEOD. BEZAM, theologum celeberrimum, auctorem dicerent, quem tamen singulari dissertatione defendit GISEBERTVS VOETIVS. Sed genuinus auctor est HVB. LANGVETVS, Gallus, ob religionem profugus, et in aulis Saxonica et Palatina celebris.

3. ALTHVSIVS in *Politica*. Docuit primum Herbornae, inde Emdam euocatus, tamquam syndicus vel ciuitatis consiliarius. Vir doctus, sed omni monarchiae infensissimus.

4. IO. MILTONVS, Anglus, qui trucidato a Cromwello et assclis eius rege patronum egit huius parricidii, et hinc nata controuersia inter Miltonum et Salmasium. Hic primum addidit *defensionem regiam* : sequuta est MILTONI *defensio populi Angl.* Hinc porro prodiit SALMASII *responsio*, et MILTONI *noua defensio*, item SALMASII *Clamor sanguinis regii ad caelum*, et huius generis alia.

5. SCHELIVS libellum edidit *de summo imperio*, eleganter, sed improbe tamen scriptum. Hi sunt auctores, qui ex instituto defenderunt monarchomachismum. Sunt et alii, qui paullo tectius id agunt, vt IO. FR. GRONOVIVS in *Not. ad Grotium*, IAC. HARLINGTON in *Oceana repl. de Tolando*, edita Lond. 1700.

Immo in Anglia etiamnum vtrique secta floret, et turbas excitat maximas : Machiauellismus et Hobbefianismus ibi dicitur obedientiam passua; monarchomachi se vocant *Republicanos* : et obedientiam actiuam defendere se profitentur. Prodiierunt ante aliquot annos duo libri de historia Anglicana scripti, alter sub titulo *Iulian*, alter sub titulo *Iouinian*, quorum illo sub schemate vitae istius imperatoris Machiauellismum ; hic sub eodem schemate monarchomachismum defendit.

III. Quod ad principia attinet monarchomachorum, illa huc redeunt : maiestatem esse duplicem, realem et personalem. Illam consi-

consistere in complexione omnium regalium; hanc in praeminentia personae prae aliis. Illam esse penes populum, hanc penes regem et principem. Inde vero colligunt, 1. principem ministrum esse populi. 2. Ei resisti posse, si quid contra voluntatem populi audeat facere. 3. Immo cum supplicio adfici posse, si populus velit.

III. Quaestio itaque est, *an ubique et sine exceptione summa potestas sit populi, ita ut ei reges, quoties imperio suo male utantur, punire et coercere liceat?* Ita statum controuersiae format Grotius. Sed Gronovius putat, illum Andabatarum more pugnare, quia nemo id statuatur. Qua in re egregie fallitur. Nam omnes monarchomachi id statuunt, quia putant, inter regem et populum esse contractum mandati, mandatarium autem teneri rationes reddere mandanti, et obnoxium esse coercitioni, si fines mandati egrediatur. Ipse itaque ita format statum controuersiae: *an populus habens imperium legitimum, puta regem, vel senatum, vel conuentus ordinum, si maior et melior pars censeat, eam regiminis formam esse perniciosam, puta regem palam degenerasse in tyrannum, senatum in paucos dominos, comitia in confusam turbam seditiosorum hominum, possit illam mutare, et auctores mali punire?* Sed id absurdum, quis enim hoc negauerit? Tyrannus vere talis hostis est reipublicae. Hostem vi repellere licet. Adeoque haec quaestio monarchomachos plane non ferit, sed illa Grotii, quam iam merito cum Grotio negamus.

Primum Grotii argumentum hoc est: *si homo quisque se potest addicere in seruitutem, potest id et populus. At verum est prius. Exod. XXI. 6. Ergo et posterius.* Ex quo porro sequitur, uti seruus, qui semel se addixit, non potest resistere domino, tamquam domino: ita nec populum resistere posse principi, tamquam principi.

Quid ad haec Gronovius? Concedo totum: seruiant itaque, si volunt. Sed Grotium bonus vir non intellexit. Neque enim eius sententia est, totum populum se posse addicere in seruitutem iuris gentium, ut omnia adquirat regi: sed argumentatur a maiore ad minus. Si quisque se potest addicere in seruitutem iuris gentium: multo magis populus potest imperanti se addicere in imperium illimitatum et absolutum, ita ut rex nullo modo a populo pendeat. Hos seruire ait Gronovius; sed

sed falso. Nam 1. non se addixerunt in seruitutem, sed in imperium. 2. Si rex sit tyrannus, non est rex, sed hostis. Dici posset, id incommodum esse. Sed resp. nullam rei publicae formam esse incommodam. Si imperans bonus est, felices sunt subditi in monarchia etiam illimitata. Sin malus: subditi miseri sunt in re publica etiam liberrima.

Negat porro Gronovius quemquam praesumi tam sui inimicum, ut se vellet addicere in imperium nullis restrictum legibus. Grotius ergo aliquot causas allegat, quae eo adigere possint gentes.

1. Si sint ad extrema adductae, ut videant, sibi esse pereundum, nisi se victoris arbitrio permittant. Exempla complura sunt in historia. Grotius adfert exemplum Campanorum. Possunt addi Falisci apud Liv. lib. V. Samnites apud eundem lib. VIII. et alii. Exemplum recentissimum vidit Europa in Catalonia, quae a foederatis deserta in Hispanorum potestatem peruenit, et deditionem facere coacta est iis legibus, quas vellet victor praescribere. Tristissimum exemplum praebuit uniuersum imperium Constantinopolitanum a Turcis subactum. Quis, quaeque, dixerit, ibi maiestatem ullam remansisse penes populum?

Quasdam gentes ipsa natura impellit, idque Grotius illustrat ^{nam. 2.} similitudine stupidorum, quos natura seruos dixerat Aristoteles. Ita et gentes quasdam ait esse tam stupidas et barbaras, ut non possint nisi adductissime regnari.

Iam quidem Aristotelicum principium falsum est, si ita intelligatur, quod quidam natura ipso ACTV serui sint: non enim sequitur, hic est me stupidior, ergo est seruus meus: admitti tamen potest, si intelligatur de POTENTIA. Stupidos enim, qui se sponte regere et alere nequeunt, aptissimos esse ad seruitutem, nemo negauerit: quin vix consuli illis posset, nisi ab aliis regerentur, nec magis lenia remedia admittit hominum stupiditas, quam asini, qui sine fuste nihil agunt.

Ita sane comparatae sunt integrae gentes, de quibus vere dixeris, eos esse ingenii seruilis, ut in Europa Kussi, in Asia gentes fere omnes, quae tam seruiles sunt, ut adductissima debeant esse eorum imperia. Elegantia sunt exempla Cappadocum, Thracum, Mysorum, Getarum, a Grotio allegata. His addendum elegans exemplum Alexandri M. qui deuictis Persis, Medis, Bactrianis, aliisque gentibus plane ad mores Persarum

Heineccii Praef. Grot.

M

se

se composuit, et a pristina sobrietate humanitateque multum remisit. Reprehendunt id scriptores Graeci. Sed profecto hic dies aliam vitam, alios mores postulabat. Aliud imperium requirebat Macedonum, aliud orientalium genus ad seruitutem a natura factus.

num. 5. Tertia causa, cur aliquae gentes se vltro addixerunt aliorum imperio absoluto, est felicitas subditorum. Saepe enim in hisce monarchiis tanta est subditorum opulentia, pax, et beatitudo, vt facile saluam moueat etiam ciuitatibus liberis, cum perpetuo bello et inopia consistantibus, vt se addicant vltro. Sic multae Graecorum ciuitates liberae, teste ISOCHRATES in *Euagora*, se dederunt Euagorae, regi Cyprorum, nullis licet bellis lacescitae.

Accedit quarta causa, quod corrupta rei publicae forma gliscientibus bellis ciuilibus et factionibus aliter consuli non possit rei publicae, quam huius modi imperio absoluto. Hinc Romani, quoties huius modi status animaduertebatur, dictatorem creabant. Sed quum huius semestris tantum esse imperium, denique id vix suffecit. Hinc Sullae et Caesari concesserunt dictaturam perpetuam. Eo occiso, tanta denuo perturbatio rerum omnium esse coepit, vt salua esse non posset res publica, nisi ab vno regeretur. TACIT. *Annal. lib. I. cap. 9. Histor. lib. I. cap. I.*

Ipsi hoc in Anglia experti sunt monarchomachi. Occiso enim rege aliquamdiu rem publicam liberam constituerant. Sed gliscientibus factionibus inter parlamentum, exercitus, agitadores, vti tum vocabantur, et alios, non aliter videbatur consuli posse rei publicae, quam si vni permetteretur. Et quamuis a regia abhorrentes familia Cromwellio summam rerum deferrent, is tamen sub nomine *protectoris* tam libere et absolute imperauit, vt nullus vmquam rex Angliae.

Quum itaque tot causae esse possint, quae gentibus liberis persuadere possunt, vt se vnus imperio addicant: falsissimum sane est, quod sibi persuasit Gronouius, nullam gentem tam politam fore, vt se alii addicat.

num. 6. Alterum Grotii argumentum contra monarchomachos tale est:

*Si bello iusto acquiritur dominium priuatum: eodem etiam
acquiri potest dominium ciuile, seu imperium.*

As

At verum est prius.

Ergo et posterius.

Hinc porro ratiocinamur :

*Si bello iusto adquisitum imperium, illud sane non semper
dependet ab ultiraneo mandato populi.*

At verum est prius.

Ergo et posterius.

Sane si magistratus in poenam Titii bona publicat ; eaque a fisco invito Titio eripiuntur : quis dixerit, fiscum illa administrare mandato Titii, et hinc nihil posse fiscum, nisi consentiente Titio ?

Iam, quod in ciuitate est poena, id extra ciuitatem est bellum. Quis ergo dixerit, principem prouinciam iusto bello inuitis ceptam administrare mandato prouincialium ?

Quid ad haec Gronouius ? Iterum concedit totum. Nam certe, inquit, plus licet in populos bello subactos, quam qui creauerunt regem.

Sed resp. ita Gronouius non impugnat Grotium, sed tantum suam thesin defendit, quod tyranno possit resisti, quod nemo vmquam, et nec Grotius quidem, negauit.

Videamus itaque tertium Grotii argumentum :

Si rex nihil potest sine populo, et hic ius habet regem coercendi et puniendi: idem ius populus quoque habebit in aristocratia, immo et in democratia; nam nec in hac seminae inopes, adolefcentes a deliberationibus publicis excluduntur.

At posterius falsum esse dicunt monarchomachi.

Ergo et prius falsum erit.

Gronouius quidem dicit, se non videre, quid hoc argumentum concludat : sed concludit permultum. Scopus enim monarchomachorum est, explodere formam rei publicae monarchicam, tamquam minus conuenientem rectae rationi, et contra commendare formam aristocraticam vel democraticam. Ergo acute ostendit Gronouius, monarchomachorum argumenta etiam has formas euertere, et hinc esse falsa. Et sane fingamus, Venetiis factores, sutores, nautas dicere, senatum Venetum esse mandatarios suos : illos male administrasse rem publicam, et hinc amissas esse Cyprum, Candiam, Moream, et tot alias insulas, se velle homines illos coercere, et punire. Quid respondebit

monarchomachus? an non item licebit aduersus nobiles, quod aduersus reges?

Fingamus porro Athenis, vbi pura erat democratia, feminas, nautas, adolescentes, qui ad comitia non admittebantur, existimasse, reliquum populum Atheniensem esse mandatarium suum, et quum saepe tam male rei publicae consuluerit, a se esse coercendum, quid respondissent monarchomachi? an non idem parti a rei publicae administratione exclusae licebit aduersus coriarios, fabros, oenopolas, quod in monarchia populo a rei publicae administratione excluso licet aduersus reges?

Hinc argumentum Grotii omnino est maximi momenti, et tanto diligentius inculcandum iis, qui in libera re publica viuunt, quo prociuiiores ibi homines incauti esse solent in monarchomachismum.

num. 7. Quantum Grotii argumentum:

Si populi non minus addictos sibi habuere populos, quam regibus: sequitur, ut rex non sit nudus mandatarius, sed imperans.

At verum est prius.

Ergo et posterius.

Prius innumeris constat exemplis. Populus Romanus nulli regi obnoxius sub se habuit populos Latinos, Gallicanum, Hispanicum, Graecum, Syriacum, cet. Aut ergo ipse quoque populus Romanus fuit nudus mandatarius horum populorum: aut falsum est, reges esse mandatarios populi sui. Prius nec ipsi dicent monarchomachi. Et exempla sunt, populum Romanum inuitis prouincialibus de prouinciis suis disposuisse. Et iidem monarchomachi concedere etiam tenebantur, regem non esse mandatarium.

Argumentum hoc tam clarum est, ut vel solum euertat monarchomachorum *φλυαρίαις*. Quid autem ad illud Gronouius? Illud plane peruertit, ac si ita argumentatus esset Grotius:

Si populi habuerunt non minus sibi addictos populos, quam regibus, et ab illis sunt dono dati aliis regibus, sequitur, ut nullum ius sit populo, regem potestate male uentem coercere.

Et tum respondet: nulla prorsus haec est collectio. Sed ita non collegit Grotius, sed Gronouius, qui illum vel non intellexit, vel intelligere noluit.

Quin-

Quintum argumentum Grotius desumit a testimoniis sacris et profanis, de iure regum. Nam

1. Prouocat ad *Deut. XVII. 14.* *Si dixeris: statuum supra me regem, ut aliae gentes circa me: illum statues regem supra te, quem dominus Deus tuus elegerit.* Vnde ergo colligit Grotius, Deo non displicere regum imperium, adeoque illud non repugnare rectae rationi.

2. Quum eligerent Israëlita regem, iussit Deus, ut Samuel Israëlitis proponeret ius regium, idque recensetur, 1. *Sam. VIII. 11. seqq.* Si id ergo est ius regis, sane id non repugnat rectae rationi.

3. In S. S. reges passim dicuntur vncti domini, electi a domino, constituti a Deo super populum. Ergo sane Deus, adeoque nec recta ratio respuit regum imperium.

4. Ipse Christus dicit: *reges gentium dominantur eis. Luc. XX. 25.* Nec hoc Christus improbat, sed tantum negat, apostolos ita dominari debere. Quin potius apostoli Christi, in primis Paullus, *Rom. XIII.* omnes hortatur ad obsequium regibus praestandum, iisque non resistendum. Ergo sane regnum non repugnat voluntati diuinae.

Ita et gentiles et profani auctores philosophati sunt, quorum testimonia adducuntur a Grotio, veluti Senecae, Plutarchi, Herodoti, Dionis Prusaeensis, qui alias dicitur Chrysostomus, Pausaniae Messenici.

ARISTOTELIS locus est magni momenti ex *Polit. lib. III. cap. 14.* reges quosdam esse cum eo iure, quod alibi habet ipsa gens in se et sua. Ex eo enim intelligimus, quid sibi velint iura nostra, quum dicunt, populum Romanum lege regia omne imperium et potestatem ei, scilicet principi, et in eum contulisse. *5. 6. Inst. de iur. nat. gent. et civil.*

Quid ad hoc Gronovius? Respondet

1. His non tolli ius populi. Immo omnino tollitur. Cui enim quis renunciauit, id non habet.

2. Populus regi non plus potuit dare, quam habuit. Recte ergo si dedit, quod habuit, rex non subest populo.

3. Populum numquam habuisse ius se ipsum exstinguendi, aut in corpus suum saeuendi iniuste; ergo nec regi id dari potuisse. Resp. concedo totum, rex qui populum exstinguit, et iniuste saeuit, non est rex, sed tyrannus, et de hoc non est quaestio.

4. Testimonia haec testari de abusu, seu de facto, non de iure. Resp. immo, dum Deus haec probauit, non de facto, sed de iure testatur.

5. Reges fuisse supra populum, vti consules Romanos. Resp. est haec petitio principii. Hi enim eligebantur a populo: non autem omnes reges eliguntur: hi legibus tenebantur, reges ipsi leges ferunt.

6. Misere explicat dictum Christi: *reges gentium dominantur eis*: quasi sensus sit, esse eos superiore gradu et dignitate. Siccine dominari est superiore dignitate esse? Quis hoc vquam somniauit? Et cur Paullus monet, iis non resistendum esse? Exemplum videmus, quomodo et viri docti coecutiant, si semel praeiudicatae opinioni, tamquam glebae, adscripti sint.

num. 11. Neque tamen haec de omnibus regnis vera sunt, sed sunt quaedam,

1. In quibus rex nudum nomen habet regis, re ipsa omnia agit populus solus. Talis olim fuit Theseus, rex Atheniensium, Lacedaemonii reges, talis hodie dux Venetus.

Hos proprie reges et principes esse negamus, et ab iis non magis concludendum ad veros reges et principes, quam a regibus sacrificulis Romanorum.

num. 12. 2. Qui ad tempus suprema potestate funguntur, vti Amymones apud Cnidios, dictatores apud Romanos.

Poterantne hi coerceri? Respondent monarchomachi: quis negauerit? et inde colligunt, et reges teneri ad rationes populo reddendas. Nos contra. Dictatores non poterant coerceri durante magistratu; erant enim sine prouocatione constituti. Quia ergo monarchomachi a dictatoribus argumentantur ad reges, licebit et nobis eodem modo argumentari:

Si dictatores non poterant coerceri aut puniri, quamdiu erant dictatores, nec reges erunt coercendi, quamdiu reges.

At prius verum est.

Ergo et posterius.

num. 13. Hactenus Grotius argumenta quaedam opposuit monarchomachis, quibus et alia subiungi possint, in primis ab absurdo, quod e. g. ex mente monarchomachorum rex sit subditus subditorum, et subditi imperantes imperantium: sed progredimur ad argumenta monarchomachorum:

1. Ita

1. Ita argumentantur.

*Constituens superior est constituto.**Populus ratione regis est constituens.**Ergo populus est superior rege constituto.*

Sed 1. negamus maiorem, et distinguimus inter constitutionem; cuius effectus perpetuo a constituyente pendet, et eam, quae cum renunciatione coniuncta est: de illa verum est axioma, e. g. in principe constituyente ministrum: in patre filiis constituyente paedagogum, cet. de hac vero falsum. Nam sic e. g. is, qui se venundat in servitutem, ratione domini est constituens, an ideo domino est superior? Cardinales constituunt papam, canonici episcopum; an ideo sunt superiores?

Notetur elegans exemplum allegatum a Grotio de Valentiniano.

2. Negamus etiam minorem. Nec enim usquequaque verum est, omnes reges constitui a suo populo. Nam quamvis consensus populi semper addit, ille tamen saepe est vi siue iusta siue iniusta extortus. Sic e. g. Graeci numquam super se constituerunt imperatorem Turcicum: Israelitae numquam constituerunt imperatores, nec Herodem, et tamen eos reges et imperantes suos agnoscere tenebantur.

Gronovius hanc responsionem putat petere principium: idem negat, quemquam regem non constitui a populo. Sed quod ad prius, denuo confundit regem et tyrannum. Postcrius misere probat ex doctrina quasi-contractus. Quasi talis quasi-contractus fingi possit inter victorem et victos, hos toleraturos victorem; sed si non suo arbitrio imperet, se sibi reservare ius regem victorem capite plectendi. Elegans philosophia!

Alterum argumentum:

Omne regimen eorum, qui reguntur, causa est comparatum, non, qui regunt. n. 14.15:

Ergo et regis regimen.

Ergo ii, qui reguntur, i. e. populus, rege est superior.

Sed primo falsum est axioma: *omne regimen est eorum, qui reguntur, causa comparatum.* Nam sunt 1. regimina, quae regentis causa comparata, ut servile. Sunt, 2. quae utriusque causa, e. g. maritale. Ita et regna quaedam, immo omnia saltem utriusque causa comparata esse debent.

Deinde falso inde colligitur, populum esse superiorem rege, si vel

si vel maxime concedamus, populi causa eum regnare. Nam damus cum Grotio instantiam: tutela pupilli causa comparata, nec tamen ideo pupillus est superior tutore.

Quid Gronovius? 1. negat dari societatem solius regentis causa constitutam. Nam et servilem respicere salutem servi, quia servetur. Sed confundit Gronovius modum constituendi societatem cum ipsa societate. Et quid si dominus servum emit? 2. Negat, victa regna ad solam utilitatem victoris pertinere. Nam Deum aliud velle. Sed unde hoc novit? An Israelitae Dei auspiciis bella gerentes mitius habuere gentes devictas, quam alii populi?

num. 16.

Vltimum argumentum monarchomachorum:

Si ob peccata regum Deus saepe punit populum, sequitur, ut peccet populus, nisi regem coercet.

At verum est prius.

Ergo est posterius.

Antecedens probat ex 2. Sam. XVIII. 11. 2. Sam. XXIII. 10. Sed recte respondet Grotius, 1. populum non puniri ideo, quod regem non coercuerit, (id enim verbum Dei non patitur), sed quod consensu participes facti sint huius delicti. 2. Poenam re vera fuisse regis, dum orbaretur subditis, vel ii bonis exhaurirentur.

§. 9.

num. 1.3.

Iam ad alteram sententiam monarchomachorum paullo mitiorem progreditur auctor. Rigidi enim plane regem subiiciunt populo. Mitiores populum regi, regem populo subiectum esse docent. Nimirum aut recte imperare regem, tunc populum subiectum esse regi: aut male, tunc regem subiectum esse populo.

Sed resp. 1. Hoc denuo monitrosus est, regem esse regem et subdum subditorum, subditos reges regis.

2. Aut per male imperantes reges intelligunt tyrannos, aut reges non per omnia ad voluntatem populi imperantes. Si prius: non dicendum est, tyrannos esse subiectos populo, sed esse hostium loco, et hinc in eos, tamquam hostes, omnia licere. Sin vero intelligant reges non per omnia populo obsecundantes: profecto iniustissimum esset regem subicere populi iudicio, quum facile actiones iniustissimae displicere possint populo.

Videmus ex multis exemplis, populum sententiam tulisse de regibus

regibus optimis et innocentibus. Quasdam actiones regum esse dubiae interpretationis. Videantur *Acta depositionis ADOLFI NAS-
SOVII, Historia Tarquinii*, cet.

§. 10.

His praemissis, cautiones quasdam subiungit Grotius de sum-
ma potestate obseruandas.

1. Prima est, non ex titulis iudicandum esse de summa po-
testate, sed ex re ipsa et effectu. Nam quamuis vulgo dicant dis-
tingui principes et reges, tamen nec discrimen satis perspicue
ostendunt, nec veteres id semper obseruant. Gronouius ait,
principem esse, qui dignitate eminet in libera ciuitate: regem,
qui iusto imperio vtatur in subditos. Et sane huius generis sunt
loca ex Iul. Caesare, Tacito, Suetonio, et Velleio allegata.

Et hinc forte est, quod Augustus regis adspersatus nonem
princeps dici maluit, vt existimarent Romani, non se regi pa-
rere, sed liberum esse populum.

Sed quamuis hoc discrimen grammaticae verum sit, (prin-
ceps enim est, qui primus, qui et sine imperio intelligi potest):
non tamen ex titulo principis et regis de summa potestate iu-
dicandum. Nam

1. Saepe dicti reges, qui nulla parte iurium maiestatis gan-
debant. E. g. Lacedaemonii duos reges habebant, ii tamen sub-
iecti erant ephoris: quod quidem negat Gronouius, sed satis
certum est ex ipso Cornelio Nepote. Quamuis enim Pausanias;
vt NEP. in *Thra. ybul. cap. 3.* scribit, esset rex Spartanorum: in
vincula tamen publica coniectus est ab ephoris. Licet enim, in-
quit NEPOS in *Pausan. cap. 3. legibus eorum cuius ephoro hoc fa-
cere regi.* Ita et Germani suos imperantes vocabant reges,
quum tamen Tacitus eos auctoritate suadendi magis, quam iu-
bendi praefuisse testetur. Mitto alia exempla a Grotio adlata, et
id vnum addo, quod habuimus §. 8. num. 11. de Theseo, rege
Atheniensium.

2. Haud raro principes vocati, qui absolutissimo utebantur
imperio, e. g. Augustus et eius successores, duces veteres Li-
thuaniae.

3. Saepe, qui insignibus non vtuntur, veri sunt reges. et
qui vtuntur, non sunt, sed soli principes, e. g. in Russia ante
imperatorem Petrum, qui coronam adsumsit imperialem, non fuit
Heineccii Prael. Grot. N *coro-*

coronatio recepta, et tamen vere fuerunt reges antecessores eius. Contra duces Venetorum tanta sollempnitate coronantur, vt vix similis splendor in vllius potentissimi regis coronatione obseruetur: et tamen non sunt reges, sed principes.

num. 4. 4. Non ex comitiis iudicari potest. Alibi enim illa comitia sunt merum consilium publicum, quod imperans audit, si e re videatur, e. g. ordines prouinciales in Hispania, quos dicunt *los cortes*. Alibi rex nihil potest siue comitiis, nec comitia siue rege, vt in Britannia, Germania. Alibi comitia de ipso rege iudicandi sibi sumunt arbitrium, e. g. in Polonia ante aliquot annos, quum regi suo Augusto abrogarent imperium, eisque surrogarent Stanislauum. Ergo non statim sequitur, in hac vel illa prouincia princeps adhibet in consilium comitia, ergo non gaudet summa potestate.

num. 5. 5. Nec denique ex successione iudicandum. Sunt, qui putant; imperantes successiuos pollere summa potestate, non autem electiuos. Sed id saepe fallit. Pontifex Romanus si consideretur tamquam princeps, eligitur, et nullus tamen regum aequae est legibus omnibus solutus. Lacedaemoniorum reges iure successionis praerant, et tamen, vt supra monuimus, nulla gaudebant parte maiestatis.

Quaenam ratio? Quia successio non tribuit nouum ius, sed vetus continuat. Nec sola electio regi quidquam adimit, si alias regnum sit absolutum. E. g. proauus hodierni Russorum regis fuit per electionem electus ad imperium, nec tamen minus herile fuit eius imperium, quam antecessorum.

Ex quo sane sequitur, vt de summa potestate non ex nudis titulis, insignibus, aliisque huius generis externis iudicandum sit, sed ex effectu.

§. II.

num. 1. Altera cautio est, ne confundamus ius supremae potestatis, et modum illud ius habendi, e. g. Titus et Maevius possunt idem ius habere, nempe dominium, sed ille id habet in perpetuum, hic ad tempus.

Ita et imperantes possunt plures summam potestatem habere, sed non eodem modo. Sic e. g.

1. Alii illam habent in perpetuum, vt reges; alii ad tempus, vt dictatores,

2. Alii

2. Alii illud habent iure electionis, vt Hugo Capetus, rex Franciae; alii iure successione, vti eius successores.
3. Alii habent tamquam patrimonium, alii iure vsusfructus, vnde diuisio regnorum in patrimonialia et vsufructuaria, de qua §. 12. auctor agit.

Iam quaeritur, an, qui ad tempus praesunt, possint dici *num. 2.* summam potestatem habere? Negant nonnulli, inprimis BODINVS *de republ. lib. I. cap. 8.* qui ideo et dictatoribus supremam potestatem non concedunt, quia ad tempus praeerant. Sed hoc recte refellit Grotius. Nam

1. Rerum moralium natura non ex tempore, sed ex operationibus cognoscitur. Hinc vt vere consul est, qui per mensem saltim consulis partes explicauit; vti vere seruus fuit, qui per momentum in seruitute iusta fuit: ita vere summa potestate gaudet, qui vel per aliquot menses eius iura et partes exercuit.

2. Ea autem iura omnia exercuit dictator, nam 1. bello et pace agebat omnia, 2. nemini erat obnoxius, 3. actus eius a nemine poterant irriti fieri, 4. nulla erat ab eo prouocatio, quamuis id posterioribus temporibus fuerit mutatum. Vnde DYONYS. HAL. obseruat, dictatorum eandem fuisse potestatem, ac regum.

Addit tamen auctor exceptionem. Dixerat, etiam temporarium imperium posse esse summum. Obici possent quaedam exempla regum, quibus imperium datum est sub conditione, vt liceat illud pro lubitu reuocare, nisi recte et bene imperarent. Tale sane fuit regnum Gothorum in Hispania, et Vandalorum in Africa, vt docet PROCOPIUS *de bell. Vand. lib. I. cap. 9.* et AIMON. *in Hist. Franc. lib. II. cap. 20. lib. III. cap. 35.* Conf. IO. NIC. HERTII *Notis. vet. Germ. populorum.*

Sed resp. distingue inter regnum temporarium et precarium. Illud verum regnum est, quamuis ad tempus concessum: hoc non est, quia semper actiones huius modi principum subsunt potestati et arbitrio populi, ita vt mutari, et ipsi reges coerceri possint pro lubitu.

§. 12.

Iam progredimur ad distinctionem regnorum patrimonialium *num. 1.* et vsufructuorum.

Regnum patrimoniale dicitur, ubi facultas alienandi et diu-
dendi regnum est penes regem.

Regnum usufructuarium, ubi non est.

Multi hanc diuisionem impugnant, et quidem modo ratio-
ne vocabulorum, modo ob rem ipsam.

Quoad vocabula monent, quomodo regnum dici possit vfu-
fructuarium, quum usufructus exspiret morte, nec ad heredes
transmittatur, quum sit seruitus praedio, non regno, inhaerens?
Sed resp. verba valent sicut nummi Grotius ideo vsus est his
vocalibus, quia eatenus similia huius modi regna sunt usufructui,
quod vt usufructuarius non potest libere de re disponere, sed
vti frui debet salua eius substantia: ita et reges hi non possunt
alienare, diuidere, donare, cet. Simile itaque ultra suum tertium
non est extendendum. Attamen non abs re monuit IHO-
MASIVS *iurispr. diuin. lib. III. cap. 6. §. 135.* commodius regna
dici posse fideicommissaria, quam usufructuaria.

Videbimus itaque, quid obiciant alii huic diuisioni Gro-
tiana.

*I. Liberi homines non sunt in patrimonio. Liberi homines con-
stituunt regnum.*

Ergo regnum non est in patrimonio.

Resp. 1. distinguendum inter libertatem iuris gentium et
ciuilem. Illi opponitur seruitus; huic subiectio. Non ergo sequi-
tur, liberi homines iure gentium tales non sunt in patrimo-
nio dominorum, ergo nec sunt in patrimonio summorum im-
perantium.

num. 2. Resp. 2. proprie non dicitur liberos homines esse in patrimo-
nio, sed imperium, quod rex in liberos homines exercet, salua
eorum libertate. Eleganter id illustrat Grotius exemplo liberti,
qui, quamuis sit persona libera, tamen assignari poterat a pa-
tre vni ex liberis. Vid. *tit. D. de assignat. libertor.* Non tam li-
bertus alicui dabatur, quam ius patronatus, quod in libertum
competebat.

num. 3. II. Alterum argumentum. *Quos rex adquisiuit bello, eos non
sibi, sed populo suo adquisiuit. Quos rex populo quaesuit, ii non
sunt in eius patrimonio.*

Ergo subditi bello acquisiti non sunt in eius patrimonio.

Sed resp. 1. rex potuit ex fructibus suis aluisse exercitum.

2. Rex

2. Rex potuit sumtibus foederatorum vsus esse.

3. Non semper verum est, quod id, quod alterius sumtibus adquisitum, sit eius, qui sumtus fecit. Hinc multis exemplis constat, regna bello adquisita plane fuisse in patrimonio, victoresque de iis liberrime disposuisse. Huc pertinent regna Spartaee, Anaxagorae, Darii, successorum Alexandri. Quid ad regni Siciliae et Neapoleos ab Arragoniis adquisiti, quod Alphonsus rex Arragoniae dedit Ferdinando Notho, qui alias in nullam regni partem succedere potuisset. num. 4.
s. 6.

Nos id tantum addimus, ipsam S. S. aequitatem huius divisionis agnoscere. Nam *Genes. XXXV* ubi Iacobus moribundus prouincias Canaanis prophético testamento inter liberos distribuit, addit, *se Iosepho praecipuum dare tractum Sichem, quem gladio et arcu suo occupatis*. Adeoque hunc tractum considerauit tamquam patrimonium suum.

§. 13.

Haftenus probatum, fundamento non desitui hanc distinctionem: iam in specie agit de regnis vsufructuariis, et docet,

I. Ea omnia esse vsufructuaria, quae voluntate populi deferuntur, siue

1. Per electionem. Nam tunc praesumptio est, populum vel-
le, vt eodem modo sibi reddatur regnum, quo tradidit;

2. Per pacta, nuptias, foedera. Tunc enim existimatur nouo titulo, id est, consensu populi, imperare.

Sed tamen excipiuntur aliquot casus. Nam non statim regnum per electionem fit vsufructuarium,

1. Si electio sit generalis, et antecessores pleno iure fuerint reges, eligentes autem sibi nullam libertatem stipulantur. E. g. in electione Theodori, Russorum imperatoris.

2. Si regnum pactis vel nuptiis, aliisque modis voluntariis adquisitum, postea bello a subditis moto recuperetur. Sic Catalonia olim multis gaudebat priuilegiis, vt aliae prouinciae Hispanicae, quae nullo modo sunt patrimoniales. At postquam ab hodierno rege defecerat, et is bello terra marique illato illam recuperauit, omnibus spoliata priuilegiis iam non melioris conditionis est, quam patrimonialis prouincia.

II. Regnum vsufructuarium ab imperante non posse alienari.

nari. Ratio est, quia, dum populus hodiernum imperatorem; eiusque familiam, sibi elegit, idem ius sibi reservasse censetur in eum casum, si imperans, eiusque familia regnatrici, exspiravit.

Sed obiciunt aliquot exempla. 1. Caroli M. et Ludouici Pii, qui regnum inter liberos suo arbitrio diuiserunt; et tamen Franciae regnum non armis occupauerant, sed Pipinus id voluntate populi fuerat consequutus. Sed resp. a) Regnum, quod Pipinus accepit, fuisse satis paruum, complexum enim solam Galliae et Alamanniae partem. At ipse et successores bello adquisiuerunt vniuersam Germaniam, Galliam, Italiam, Hispaniae et Pannoniae partem. Potuere ergo saltim de his disponere. b) Re vera non libere disposuerunt, sed commendarunt ordinibus hanc diuisionem, et hi eam ratam habuerunt in comitiis. Hinc est, quod plures hodie contra P. DANIELEM, scriptorem historiae Francicae celeberrimum, probent, regnum Francicum non fuisse hereditarium, sed electitum, quamuis Ludouici filii ex testamento paterno vulgo dicantur successisse.

2. Obiciunt exemplum Ludouici Pii, qui, quum pater Carolus M. Romam adquisiuisset vltroque voluntate populi Romani, tamen hanc urbem Pontifici donauit. Sed resp. 1. negando, Ludouicum id fecisse, seruauit enim sibi supremum in urbem dominium, et pontificem quasi vasallum habuit. Eleganter id docuit M^a. le BLANC in libello Gallice scripto *de nummis regum Franciae*, ubi ex ipsis nummis docet, Romam Ludouicum eiusque posteros agnouisse supremos dominos. 2. Aliud est libere disponere, et regnum, vel eius partem, in extraneum transferre: aliud reddere ei, a quo acceperis. At Ludouicus, inquit Grotius, reddidit populo Romano, a quo Romam acceperat. Sed haec responsio Grotii non magni momenti est, quia pontifex non est populus Romanus. Hinc in priore tutius adquiescimus.

§. 14.

Redit auctor ad cautionem 2. quam supra §. 11. explicauimus, non confundendum nempe esse summum imperium cum modo habendi. Et inde elicit duas conclusiones perelegantes.

1. Non omne regnum vsufructuarium esse summo minus. Sic vsufructuarium esse diximus regnum Hispaniarum, et id tamen summum esse nemo negat.

2. Non

2. Non omne regnum patrimoniale esse summum. Sic e.g. multae provinciae Germaniae, ut principatus, comitatus, ita sunt in possessorum patrimonio, ut libere vendi, et quibuscumque modis in alios transferri possint, e.g. dynastia Leuerensis, quam ultimus comes comes Oidenburgicus domui Anhaltinae legavit testamento. Confer. B. G. STRUVII *Diff. de allodiis imperii*. Quis autem dixerit, harum provinciarum possessores gaudere summo imperio?

§. 15.

Idem discrimen inter summum imperium et modum habendi declarat porro exemplo regni tutelae. In patrimonialibus enim num. 1. ipse princeps tutorem dat liberis, quemcumque vult, in usufructuariis vel lex dat tutorem, vel populus.

Hinc cum condito testamento rex Galliae Ludovicus XIII. tutorem, ut putatur, regi hodierno dedisset ducem Cenomaniae (le Duc du Maine): tutela a parlamento nihilominus credita duci Aurelianensi, nec ratum habitum est testamentum regis, quia regnum Galliae est usufructuarium. Et Henricus VIII. imp. quum filio Henrico V. tutricem constituisset Agnetem matrem, tantum abest, ut principes hoc ratum habuerint, ut potius pupillum imperatorem Coloniae in naudem pellectum matri eripuerint, et Annonis, archi-episcopi Colonienfis, tutelae crederint.

Porro monet, non confundenda esse regna patrimonialia cum num. 2. iis, ubi ipsi fundi in dominio regis sint, quale Aegyptiacum fuit tempore Iosephi regis, et Indica regna, teste DIODORO Sic. lib. XII. Addi posset insula Seucrambes, quae ab AVCTORRE *Historiae Seucrambum* ita describitur, quod omnia sint regis, isque solus alat liberos suos. Sed ea fabula est, in qua iam alii atheismum latitare animadverterunt.

Sed cur putat auctor regna patrimonialia et haec esse distinguenda, quum tamen utraque sint in patrimonialibus? Resp. 1. In regnis patrimonialibus imperium est in patrimonio, in his ipsae priuatorum possessiones. 2. In illis imperans vitur dominio eminente, sed non nisi in extremo necessitatis casu, in his gaudet etiam dominio simplice. 3. Illa imperia sunt civilia, haec herilia, quia populus nihil habet proprium.

§. 16.

num. 1. Explicatis supra duabus cautionibus iam sequitur tertia: non definire summum imperium, si imperans aliquid vel Deo, vel subditis per pacta promittat. Respicit auctor ad notissima exempla. Traianus imperium consequutus caput et dextram suam Deorum irae consecrabat, si sciens fefelleret. Ita et Hadrianus imperator iuravit, se senatorem non occisurum. Quaeritur, an ideo non penes illos fuerit summum imperium? Resp. omnino fuit. Nam 1. nudum promissum non tollit superioritatem et imperium, si quis ipsi imperio non renunciavit, quod exemplo patrisfamilias et mariti declarat auctor.

2. Plerumque hae promissiones ita comparatae sunt, ut ad eas iam tum obstricti sint imperantes. Sic sane obligatus fuit Traianus, ne sciens falleret; Hadrianus, ne senatores occideret. Iuri vero gentium et legibus divinis parere et imperans potest salvo summo imperio.

num. 2. Sed hic aliquot quaestiones soluendae:

1. *An non autem imperium summum saltem restringitur, et arctius quodammodo redditur huius modi permissionibus, quae ad imperium pertinent, et ad quas imperans alioquin non tenebitur?* E. g. dum rex Franciae se in causis civilibus subiecit parlamento.

Resp. restringitur omnino, sed non nisi quoad eam partem, de qua promittit, e. g. regis Galliae non ulterius restrictum est imperium, quam quoad iurisdictionem illam prorogatam, cetera absolute rex est.

2. *Quale ius nascitur ex huius modi promisso?* Aut aliquid agit princeps, quod se non acturum promittit, tum actus est iniustus, e. g. Hadrianus si occidit senatorem; aut agit aliquid, cuius agendi facultati ipse per pacta et promissa renunciavit, tunc actus est nullus, e. g. si rex Poloniae tributa imponeret Polonis, inauditis comitis.

Sed obici possit: si actus contra promissa a rege suscepti sunt iniusti vel nulli, sequitur, ut habeat rex superiorem, a quo eius actus puniri et nulli reddi queant. Et quem alium, nisi populum. Ergo recte sentiunt monarchomachi, qui regem populo subiciunt. Sed resp. Grotius, actus hos non irritos fieri a superiore, sed ipso iure, quasi non et ius superiorem

rem supponat. Ergo potius respondemus, concedendo totum argumentum. Facile enim largimur, principem habere superiorem, puta Deum, cuius lex actus contra promissa susceperit iniustos et nullos pronunciat. Nullum ergo hic monarchomachis praesidium.

Id omne illustrat Grotius elegantissimis exemplis regum Persiae, Aegyptiorum, Hebraeorum, quibus demonstrat, tertiam cautionem esse veram, promissa a regibus facta non eblare summo imperio. num. 3.

Quaeritur, an summo imperio obstat clausula commissoria? Vocant ICI clausulam commissoriam, si pactis adicitur conditio, ut si illa non impleatur, pactum nullum sit. Hinc quaeritur, si subditi eligentes regem eum adstrinxerint certis pactis, uti e. g. in Germania capitulatio, in Polonia pacta conventa nota sunt, iisque pactis adiecta clausula, si rex non ex pacto regnaturus sit, illum ipso iure regni iuribus excidere debere, an non eo ipso imperium desinat esse summum? num. 4.

Et resp. neg. summum enim est, quod superiorem non agnoscit. At imperans huius modi superiorem non agnoscit. Ergo habet imperium summum.

Obicitur, atqui hic omnino imperantem habere superiorem populum, quia ab eo possit regno privari, si pactis non satisfaciat. Sed id falsum. Ipse imperans se regno privavit, dum pactum hoc iniit. Non privatur in poenam a superiore, sed privatur ex pacto a compaciscentibus. Rem illustrabimus similitudine. Si princeps cum architecto paciscatur, et hic principi promittat se aedificaturum ei palatium, si pecunia intra annum solvatur; sin minus, pactum nullius valoris fore. An tunc si architectus spe sua frustratus pactum irritum esse dicit, principem punit, tamquam superior?

Idem alio simili declarat Grotius. Si quis fideicommissum possidet, an non est dominus? respondetur, omnino; sed tamen eo extincto fundus devolvitur ad fideicommissarium haerodem ob clausulam fideicommissariam. Ergo non potest alienare. Resp. nihilominus dominus est per vitam, quamvis modus habendi sit talis, ut non possit pro lubitu feudum in alium transferre. Ita et imperans, qui cum clausula commissoria regnum est adeptus, verus imperans est, quamvis modus habendi sit talis, ut regno excidet ex pacto, si non ex pacto imperet. num. 5.

Heineccii Prael. Grot.

O

§. 17.

§. 17.

num. 1.

Sequitur quarta cautio: summum imperium esse indiuisum, et tamen diuidi posse siue in partes integrales quoad prouincias, siue quoad partes subiectiuas, id est, ratione regalium vel iurium maiestatis.

1. Ratione partium integralium multa exstant exempla in Romana historia. Sic e. g. Constantinus inter tres filios diuisit imperium, et Theodosius M. inter duos. Ita Hispaniae saepe tot praefuere reges, quot eius erant prouinciae.

2. Ratione iurium maiestatis, si populus quaedam maiestatis iura sibi reseruet, quod fit 1. vel expresse, si huius modi leges fiant, quibus iura maiestatis diuidantur, vt in Britannia, 2. vel per modum praecepti imperanti ante imperium iniuncti, vt in Germania per capitulationem.

Sed hic multa merentur animaduersionem. Nam

1. Verum est, imperium diuidi posse per partes integrales; sed tunc non summum imperium diuiditur, ita vt ex vno summo fiant duo semiplena, sed prouinciae diuiduntur, et in vtraque manet summum imperium.

2. Falsum est, imperii vel maiestatis iura diuidi posse inter principem et populum, nam tunc statim esset res publica in re publica, si pars imperii penes principem, pars penes populum esset. Hoc autem est monstrum politicum, horrendum, ingens; cui lumen adentum. Id potius dicendum, iura maiestatis communicari posse inter principem et populum, vt princeps certa iura imperii non exerceat sine ordinibus, nec ordines sine principe.

3. Falsum est, id fieri per modum legis vel praecepti, sed semper fit per modum pacti. Paciscitur populus cum principe, antequam imperio potiatur, se illi paritutum, si hoc vel illo modo imperet. Talis est capitulatio imperatoris, talia sunt pacta conuenta Polonorum, et omnes reliquae pactiiones, quae abusiue dicuntur leges fundamentales.

num. 2.

Sed quaerit porro Grotius, *an haec imperandi forma admitenda sit?* Negant Machiauellistae et Hobbesiani, et multa recensent incommoda, quae non possint non ex hac communicatione iurum maiestatis sequi. Sed resp.

1. Illi

1. Illi supponunt diuisionem regalium, qualis non est communicatio.
2. Omnia imperia obnoxia sunt suis incommodis.
3. Machiauellistarum absolutum imperium multo est incommodius.

§. 18.

Quom haftenus egerimus de rebus publicis, in quibus iura maiestatis inter principem et populum sunt communicata, iam porro Grotius monet, cum istis non confundenda regna absoluta, vbi rex acta sua a senatu ratihaberi iubet. Sic e. g. de rebus Franciae dici solet, quod in perpetuum sint minores. Et hinc nec alienare quidquam, nec aliquid agere possunt magnae rei, nisi accedat parlamenti confirmatio. Quaeritur itaque, *an in huius modi regnis vel communicata vel diuisa sint iura maiestatis?*

Resp. neg. nam 1. haec confirmatio, inquit, non petitur; quasi alioquin actus esset irritus, sed ne quid falsum pro vero obtrudatur.

Illustrat id Grotius simili a testamentis desumpto, vbi testator saepe addit clausulam, se nolle, vt posterius aliquod testamentum valeat. Quo ipso non sibi facultatem eripit testator condendi testamentum, sed indicat, non pro suo habendum, si posterius reperiat. Hinc si contra certo constet, eum id testamentum condidisse, nemo dubitat, quin posterius derogat priori. Ita et princeps, dum exigit confirmationem senatus, non indicat, sine hac confirmatione actus suos esse irritos, sed eos non temere pro suis habendos, nisi ea sollempnitas accesserit.

Vti soleo hac illustratione. Non valent rescripta et priuilegia nisi, subscripserit praeter principem cancellarius et secretarius: an ideo inter principem, cancellarium, et secretarium ius illud maiestatis concedendi priuilegia est communicatum, aut plane diuisum?

2. Adde, quod plerumque sub hac confirmatione lateat arcum politicum, magis ad firmandam, quam imminuendam maiestatem comparatum. Solent enim principes eo vti, si quando ipsi acta sua irrita fieri cupiunt. Sic e. g. Franciscus I. rex

Galliae a Carolo V. captus, pertaesius captiuitatis multa promissit, e. g. se summam pecuniae ingentem soluturum, iuri in ducatum Burgundicum, Mediolanensem, et Comitatum Flan-
drensem renunciaturum, cet. Dimissus vero horum nihil praestitit, causam interserens, passionem hanc a parlamento suo non esse confirmatam, regem Galliae esse perpetuo minorem, et hinc nec pacisci, nec alienare posse. Conf. DANKELMANNI, *Diff. de pallis principis captivi*.

§. 19.

Hinc porro quaerit auctor, *quid de formis rerum publicarum mixtis sentiendum?*

Tres sunt rei publicae formae simplices, monarchia, aristocratia, et democratia. Est enim summum imperium vel penes vnum, vel penes plures, vel penes omnes.

POLYBIUS autem, quem et alii sequuntur politici, dicit, has formas interdum misceri, et hoc demonstrat exemplo rei publicae Romanae, ubi consules monarchiam, senatus aristocratiam, populus democratiam repraesentauit.

Hinc quaeritur, *an vere dentur mixtae res publicae?* Idque multi cum Grotio negant eo argumento, quia non possit simul summum imperium esse penes vnum, et penes multos et omnes. Si enim esset penes vnum, non esset penes multos, et vice versa. Deinde negant rei publicae Romanae formam fuisse mixtam, sed mere popularem vel democraticam, quia et consules et senatus fuerint subiecti populo.

Sed potest tamen haec Polybii doctrina omnino defendi, si distinguas inter materiam imperii et formam administrandi. Materia summi imperii sunt iura maiestatis, et haec non possunt esse penes vnum et plures; et eatenus non datur res publica mixta.

Forma administrandi in eo consistit, ut ea iura maiestatis non vnus solus exerceat, vel vnus cum multis et omnibus; et tunc res publica illa dicitur mixta. Hinc eatenus omnino mixta dicitur Romana, quia nec consules sine senatu, nec senatus sine populo, nec populus sine consulibus et senatu quidquam rite facere poterat. Qualis fere forma etiam in Britannia obseruatur.

§. 20.

§. 20.

Porro quod ad monarchiam in specie attinet : illam non esse *num. 1.* vnius generis, Aristoteles obseruat. Sed quum huius doctrinam non satis plene proposuerit Gratius, eam supplere iuuabit ex *Politicor. lib. III. cap. 10. et 11.* Diuidit ARISTOTELES regna

1. In *heroica*, vbi rex omnia agit suffragis populi. Qualia fuere regna Graecorum, quorum meminit Homerus, vnde etiam heroica vocantur. Hodiernum tale quid obseruatur apud Cosaccos, de quibus in libello : *Nouus status Russiae.*

2. In *barbarica*, vbi rex vtitur subditis pro seruis, vnde et alias *despotica* et *herilia* vocantur. Talia sunt in oriente tere omnia, vt et Maroccanum, Russicum.

3. In *asymmetica*, vbi rex tantum ad certum tempus in periculo constituitur, eoque finito res ad libertatem redit. Tales fuere dictatores apud Romanos, et, vt videtur, iudices apud Ebraeos.

4. In *Laconica*, vbi tempore pacis rex ordinarius est praefes rei publicae, tempore belli vero summum imperium obtinet. Tales fuere reges Spartanorum. Eodem CONRINGIVS in *Diff. de regno* refert gubernatores in Belgio, quamuis minus accurate, quia gubernatores ibi nullo modo tamquam imperantes, sed tamquam primi rei publicae administri considerantur, et in bello non alio iure imperant, quam alii supremi belli duces.

5. *Παμβασιλῆαι*, vbi rex solus omnia agit, salua populi libertate, saluoque cuique rerum suarum dominio. Eo enim ipso *παμβασιλῆαι* differt a regno barbarico vel herili.

Sed praecipue quaeritur, an dentur huius modi *παμβασιλῆαι*? Et resp. dari, idque ex auctoribus auctor probat de Perus, aliisque orientalibus.

Quin probat, et regnum Hebraeorum fuisse *παμβασιλῆαι*, *num. 2.* idque 1. ex iure regio, quod Samuel refert, 2. ex verbis *Psalmi LI. tibi soli peccaui*, 3. ex testimonio rabbi BAB NACHMON, quod nulla creatura iudicet regem, sed Deus benedictus.

Obiici posset : at regem ex rabbinorum sententia potuisse flagris caedi, si aduersus legem peccauerit. Sed resp. 1. id non posse probari, nisi ex rabbinorum testimonio. 2. Addunt, illa flagra infamia caruisse, et ab ipso rege sibi eam dictam sententiam, qui et modum his flagris pro arbitrio statuerit. Ergo non

fuere poena, poena enim non est malum passionis infligendum a se ipso, sed a superiore. 3. Re vera ea fuit poenitentia ecclesiastica, vti loquuntur canonistae. Conf. SCHICKARDVS *de iure regio Hebraeorum*.

num. 3. Obiiciunt porro, summam potestatem in regno Hebraeorum fuisse penes synedrium. Et ipse Grotius concedit, illud synedrium exercuisse quaedam iudicia, quibus ipse rex praeesse non potuerit. Idque probat 1. ex locis S. S. vbi iudices vocantur *dii*, et iudicium eorum Dei esse dicitur. 2. Ex testimoniis rabbinorum distinguendum inter res Dei et res regis, et illas a synedrio independentes a rege fuisse decidas affirmantium. 3. Ex verbis regis, *Ierem. XXXVIII. 5. ad proceres: ecce Ieremias in potestate vestra, nam contra vos rex nihil potest.*

Enimvero falli hic Grotium certissimum est. Nam 1. si synedrium independentem habuisset iudicandi facultatem, Hebraeorum regnum fuisset omnium monstruosissimum, et res publica in re publica.

2. Non solum synedrium, sed omnes iudices dicuntur *dii*, et Dei iudicium administrare.

3. Rex etiam absolute imperans potest dicere, rex contra vos nihil potest, id est, argumenta vestra tam firma sunt, vt iis resistere nequeam.

4. Quod palmarium est, Io. CLERICVS in *appendice ad Comm. in libros historicos V. T.* singulari dissertatione demonstravit, et fere euicit, ante captiuitatem Babylonicam nullum apud Iudaeos fuisse synedrium, sed inuentum hoc esse recentius.

num. 4. Contra iam demonstrat exemplis variis, dari etiam regna, quae non sint *παμβασιλείαι*. Demonstrat id exemplis

1. Macedonum, de quibus Arriani et Curtii testimonia adducuntur

2. Gothorum et Germanorum, de quibus TACIT. *de morib. Germanor.*

num. 5. 3. Regnum Romanorum, de quibus ante omnia conferri meretur DIONYS. HALIC. *lib. II.* et ficta ibi oratio Romuli de instituenda noua re publica. Vbi simul comparatur status popularis Romanorum cum regno.

4. Atheniensium, de quibus Isocratis testimonium expendendum. Sed in his nobis licebit esse breuioribus, quia exempla illustrent, non probant.

§. 21.

His de natura summi imperii praemissis, quaestiones quaf-
dam tractat auctor, quarum prima est

1. *An summum imperium habere potest is, qui inaequali foedere tenetur?*

Foedus est pactum inter summos imperantes vel res publicas initum. Quamvis autem in pactis semper paciscentes concipiantur tamquam pares: ipsum tamen foedus in aequale et inaequale dividi solet: id vero duplici modo intelligitur, vel

1. *Ratione praestationum*, e. g. dum foedus incunt potentior et impotentior, et hic illi 6. millia hominum; ille huic 20000. in auxilium promittit. Tale fuit foedus inter regem Galliae et electores Bavariae et Coloniae.

2. *Ratione subiectionis*, si per foedus alter foederatus alteri se ad certum quoddam onus ab imperio summo alias alienum adstringit, e. g. ad tributum, ad evacuanda alteri munimenta et fortalitia. Et tunc huius modi foedus inaequale est vel perpetuum, vel temporarium.

a) *Perpetuum*. Sic in foedere Romanorum cum Aetolis erat, ut Aetoli agnoscerent Romanam maiestatem: in foedere Michaelis Wicłnowski, regis Poloniae cum Tartaris, ut Poloni annum tributum soluerent.

b) *Temporarium*, si per aliquod tempus, e. g. durante bello, alter ab altero sibi subiectionem quamdam ilipulatur, vel aliud onus, e. g. ut foederatus foederato sumtus belli suppeditet, cet.

Iam facile patet, quid respondendum ad quaestionem. Nimirum dicimus, nullo modo huius modi foedus extinguere ius summum imperii, nisi sibi alter alteri perpetuam subiectionem spondeat. Hinc ne sic quidem exstinguitur, si quis promittat, se alterius foederati maiestatem comiter veneraturum, ut recte vidit PROCVLVS l. 7. §. 1. *D. de captiu. et postlimin.*

Rationes sunt clarae.

Summum imperium est, quod in exercitio iurium maiestatis a nemine dependet, tamquam a superiore.

Imperans vel res publica, qui quacumque foederato suppeditat milites, sumtus belli, aliquot munimenta, vel promittit se aliterius

alterius maiestatem comiter veneraturum, non ideo dependet a foederato, tamquam a superiore.

Ergo penes huius modi imperantem vel rem publicam est summum imperium.

Minorem probo, 1. quia cuius privato licet donare, quidni et imperanti et rei publicae. 2. Quia et cuius privato licet se ad perpetuam praestantem obstringere sine subiectione, quidni et rei publicae? 3. Quia magnum est discrimen inter dignitatem et imperium. Possum aliquem dignitate superiorem agnoscere sine subiectione, vti e. g. principes in Germania electores, ciuitates imperiales principes superiores agnoscunt, eorumque dignitatem comiter venerantur.

num. 3. Quia PROCVLVVS d. l. 7. §. 1. id illustrat similitudine a clientibus desumpta: hanc similitudinem explicat Grotius hoc num. 3. Nimirum erat Romae inter patritios et plebeios a Romulo introductum ius patronatus. Patritii plebeis, qui se in eorum fidem dederant, praestabant auxilia, eos defendebant gratis in iudiciis, iisque consilia dabant in rebus ambiguis: contra plebeii se vocabant patronorum suorum clientes, mane eos honoris causa salutabant, domo deducebant, suffragiis iuuant in defendendis honoribus, cet. Vid. PLVTARCH. in *vita Romuli*, et DIONYS. HALIC. lib. II. Sic inaequale erat pactum inter patronum et clientem, an vero hic alteri ideo erat subiectus? Minime.

Eodem itaque modo se res habet in regnis et ciuitatibus foederatis, quae alterius imperii maiestatem comiter venerantur. Illae erant in fide, non in ditione: agnoscebant alterius imperii praeeminentiam ratione dignitatis, non ratione imperii, adeoque ideo non amittebant summum imperium.

num. 4. Sed obici posset: saepe tamen populi huius modi foederati rei sunt apud alterum, cuius maiestatem venerantur, d. l. 7. §. 1. *D. de captiu.* ergo reuera subiectionem inuoluit huius modi foedus, quia actus vnus ab altero irriti redduntur.

Resp. Grotius, quatuor esse controuersiarum genera.

1. Si quis ex populo dicatur fecisse contra foedus, vti Romani accusabant Hannibalem, quod foederi contrauenisset.

2. Si populus vel rex ipse accusentur, vti Romani accusabant Albanos, quod foederi non stetissent.

3. Si

3. Si focii populi in eiusdem imperii clientela constituti inter se litigent.

4. Si subditi de rege, vel rex de subditis conqueratur.

Prima controuersia non pertinet ad foederatum, quia sic esset iudex in propria causa: sed foederatus a foederato exigit satisfactionem, ea vero non praestita, ex foedere fit bellum.

Secunda species denuo locum non facit iudicio alterius foederati, ob eandem rationem, sed inde nascitur bellum, aequae ac inter inaequaliter foederatos, vti apparet exemplo Romanorum bellum inferentium Albanis.

Addit Grotius, tunc foederatum a foederato puniri posse, quod incommode dictum. Poena enim infligitur a superiore, non a pari. Sed, vt libro sequente videbimus, Grotius in ea opinione haeret, quod bellum et poenae nomine inferri possit, quod falsum esse suo loco docebimus.

Tertia controuersia aliquando deservit ad foederatum, sed magis per modum arbitrii, quam iudicii ordinarii. Sic Masinissa focius populi Romani rex Numidiae finito bello Punico II. saepe cum Carthagenensibus, itidem foederatis populi Romani litigabat de finibus. Eam controuersiam Romani decidebant, sed tamquam arbitri, vel, vt hodie vocantur, tamquam *Garants*, vt bellum inter socios impediretur, non tamquam iudices ordinarii. Arbitria autem neminem constituunt superiorem.

In quarta controuersia nullum ius est foederato se interponere huic controuersiae, nisi denuo per modum arbitrii. Quo elegantissima pertinent Herodis et Carthagenensium exempla ab ipso Grotio allata.

Obiicitur secundo: at foederatum dici imperare foederato. Quae loquutio frequenter apud veteres scriptores occurrit. Sic e. g. Romani naues, pecuniam, focis imperabant.

Resp. distinguendum inter negotia foederatorum communia, et propria singulis foederatis.

In illis imperat omnino foederatus superior, salua inferioris libertate et superioritate: in his non imperat. Multis exemplis et vetere historia petitis id illustrat ipse Grotius. Sed maior est vti itas quaestionis, quomodo salua dici possit foederati superioritas et libertas, quum tamen alter foederatus ipsi imperet? Respondemus, imperare est leges praescribere: leges praescribere

Heineccii Prael. Gros.

P

re

re est alterius inuiti libertatem naturalem circumscribere. Tunc enim inuiti libertatem nostram naturalem circumscribi patimur, si alterius ad vtilitatem aliquid facere cogimur. Ergo si foederatus foederato aliquid imperat, ad communem foederis vtilitatem pertinens, illud non fit inuito, sed volenti, adeoque id proprie non est imperium, sed exsequutio pacti.

Rem illustrabimus exemplo. Decem priuati pacti sunt de societate mercatoria inunda. Vnus in se suscipit directionem. Is reliquis imperat pecuniam, itinera suscipienda, epistolas scribendas: an ideo reliqui huic subiiciuntur? Minime. Ea omnia enim faciunt non in vtilitatem dirigentis, sed communem societatis, cuius ipsi membra sunt.

num. 10.
11.

Monet tamen Grotius, et recte monet, periculosa esse haec foedera inaequalia, et, si nimia sit potentiae foederatorum inaequalitas, facile inde nasci veram subiectionem.

1. Si altera alterius rei publicae maiestatem agnoscere tenetur.
2. Si praestationes perpetuae ipsi iniunguntur.
3. Si oppidis induerentur alterius praecidia.

Tunc enim multa ferre tenentur socii infirmiores, nec ad arma conuolare statim possunt. Ista patientia sensim transit in ius, et inde ex foedere fit subiectio. Exemplo suo id docuerunt Moldaviae, Valachiae, et Transsylvaniae principes, qui olim foederati Turcarum inaequales, hodie vere subditi sunt, et quascumque ferre tenentur eorum iniurias.

§. 22.

Porro quaeritur: *an res publica tributaria summum imperium habeat?* Dicitur autem *tributaria*, quae pacis redimendae causa vicino potentiori annuam soluit pecuniam. Id saepe contingit rebus publicis. Allegat auctor Hebraeorum regnum, quod aliquando tributarium factum Chaldaeis, aliquando Aegyptiis, aliquando Romanis. Ita et imperatores Germanorum Turcae tributum soluerunt sub Rudolpho II. Hungaris sub Conrado I. Eadem necessitas incubuit Polonis sub Michaelae Wicnowski.

Recte resp. auctor, huius modi tributum non imminuere summum imperium. Summum imperium enim est facultas omnes partes rei publicae administrandi ad finem suum. Id possunt et regna

regna tributaria, siquidem illa res publica, quae tributum accipit, nullum alterius actum reddere potest irritum. Ergo penes tributariam rem publicam manet summum imperium.

Fatendum equidem esse, tributum confessionem publicam impotentiae, sed non semper confessionem imperii. Quo etiam sit, ut plerumque gentes prudentiores id non vocari patiantur tributum, sed donum vitroneum, (*un don gratuit*), vel pensionem.

§. 23.

Porro quaeritur, *an nexus feudalis summo obset imperio?*
Hic

1. Praemittendum, *quid sit feudum?*

2. *An ex eius natura fluat subiectio?*

I. Quod ad priorem attinet quaestionem, feudum potest *num. 1.* considerari vel ut contractus, vel tamquam ius in re; uti simile quid in pignore et emphyteusi animaduertimus.

Si consideretur tamquam *contractus*, tunc est obligatio reciproca inter dominum et vasallum. Ille huic concedit dominium utile rei vel praedii sub conditione fidelitatis, hic alterum agnoscit dominum directum, et fidelitatem seruitiaque militaria promittit. Recte Grotius obseruauit, esse hunc contractum non iuris gentium, sed a Germanicae originis gentibus inuentum, quia ob defectum pecuniae militibus suis praedia hoc modo concedere solebant domini. Conf. THOMASII *Selecta feudalia*, et *Dissert. de originibus feudorum*.

Sin consideretur tamquam *ius in re*, tunc est dominium; quod per inuestituram nascitur, et quidem diuisum inter dominum et vasallum. Ille habet dominium directum, quod in eo consistit, 1. ut sine eius consensu non possit feudum alienari vel oppignorari, 2. ut illud ob delicta feudalia, quae feloniae vocantur, possit eripere, 3. ut possit seruitia exigere, 4. ut mortuo sine heredibus masculis vasallo feudum ad eum redeat. Vasallus autem sit dominus utilis, siquidem et fructus feudi omnes percipit, et feudum vindicat, et ad ipsos heredes masculos transmittit.

II. Iam facile patet, *an hic nexus feudalis inuoluat subiectio-* *num. 1.3:*
nem? Resp. Grotius potest et solet esse subditus domini, sed non sequitur, ut sit subditus, quia est vasallus. Nam

1. Si consideretur ut contractus, nihil aliud est feudalis *ille* nexus, quam foedus inaequale *συμπαχινόν*, quia vassallus promittit se militaturum domino, et quidem vel aduersus omnes promiscue, tunc dicitur feudum *ligium*, vel contra omnes, excepto principe suo, tunc dicitur *non ligium*: contra dominus promittit vassallo, se hunc defensurum aduersus quoscumque. An id foedus inuoluit subiectionem?

2. Si consideretur ut ius in re, aliud est dominium, aliud imperium. Potest illud sine hoc esse, et hoc sine illo. Sic e. g. imperator non negat, papae competere dominium directum in regnum Neapolitanum, et tamen ne minimam quidem partem imperii ibi exercere eum patitur. Alius enim est dominus, alius imperans.

Hoc ideo obseruandum,

1. Quia saepe et aequales reges et principes sibi inuicem nexu feudali obstricti sunt, e. g. imperatori rex Britanniae, ratione electoratus Brunsvicensis, Sueciae ratione Pomeraniae, Daniae ratione Holsatiae et Oldenburgi, Poloniae ratione Saxoniae.

2. Quia saepe maiores feuda tenent a minoribus, e. g. rex Daniae est vassallus ducum Brunsvicensium, quatuor electores episcopi Bambergensis, rex Prussiae abbatissae Gandersheimensis.

3. Quia inde saepe nascuntur controuersiae. Sic principes Schwartzburgici sunt vassalli Saxonici: sed non ideo sequitur, ut sint subditi. Inde maxima nata controuersia.

§. 24.

Concludit auctor hoc caput monito, quod distinguendum sit inter imperii actum primum, (seu potentiam), et actum secundum, (seu exercitium.)

1. Actus secundus adparet, quoties quis iura imperii exercet.

2. Actus tantum primus; quoties eius exercitium impeditur: quod fieri potest 1. aetate, 2. furore, 3. captiuitate, 4. rebellionem subditorum. Quamuis quod ad furorem attinet, in regnis successibus tantum furiosus actu primo rex maneat, non in electiis, ubi statim nouus eligi potest. Conf. DANKELMANNI *Diss. de pactis principis captiui*.

CAP.

CAP. IIII.

DE BELLO SVBDITORVM IN SVPERIORES.

§. 1.

Bellum est status societatum liberarum per vim certantium, num. 1. aut propositum certandi retinentium. Haec definitio in statu civili locum habet. In statu autem naturali, quum nulla sint iudicia, nulli imperantes, a quibus defendi quis posset, unusquisque vim vi privata propulsat, id est, bellum gerit.

Ex hoc ergo axioma facile iam variae quaestiones solvuntur. Nam quaeritur

1. *An priuatus bellum gerere possit aduersus priuatum?* Negamus in statu civili, adfirmamus in statu naturali. Ad statum autem naturalem et is videtur rediisse, qui in eo loco versatur, vt auxilio magistratus nullo subleuetur, e. g. si a latronibus quis circumueniatur.

2. *An imperans contra imperantem?* Adfirmamus, sunt enim vtraeque res publicae societates liberae. Huc pertinet exemplum belli Dauidis in Ammonitarum regem.

3. *An priuatus contra imperantem extraneum?* Adfirmat Grotius, nos negamus, nisi moderamen inculpatae tutelae suscipiat. Ratio, quia non est liber priuatus a superioritate. Ad exemplum Abrahami respondemus, eum non fuisse priuatum, sed foederatum regem et socium, in quorum regnis habitabat.

4. *An imperans contra subditos rebelles?* Adfirm. sed tunc proprie non est bellum, nec enim subditi sunt societas libera. Est ergo potius exsecutio poenae rebellibus debita.

Verum de his omnibus quaestionibus iam non agimus, sed num. 1. 3. de bello subditorum in superiores hoc capite quaerimus. Et hinc status controuersiae rite formandus. Non quaeritur

1. *An subditi se defendere possint aduersus superiores non suos, sed eidem regi subiectos, si is iniuriam intenet sine mandato regis.* Exemplum Nehemiae. Nam et priuati hic se possunt defendere. Vid. L. 5. C. de metatoribus.

2. *Nec quaestio est, an obsequium denegari possit imperan-*

P 3 tibus

tibus aliquid contra ius naturae praecipientibus. Id enim ipsa S. iubet, *Aclor. V. 29. Deo magis obediendum, quam hominibus.* Et notum exemplum obstetricum Aegyptiarum. *Exod. I.* Sed quaestio est,

3. *An vi subditi possint resistere regi legitimo, et cum eo gerere bellum, si iniuriam ab eo nobis fieri existimemus?* Id vero negandum esse Grotius demonstrat:

1. *Ex iure naturae et gentium. §. 2.*

2. *Ex lege Hebraea. §. 3.*

3. *Ex Evangelio. §. 4.*

4. *Ex praxi Christianorum. §. 5.*

Quia autem nulla regula temere sine exceptione est, hinc caput hoc constat duabus partibus. Nam

Priore tradit regulam. §. 2-7.

Posteriore subiungit exceptionem. §. 7. ad fin.

Nos iam primo regulam demonstrabimus, aliorumque obiediones refutabimus. Regula est: *non posse subditos bello adgredi superiores suos.*

§. 2.

Hanc regulam Grotius probat I. Ex iure naturae et gentium. Argumentum Grotii tale est:

Quicumque renunciarunt libertati naturali vim vi repellendi, illis non competit ius belli.

Subditi, ratione ciuitatis et imperantium, renunciarunt libertati naturali vim vi repellendi.

Ergo subditi non competit ius belli aduersus ciuitatem vel imperantes.

Maior clara est. Nam

1. Ad renunciata non datur regressus.

2. Renunciatio haec non magis iniqua est, quam hominem, qui se in seruitutem addicit, renunciare omni iuri suo in se ipsum.

Minor autem, quod facta sit huius modi renunciatio, probatur

1. Ex fine ciuitatum, quae coaluerunt mutuae defensionis causa aduersus externos. Non ergo defensio locum habet aduersus ipsam rem publicam, et qui eam repraesentat, regem.

2. Ex forma. Haec consistit in vnione voluntatum et iurium. Vnio illa voluntatum in eo consistit, quod omnes voluntates suas submiserunt vel vni, vel pluribus, vel maiori parti

parti ciuitatis. Quibus vero submissimus voluntates nostras, earum ratione renunciauimus libertati naturali.

3. Ex effectu. Aut resistere licet, aut non licet summo imperanti. Si licet, tunc erit anarchia, quia nulla erit submissio voluntatum. Si non licet, nec bellum gerere licebit.

§. 3.

Eandem regulam Grotius demonstrat II. ex lege Hebraeorum. Quum enim ea res publica sit diuinitus instituta: magnum omnino in eorum testimonio positum erit praesidium.

Hebraeis autem non licuisse resistere summis imperantibus, probatur

1. Ex *Deut. XV. 1. 12. Ios. I. 18.*

2. Ex lege regia 1. *Sam. VIII. 11.* Atqui saepe diximus: ibi non referre Samuelem, quid rex facere debeat, sed quid facturus sit: et tamen additur, populo nullum fore auxilium aduersus regem, ne in ipso quidem Deo, qui ad se clamantes non sit auditurus. Addi possunt

3. Exempla Israelitarum Pharaoni in Aegypto non resistentium, Davidis, qui iusto fultus exercitu fugere maluit, quam resistere Sauli, impio, iniusto, a Deo reiecto.

§. 4.

Sequitur demonstratio III. ex Euangelio. Vbi Grotius num. 1: allegat 1. dictum Christi: *date Caesari*, cct. Notatu dignum, non adicere Christum, quid Caesari dare debeant: sensus enim est, date ei quae iam ex lege vestra scitis illi esse danda. At lex Hebraeorum exigebat obsequium sine resistentia. Ergo hanc praestat Caesari.

2. Ad dictum PAVLLI *Rom. 13. qui resistit, condemnationem accipiet.* At qui bello persequitur summum imperantem, is resistit; ergo condemnationem accipiet, adeoque iniuste egit.

3. Ad dicta eiusdem, vbi vocatur imperans *minister Dei, cui parendum non solum ob iram, sed et propter conscientiam.* Ergo qui resistit, Deo resistit, et peccat contra conscientiam.

Obiici posset, non vtile esse pati iniurias, quia et is, qui num. 2: infert, hac patientia fit deterior, et aliis idem imminet periculum. 3. 4.

Resp. hic omnino vtilius esse priuatos aliquid pati iniuriae,

riae, quam bello persequi imperantes. Si enim hoc fit : statim dissolvitur ciuitas, et fit anarchia. In anarchia autem multo minor securitas est, quam in quouis imperio etiam tyrannico.

Accedit, quod multa subditi interpretentur pro iniuriis, quae tales non sint. Ne Iupiter quidem omnibus placet, necdum imperans. Si liceret itaque subditis eum bello petere, eique resistere : numquam futura esset tranquilla ciuitas.

Haec omnia egregiis testimoniis veterum suo more illustrat Grotius, ex quibus praecipue expendi merentur loca THYCYDIDIS num. 4. et DIONIS CHRYSOSTOMI num. 5.

num. 6.

4. Sequitur testimonium PETRI 1. Epist. II. 18. ubi docet, iniurias etiam regum et dominorum malorum ferendas, idque exemplo Christi.

Iam argumentamur :

Qui tenentur honorare reges et dominos exemplo Christi, illi non possunt in eos bellum suscipere.

Christiani ex praecepto apostoli tenentur honorare regem exemplo Christi.

Ergo non possunt in eos bellum suscipere.

Maior clara est. Nam Christus numquam resistit, quum ipse fateatur, se posse a patre impetrare plus quam XII. legiones : non hominum, sed angelorum.

Minor ex ipso Petri textu desumpta est. Vera ergo et conclusio.

§. 5.

Denique hanc regulam firmat IIII. praxi veterum Christianorum, quae sane optima est dictorum Christi et apostolorum interpres. Nam

1. Christiani numquam se opposuere tyrannis, quum et multitudine vincerent, et facile possent socios reperire. E. g. Neroni crudeli Christianorum lanioni se opposuere Galba, Ottho, Vitellius. Nemo Christianorum horum factionibus accessit. Dominiano Cassius et alii, Antonino Philosopho Cassius bella intulerunt. Nemo his Christianus adfuisse legitur, quum tamen et possent, et ab aliis imperatoribus dira passi essent. Hinc iusta TERTULLIANI gloriatio in *Apologetico* : unde Cassii et Nigri cct.

2. Num-

2. Numquam vim vi repulere. Adparet id 1. ex illis gravissimis persecutionibus, quibus Christiani innumeri mactabantur. Tanta erat Christianorum multitudo, ut TERTULLIANVS in eodem *Apologetico* dicat, Christianos implere palatia, curias, castra: nam totae legiones Christianae memorantur, et tamen numquam resistebant, numquam sumebant arma. 2. Exemplo Ambrosii, quod auctor refert, qui et populi motus sedare, et Maximi copias auxiliares detrectare maluit, quam Valentiniano crudeli et Arriano resistere. 3. Exemplo Christianorum sub Iuliano apostata. Sane tunc religio Christiana erat supereminens et dominans: imperator paucissimos habebat alleclas gentiles. Et tamen illi omnia ferebant, et, ut Gregorius Nazianzenus loquitur, precibus et lacrymis tantum se defendebant, quia solum hoc ipsis concessum videbatur contra persecutiones remedium.

Ergo manifestum est, Christianos semper credidisse, non licere bellum gerere aduersus superiores. Q. E. D.

§. 6.

Haftenus pluribus argumentis demonstrata est regula, quod non liceat bellum gerere contra superiores. Sed antequam ad alteram capitis partem progrediatur Grotius, et aliorum argumenta profligare instituit.

Et sunt quidam, 1. qui putant, vniuersum populum resistere posse regi, eumque bello persequi, si male imperet, eaque sententia est monarchomachorum, inprimis Miltoni, Hotomanni, et Steph. Iun. Bruti. Sunt, 2. qui hanc potestatem quidem non omni populo concedunt, sed magistratibus inferioribus et ordinibus. In qua sententia sunt PETRVS MARTYR, theologus, qui Geneuae docuit, et sub Eduardo reformationem Anglicanam promouit, in *libr. Indic. III.* DANAEOVS, theologus Heidelbergensis, in *Rom. XIII.* HADR. IVNIVS, Belga, et LAMBERTVS DANAEOVS Nauatrus, in *lib. VI. Polit. Christianae*. Et hos praecipue refutat Grotius ex principiis philosophicis. Ut genus aliquid est ratione inferioris, et tamen eadem est species ratione superioris: ita magistratus inferiores sunt magistratus et superiores ratione priuatorum, quibus praesunt, sed sunt iidem subditi ratione imperantium, quorum nomine magistratu funguntur. Hinc argumentum:

Heineccii Prael. Grot.

Q

Si

Si subditis non licet bellum gerere aduersus imperantem, nec id licet magistratibus inferioribus.

Prius verum est, vii concedunt hi auctores.

Ergo et posterius.

num. 2. Secundo eos Grotius ducit ad absurdum, et vrget, si possint magistratus inferiores bello coërcere summos imperantes, regnum statim fore in regno, rem publicam in re publica, id est, eum statum, quem omnes fatentur esse monstrum politicum. Hinc alterum Grotii argumentum:

Si magistratibus inferioribus licet coërcere summos imperantes, erit regnum in regno.

Posterius est absurdum,

Ergo et prius.

num. 3. 4. Repugnat id tertio Scripturae sacrae. Nam 1. ipse PETRVS 1. Ep. 11 1. subordinationem vrget, et aliter non subesse iubet magistratibus inferioribus, aliter summo imperanti: regem enim vocat potestatem superiorem. 2. PAVLLVS Rom. XIII. vult omnem animam subesse summo imperanti, ergo et magistratus inferiores. 3. Praxis Hebraeorum docet, regi Israelitarum et proceres subfuisse, veluti Samuelem Sauli, citius diuinitus reiecto. 4. Addendus elegans locus de centurione Capernaumitico: *sum homo, subiectus imperanti, et habeo infra me milites*. Hic erat magistratus inferior militaris, et fateatur tamen, se subiectum imperio.

num. 5. Obiciunt dictum Traiani, qui porrecto praefecto pugione: *hoc, inquit, prome vitare, si recte impero: contra me, si male.*

Resp. 1. Ex dictis regum eorum iura frustra probantur. Nam alias et dicta Neronis, Commodi, Caracallae non minus roboris haberent, quam illud Traiani.

2. Quando rex quidam se sponte submittit, vel iuri alicui renunciat, id non praediocat aliis, ceu patet exemplo eorum regum, qui sponte et per modum iuris dictionis prorogatae se submitunt iudicii curiarum suarum.

3. Traianus et alii imperatores civiliter imperantes id dedere operam, vt simulacris libertatis populo illuderent. Explicandum autem ex politicis, quid sint simulacra libertatis.

§. 7.

Quaeritur porro, an lex de non resistendo superioribus obliget
etiam

etiam in extremo periculo? E. g. si imperans ira percitus me gladio petat innocentem, et aut mihi, aut illi pereundum sit: mihi ne potius consulam, an principi? Et an non eius repellere possum conatus?

Resp. ante omnia distinguendum est inter defensionem sine principis interitu, et cum eius interitu coniunctam.

De priorē recte defendit Grotius, licitam illam esse, nec *num. 1.* principem conqueri posse de facta sibi iniuria, si me non patiar innocentem mactari. Id Grotius demonstrat ita

1. Argumento a maiore ad minus. Ipsae leges diuinae et de cultu diuino cessant in casu necessitatis extremae. Ergo multo magis leges de non resistendo summo imperanti. Antecedens probatur exemplo de sabbatho, et de cibis vetitis, quas necessitas cedere, et magistri Ebraeorum, et ipse Christus faterentur.

Adcuratius dicimus, leges vel esse

1. Humanas, quae semper admittunt exceptionem necessitatis, nisi diserte dicat imperans, eam cessare debere.

2. Diuinas

1. De officiis erga Deum

a) Adfirmatiuae, admittunt exceptionem.

b) Negatiuae, non admittunt.

2. De officiis erga proximum, tunc necessitas est

a) A Deo, et sic admittit exceptionem.

b) Ab hominum malitia, quae intendit vel

1. Perniciem, tunc admittit,

2. Peccatum, et non admittit. THOMAS. in *Iuris prud. diu. lib. II. cap. 2. §. 143. sequ.*

2. A modo et fine se subiiciendi. Numquam Deus vel in lege naturae, vel in S. S. absolute iussit, ut ciuitates et res publicae constitueremus. Ergo ciuitates et res publicae origenetenus sunt humanae: ergo et primae leges de non violandis summis imperantibus humanae fuerunt. Ergo non praesumitur eas obstringere etiam ad subeundum vitae discrimen: quum plerumque leges humanae intelligendae sint cum exceptione necessitatis.

Obiiciunt. At possunt et humanae leges sancire, ut et extremum subeamus periculum, v. c. quis neget summum imperantem posse iniungere militibus, ut potius interimi se patiantur, quam loco cedant?

Q 2

Resp.

Resp. non quaeritur, hic, quid legibus humanis sanciri possit, sed quid iis sancitum sit. Jam si omnes, qui primum in societatem coaluerint, interrogasses, vellentne ita se mancipare, ut si innocentes a principe petantur, se mori velle praepararent, quam propulsare iniuriam: nemo forte id affirmasset. Ergo tam dura et rigida obligatio non praesumitur.

Possset porro obiici: at supra demonstratum esse, populum; qui in rem publicam coaluit, renunciasse iuri resistendi. Resp. recte, sed 1. renunciarunt, se principi non restituros, id est, si princeps tamquam princeps aliquid praecipiat, vetet, iniungat. At si princeps ira percitus gladio innocentem petit, id non facit tamquam princeps, sed tamquam hostis meus. 2. Renunciauere iuri resistendi, id est, offendendi belloque petendi regem. Nos vero loquimur de defensione non coniuncta cum principis interitu, veluti, si ictus eius ante elidam, si me recipiam in aedes bene munitas, ex iisque in tutiora loca me recipiam, cet.

num. 3.

Porro obiicitur: non resistendum esse magistratui non esse legem humanam, sed diuinam. Resp.

1. Et leges diuinas aliquando admittere exceptionem necessitatis, supra ostendimus.

2. Est lex diuina non ratione originis, sed ratione confirmationis. Resp. sunt originis et inuentionis humanae, adeoque et leges de nexu imperantium et subditorum. Sed Deus hunc ordinem, tamquam ad conseruationem generis humani utilem, confirmauit, legesque de illo imperantium et subditorum nexu ratas habuit. Et hinc videmus, imperia modo dici ordinationem humanam, ut 1. *Peir. II. 13.* modo diuinam, ut *Rom. XIII.* humanam ratione originis, diuinam ratione confirmationis. Manet ergo ea lex humana, quamuis a Deo confirmata.

num. 4.

3. Eandem thesin Grotius probat testimonio *GVIL. BARCLAI*, Scoti, viri doctissimi. Est ille non confundendus cum *ROB. BARCLAI*O, qui elegantissimo et florido stilo scripsit *Euphormionem*, *Argentem*, *Iconem animorum*, nec cum *ROBERTO BARCLAI*O, qui Quackeros, quos vocant, apologia non insecite scripta defendit, sed *GVILIELMVS* in iure publico et gentium inclaruit, et demum Romam migravit, mutata religione auita. Scripsit libros *de regno contra monarchomachos*, eorumque principia feliciter profligauit.

Is

Is ergo ipse concedere tenetur, maiorem partem populi se tueri posse aduersus facitiam principis, (tueri inquit, non bellum gerere.) At inde arguit Grotius: si id potest maior pars, quidni et minor pars, quidni et priuatus? Idque illustrat exemplo Dauidis, a Saule iniuste pressi, qui non solum in fugam se coniecit, sed et quadringentorum hominum praesidium sibi circumposuit, 1. *Sam. XXII. 2. XXIII. 13.* non ut bellum cum Saule gereret, sed ut personam suam tueretur ab eius iniuriis.

4. Addit denique Grotius exemplum Maccabaeorum, sub quibus Iudaei iniuste oppressi ab Antiochis sacra vitamque strenue tuebantur, non modo multi, sed et singuli et subducendo se, et praesidiis muniendo templum. num. 5.

Sed hoc exemplum huc vix pertinet. Nam 1. haec non fuit innoxia defensio, sed verum bellum contra Antiochos: adeoque de eius iustitia in altera capitis parte dispiciendum. Vbi et indagandum erit, fuerintne Antiochi iusti Iudaeorum reges, au nudi inuasores, quam controuersiam hic loco non satis commodo tractauit Grotius.

Haecenus de priore quaestione, an non liceat in extremo periculo se defendere aduersus principem, si defensio illa sine interitu principis fiat? num. 6.

Iam sequitur altera: *an licita sit defensio cum principis interitu coniuncta?* Recte resp. regis personae etiam in tali periculo parcendum. Nam

1. Regis et principis personae sunt sacrosanctae, non in sensu theologico, sed iuridico, inuiolabiles, idque omnes gentes agnoscunt.

2. Regis interitus non potest non cum summa perturbatione rei publicae coniunctus esse, cui quam maxime parcendum est.

3. Dauides Saulem saepe in castes suas incidentem nunquam occidere voluit, sed ei semper pepercit, nolle se, inquit, manus iniicere vincto domini. Sunt, qui putant, id Dauidem non fecisse ex obligatione stricta, sed ex sublimi proposito, vel, ut opus supererogationis, uti loquuntur moralistae pontificii. Sed id falsum esse, tum ex praecepto Dei *Deut. XXII. 28.* tum ex ipso facto Dauidis patet, qui et eum occidi iussit, qui Saulem femiuuum ipsius rogatu occiderat, coronamque attulerat ad Dauidem.

Q 3

4. Porro

num. 7. 4. Porro arguit Grotius a minore ad maius : *Si ne verbis quidem laedere licet imperantes ; multo minus facili et manu.*

Præius verum.

Ergo et posterius.

Antecedens probatur ex *Deut. XXII. 28. principi in populo tuo ne maledicas.* Quin mortis supplicium imminabat ei, qui regi malediceret. Adeo, ut quamvis Dauides Simei, sibi in fuga maledicenti, gratiam huius delicti fecisset, Salomoni tamen inter extrema mandata iniungeret, ne pateretur eum morte sua mori.

Nec Iudæi solum, sed et omnes gentes eiusdem erant sententiae, ceu variis testimoniis ex Arilotele, Curtio, aliisque petitis demonstrat Grotius. Praeclarum est testimonium *ARTABANI*, Persæ, apud Plutarchum, ubi regem vocat *αἰνῶτα Θεὸν τὸν πάντων σωτῆρα*, Dei omnia sospitantis effigiem.

num. 8. Ex his duabus quaestionibus tertiam format Grotius. Quum enim supra concesserit licitam aduersus regem iniurias intentantem defensionem, modo ne in personam illius grauius quid statuamus, iam porro quaerit, *an non Christianismus potius absolutam nobis iniungat patientiam?*

Multa enim permittunt leges naturales, immo et reuelatae Veteris Testamenti, quae non permittit Euangelium, multo exactiorem a nobis exigens sanctimoniam.

Et sane Grotius in eam sententiam videtur pronior, quod Christianus rectius faciat, si se plane non defendat aduersus superiorem. Id probat

1. Ex illis dictis, quae patientiam suadent exactissimam, e. g. *Math. V. 44. 45. Benedicite maledicentibus vobis, benefacite iudentibus vos, deprecamini pro iis, qui persequuntur vos, ita eritis filii patris caelestis.*

2. Christus iis, qui patiuntur persecutionem religionis causa, fugam tantum concessit.

3. Exemplo Christi, quod Petrus vrgit *1. Petr. IIII. 12. sequi.* Quum is non defenderit se aduersus pontifices et Pilatum, sed omnes subierit iniurias : idem videtur Christianorum officium.

num. 9. 4. A praxi primorum Christianorum in persecutionibus se numquam defendentium. Dicas, vires, non animum illis defuisse. Sed audi Tertullianum, Cyprianum, Lactantium, ab ipso Grotio allegatos.

5. Ex-

5. Exemplo legionis Thebeae a Maximiano Caesare apud num. 10.
11. 12. Oſtodurum decimatae, nullo militum repugnante. Id exemplum fufe narrat Grotius, ſimulque verba praecipuorum ex iſta legione enarrat. Nam Mauritius dux vel tribunus legionis: *quam timui*, cet. Sic quum facta eſſet decimatio, et iis, qui ſuperſtites erant, denuo Maximianus praeciperet, vt diis ſacra facerent: reſponderunt intrepide, ſe in imperatoris poteſtate eſſe, at non ſacrificaturos. Inprimis egregia eſt Exuperii ſigniferi oratio: *non aduerſum te, imperator, armauit, cet.*

6. Exemplo Chriſtianorum ſaeculi IIII. qui numquam ſe n. 14. 15: valenti Arianis, ſacienti in ſe, oppoſuerant. Et demum inde inferit. Quemadmodum Chriſti, ita et Chriſtianorum patientiam ſe ad mortem extendere.

Sed quamvis haec omnia recte ſe habeant: non tamen confundenda iuſtitia et ſanctitas actionis. Qui debita remittit debitori, iſ ſanctè agit: ſed non ideo iniuſtus eſt, ſi non remittit. Qui ſua ſibi iniuſte erepta actione forenſi non vindicat, ſanctè agit, ſed quis diceret iniuſtum, qui actione petit, quod ſibi debetur? Ita et ſanctè agunt, qui Chriſti exemplo potius perire, quam ſe defendere, aduerſus principem malunt, ſanctè egerunt Thebaei legionarii, qui aetna in principem non conuerterunt: ſed nec iniuſtos eos dicerem, ſi iis uſi eſſent praefidiis, quibus ſine imperatoris laetione ſe vitamque ſuam deindeſſent.

ſ. 8.

Vidimus haſtenus regulam, quod bellum gerere nefas ſit ſubditis aduerſus principes vel ſuperiores. Sequuntur iam exceptiones. Quarum prima ſe prodiit

1. In regibus principibuſque nullo iure maiestatis gaudentibus, et hinc reuera populo ſuo ſubiectis, quales erant reges Lacedaemoniorum, et hodie dux Venetus, Genuenſis. Hi enim ſi vim inferrent populo, et eius iura vel libertatem opprimere auderent, procul dubio populo ius eſſet vim vi repellere. Nam

1. Hi improprie dicuntur reges et principes, reuera magiſtratus a populo conſtituti.

2. Bellum itaque proprie non gerunt aduerſus ſuperiores, ſed aduerſus inferiores, iniuriam ſibi illaturos.

3. Pro-

3. Proprie id ne bellum quidem est, quippe quod inter se gerunt societates liberae et summi imperantes, quales non sunt, qui superioriorem agnoscunt populum. Est ergo potius executio poenae, quam merentur, qui tyrannidem adieciunt in societate vel ciuitate libera.

§. 9.

Alteram exceptionem videmus II. in iis, qui quum antea regno se abdicassent, vel illud pro derelicto habuissent, postea illi intentant hostilia. Conf. LACTANT. *de mortib. persecutor.*

Huius rei illustre exemplum exstat in historia Diocletiani et Maximiani imperatorum, qui quum sibi alios sub nomine Caesarum substituisent, postea regno se abdicarunt, et ad priuatam vitam redierunt. Sed aduetos imperio facile et mox poenituit, maxime Maximianum, qui Constantium et alios regno conabatur priuare. Bello itaque petitus et profligatus est. Quaeritur, an tunc populus Romanus iure militare potuerit aduersus principem suum? Et resp. Grotius, omnia in huius modi adgressorem licere, quae in hostem.

Recte. Nam 1. non est princeps vel superior, qui perabdicacionem iuri suo renunciauit.

2. Iure defenditur ab iis iustus imperans, qui, illis se abdicantibus, imperium cepit.

3. Dum ad vitam priuatam redierunt, facti sunt successoris subditi. Subditi adiectantes imperium superioris sui crimen maiestatis committunt. Reos autem huius criminis bello coerceri posse manifestum est.

§. 10.

Tertiam exceptionem ipse Barclaius admittit: si rex velit alienare regnum; tunc enim amitti ab eo regnum, et hinc posse eum pro hoste haberi.

Sed recte Grotius hic cautius procedendum putat. Nam aut regnum est patrimoniale, aut usufructuarium.

Si patrimoniale, valet regula: *qui iure suo utitur, nemini facit iniuriam*. Huius modi enim regem regnum posse alienare, extra controuersiam est.

Sic

Sin vsufructuarium : aut vult alienare, aut alienauit. Si prius, non opus est bello, sed nullum est ipso iure hoc consilium. Sin iam alienauit : tunc non bellum geritur aduersus principem alienantem, sed aduersus eum, qui vi vitur in regno occupando. Si eius partibus accedit rex, tunc non amplius rex est. sed hostis populi sui, adeoque non geritur bellum aduersus superiorem, sed aduersus hostem.

§. II.

Quarta exceptio est in tyranno. Sed haec paullo difficilior, et hinc adcuratius explicanda. *Tyranni* vox est indifferens, et denotat regem, adeo, vt et gentiles in precibus Herculem cognominarent tyrannum, quasi regem : et Miltiades tyrannum vocari sibi laudi duceret. CORN. NEP. in *Milt. cap.* Sed postea id vocabulum in deteriorem partem sumtum est, quemadmodum idem fatum habuere vocabula fur, sophista, caussidicus, cet.

Sunt autem tyranni duorum generum, titulo et administratione. Titulo sunt tyranni, qui nullo praecedente et concurrente iusto titulo imperium adieciunt et administrant, quales tyranni fuerant Athenis Pisistratus, Syracusae Dionysii, Romae Iulius Caesar.

Administratione contra, qui quum iusto titulo imperent, imperium tamen ita administrant, vt hostilem animum aduersus totum populum ostendant. Aliquando vtrumque concurrit, vt nec titulus adsit, et magna crudelitate vtatur imperans, idque fit frequentissime. Nam *imperium flagitio quaesitum nemo bonis artibus retinuit.* TACIT. *Histor. lib. I. cap. 30.*

Ergo patet, 1. non esse statim tyrannum, cuius titulus dubius, modo aliquis sit. Sic e. g. papa declarabat Henricum III. imp. esse tyrannum, quia sibi non pareat, Fridericum II. esse tyrannum, quia iura imperii in Italia vindicabat, Elisabetham reginam Angliae, non esse reginam legitimam, quia religionem pontificiam deseruisset. Multi papae obnoxii tunc dubitare coeperant de titulo, an ideo tyranni erant? Minime.

2. Non statim esse tyrannos, qui aliquid iniuste agunt, quin qui multa agunt crudeliter. Omne enim magnum imperium, inquit Tacitus, habet aliquid ex iniquo, quod publica utilitate pensatur. Sic e. g. Ludouicum XIII. regem Franciae nemo

Heineccii Prael. Grot.

R

igno-

ignorat, Veneri plus iusto indulgisse, subditos reformatae religioni addictos adlixisse, saepe foedera et pacem abrupisse, cet. Omnia haec iniusta: nec tamen ideo statim tyrannus fuit. Exemplo Tarquinii Superbi egregie id illustrat BVDDEVS in *Specimine iuris prudentiae historicae* §. 35. sequ.

3. Nec eos esse tyrannos statim, qui bello et aperta vi iura sua vindicant a subditis. Iam supra enim diximus, hanc non esse speciem belli, sed exsequutionis. Exsequutio autem et sine hostili animo in rem publicam fieri potest. Ergo quum Carolus I. rex Angliae a Miltoño tyrannus ideo dicitur, quod bello adgressus sit subditos, male ratiocinatur, si supponamus, subditos ipsi omnia iura extorsisse per iniuriam, quae vi rex infelicissimus recuperabat.

4. Illos esse tyrannos, qui vel nullo plane titulo imperium inuadunt, et in eo numquam a populo confirmati sunt, vel hostilem animum aduersus populum vel rem publicam aperte ostendunt. Addo, a populo non confirmati sunt. Sic e. g. verum quidem est, Turcas imperium Constantinopolitanum sine titulo adgressos, sed tamen postquam seniel populus in eorum imperium consensit, non amplius habetur tyrannus, sed legitimus imperans. Et hinc merito dubitatur, an tamquam tyrannus fuerit Caesar occisus. Tamquam tyrannus inuaserat rem publicam. Sed postquam seniel senatus populusque Romanus ei dictaturam perpetuam lege lata detulerat, tyrannus non amplius erat, sed iustus imperans.

Hostilis autem animus aduersus populum adparet ex eo; 1. si imperans omnes promiscue occidat, in omnes saeuat sine discrimine, v. g. Nero et Domitianus, 2. si bellum illis inferat nulla iniuria prouocatus, e. g. rex Hispanianum Belgis.

Si itaque certum est, aliquem esse tyrannum: certum quoque, eum posse bello peti. Tyrannus enim est hostis rei publicae. Aduersus hostem autem hosti in infinitum omnia licita sunt.

Eleganter ergo MARIANA de rege et regis institut. lib. I. cap. 6. pag. 57. facti quaestio in controuersia est: quis merito tyrannus habeatur: iuris in aperto est, fas esse, tyrannum perimere.

§. 12.

Quinta exceptio est in eo, qui regnum commisit. Quid sit clau-

clausula commissoria, supra declarauimus. Talis vero in imperiis duplex occurrit:

1. Vbi capitulatio vel pacta conuenta ineuntur inter regem et subditos, inprimis ordines, additurque, si eas leges non seruet imperans, tunc eum ipso iure imperii exortem fore. Exemplum est in Germania a Caroli V. temporibus, et in Polonia.

2. Vbi regnum vel principatus feudali nexu alteri obstriguntur. Tunc enim regno priuatur ob feloniam, qui delictum feudale commisit, et tunc subditi magis obstricti sunt domino directo, quam eius vasallo. Sic e. g. Leopoldus imp. ob feloniam in bannum imperii declarabat duces Sabaudiae et Mantuanum: Iosephus electores Bauariae et Coloniae. An iniuste egissent subditi, si eos bello fuissent persequuti? Minime.

§. 13.

Sexta exceptio est nullius momenti. Dicit Grotius, licitum esse bellum in imperantes, si partem imperii habeat princeps, partem populus, et imperans in partem populi inuolet.

Sed hic status rei publicae plane esset monstrosus: esset enim res publica in re publica. Imperans et populus possunt regalia communiter exercere, non inter se diuidere. Potest imperans quaedam regalia solus habere, quaedam communicare cum populo: sed numquam potest populus quaedam solus habere, ad quae rex non concurrat.

An autem tunc quoque bello locus est, si princeps sibi soli vindicet, quae communia sunt? Et tunc respondetur omnino, modo vere id agat princeps, et modo non subditi sibi arrogent iura, quae illis minime competunt. Sic nemo dubitat, si imperator omnia principum et statuum iura vellet suppressere, et absolutum adiectare imperium, bello fore locum, quale etiam aduersus Ferdinandum II. imp. per triginta annos gestum nouimus.

§. 14.

Septima exceptio est eo casu, si populus sibi ius resistendi certo casu expresse reseruauit, et rex in id consenserit.

Quisque enim potest iuri suo renunciare, in sui fauorem introducto. Exemplum habet THYANVS *lib. CXXXI. ad a. 1604.*

R 2

et

et libro CXXXIII. a. 1605. de Hungaris, qui sibi stipulati sunt ius resiliendi regi, si vel religioni vim inferret, vel praefidia externa iuduceret in rempublicam.

§. 15.

- num. 1. Redit 1. Grotius ad tyrannos titulo tales, et quaerit;
 2. *Quatenus parendum sit inuasori alieni imperii?* §. 15.
 3. *Quatenus ei resisti possit?* §. 16-19.

Prima quaestio facile expeditur. Omne imperium acquiritur consensu. Consensus est vel vltroque, vel metu vique extortus. Ergo quamdiu populus nondum consensit in inuasoris imperium, tamdiu hostis est, et in eum omnia permessa sunt: simul ac autem consenserunt, siue id vltro fecerint, siue metu coacti: parendi ipsis gloria relicta est. Sic e. g. imperator Rufforum inuadebat Liunioniam. Fingamus, ei nullum fuisse iustum titulum, adeoque illum vere fuisse inuasorem: an poterant Liuones iure illi resistere, et bello opponere bellum? Procul dubio. Si autem quaeras, an postea, quum vrbes sub suam redegisset potestatem, id potuissent? Negandum id esset. Iam enim consenserant in eius imperium.

At vnde is consensus praesumitur? Ex depositione armorum et deditioe. Dum enim se dedunt, dum arma animumque hostilem ponant, procul dubio consentiunt in eius imperium.

- num. 2. Nec admittenda exceptio Grotii, quod parendum non sit in iis, quae ad firmandum inuasoris imperium pertinent. Qui enim consentiunt in imperium inuasoris, procul dubio etiam ad id firmandum obstricti sunt. Hinc si Liuones Russis negassent tributa, quia iis imperator abufurus sit aduersus Succos, veros dominos, et ad firmandum in Liunionia imperium: omnino stolidi egissent.

At alia quaestio est, an parere teneantur subditi, si inuasor eorum opera uti velit aduersus verum dominum, id enim nec tenentur facere, nec salua conscientia possunt, quia quidem inuasor imperator noster est, respectu exterorum, sed non respectu veri domini, cui semper saluum est ius recuperandi prouinciam, quamdiu ei in pacis conditionibus non renunciaret.

§. 16.

§. 16.

Sequitur iam altera quaestio, *an inuasori liceat resistere, eum deiicere, immo occidere?*

Respondet Grotius, licere, et quidem variis casibus. Generalis vero regula est: *quoties huius modi inuasor nondum est princeps, sed hostis, toties in illum omnia licent.* Inde itaque colligimus:

I. Id licere, si bello iniusto quis nos adgrediatur, et nulla pactio inter illum et nos sequuta sit, et quidem neque tacita, neque expressa. Nam tunc non est princeps, sed hostis. In hostem nihil non licet.

Dico autem perinde esse, siue tacite pacti simus cum inuasore, siue expresse. Nam tacitus consensus etiam verus consensus est, quod non videtur agnouisse Grotius. Dum enim tolero alterius imperium, dum arma pono, dum, vt in me iure belli abstineat, volo, eo ipso tacite cum eo paciscor, adeoque ipsum agnosco principem eousque, donec verus et legitimus imperans imperium iustis mediis recuperarit.

Hinc non minus iniustum esset bellum Graecorum in Turciae imperatorem, quam vesperae Siculae, quibus Galli perfide trucidati sunt. Illi tacite, hi expresse imperium inuasorum agnouerant.

§. 17.

II. Si lex exstat, vt cuius fas sit occidere tyrannum. Tales autem leges exstabant in Graeciae ciuitatibus tere omnibus, nec non Romae lex Valeria. Et hinc defendi solet caedes lulii Caesaris, quamuis a priuatis perpetrata.

Sed haec regula non vsquequaque vera est. Nam 1. distinguendam inter inuasores, qui ipsi ciues sunt, et extraneos. Illos solos huius modi lex obstringit, et quum contra hanc legem inuadant rem publicam, non possunt de facta sibi iniuria conqueri, si occidantur. At extraneos haec lex non obstringit; adeoque si is inuasit rem publicam, et libertatem sustulit: non valebit aduersus eum lex a libero adhuc populo lata. Hinc absurdum fuisset, si quilibet Thebanus putasset sibi licere occidere Alexandrum M. postquam semel eorum princeps fuerat factus.

R 3

2. Etiam

2. Etiam quod ad ciues attinet, distinguendum, vtrum pactio sequuta sit cum populo, nec ne. Si prius, legem illam veterem noua lege sustulit populus: sin posterius, tunc locum habet Grotii regula. Ergo iure occisus est C. Cassius, qui inuaserat rem publicam, non iure occisus est Iulius Caesar, quem ipse populus lege lata dictatorem perpetuum constituerat.

§. 18.

Tertius casus est, si accedat iussus veri imperantis. Hinc saepe solent veri imperantes promittere praemium ei, qui inuasorem viuum mortuumue obtulerit.

Sed denuo distinguendum, 1. an adhuc possideat imperium, princeps legitimus, an inuasor iam vniuersum regnum teneat. Sic iure poterat imperator praemium huius modi promittere ei; qui Ragotzium viuum mortuumue sibi obtulisset, at id non poterat Augustus, rex Poloniae, quum regno deiectus Stanislaus ope Suecorum imperaret. Ratio diuersitatis est, quia, vti iam diximus, inuasori parere eousque tenemur, quoad imperans legitimis mediis recuperasset rem publicam. Quamdiu nondum recuperauit, eius ius in suspenso est. Ergo nihil nobis potest praecipere.

2. Denuo distinguendum, an pacta intercesserint, nec ne: Pactum enim ex inuasore ratione paciscentium facit principem, quamuis legitimum imperantem haec pacta non obstringant, tamquam res inter alios acta.

§. 19.

§. 19. Subiungit Grotius monitum. Extra hos casus non licere priuato deicere aut occidere inuasorem. Idque probat

1. Inde, quia non constet de voluntate summi imperantis, qui mauult fortassis tolerari inuasorem, quam rem in extremum periculum adduci. Hinc laudant Romani scriptores Mutii Scaeuolae factum, qui in Porfennae castra profectus regem infesto ictu petens, eius administrum primum occidit. Sed addit Liuius, eum rem prius ad senatum detulisse, et eo probante in castra profectum. Extra iussum principis vel populi legitime imperantis non licebit priuato in summum discrimen adducere rem publicam.

2. Quia

2. Quia libertas quidem iucunda, sed saepe remedium servitutis ipso morbo gravius. Nam 1. aliquando non potest populus libertatem ferre, vti Romae temporē Caesaris et Augusti: 2. semper inuasor occidendus habet, qui ipsi faueant. Hinc ex huius modi caede nascitur bellum ciuile, ex hoc noua tyrannis priore multo grauior, cū exemplum Iulii Caesaris occisi docuit.

Quum itaque priuati non sit de graui hac quaestione decernere, nec ei licebit occidere inuasorem, sine iussu totius populi.

Obiiciunt aliqui factum Ehudis, qui hoc modo occidit Eglo-^{num. 1. 3.} nem, Phylisaeorum regem; *Iudic. III. 15.* et facinus Iehu, qui domum Ahabi ita destruxit, et principatu deiecit. Sed resp.

1. Exemplum non probare, sed illustrare: non ostendere, quid fieri debeat, sed quid factum.

2. Vtrumque tyrannicidam ipso Dei iussu dextram aduersus tyrannos armasse: Dei autem iudicio supremo nemo iniustitiae dicam scripserit. Condamnauerat illos Deus ad mortem, exequutionem demandare poterat, cuicumque vellet.

§. 20.

Denique grauitè monet Grotius, non esse priuatorum de controuersis huius modi et factis principum iudicare. Et rectè quidem. Nam

1. Illis deest iudicium et prudentia sufficiens ea de re iudicandi.

2. Plebs summis imperantibus semper iniqua est.

3. Christus ipse noluit priuatis permittere iudicium de imperio Augustorum, dum dixit: *dote Caesari* cet.

CAPVT V.

QVI BELLVM LICITE GERANT.

§. 1.

Vltimo hoc capite quaenam quaestio tractetur; paucis explicandum. Causa efficiens belli duplex est, principalis, et minus

minus principalis. Principales sunt summi imperantes vel res publicae, quorum auspiciis bellum geritur. Minus principales sunt duces, milites. Hinc tres nasci possunt quaestiones:

1. *An summi imperantes vel res publicae, et qui quaecumque inter se bellum iure gerant?*
2. *An summi imperantes et res publicae etiam pro aliis bellum gerere possint?*
3. *An subditi possint et teneantur milites agere pro superioribus suis.*

Prima quaestio haecenus explicata, de reliquis agitur hoc capite, et de secunda quidem §. 2. de tertia §. 3. 4.

§. 2.

num. 1. Quod ergo ad bella pro aliis gerenda attinet: nemo dubitavit ea iusta esse. Nam

1. Ipsa humana natura nos obligat, ut miseris succurramus. Si privati iure reprehenduntur, qui id non faciunt: quidni et imperantes et res publicae?

2. Vicinorum clades semper fere cum nostro periculo coniuncta est. Vicino oppresso, tanto facilius et nos opprimimur. Tunc tua res agitur paries cum proximus ardet.

num. 2. 3. Potest et vinculum nos obstringere ad arma pro aliis capienda. Sed quale? Grotius sufficere, ait, naturae humanae communionem. Sed id vinculum paullo laxius. Sunt multo maiora, veluti

1. Foedus, ex quo tenemur alterius causam suscipere.

2. Fideiussio de servanda pace, quae vocatur *la garantie*. Tunc enim fideiussor (*le garant*) tenetur armis tueri eum, cui contra pacem fit iniuria.

3. Cognatio, adfinitas.

4. Spes succedendi.

5. Religionis societas, eiusque periculum.

§. 3.

Sequitur ultima quaestio, *an et qui subditi possint et teneantur militare superiori?* Afirmat Grotius, idque

1. Inde

1. Inde probat, quia subditi sint instrumenta summi imperantis, non externa, sed interna. Sed hoc argumentum dilutum est. Nos addimus aliterum.

2. Quia rei publicae essentia consistit in vnione voluntatum et virium. Si vires vnitae, poterit imperans et subditis vti ad militiam.

§. 4.

Sed quaeritur, *an nemo excipiat*? Dist. inter militiam le-
tam et mercenariam. Illa neminem excipit, nisi privilegio mu-
nitum: haec omnes, qui sumtus rei publicae suppeditare possunt
ad conducendum militem.

* * * * *

LIBER II.

CAPVT I.

DE BELLI CAVSSIS, ET PRIMVM DE DEFENSIONE SVI, ET RERVVM.

DIximus sub finem prooemii, tres esse Grotiani operis par-
tes, quas vulgo hoc versiculo soleant complecti:

Quid bellum? belli causae; quae iuraque belli?

Quum itaque haecenus primo libro actum sit de bello in genere:
iam libro II. causae belli prolixè explicantur.

Caput primum constat tribus partibus. In prima ostenditur,
quid sit causa belli? §. 1. in secunda, *quot et quanam sint?* §. 2.
in tertia prima belli causa tractatur, nempe *defensio vitae et re-
rum suarum.* §. 3. *ad finem.*

§. 1.

Si itaque quaeritur, *quanam sint causae belli*: ante omnia num. 1.
distingui merentur, quae vulgo confunduntur. Nam

1. Alii sunt praetextus, aliae sunt causae belli. Praetextus,
vel, vt Latinius loquamur, causae, quas obtinere falso so-
Heineccii Prael. Grot. S lent

lent belligerantes, sunt illae, quae quum mouisse imperantes dicantur, eos tamen non mouerunt. Sic e. g. Ferdinandus Catholicus occupabat partem regni Nauarrae Hispanicam sub praetextu excommunicationis papalis, quum vera causa esset habendi cupiditas. Romani debebant Carthaginem sub obtentu, quod foedus violarit, quum vera causa esset, quod exstare nollent urbem, a qua aliquando fuerant tot cladibus adfecti. Causae autem belli sunt, quae vere mouerunt.

2. Et hae denuo vel politicae sunt, vel occasionales, vel iustificae. Mere *politicae*, quae merae utilitatis contemplatione mouent, e. g. bello adgrediendus vicinus, quia iam debilis est, *Occasionales*, quae proxime occasionem dant, vt ad manus veniatur, vnde et *principia belli* dicuntur. Tale belli principium erat ceruus apud VIRGILIUM *Aeneid. lib. VII. v. 485.* cuius occasione ad manus veniebant Aeneas et Turnus. Ita et caesi ad Delium templum milites principium belli fuere Romanorum aduersus Antiochum. *Liv. lib. XXXV. cap. 51.* Causae denique *iustificae* sunt, quae ex regulis iusti fluunt, et efficiunt, vt salua fide et conscientia bellum geri possit. Et de his iam agendum.

His causis iustificis opus esse, si bellum debeat iustum dici, facile probatur. Nam

num. 2. 1. Rerum moralium iustitia et iniustitia ex fine et causa impulsua aestimatur. Iusta est lis, quae sui recuperandi retinendique: iniusta, quae alterius vexandi causa suscipitur. Ita et iustum bellum, quod ex iusta causa; iniustum, quod ex mera ambitione et avaritia suscipitur.

num. 3. 2. A minore ad maius inferri potest. Si iniustum est priuatum vim adhibere sine iusta causa, idque qui facit, latro merito appellatur: multo magis, qui totam gentem sine iusta causa variis cladibus adficit. Immo tanto magis latro est, quo plus innocentis sanguinis sine ratione fundit. Notetur elegans iudicium Scytharum de Alexandro M. apud CVRT. *lib. VII. cap. 8. §. 19.* *at tu, qui te gloriaris ad latrones persequendos venire, omnium gentium, quas odisti, latro es.* LVCANVS *lib. X. v. 21.* Caesarem vocat *terrarum felicem praedonem.*

num. 4. 3. A fine bellorum idem probatur. Bellum idem est in statu naturali, quod in ciuili sunt iudicia. Quemadmodum itaque locum non habent iudicia sine iniuria, ita nec bella sine iniuria a principe vel gente illata.

f. 2.

§. 2.

Iam porro quaeritur, *quaenam illae sint causae iustificae*, ob ^{num. 1.2.} *quas bellum pie et iuste geritur?*

Grotius ita procedit, ut comparet inter se iudicia ciuilia et bella, et supponat regulam: *ex quibus causis ciues inter se iuste litigant, ob eandem principes et gentes inter se iuste bella gerunt.*

Iam omnes lites iustae nascuntur ob *iniuriam* siue *non dum factam*, sed quam metuimus, ut cautio de damno infecto, interdita uti possidetis, ne vis fiat, cet. siue ob *iam factam*, unde dantur actiones reales, rei vindicatio, confessoria, cet. et personales ex contractibus veris et quasi contractibus; vel denique *de poenis* ob delictum siue publicum, siue priuatum: quo pertinent omnes actiones poenales et persequutiones criminales.

Ita et tres sunt belli causae. Ob iniuriam enim imminentem licita est *defensio*; ob iam illatam, *recuperatio* rerum nostrarum; ob factum quodcumque grauius vel iniustum *poena* seu ultio.

Ita Grotium tres sunt belli causae iustificae, *defensio*, *recuperatio* rerum, et *punitio*: idque deinde suo more illustrat testimoniis veterum, veluti Diodori, Liuii, Aristotelis, Curtii.

Sed hic Grotium merito castigarunt Boeclerus, Io. a Fel- ^{num. 3:} de, et Casp. Zieglerus. Nam poena concipi nequit sine superiore, qui ius poenam exigendi habet. Quum vero principes et gentes inter se non sint superiores et inferiores, merito argumentamur:

Qui sunt pares, illi se inuicem punire nequeunt,

Principes et gentes inter se sunt pares,

Ergo principes et gentes se inuicem punire nequeunt.

Hinc merito haec tertia causa omittitur: et omne bellum aut geritur propter defensionem, aut propter reparationem rerum nostrarum, non propter punctionem. Conf. BVDDEI *Diss. de expeditionibus cruciatis*, §. 7. seqq. ubi quaerit, an iusta fuerint bella Christianorum cum barbaris, quia hi fuerint infideles?

Interim Grotius hunc ordinem hoc libro obseruat. Nam

1. de *defensione* sui agit, cap. 1 - 9.

2. de *reparatione* rerum nostrarum, cap. 10-19.

3. de *punitio* cap. 20. 21.

S 2

§. 3.

§. 3.

Prima caussa est DEFENSIO sui suarumque rerum. Ea vero denuo est triplex. Nam aut defendimus

1. *vitam*, §. 3-5.
2. *integritatem membrorum*, §. 6.
3. *pudicitiam*, §. 7.
4. *res nostras*, §. 11. *seqq.*

De singulis iam seorsim.

1. Recte defendit, ob periculum vitae imminens, et quod aliter evitari non potest, bellum et priuatum et publicum recte geri. Priuatum, quoties suscipimus moderamen inculpatæ tutelæ: publicum, quoties hostis nobis extrema intentat. Immo hic non interest, siue is qui me adgreditur, id bona fide faciat, e. g. furiosus, errans, siue mala. Nam

1. Nullum ius nos obligat, vt magis amemus alios, quam nos ipsos. *Dilige proximum tuum, sicut te ipsum.* Non itaque parcere alii cogor cum meo interitu.

2. Ex eo fundamento porro sequitur. Quia defendere cogor proximum, si incidat in periculum, multo magis me ipsum. Vera enim dilectio incipit a se ipso.

3. Quum ergo fundamentum defensionis meae non sit alterius peccatum, sed obligatio illa et impeius naturalis me defendendi: hinc facile patet, me meae defensionis caussa occidere posse, qui mihi intentat necem, quamuis id sine dolo faciat. Hinc variae decidendae quaestiones:

- a) *An in bello occidere possim militem hosti bona fide militantem?*
- b) *An, qui me adgreditur ex errore, quum putes me alium esse?*
- c) *An furiosum, insanum, noctiuagum vel lunaticum?* Omnes hae quaestiones adfirmandae, quia, ut diximus, id ius non habet pro fundamento peccatum alterius, sed obligationem meam vitam defendendi.

§. 4.

Ex eodem fundamento definiendae quaestiones:

num. 1.

- d) *An ei innocentes plane, qui mihi resistunt, possim obruncare, si mihi aliter consulere nequeam?* e. g. si infans vel claudus impediatur me fugientem, dum viam occupauit. Resp. alii affir-

affirmando, vt cardinalis *HOSIVS lib. I. qu. 33. PETRVS NAVARRVS lib. III. cap. 3. n. 147. CALETANVS lib. II. cap. 2. art. 6. 7. qu. 2.* At Grotius id putat repugnare dilectioni, adeoque regulis Evangelicis.

Sed 1. quod iustum est ex iure naturae, id non potest iniustum fieri euangelio, quamvis forte Euangelium maiorem sanctitatem requirat.

2. Nullum est testimonium S. S. quod hoc casu me iubeat parcere infanti, vel claudo, et me potius perire.

3. Euangelium non aliam requirit dilectionem proximi, quam vt eum diligamus sicut nos ipsos. Si autem ei parcimus, vt pereamus : magis diligimus proximum, quam nos ipsos.

Hinc rectius alii dicunt, hoc quoque casu quamvis esse honestam rationem expediendae salutis, quamvis recta ratio suadeat, 1. vt periculum faciamus, an saltu possimus transmittere infantem, 2. an claudum sine interitu possimus prosterne-
re, 3. vt si ei damnum dederimus, id refarciamus pro virili.

§. 5.

Dum autem defensionem vitae etiam violentam concedimus, aliter id intelligendum in quaestione de bello priuato, aliter in altera de bello publico.

In bello publico sufficit quoduis periculum imminens, modo certe immineat, et non mera suspicio periculi sit. E. g. si vicinus non solum bellum manifesto parat, sed etiam variis in rebus hostilem aduersus nos animum ostendat, nullum est dubium, quin praecoccupare illum liceat. Sic quum domus Brunsvicensis exercitum compararet maximum nummis Gallicanis, et nemini exitium minaretur, quam domui Hanoueranae, cui ob electoratum succensebat : haec vna nocte omnes inuasit terras Brunsvicenses, et militum nondum contractorum partem maximam captiuam abduxit.

At in bello priuato periculum adesse debet praesentissimum, adeo vt moderamen inculpatae tutelae non sit,

1. Si quis ob imminens periculum, vel ob minas alterum occidat.

2. Si periculo iam propulsato adgressorem occidere audeam.

Rationem Grotius arcessit a natura metus, qui saepe falle-

re soleat, ut nobis periculum imminere fingamus, quale nulum imminet: sed haec ratio non sufficit, nam et in bello publico locum habet, nec quisquam potest salva conscientia bello adgredi alterum, nisi metus sit iustus. Ergo ex hac ratione explicari non potest hoc discrimen, cur in bello publico liceat ob metum iustum defensionem suscipere, in privato non liceat.

Vera itaque ratio est, quod in statu civili periculum imminens possit propulsari, implorato auxilio magistratus, qui potest iubere cautionem praestari de non offendendo, id autem fieri nequit in statu naturali. Ergo hic primum ictum excipere non teneor.

num. 2.

Ergo facile patet, quid sentiendum sit de quaestione num. 2. proposita, *an, si coniurasse, insidiari, venenum parare alterum videam, eum iure interficiam?* Ex theologis moralistis, uti se vocant, hoc concedit BANNEZ in *Quaest. 64. art. 7. dub. 4.* ex ICtis BALDVS: sed Grotius merito negat. Nam non video, quomodo hic magistratus auxilium implorari, ab eoque nobis auxilium praestari nequeat. Quamdiu autem id nobis praesto est, nullum nobis ius est defensionis in statu civili.

§. 6.

Secundo etiam defensio membrorum nonnunquam necessaria est, maximeque ea causa locum habet in bello privato, seu moderamine inculpatae tutelae. Quaeritur, *an ea iusta sit, ita ut occidere possim eum, qui me manu, oculo mutilare, vel mihi vulnus dolorificum infligere intendat?*

Resp. affirmandum id esse. Nam 1. non teneor alterum plus amare, quam me.

2. Ea intentio saepe dubia est, nec ictus ita ad mensuram dari possunt, ut certus esse possim, solam manum peti.

3. Integritas corporis saepe non minoris nobis est, quam ipsa vita: immo facilius aliquando vitam, quam oculos manusque nobis eripi pateremur.

4. Incertus est vulneris euentus, quum et ex minimo vulnere mors sequi possit.

§. 7.

An vero idem licet pro pudicitia? Adfirmant plerique, et in his GROTIUS, PUFENDORFFIUS, lib. II. cap. 5. §. 11. et ipse PLATO

PLATO *de legib. lib. VIII.* HADRIANVS in *l. 1. §. 4. D. ad leg. Cornel. de fícar. Hebraei apud SELDEN. de iur. nat. et gent. sec. discipl. Hebraeor. lib. III. cap. 3.*

1. Quia Deus ipse vitam et pudicitiam pari pretio aestimet.

2. Quia virgini pudicitia pro dote sit.

3. Quia magistratus stupratorem violentum possit capitis damnare, adeoque et priuato, vt id faciat, permittere.

Sed dissentiunt tamen alii, et in his THOMAS in *Iuris prud. diuin. lib. II. cap. 2. §. 114.* BVDDVS in *Theol. moral. part. II. cap. 3. sect. 3. §. 20.* quin ex veteribus AVGVSTIN. *de liber. arbit. lib. I. cap. 5.* Rationes sunt:

1. Si per pudicitiam intelligatur virtus moralis, eam eripi non posse: cuius vero amittendi non est periculum, eius nec defendendi ius est.

2. Sin per pudicitiam intelligatur integritas corporis physica: ea in se non ita violatur a stupratore, vt non magistratus auxilio satisfactionem impetrare possit.

3. Sic ex parte virginis duo concurrere mala, vnum minus et physicum, vt hanc iniuriam corpore excipiat, alterum maius et morale, vt stupratorem occidat: ex duobus autem malis, quorum alterum physicum, alterum morale, vel vtrumque physicum est, semper eligendum esse minus.

Nos virginem hanc in foro puniri haud posse dicimus: sed an conscientiae suae satis consulat hoc defensionis genere, non definiam. Tutius saltim fuerit, clamore, relictatione, minis se defendere quouis modo, quam his non sufficientibus ad arma se conuertere.

§. 8.

Sequitur iam noua quaestio, *an liceat defensionem omittere*, adeoque iuri suo renunciare?

Nequant hoc alii, qui hanc legem putant esse praeceptiuam: *defende te.* Alii, qui eam permissiuam volunt, adfirmant, quum quisque iuri in sui fauorem introducto possit renunciare. Alii denique distinguunt inter personas, quas viuere interlit, et quorum vita non adeo utilis sit rei publicae. Illas se defendere teneri putant, has laudabilius agere, si se non defendant, quamuis, si velint, id possint.

Nobis omnino haec lex non solum permissiua, sed praeceptiua

tua videtur, adeoque hic non valet regula: quisque potest iuri in fauorem sui introducto renunciare. Nam ea locum non habet, nisi in rebus nostris. Vita non nostra est, sed dei. Praeterea nititur obligatio defensionis regula et lege diuina: *dilige proximum, sicut te ipsum*. Vti ergo proximum defendere non sola permissio, sed verum praeceptum est: ita et se ipsum defendere.

§. 9.

NUM. 1. 2. 3. Iam regulae huic quaestiones nonnullae adduntur. Et quidem 1. de iensonem violentam cessare in privato contra principem suum, de quo late Grotius tota hac paragrapho: sed quum iam superiore libro, cap. 4. de hac re ex professo actum sit, non opus plura iam addi.

§. 10.

NUM. 1. Secunda exceptio est, si iniuria intentata sit momenti paullo minoris. Vnde variae quaestiones. Nam

1. Quaeritur, *an ob intentatam alapam liceat ad defensionem violentam prouere, et intentantem occidere?* Grotius diuidit inter ius strictum et aequitatem euangelicam. Illo iure, seu expletrice iustitia duce, putat licere, ex ea ratione, quod dum alter me iniuria adficere parat, is mihi eo ipso det ius in infinitum aduersus se: at ex euangelica lege id minime concedi, quia Christus potius vult nos iniuriam istam tolerare.

Sed ego nec ex lege euangelica, nec ex iure naturae stricto procedere arbitror defensionem, vsque ad destructionem alterius.

Nam alapa consideratur aut tamquam iniuria, aut tamquam dolorem efficiens actus. Si prius, nullum hic est periculum, ne per magistratum satis factionem accipere non possimus: sin posterius, non est dolor iste tam intolerabilis, vt dignus sit, vt ad eum euitandum alterum destruere conemur.

NUM. 2. 2. *An accepta alapa liceat alterum occidere ad recuperandum honorem, vt aiunt?*

Affirmant id theologi, Nauarrus, Henriquez, Desoto, aliique, sed Grotius recte negat. Nam

a) Vera existimatio est opinio aliorum hominum de nostra virtute. Ea non amittitur alapa innocenter accepta, sed vitiis, vt

vt

vt facinoribus aduersus rectam rationem admissis.

b) In bello priuato ius defensionis non durat diutius, quam dum praesens est periculum. Eo defuncti reliqua committenda magistratui.

c) Si amissa esset existimatio, illa non recuperaretur vindicta priuata, quae est actus illicitus, sed auxilio magistratus, et poena ab illo infligenda.

3. *An, si fuga possim declinare periculum, nihilominus possim num. 3: violenta alterius caede mihi securitatem parare?*

Negat Grotius, ex ea ratione, quod fuga in se nihil ignominiae habeat, nisi forte in milite ad moriendum potius, quam fugiendum obligato.

Sed distinguendum potius inter fugam et periculum. Ad hoc obstricti sumus, quia sic securitati nostrae consulitur: ad illam minime.

a) Quia fugiens tergum praebet aduersario.

b) Quia si caderet, actum esset cum fugiente.

c) Quia si adgressor illum adsequeretur, difficile foret, ad defensionem se de nouo componere.

§. 11.

Ultima species est, quae pro tuendis rebus nostris suscipitur. Vbi auctor disquirat, 1. *an ea conueniat iuri naturae?* §. 11.

2. *an legibus V. T.?* §. 12.

3. *an doctrinis N. T.?* §. 13.

4. *an iuri civili?* §. 14.

I. Quod ad primam quaestionem attinet, illam adfirmat Grotius, fateturque, non aduersari hanc defensionem iuri naturae. Nam 1. res, bona, opes pertinent ad vitam sustentandam, et saepe occidere videtur, qui bona et res nobis subtrahit. 2. Plerumque fures et raptores non tantum furandi, sed et occidendi animo irruunt. 3. Fuga sibi consulunt ordinarie, et res leuissimo pretio distrahunt, adeoque vix spes est, vel personam adsequendi, vel res nostras recuperandi. Quum itaque hic cesset magistratus auxilium: quaelibet honesta ratio est expediendi salutem.

Sed tamen ex his ipsis rationibus patet, regulam hanc admittere exceptiones, nimirum

1. Si res sit nullius momenti, quam raptor petit.

Heineccii Prael. Grot.

T

2. Si

2. Si vel spes sit recuperandi, e. g. si raptor sit notus et locuples, vel magistratus aliorumue hominum auxilio periculum propulsare possim, v. g. si interdiu rapere conetur in vrbe celebri et populosa, vbi facile sit aduocare vicinos. Defensio enim inter priuatos cessat, nisi adsit extremum periculum.

§. 12.

num. 1.

II. Quaeritur, quid leges V. T. ea de re sanxerint? Lex Moisaica distinguit inter furem et raptorem diurnum, et nocturnum, illum occidere vetat, hunc permittit. *Exod. XXII. 2.*

Ea lex tam aequa visa est, vt apud plerasque gentes reperiatur similem, e. g. apud Athenienses, vid. *DEMOSTH. in Timocr.* apud Romanos, vbi in XII. tabb. cautum fuerat, vt furem nocturnum occidere liceret, non item diurnum, nisi telo se defendat. *CIC. orat. pro domo cap. 41.*

Iam quaeritur, quanam sit huius distinctionis ratio? Alii rationem hanc allegant, quod noctu discerni non possit fur et sicarius: sicarius autem occidi posse nemo negat.

Alii dicunt, rationem esse, quod res noctu surreptae difficilius recuperari possint, quia fur sit nobis ignotus.

num. 2. 3.

Sed vera ratio longe alia est, nempe quod demonstrauiamus, defensionis priuatae longe aliam esse rationem, quam belli publici. In hoc ius mihi est me defendendi, simulac periculum iuste metuo, et id ius durat tamdiu, donec impetrauerim securitatem. At defensio priuata incipit, simulac periculum est praesentissimum, nec diutius durat, quam illud periculum durat; quia alias ope magistratus vti possum. Iam in furto diurno plerumque non est periculum praesentissimum, nisi in locis solitariis: in nocturno autem omnino. Ergo fures nocturnos occidere licet, diurnos non item, nisi telo se defendant.

Hinc non admittenda praesumptio, quam vrget Grotius. Dicit praesumi, furem nocturnum cum telo adiuisse: hinc si contrarium probari possit, cessare praesumptionem. Nam id potius ad furtum diurnum pertinet. Noctu haec vix discerni possunt, quum fuerim in iusto metu.

num. 4.

Illustrat id Grotius exemplo legis de occidendo stupratore. Nam Moses id permittit in agro, non item in vrbe, vbi clamore possit periculum auertere.

Sed pudicitiae aliam rationem esse, iam supra ostendimus; et

et haec ipsa lex eodem principio potest explicari, quod in vrbe populosa periculum non sit praesentissimum, in agro aliisque locis solitariis omnino praesentissimum esse solet.

§. 13.

III. Pergit Grotius ad doctrinas Novi Testamenti; et pu-^{num. 11} tat, eam defensionem rerum suarum violentam non esse iis permissam, idque probat dictis Christi notissimis, *si quis pallium eripiat, tu ei tunicam quoque concede, Matth. V. 40.* item Pauli, qui Christianis turpe putat de rebus huius mundi litigare. Quanto minus iustum erit occidere, ad res suas seruandas? Sed

1. Christus non est nouus legislator.

2. Consilia haec non obligant, nisi quibusdam casibus, nempe tempore persecutionis.

3. Paulus non dixit, nefas esse Christianis, litigare coram iudice, sed coram iudice ethnico, vnde scandalum nasci possit. Hinc suadet, vt inter se arbitros eligant, qui iudicent inter fratrem et fratrem.

Hinc nec est, quod theologos reprehendat, qui id ius de-^{num. 11} fendendi defendunt. In hoc vno tamen reprehensionem merentur moralistae illi pontificii, Soto et Lessius, quod et furem diurnum, et qui telo se non defendat, occidi posse existimant. Id enim vel ideo absurdum, quod regula generalis etiam in defensione vitae obtinet, defensionem iustam esse, non nisi eo casu, si praesentissimum adsit periculum. An plus liceret pro rebus tuendis, quam pro vita?

§. 14.

III. Denique progreditur Auctor ad ius ciuile, et quaerit, *an illud huius modi caedem pro rerum suarum defensione permittere possit?* Id negat

1. Quia lex non habeat ius necis in ciues, nisi ex delicto graui, quod mortem mereatur.

2. Quia probabilis sit Scoti sententia, neminem posse ad mortem damnari, nisi ob delictum, cui lex Mosaica poenam capitalem proposuerit. Furtum autem ex lege Mosaica non puniri morte.

3. Lex nemini irrogat poenam, nisi causa cognita.

T 2

4 Lex

4. Lex impunitatem promittere, ius facere non potest.

Sed in his omnibus egregie fallitur. Nam respondeo

1. Ad primum : legistatorem gaudere iure vitæ et necis, si grauiora delicta ingruant. Grauiora autem habentur, quæ et frequentius perpetrantur, et securitatem rei publicæ turbant. Tale est furtum et rapina.

2. Ad secundum : falsum esse, quod ea tantum delicta capitalia sint, quæ capitalia voluerit esse lex Mosaica; leges enim forenses attemperandæ statui rei publicæ. Iam Israeliticæ rei publicæ quidem consentaneæ fuerunt leges Mosaicæ: at non ideo statim conueniunt nostræ, vbi furta sunt multo frequentiora.

3. Lex nemini irrogat poenam, nisi causa cognita: sed hic poena non est, sed defensio.

4. Lex non potest ius facere, sed impunitatem dare. Resp. concedendo, si lex quidquam introducit contra ius naturæ. Sed defensionem hanc licitam esse iure naturæ, ipse Grotius falsus est §. 11.

§. 15.

Hinc quaestionem mouet de duellis, *an ea icita*? Idque negat, exceptis duobus casibus:

1. Si iniussor me adducat in huius modi discrimen.

2. Si magistratus duos mortem meritos committat: quod frequenter in theatris faciebant Romani. Sed quum prius non sit duellum, sed defensio vel moderamen inculpatae tutelæ, posterius actio stolida, et crudelis: rectius dixeris, duella nunquam licita.

1. Quia defensio priuatis nulla, vbi non praesentissimum periculum. Prouocatus vero posset implorare auxilium magistratus.

2. Quia hoc modo inuaditur officium magistratus.

3. Quia iste modus decidendi controuersius est absurdus; quum et innocens perire, et iniustus vincere queat.

§. 16.

Haec de bello priuato. Iam quaeritur, *an ea et ad bella publica pertineant*? Resp. et haec ob defensionem rei publicæ iuste.

iuste geri : sed tamen non vnum esse inter bella publica et priuata discrimen. Nam 1. priuati defensio incipit, simulac periculum est praesentissimum. Contra publicum bellum suscipitur etiam ob metum iustum periculi futuri. 2. Defensio priuati cessat, cessante periculo : ius belli non cessat propulsato periculo ; hosti enim in hostem in infinitum omnia licent, donec mihi satis fecerit.

§. 17.

Quaeritur autem, *an ob solam vicini potentiam liceat bellum gerere ?*

Negat Grotius merito. Bellum enim nullum est sine iniuria. At qui suo iure vsus sit potentior, nemini facit iniuriam. Vnde merito haec doctrina Hobbesii reiicienda. Sed distinguendum tamen inter potentiam iuste et iniuste adquisitam. Priore enim casu cessat causa belli : posteriore omnino licet illud gerere. Hinc quum rex Franciae Hispaniam nepoti suo multis artibus vindicasset, domo Austriaca exclusa : iusta arma capiebant Britanni, Lusitani, Belgae, quorum intererat, potentiam Gallicanam hac accessione non fieri intolerabilem.

§. 18.

Denique quaeritur, *an et eorum, qui bellum promeriti sunt : num. 1. 2. sola defensio sit causa belli iustifica ?*

Resp. negando. Qui enim defendit, is propulsat iniuriam. Non autem patitur iniuriam, qui ipse intulit.

Ergo qui laesit, bello petitus iniuste se defendit, quum potius teneatur ad satisfactionem praestandam.

Id tamen obseruandum, posse ex bello iniusto fieri iustum, si laedens se officrat ad satis factionem aequam, laesus autem illam respuat. Tunc bona causa a laeso transit ad laedentem. Exemplis id illustrat Grotius, quibus merito accenseas vltimum bellum Suecicum. Sueci erant laesi : sed oblata a Russis et Polonis satis factione, eaque reiecta, iusta causa transibat ad laedentes.

CAPVT II.

DE HIS, QVAE HOMINIBVS COMMVNITER COMPETVNT.

§. 1.

DEmonstrauit haftenus auctor causam bellorum iustificam esse *defensionem*. Ea autem defensio saepe suscipitur non pro vita et membris, sed pro rebus nostris. Nostrae vero res non sunt natura, quia summus creator omnia initio humano generi dedit tamquam communia. Ergo quaeritur, *cur et quomodo res quaedam nostrae dicantur?* Et hanc doctrinam prolixissime tractat auctor capitibus insequentibus. Quum autem res quaedam nostrae sint communiter cum aliis, quaedam nobis propriae, de illis agitur capite hoc secundo, de his sequentibus.

Communes res sunt denuo duplici sensu, priuatiue et positiue. *Priuatine*, quae in nullius dominio sunt, sed omnium vsui patent, vt aër, lux, aqua profluens: *positiue*, quae sunt in dominio plurium. Sic e. g. oppidum Trefurtum in Germania commune est Mogantino, Saxoni, et Hassio.

Et haec diuisio paullo adcuratior est altera Grotiana in res communes, quae in dominio *nec sunt, nec esse possunt*, et illas, quae *non sunt quidem, sed queant tamen esse*. Nullae enim sunt res, quae non saltim ex parte possint fieri propriae, id est, ita occupari ab altero, vt reliqui ab earum vsu excludantur, ceu exemplo ipsius aëris intra aedes, marisque patet. Nihilominus hunc ordinem seruat auctor, vt consideret

1. *Res, quae propriae fieri nequeant, §. 2. 3.*

2. *Res, quae propriae fiant per occupationem, §. 4. ad fin.*

§. 2.

Vt rerum prioris generis natura perspiciatur; primo inquit; *unde ius proprietatis? quomodo res propriae factae sint? et cur, quaedam manserint communes.*

L. Ius

I. Ius proprietatis Grotius recte deriuat a concessione diuina, vt homines rebus creatis ad suam conseruationem vti possint. Nam si, quod mihi concessum est, occupo, procul dubio fio dominus. Concessisse autem Deum humano generi res omnes, patet

a) Ex S. S. *Genes. I. 29. 30. et Genes. VIII. 2.* vbi prior locus de concessione post creationem; posterior de concessione post diluuium agit. Errant vero, qui putant, istis locis Deum hominibus concessisse dominium rerum: minime, sed ius dominium introducendi. Res enim non concessit vni, sed omnibus, non diuisim, sed communiter.

b) Ex recta ratione. Deus nobis dedit, vt simus, ergo et vult, vt conseruemur. Conseruationem dum vult, vult et media eiusdem. Media conseruationis nostrae sunt res, sine quibus ne per momentum quidem viuere possemus. Ergo Deus nobis concessit vsum rerum. Si vsum rerum dedit, concessit etiam ius res occupandi, et iis tamquam nostris vtendi. Q. E. D. Hinc et gentiles, quibus SS. ignota est, eam veritatem agnouerunt, veluti IUSTINVS *Hissor. lib. XXXVIII. cap. 1.*

II. Quum autem res nobis Deus omnes concesserit communiter, porro quaeritur, cur in prima illa *communione homines non persisterint?* Grotius ea de re disserit prolixè, sed ita, vt multa ex theologia sua immisceat. Nos iis fluctibus nos haud commitemus, sed rem ipsam proponemus.

1. Prima ratio est aucta hominum multitudo. Quamdiu hominum numerus intra paucos stetit, suffecere res eorum vñbus, quin omnia erant inexhausti vsus, adeoque nullo opus erat dominio. At postquam ita auctum est genus humanum, vt omnes terras, insulas, prouincias, quin et loca parum fertilia occuparet: non potuit non fieri, vt non sufficerent res omnibus, nec potuissent sufficere, si singulis liber earum vsus fuisset concessus. Demonstrat id exemplum aquae in vrbibus obsessis: quamdiu ea sufficit promiscue omnibus, non est in dominio, sed communis; simulac vero vel ob copiosum praesidium, vel ob hostium cuniculos metuitur, ne deficiat, statim vsus iste promiscuus cessat. Ita se res in aliis rebus habuit.

2. Altera causa fuit voluptas, quae homines impulit, vt a simplicitate primaeuæ ad lautiores vitam desciscerent. Sic homines primaeui nudi incedebant, postea pelibus non ad splendorem,

dorem, sed ad expellendum frigus, velandamque nuditatem vestiebantur, demum auro, argento, gemmis fulgere dulce putabant. Primi mortalibus antrum vel tentorium pro tecto, terra pro cubili erat: posteri aedibus et palatiis splendidis habitare, et lectulis incubare malebant. Nulla olim supellex, postea ne copiosa quidem sufficiebat, nisi et materiae pretium accederet. Primi homines cibo parabili et sponte nato; posteri exquisito, et varie condito vesciebantur. Huic vitae sane non sufficiebant res, si omnium promiscue usus patuissent. Ergo a communione primaeva videbatur discedendum. Accessit

3. Avaritia. Dum enim semel homines res tamquam suas vindicare coeperant: res accipere pretium. Ergo impotens ista habendi cupido facile stimulabat homines, ut plura occuparent, quam necessitas exigeret. Hinc factum, ut quum ita reliquis deesset, unde viverent, omnia perquisiverunt, ut et ipsi aliquid haberent. Inde et silvae, rivi, flumina occupari coeperant. Inde et in terrae viscera penetratum, ut metalla extraherent. Denique sequuntur

4. Generosum vitium, uti eleganter vocat Grotius, ambitio, quae concordiam, ac deinde omnem communionem rupit, maxime quum lites de limitibus, et hinc bella accederent.

Hae sunt verae causae, cur a communione primaeva discessum. Omnes a Grotio allatae ex vitiis hominum sunt, ex quibus sane non potuit nasci iustus titulus occupantibus. At nos primam causam dicimus primariam, ex qua iustus titulus natus est occupantibus. Vitia autem illa in causa fuerunt, ut abuterentur homines eo iure occupandi, et res non aequaliter partirentur, sed unus altero plus occuparet.

num. 5.

III. Quaeritur, quomodo res factae fuerint propriae? Nempe

1. per occupationem. *Occupatio* autem est rei nullius apprehensio cum animo vel consilio eam mihi habendi. Quia enim Deus omnium usus concefferat res creatas; prono alueo inde fluebat axioma, quae nullius sunt, cedunt occupanti.

Ex ea autem occupationis definitione fluit, occupationem fieri non solum *animo*, sed et *corporali apprehensione*. Sine hac enim alter nescit, rem esse exemtam communione, inquit Grotius. Sed ea non est vera ratio. Nam quid si alter verbis id declarat, vel aliis signis? E. g. ego cum Titio in litore maris ambulo. Ille me praecedat, ego tamen prius video gemmam

nam a mari eiectam, animus mihi est, eam occupandi, clamo, me illam habere velle, sed Titius nihil verborum faciens illam sibi adprehendit et vindicat. An ideo mea est, quia habui animum occupandi, et Titius iam sciuit, me eum animum habere? Ratio itaque alia est, nempe quia velle occupare, non est occupare. Quum itaque sola occupatio rem faciat meam: non sane sufficit, me animum declarasse, sed opus est vera occupatione, id est adprehensione corporali.

2. Per diuisionem quoque res communes sunt propriae, ceu exemplo Palaestinae ab Israelitis communiter occupatae, et postea inter tribus per sortem diuisae luculenter patet.

§. 3.

His praemissis auctor ad ea transit, quae in dominium et proprietatem hominum ire posse negat, eoque refert mare, aërem, et fyrtes.

1. Prima quaestio, *an mare sit in dominio?* multa ingenia ^{num. 1.} eximia exercuit, veluti Grotium, cuius singularis ea de re tractatus post hunc librum reperiri solet, SELDENVM, cuius *Mare clausum* exstat, GRASWINKELIVM, ISAAC. PONTANVM, VLR. HYBERVM, et BYNKERSHOEKIVM, qui Grotii causam egerunt, et IO. BAPT. BYRGVM, qui dominium maris Ligustici defendit. Taceo, qui in tractatibus iuris publici et gentium ea de re egerunt, vt PVFENDORFFIVM, THOMASIVM, ZIEGLERVM in aureo tractatu *de iuribus maris*, et alios.

Sed uti Grotius, et multi alii eam tractant quaestionem, eam facile adfirmabimus. Si quis enim quaerit, an mare possit esse in proprietate et dominio, id cum Grotio negamus:

1. Quia tanta eius magnitudo, vt occupari nequeat.

2. Quia sit inexhausti vsus, omnibusque sufficiat. Ex quibus fundamentis, etiam altera quaestio:

II. *An mare sit in dominio?* facile deciditur. Sed quod ad mare attinet, probe tenendum, quaestionem 1. proprie non esse de dominio maris, quamuis ita loqui soleant scriptores: sed de imperio, an non et iura quaedam maiestatis in mari exerceri queant, v. gr. ius vectigalia petendi, ius impediendi nauigantes qui hostilibus res necessarias aduehunt, ius sibi vindicandi

Heineccii Prael. Grot.

V

obuen-

obuentiones extraordinarias, v. gr. vniones, gemmas, cet. 2: Nec proprie de oceano quaeri, cuius tanta est magnitudo, vt occupari nequeat, sed de partibus maris terrae propinquis.

nam. 2.3.

De fyrtibus, an sint in dominio, non facile nascetur quaestio. Sed si quis quaerat, an esse possint? nescio qui id negare velit Grotius; quum ex ipsius mente sint res nullius, et cedere possint occupanti. Immo re vera occupatae sunt insulae desertae et incultae, veluti insula S. Helenae.

§. 4.

Sequitur altera pars de rebus communibus, quae non sunt in dominio, sed esse possunt per occupationem. Eo refert Grotius loca inculta, insulas in mari puta incultas, pisces, feras, aues; quippe quae occupando demum transeunt in proprietatem. Sed quum tamen experientia doceat, haec maximam partem pro rebus communibus non haberi, nec ius ea occupandi promiscue omnibus concedi: quaeritur, qui fallum sit, vt haec res non pateant vsibus singulorum, quum sua natura sint communes?

Et hic sequitur praestantissima doctrina de modo occupandi, quam soli Grotio debemus.

Nimirum occupatio duplex est, per vniuersitatem, et per fundos. Prior est, quando vniuersus populus occupat terrae tractum communiter, eumque deinde inter se diuidit. Exemplum praebet S. S. de Israelitis, terram Canaan occupantibus. Posterior est, quando quisque paterfamilias sibi rem vel locum capit, suisque assignat vsibus. Talem occupationem videmus apud populos Nomades, e. g. Arabes, Tartaros, vbi homines cum familiis et pecoribus e loco in locum migrant, et reposito loco irriguo vel gramine, ibi sibi constituunt domicilium.

Iam si per vniuersitatem totus tractus occupatur, tunc valet regula: cuius est totum, eius quoque sunt omnia, quae hoc toto continentur, vt flumina, pisces, ferae, metalla. Nihil ergo in his est nullius, sed omnia ad populum occupantem pertinent.

Sin per fundos: ea quae nondum occupata sunt, manent in communione negativa, id est, sunt nullius, hinc cuius cedunt occupanti.

Iam facile patet, cur in nostris regionibus, vbi populus non

non per modum gentium Nomadum occupauit prouincias, sed per vniuersitatem, hae res non omnium vñibus pateant? Quia enim omnia sunt populi: hinc nemo potest ea vindicare, nisi cui id populus concessit. Et quia haec commode inter singulos diuidi nequeunt: hinc alibi populus ea reliquit principi, tamquam domania, alibi nobilibus, vt habeant, quo viriui bellicae per venationem praeludant, alibi priuatis, sed non nisi dato canone annuo locatur.

§. 5.

Iam ergo facile liquet, *quid bodie liceat in feras, aues, pisces?* Resp. etiamnum valet regula: *quae nullius sunt, cedunt occupanti.* Sed ante omnia in singulis prouinciis dispiciendum, an vere sint res nullius. Nam, vt dixi, plerumque sunt in proprietate vel principis, vel nobilium vel priuatorum vsu. Aliena vero occupare, est furtum committere.

Sed quaeritur, *an iuste egerint populi, dum haec priuatorum vsus exemerunt?* Et id adfirmare non dubito:

1. Quia hae res commode non admittunt diuisionem, et hinc saepe ad manus res esset ventura, si plures idem adpetenter.

2. Quia non sunt inexhausti vsus, et hinc interest rei publicae, ne iis promiscue omnes abutantur.

3. Quia sic futurum esset, ut ciues otio et voluptatibus magis indulgerent, quam rerum suarum satagerent.

Hinc nec dubitandum, quin et exteri in prouincias nostras venientes his legibus obstringantur, et nec iure naturae, nec iure Romano se tueri possint. Qui enim in prouincia est, sit subditus temporarius, subditus autem legibus parere tenetur.

§. 6.

Sequitur momentosa quaestio: *an, introducta proprietate rerum olim communium, ita sublata sit omnis communio, vt nec in casu necessitatis ius aliquod in res alienas supersit?* num. 1.2. Et recte respondet Grotius, omnino duplicem admittere exceptionem. Nam I. extremam necessitatem esse excipiendam, in qua communio veluti reuiuiscit, et II. officia innoxiae vtilitatis, de quibus infra §. 11. Rationes videbimus.

V 2

1. Id

1. Id probatur ex fine primorum acquirentium, et occupationem illam permittentium. Eos sane aut aequitatis rationem habuisse oportet, aut non habuisse. Si habuerunt, noluerunt sane, ut ipsi omnia haberent, alii fame perirent: si non habuerunt, iniuste possidere coeperunt, nec facti sunt domini. Vtroque casu iis, qui necessitate premuntur, ius aliquod erit in res alienas.

2. Occupatio facta est non auctoritate publica, sed priuata. Iam si ipsae leges, quae auctoritate publica feruntur, admittunt exceptionem necessitatis, uti supra demonstraui: quanto magis proprietas ista priuatorum?

3. Omnes leges humanae admittunt exceptionem necessitatis. Ergo et dominium, lege, non diuina, sed humana, introductum, si vel maxime dicas, occupationem factam auctoritate publica.

num. 3. Ergo in casu extremae necessitatis reuiuiscit communio primaeva, idque iam exemplo illustrat auctor. Huc pertinet; 1. quod in naue deficientibus cibis singuli, quod habent, in commune referre tenentur: quod tamen ita intelligendum, modo ne domini esurire teneantur, id est, si tanta sit quantitas cibariorum, ut probabile sit, ea omnibus suffectura, donec in portum adueniamus.

2. Ita et vicini aedes incendiū arcendi causa diruere possum, si aliter arceri nequit.

3. Ita discindit nauta funes nauis alienae, in quos sua nauis impulsā est.

Sed quamuis id et rationi, et experientiae sit consentaneum: non temere tamen ea omnia permittentur, nisi fiat restitutio damni ex necessitate dati. Sic cibariorum meorum cum aliis communicatorum pretium mihi soluendum, is, cuius aedes nondum flammis correptae dirutae sunt, a vicinitate restitutionem exigit, actione vtili ex lege Rhodia de iactu, cet.

num. 4. 4. Ea vero grauissima quaestio est, an liceat in casu extremae necessitatis alii, mihi necessaria deneganti, aliquid furripere?

Negat id Alberti in *comp. iur. nat. oribod. conformat. part. II. cap. 2. §. 20. 24.* 1. quia rem alienam auferre inuito domino sit furari, furtum vero omne prohibitum; 2. quia ex duobus malis, quorum alterum physicum, ut fames, alterum morale;

rare, vt furtum, semper eligendum sit minus, quale sit physicum.

Sed haec nihili. Contrarium demonstramus inde,

1. Quia iam ostensum in casu necessitatis reuiuiscere communionem.

2. Quia si in casu necessitatis ipsam vitam alteri defensionis meae causa eripere possum, immo et conseruationis meae causa, quidni et res eius mihi vindicare?

Ad argumenta Alberti resp. 1. negando esse furtum, quia furtum est ablatio rei alienae *fraudulosa lucri faciendi causa* facta. Hic autem nec fraus vel dolus adest, nec lucri faciendi consilium. 2. Si ergo non est furtum, nec est malum morale, sed mere physicum: ex duobus vero physicis malis eligendum est minus. Et quis negauerit autem, minus physice malum esse, alteri perire frustum panis, quam mihi vitam.

§. 7.

Sed tamen et hic obseruandum 1. extremam hic supponendam necessitatem, e. g. famem extremam; quam nemo vel frusto panis oblato leuare velit: 2. non plus sibi sumat, quam opus est. conf. PUFENDORFF. *de iur. nat. et gent. lib. 11. cap. 6. §. 5.* SELDEN. *de iur. nat. et gent. secund. disciplin. Ebraeor. lib. VI. cap. 7.* et THOMAS. in *Iuris prud. diuin. lib. 11. cap. 2.*

§. 8.

3. Ne ei eripiat, qui ipse indigeat. Nam a) vti nemo tenetur alteri succurrere cum detrimento suo, nec dilectio proximi superare debet dilectionem sui: ita nec communio reuiuiscere potest, si ipse indigeam; b) in dubio semper melior est conditio possidentis.

§. 9.

4. Vt habeat animum restituendi: nam sufficit, rem esse alienam; si damnum dederis, restitue.

Obiici posset: qui iure suo vitur; nemini facit iniuriam, ergo cessat obligatio restituendi.

Sed resp. concedo nemini, hunc facere iniuriam. Sed iniuriae correlatum non est restitutio, verum poena. Ergo recte sequitur, vt puniri non possit, tamquam fur: sed non sequitur, vt immunis sit a restitutione damni dari.

§. 10.

Rem egregie illustrat Grotius exemplo loci bello occupati. E. g. bellum gerimus cum Gallis. Exercitus per Coloniensem ditionem aduenturus dicitur. Occupamus aliquot loca munita in hac ditione, ne a Gallis occupentur. Hic sane nos iure nostro uti nemo negabit : sed tamen quis dicat, ideo nos haud obstrictos esse ad refarciendum damnum ? Elegans quoque est, quod ex *XENOPHONTIS Expedit. Cyri, lib. V. cap. 1.* refert exemplum, de multis mercatorum capiendis ad transitum.

§. 11.

Vidimus primam exceptionem proprietatis semel introductae, nempe casum extremae necessitatis. Sequitur altera, *officium innoxiae utilitatis*. Quid hoc est ? Est officium imperfectum, ex regula honesti natum, quo alteri teneor praestare utilitatem, quam sine detrimento praestare possum.

Notanda ergo regula : *quod tibi non nocet, et alteri prodest, ad id es obligatus*. E. g. erranti monstrare viam, pati, ut vicinus lumen de lumine meo accendat.

Haec qui non praestat, non quidem iniustus est, sed tamen summe inhumanus, quia 1. id negat, quod per virtutem debet, et sine damno potest, quum et detrimentum quoddam minus negligere debeamus in utilitatem proximi. 2. Quia reuera tunc reuiuiscit primaeva communio, uti alteri res nostrae prodesse possunt sine damno nostro.

§. 12.

Iam ex hoc principio varios casus expendit auctor. Et hinc quaerit, 1. *an flumina sint in communione* ? Resp. Flumen consideratur aut ut totum, aut quoad singulas partes toto illo contentas.

Si quoad totum, flumen est in proprietate populi. Nam, uti supra demonstraui, quoties per vniuersitatem acquiritur, toties qui totum occupauit, is et singulas totius partes censetur occupasse. Ergo et flumina.

Sin quoad partes, tunc quaedam eius partes sunt exhausti vsus, ut pisces in flumine, aurum, quod flumen vehit, et similia.

similia. Et haec denuo non sunt communia, sed populi vel principis, cui populus concessit. Alia sunt inexhausti vsus, vt aqua profluens; et haec omnino mansit communis, adeo vt is neget officium innoxiae vtilitatis, adeoque inhumanissimus sit, qui aquam hauriri ex flumine non patitur. Hinc illi versus elegantes OVIDII:

*Quis vetet adposito lumen de lumine sumi;
Atque cauum vastas in mare seruet aquas?*
item:

Quid prohibetis aquas? vsus communis aquarum est.

Enimvero haec regula admittit exceptionem: si nobis res sit cum hostibus. Quam enim in statu naturali hosti in hostem in infinitum omnia liceant, nec potest hostis ab hoste expetere officia innoxiae vtilitatis. Hinc elegans controuersia cuius fundamentum refert L. 2. §. 46. D. de orig. iur. Ligarius Caesaris hostis oram Africae tenens infirmum Tiberonem adplicare non permiserat, nec aquam haurire: quo nomine eum accusauit Tiberio, et Cicero defendit. Profecto ius belli id Ligario permittit, hostem excludere littore, eique aquam prohibere.

§. 13.

Quaeritur II. an vicinis possimus denegare transitum per nostras terras et regiones?

Transitus autem peti potest ex pluribus causis, 1. si gens expulsa finibus nouas et vacuas sedes quaerit: 2. si gens commercium expetit cum gente seposita: 3. si gens cum gente bellum iustum gerit, nec potest ei nocere, nisi concedatur a nobis transitus.

Id quidem negari nemini posse sibi persuadet Grotius, idque late demonstrat per omnes numeros §. 13. sed perperam, vti paullo post videbimus.

I. Primum argumentum desumit ab obligatione praestandi officia innoxiae vtilitatis: quod tibi non nocet, et alteri prodest, ad id sumus obligati.

Transitus vicinorum nobis non nocet, illisque prodest.

Ergo ad eum sumus obligati.

Minorem inde probat, quod supponatur hic transitus innoxius, vbi copiae transducantur sine damno nostro, vbi cibaria

et

et quaevis alia iusto pretio emantur, vbi nemini fiat iniuria.

num. 2. II. Alterum argumentum Grotius ex historia Mosaica desumit, Numer. cap. 20. et 21. Nam quum Idumaei et Amorrhæi transitum innoxium negarent populo Israelitico, bello petiti sunt ab Israelitis, et quidem iussu Dei. An autem Deus iniustum bellum præcipiat?

num. 3. III. Accedit consensus gentium, ex quo Grotius ius gentium deriuare solet. Hinc allegat responsum Clearchi ex Xenophonte, Agesilai, Lyfandri, Batauorum.

Vbi quum Atheniensium refert transitum per fines Corinthiorum, hique illos, se insecus transisse conquererentur: quaestione ea occasione mouet Grotius: *an et inconsulto altero id liceat?* Athenienses putabant, omnia patere debere plus valentibus. Agesilaus iocose Macedonum legatis respondit: *consuliet, nos interea transibimus.* At Grotius putat, omnino prius postulandum esse transitum; sed si negetur, vindicari posse.

num. 4. Hactenus Grotius suam sententiam proposuit, iam et obiectiones soluit. Obiicitur

1. Metui posse multitudinem transeuntium. Respondet a) metum alterius ius meum non tollere: b) posse cauere, vt diuisis manibus transmittantur, vel, vt inermes transeant, vt dent obsides.

2. Posse hostem alio flectere iter, quam dicat. Resp. a) nec hunc dolum interuenterè obligationem transitum concedendi. b) Si iniustum bellum eum moliri videam, nos posse transitum negare.

num. 5. Denique ea, quae de transitu ipsorum exercituum dixit; extendit etiam ad commercia, et eorum quoque causa liberum transitum concedendum putat, etiam si nobis lucrum decedere videatur. Sed loco argumentorum nihil allegat, praeter loca quaedam ex Philone, Plutarcho, Libanio, Euripide, et Floro, quae illustrant non probant.

Hactenus Grotii doctrinam breui *analysi* et bona fide posuimus. Iam videbimus, quid in ea desiderandum sit. Ponit tres casus, quibus transitum peti posse existimat: 1. si gens fe-
dibus suis expulsa vacuas sedes quaerit; 2. si commercia expetantur, cum gente seposita, 3. si bellum iustum cum gente remotiore gerendum.

Primo

Primo casu distinguendum, an pauci exsules et eiectionis ad sedes iam praeparatas tendant, an tota gens sedes incertas adhuc quaerat. De priore casu adfentimur Grotio, et hinc non sine inhumanitate negatus fuisset transitus Gallis religionis causa eiectionis, quum terras Brandenburgicas et Hassiacas peterent. De posteriore id negamus, et iure putamus a Romanis profligatos Cimbros, qui novas sedes quaesituri transitum petebant.

Alter casus de commerciis denuo admittit distinctionem. Nam si vicinus commercia expetit, quae ego vel iam exerceam, vel eadem spe lucri exercere possim: nulla inhumanitas est transitum negare. Et puto ipsos Hollandos negaturos Ostendensibus transitum ad interiora insulae Ceylon, ut cinamomum emere possint. Quisque sibi proximus. Si vero vicinus commercia exercere velit, quae mihi nullam adferre possunt utilitatem, tunc transitus concedendus. Et hinc iniuria Russi Holstatis negarunt transitum ad Persas, quum vellent sericum inde Holstati adportare, quum tamen ipsi tunc nec nollent nec possent inde lucrum sperare.

Tertius casus de transitu exercitus plane numquam procedere videtur, nisi nobis res sit cum foederatis, vel vltro illum concedamus ex pacto. Id iam demonstrabimus. Nam

1. Grotius supponit transitum esse innoxium, quum talis numquam sit, non modo ob incommoda, quae sequi solent, si vel amicus exercitus transit, qui omnia iusto emit pretio, sed praecipue NB. ob hostis, qui petitur, ius nos pro illa humanitate hosti suo praestita castigandi. Illustretur res exemplo imperatoris, qui quum electori Saxoniae transitum in Poloniam aduersus Suecos concessisset, postea a Suecis in Saxoniam irruentibus pro hoste habitus, et ad tractatus pacis Ransstadensis, sibi parum utiles, adactus est.

2. Exemplum Idumaeorum et Amorrhaeorum nihil ad rem facit. Erant hi Israelitarum consanguinei ab Esau et Abraamo orti: non ignorabant, Israelitis has terras a Deo esse promissas, et tamen negabant transitum ex mera inuidia et odio erga Deum Israelis: poterant ergo iussu Dei bello peti.

3. Reliqua exempla nihil probant, nisi quid factum sit, non quid fieri debeat. Et sane ex quam lubrico fundamento hoc ius deriuauerint, vel inde patet, quod Athenienses nihil pro se allegare possint, quam quod omnia licere debeant potentioribus.

Heineccii Prael. Grot.

X

4 De-

4. Denique quam nullius usus sint cautiones Grotii, res ipsa docet. Nam 1. in primo casu supponit, sedes quaeri vacuas: ubi autem sunt sedes vacuae? 2. In tertio supponit, per manus diuisas transire hostem, vel inermem transire: quis vero bello tertium adgressurus id faciat? Annon priores manus et inermes hostis prius opprimeret, quam vel posteriores manipuli vel arma sequantur? Hinc magis adfentimur doctoribus nouis, qui in concedendo eo transitu paullo cautius procedendum existimant, nec eum magis officiis innoxiae vtilitatis accensent, quam seruitutes itineris, actus, viae, in fundis priuatorum.

§. 14.

Novam iam quaestionem mouet auctor: *an mercibus trans-*
euntibus vestigalia imponi possint?

Recte distinguit Grotius inter onera personalia et realia. Illa ad sustentandam rem publicam pertinent, haec ob securitatem mercibus praestandam, reficiendas vias, portas, pontes cedantur. Illa non nisi ciuibus; haec et exteris imponuntur.

Rationes iam adduximus. Sed eae non sunt primariae. Quas reddere oportuit Grotium, quia ipse transitum mercium habuit pro officio innoxiae vtilitatis. Pro talibus officiis nemo sane praestat vestigal. Ait ergo Grotius, id non praestari pro transitu, sed in compensationem securitatis mercibus praestitae, resectorum viarum, pontium, cet.

Vera ratio est, quia qui merces inferunt et exportant, lucrum captant e re publica nostra. Ergo nihil aequius est, quam vt partem lucri, tamquam ciues temporarii, concedant imperanti.

§. 15.

Rectius officiis innoxiae vtilitatis Grotius accenset ius morandi in alieno territorio: cuius variae possunt esse causae. E. g.

1. Valetudinis causa: vti facultatem in ora maritima Africae commorandi petebat aegrotans Tubero. l. 2. §. 46. D. de orig. iur.

2. Distrahendarum mercium, vel
3. Reficiendarum nauium causa.

Id inquit Grotius, sine summa inhumanitate adeo vili negari nequit, vt potius et tuguriolum extruere liceat. Quod enim nobis non nocet, et alteri prodest, cet.

Sed

Sed denuo distinguendum, an iusta negandi caussa sit, nec ne. Nam saepius morandi licentia recte negatur et aegrotis et mercatoribus,

1. Si metus et periculum sit infectionis,
2. Si merces adducant vetitas,
3. Si vel hostes ipsi sint, vel hostibus nostris commeatum, aliaque necessaria aduehant.

§. 16.

Porro officium humanitatis est, aduenis expulsi habitacionem concedere. Qui enim habitacionem quaerit, is ius ambit ciuitatis, legibus et oneribus se subiicit, adeoque summa inhumanitas est, hospites eiicere, vel non admittere.

Sed tamen et hic caute procedendum. Nam distinguendum, 1. pauci, an multi expetant hospitium. Posteriore casu res aliquando non caret periculo, maxime si aduenarum multitudo numerum indigenarum superet, vel si diuersae religioni additi, quae non facile sit sociabilis.

2. Sedes nostrae pluribus sufficiant, nec ne. Sic si magna multitudo hominum in Heluetia sibi sedes quaereret nouas: vix id concedi posset, quum terra montosa vix incolis alendis sufficiat.

3. Homines probi sint, an factiosi, ob seditiones domo pulsi. Nam posteriore casu et simile periculum nostrae rei publicae imminet, et facile inde bellum conflagrari posset cum vicino, qui hostes suos recipi conqueretur.

§. 17.

Porro humanitatis officium existimatur, solum sterile concedere aduenis id postulantibus. Recte, non quidem ex ratione Grotii, *quod nullius est, cedit occupanti*, sic enim non esset officium innoxiae vtilitatis, sed perfectum, nec dici potest sterile solum nullius, si territorio nostro continetur, vt supra §. 4. probauimus: sed vera ratio est quaerenda in axiomatico: *quod tibi non nocet, alteri prodest, cet.*

Potest tamen et hic occurrere exceptio, si tractus terrae incultae genti pro munitione sit, quale quid deprehendimus in historia Sinenfium, qui magnum tractum Tartariae extra murum

Sinenſem ferro et flammis deaſtarunt, ne per tantam ſolitudinem exercitus poſſit duci.

§. 18.

Vidimus haſtenus, quae res ſint communes: ſequitur ut et ad actus quosdam communes progrediamur.

Sunt vero *actus communes*, qui a nemine impediri poſſunt; eorumque fundamentum eſt conſervatio vitae humanae. Vnde regula: *sine quo actu vita humana conſervari nequit, iſte impediri non poteſt ab ullo*. Ii vel ſunt *ſimpliciter tales*, vel *ex hypotheſi*, ſeu ſuppoſitione. *Simpliciter*, qui communes ſunt ſemper: ex hypotheſi, qui communes ſunt certis ſuppoſitis circumſtantiis. De illis agitur §. 19. 20. 21. de his §. 22. *ad fin.*

Nihil hoc principio aequius, quippe quod ex ipſa ſocietate fluit. Neque enim homo cum homine vivere poſſet in ſocietate, ſi huiusmodi actus, ſine quibus vita humana ſervari non poteſt, per conſpirationem impedirentur. E. g. ſamem expellere non poſſum ſine cibariis. Iam ſi omnes incolae huius loci conſpirarent; ne quiſquam mihi panem venderet: id eſſet ſane iniuſtiſſimum.

§. 19.

Iam Grotius recenſet iſtos actus communes. Talis eſt 1. *ematio*. Ergo ius omnibus eſt aequo pretio ſibi emere neceſſaria, non ſolum ciuibus, ſed et exteris.

Quaeritur autem, *an ab indigentiam et ſamem expellere liceat exeros?* Saepe id fecere Romani, eoque pertinent leges Iunii Penni et Papia, de expellendis vrbe peregrinis apud Cic. *de offici. lib. III. cap. 11.* Ita ſuo tempore ob ſamem peregrinos omnes expulſos adſcribat AMBROS. *de offici. lib. III. cap. 7.*

Diſtinguendum inter peregrinos ſemel admiſſos et nondum receptos. Hos arcere poſſumus: nemo enim tenetur aliis ſupeditare cibum, ut ipſe eſuriat. At ſemel recepti iam, ciues et ſubditi ſunt, et hinc ſine iniuria expelli nequeunt.

§. 20.

An autem ad vendendum ſimiliter quis cogi poteſt? Negat auctor, quia id ex natura dominii fluit, ut, an rem meam mihi ſervare, an alienare malim, poſſim ſtatuer. Contigit tamen aliquando.

1. Ut

1. Vt quidam prohibeantur vendere, si merces videantur inutiles rei publicae. Sic in vniuersis prouincijs Prussiae nemo vendere potest *gaufape*, *den Catun*. Olim apud Belgas vinum vendere nemo poterat, teste Tacito.

2. Vt quidam vendere cogantur. E. g. in fame, si dardaniarii magnam frumenti copiam coemerint, eamque referuent, tantum vt pretium fiat immensum: cogi queunt, vt vendant iusto pretio.

§. 21.

Communis quoque actus censetur connubium: ne gens genti neget matrimonij societatem. Id enim exigere videtur vitae humanae conseruatio. Hinc nouimus, saepe bellum gestum ob denegatas vxores: saepe et raptas esse virgines. Raptus Sabinarum notissimus est.

Sed tamen dubito, an haec res actibus communibus recte accenseatur. Nam

1. Non vita humana hic periclitatur, sed tantum spes posteritatis.

2. Nulla ratio est, cur quis non ex sua potius gente vxores petat, quam a vicinis extorqueat. Populus enim virorum videtur rarissimus, et ipsa historia Romana ideo a multis vocatur in dubium.

3. Potest gens quaedam tam barbara, tamque saeuus moribus esse, vt moratiores gentes iussu iis denegent vxores.

4. Potest et religionis accedere periculum, si vicinae gentes sint gentiles, Iudaei, Mahumedani.

5. Vix potest pro actu communi haberi inter vicinas gentes, quod ne inter ciues quidem pro actu communi habetur. Quis vero dubitet, quin cuius cuius filiam eius expetenti repulsam iure dare posset.

§. 22. 23.

Vidimus actus ex mente Grotii simpliciter communes: sequuntur qui ex hypothesi, vel ex suppositione sunt communes. Quod enim vni conceditur, id sine iniuria negari alteri nequit.

Eo Grotius refert 1. iura venandi, piscandi, si alicubi promiscue conceduntur et extraneis: tunc enim si vel vnus prohibeatur, ei fit iniuria.

Sed 1. hic quidem casus erit rarissimus: nec enim solent ho-

die huiusmodi iura concedi exteris, nedum vt promiscue omnibus concedantur.

Deinde 2. distinguendum etiam erit Grotio inter perfecte permiffa, et imperfecte.

Perfekte permittitur, quod leges concedunt, imperfecte, quod leges praeterunt, et nec praecipunt, nec vetant. Priore casu vera est sententia Grotii. Omnino enim si lex exstat, vt omnibus exteris promiscue hic liceat venari, piscari, vñones colligere: sine iniuria nemo potest prohiberi. At si leges tantum rem praeterunt, et hinc haftenus quidam ea iura veluti precario exercuerunt: nihil impedit, quo minus id lege noua mutari, eaque libertas restringi possit.

§. 24.

Subiungit Grotius quaestionem vere Belgicam: *an populus cum populo pacisci possit, vt populus certi generis fructus sibi soli vendat?* Notum enim est, tale pactum Batauis intercedere cum Indis de cinamomo, et aliis aromatibus.

Negant nonnulli huius modi pactum iuri naturali esse consentaneum, quia 1. monopolium inuehat, et 2. alios iure suo excludat.

Sed 1. monopolium non omni iuri naturae repugnat, sed quod exercetur ita, vt iniusto pretio res vendatur. Ergo si monopolae aequo pretio vendunt, nihil iniusti huius modi pactum continet.

2. Falsum est, alios iure suo excludi; potest enim quisque vendere, cui velit. Et si cui vendere nolim: is non iure suo excluditur, sed ego meo vtor, adeoque nemini facio iniuriam.

CAPVT III.

DE ADQVISIONE ORIGINARIA RERVM, VBI DE MARI ET FLVMINIBVS.

Bellum gerimus pro defensione et recuperatione rerum nostrarum: nostrae sunt res tum communes, de quibus cap. 8. actum, tum propriae. Quam autem res propriae fiant per adquisitionem

sitionem : de his acquirendi modis agitur *cap. 3. et seqq.* vsque ad *caput 8.*

§. 1.

Modi acquirendi vel sunt *naturales*, vel *ciuiles*. Illi naturalis, hi ciuili iure introducti sunt, e. g. vsucapio.

Naturales a Grotio recte diuiduntur in *originarios* et *deriuatios*. Originariis aliquid adquirimus, quod non est in dominio, e. g. examen apum in sylua circumuolans. Deriuatiuis adquirimus, quae iam in dominio sunt, e. g. si aluearium a rustico emptum nostrum fit traditione.

Originarii, vt PUFENDORFF. *de iur. nat. et gent. lib. III. cap. 6. §. 1.* docuit, denuo vel sunt *simpliciter tales*, vel *secundum quid*.

Simpliciter tales, quibus ipsam rei substantiam adqui- ro, e. g. apes; secundum quid tales, quibus adqui- ro incrementum, quod rei substantiae vel naturae beneficio, vel arte atque industria mea adiungitur, e. g. mel.

Originarius modus simpliciter talis dicitur *occupatio*: nam olim, quum omnia essent in communione negatiua, res nullius acquirebantur vel per *diuisionem*, vel per *occupationem*. At hodie rebus plerisque reductis in dominium, vnus modus superest, occupatio.

Originarius modus secundum quid talis, dicitur *accessio*: denique deriuatiuis *traditio*.

§. 2. 3.

Hi ergo sunt modi acquirendi. Addunt aliqui plures modos; veluti 1. *concessionem seruitutis*, et 2. *specificationem*. Iam notum est, *seruitutem concedi*, quoties nobis conceditur ius, aliquid faciendi vel prohibendi in praedio vicino, e. g. vt possim ire, agere, vehere in fundo alieno, vt possim vicinum altius tollentem, lumina mea obscurantem, cet. impedire et prohibere. *Specificatio* autem est, quando nouam formam induco materiae, e. g. si ex auro conficio anulum, ex argento poculum, ex lana vestem. Quaeritur ergo, *an ea seruitus et specificatio sint modi acquirendi?*

Vtrumque recte negat Grotius, quamuis rationes eius sint paullo obscuriores. Nimirum

1. Seruitutis concessio non est modus acquirendi, quia loquimur de modis acquirendi dominium. Seruitus autem non est

est dominium. Ergo seruitus non est modus adquirendi. Dominium enim non est in re incorporali, sed in corporali.

2. In specificatione aut materiae meae induco nouam formam, aut materiae alienae, aut materiae nullius. Primo casu nihil adquireo, quia res iam mea est, et nihil noui producitur, nisi forma, quae mea sit per accessionem. Secundo casu est quidem modus adquirendi ciuilis, verum non nouus, sed denuo accessio. Tertio casu res mea sit per occupationem.

§. 4.

Iam de occupatione. *Occupatio* est adprehensio corporalis, qua nostras facimus res nullius. *Res nullius* autem sunt duplices, vel *sua natura*, quae numquam dominum habuerunt, e. g. lapilli et viationes, a mari eiectiones, vel *facto hominum* res pro derelictis habitae, id est, eo abiectae animo, ut eas in rebus nostris amplius habere nolumus.

De vtriusque valet axioma: *quae nullius sunt, ea cedunt occupanti.*

nam. 1. Iam itaque quaeritur: *quaenam occupatione adquiri possint?* Et recte respondet Grotius: *dominium et imperium.*

Dominium est ius in re corporali, quod in facultate de ea disponendi, ea cum exclusione aliorum vtendi, eademque vindicandi nascitur.

Imperium autem est complexio iurium omnium maiestatis; ad defensionem populi vel vni, vel pluribus, vel toti multitudini concessa. *Dominium* ergo est priuatorum in imperio. *Imperium* est ipsius rei publicae, vel qui eam repraesentant, principis, vel optimatum. Vtrumque posse per occupationem adquiri, res ipsa docet. Sic dominium examinis apum acquirit rusticus occupando: imperium in homines sui iuris sibi occupauit Nimrodus occupando.

nam. 2. Sed *quodnam est imperii obiectum?* Resp. duplex, primum et secundarium. *Primum* sunt homines vel populus, qui in vnam rem publicam coaluit; nam in hunc immediate imperium exercet summus imperans: *secundarium* territorium, in quo populus iste confedit. Nam in hoc imperium exercetur propter homines, qui id occuparunt.

Possent aliquis existimare, haec vix differre, saltim semper coniuncta esse, et vno plerumque actu quaeri. Sed resp.

1. Non

1. Non semper esse coniuncta, e. g. in deserto Moses, vel potius ipse Deus per Moſen imperium exercebat in populum Iſraeliticum: et tamen is nullum adhuc territorium ſibi adquiſiuerat.

2. Non ſemper in eam, qui partem territorii poſſidet, competit imperium, quum tamen id competit in territorium. Sic e. g. ſi ciuis Groninganus in hac prouincia habet praedium, ſed Groningae habitat: in eius perſonam ordines Friſiae nullum exercent imperium, quum tamen in praedium omne ipsis imperium competat. Sunt ergo diuerſa et ſeparata imperium in homines et imperium in territorium, Q. E. D.

§. 5.

Quaeritur porro, *an lege anteuerſi in imperio poſſit ius occupandi res mobiles?* Sensus quaestionis hic eſt. Multae ſunt res mobiles ſua natura in nullius conſtitutae dominio, adeoque communes, e. g. ferae beſtiae, aues, piſces cet. Quae ergo nullius ſunt, eas cedere oporteret occupanti, ſed tamen fere vbique leges ciuiles prohibent venationem promiſcuam: vnde quaestio eſt, *an lege anteuerſi et prohiberi potuerit haec mobilium occupatio?*

Reſpondetur, omnino id potuiſſe iure fieri. Nam

1. In imperio per vniuerſitatem quaesito nihil eſt nullius, ſed omnia populi. Si populi ſunt, populus potuit earum rerum occupationi et uſui leges praefcribere.

2. Iuris quidem naturae et gentium eſt, has res eſſe communes, ſed non praeceptiui, verum permiſſiui. Ius naturae autem permiſſium legibus ciuilibus reſtringi poſſe iam libro I. demonſtrauiſmus. Hoc facilius intelligetur, quam quae in hac paragrapho diſſetit Grotius.

§. 6.

Sequitur de perſonis adquirentibus: quamuis ea res loco alieno tractetur. Occupatio eſt adprehenſio, ergo ſit corpore: eadem eſt modus acquirendi dominium, ergo ſit animo ſibi habendi; adeoque nec ſolo corpore, nec ſolo animo res adquiritur, ſed utroque ſimul.

Inde vero ſequitur, infantes, furioſos, dementes non poſſe aliquid acquirere vel habere in dominio: quia non habeant animum ſibi acquirendi.

Heineccii Prael. Grot.

Y

Sed

Sed resp. Grotius: ius Gentium ob vtilitatem communem introduxisse, ut et infantes et furiosi dominia accipere et retinere possent, personam illorum interim quasi sustinente humano genere. Sed haec philosophia paullo dilutior. Quis enim dixerit, humanum genus sustinere personam infantis vel furiosi?

Alia ergo ratione opus est. Adprehensio fit animo et corpore. Animus est consensus, is vel verus est, vel praesumptus. Verus requiritur in hominibus sanis et adultis, praesumptus sufficere videtur in furiosis et infantibus. Adprehensio corporalis fit vel per nos ipsos, vel per alios nostro mandato. Mandatum denovo vel verum, vel praesumptum. Si ergo tutor nomine infantis, curator nomine furiosi adprehendit, id facere intelligitur ex mandato praesumpto infantis vel furiosi. Vnde et quasi contractus esse intelligitur inter tutorem et pupillum, curatorem et furiosum.

§. 7.

Iam auctor aliquas *res sua natura nullius* considerat, et quaerit, an *occupatione possint adquiri*. Inprimis agit de *fluminibus* §. 7. de *mari* §. 8--13. de *effectu occupati maris et fluminum* §. 14--18.

Flumina auctor concedit occupari posse, et recte. Nam 1. sunt in territorio, ubi nihil diximus esse nullius, si quaesitum sit territorium per vniuersitatem.

2. Non sunt inexhausti vsus quoad ius vectigalium, piscandi, aurum hauriendi: quamvis inexhausti vsus plerumque sit aqua profluens, quae et ideo communis manere solet.

Hinc frustra obijciunt, 1. flumen non includi territorio, sed plerumque extra territorium porrigi, e. g. Danubius fuit per Germaniam, sed ea non includitur, nam et per Hungariam transit: immo nec hac includitur, sed per Seruiam Bulgariamque se in mare exonerat. Resp. sufficit, quod pro parte in territorio est, et pro ea parte potest occupari. Similitudine res fiet clarior. In Austria est silua, quae per Carinthiam, Carniolam, Croatiam, in ipsas Turcicas provincias porrigitur: an ideo silua non potest pro parte illa, quae in ditione imperatoris est, occupari? Quis negauerit? Similis esto de flumine decisio.

2. Res in flumine non posse custodiri, ergo nec occupari, e. g. pisces, qui iam in Germanica parte Danubii agitantur, q̄ras.

cras fore in Hungaria, perendie in Turcia; Germanos eos coërcere, et laqueis catenisque constringere non posse, adeoque nec dicere se dominos eorum esse. Resp. res quandin in flumine sunt, nondum sunt occupatae; adeoque de illis non est quaestio, sed an non ius sit Germanis solis occupandi piscis in Danubio intra Germaniam? Id quis neget?

§. 8.

Pergit iam auctor ad mare. Et quum supra ostenderit, per occupationem vel dominium adquiri, vel imperium: quaestio: nem mouet,

1. *An maris dominium occupari possit?* §. 2-12.

2. *An eiusdem imperium?* §. 13.

Primam quaestionem ita Grotius adfirmat, vt complures addat limitationes. Nam

1. Hac ipsa paragrapho exigit, vt is, qui maris dominium occupat, terras possideat ad latus vtrumque, aut supra et infra; si sit fretum. Et sic dubitari non posse, ait, quin mare rubrum a Turca: fretum Siculum ab imperatore possit occupari.

2. Vt mare sit tam exiguum, vt cum terris comparatum portio earum vel accessorium putari possit.

3. Vt idem liceat et duobus populis, si vtrunque terras possideant, quia sic par sit ius vtriusque. Sic e. g. fretum Danicum commune esse deberet Danis et Suecis.

Ergo eo ipso non contradicit Grotius libello *de mari libero*, quia ibi de mari magno; hic de paruo erat quaestio. Sed nescio, aa ei obiici possit, maius et minus non variare res. Sane cui emere fas est agrum vnum, ei non video cur et mille emere non liceat, si lex non obstat. Et si exigua maris pars occupando sit nostra, quidni et magna? Videbimus ergo infra, quid in hac doctrina Grotii sit desiderandum.

§. 9.

Contra hanc doctrinam ipse obiectionem mouet Grotius ex ^{num. 1;} iure ciuili, quod in legibus in margine allegatis docet mare esse iure gentium commune.

Sunt equidem, qui commune hoc idem esse aiunt, quod publicum, adeoque Ictos existimasse putant, mare non esse in

communione totius generis humani, sed in dominio populi.

num. 1.

Id quod declarant etiam exemplo littorum, quae itidem communia dicuntur: quum tamen diserte dicat CELSVS in l. 3. *D. ne quid in loc. publ.* ea esse populi Romani. Vnde colligunt, commune ICTis idem esse, quod publicum.

Sed resp. Grotius 1. diserte ICTos distinguere res communes et publicas, et in illis mare, in his flumina recensere, §. 1. *Inst. de rer. diuis.*

2. Theophilum in *Paraphrasi Graeca Institutionum* diserte dicere, mare esse κοινὸν πάντων ἀνθρώπων, commune non ciuium Romanorum, sed omnium hominum.

3. ICTos addere, commune esse mare, sicut aërem. Hunc autem non publicum esse, sed vere communem.

4. Littora a Celfo dici publica, non quidem ratione vsus nauigantium, cuius respectu sunt communia, sed intuitu aedificiorum in littoribus constituendorum.

Adeoque firmum id ac certum manet, ICTos veteres mare habuisse pro re communi. Quid ergo respondet Grotius ad hanc obiectionem?

§. 10.

num. 1.

Respondet 1. id ex instituto, non ex naturali ratione esse, id est, ex iure ciuili, non ex iure naturae. Sed haec responsio non satisfacit: vnusquisque enim facilius credet communionem maris esse ex iure naturae, quam ex iure ciuili, quia natura omnia primum voluit esse communia. Ergo altera responsio magis quadrat.

2. Dum fatentur ICTi, mare esse res communes nullius, id est, in communione negatiua constitutas, concedere etiam debere, id posse occupari. Quae enim nullius sunt, cedunt occupanti. Id quod illustrat exemplo fluminis, quod quum publicum sit, admittat tamen dominium, si quis in diuerticulo eius per longissimum tempus piscatus sit cum aliorum exclusione. *L. 7. D. de diuers. temporal. praescript.*

3. Paullum ipsum l. 14. *D. de iniur.* concedere, posse mare ad alicuius ius proprium pertinere.

num. 2.3.

Inde argumentatur: si ergo mare in priuati potest esse dominio: quidni et in dominio gentis, quae terras possidet vtrimque vel circum circa? Vnde colligit, Romanos ideo mare dixisse

xille commune, quod quamvis natura et iure naturali occupatum sit, tamen iure gentium ea occupatio non concedatur facile, adeo vt ne Romani quidem ea vsti sint.

§. 11.

Postquam itaque concessit Grotius, mare exiguum posse occupari: iam aliquot limitationes addit, et monet

I. Occupationem non praesumi, sed docendam. Ergo non sufficere, vt quis dieat, se terras vtrunque possidere, sed requiri, vt occupatio vel quasi possessio doceatur. Et recte, nam occupatio est facti: quae facti sunt, probanda.

II. Si possessio deleatur, tunc et ius ex occupatione quaesitum cessare, et mare veluti ad pristinam libertatem redire. Hinc occupatum intelligi mare, quandiu e. g. naues bellicae ibi reperiantur, iis autem subtractis possessionem cessare. Quam doctrinam nuper singulari libello pererudito demonstrare conatus est vir ill. CORNELIVS van BYNKERSHOEK *de dominio maris*. Sed nescio, an omnes hoc admissuri sint. Notum etiam est, possessionem quidem adquiri animo et corpore simul, sed retineri etiam animo solo. Quis dixerit, me adprehensa possessionem praedii, illa statim excidere, si iter faciam, praediumque vacuum interea relinquam? Hinc Bynkershoekius argumenta ex hoc fundamento refellit THOMAS. in *scholiis ad Vlr. Huberi libellum de iure ciuitatis*.

§. 12.

III. Monet, quamvis aliquis maris dominium occuparit, tamen nemini negari posse transitum innoxium, vel navigationem impediri.

Sed eo ipso totam suam doctrinam, quod portio maris exigua in dominio esse possit, destruit Grotius. Quid enim est dominium? Est ius in re corporali re solitarie vtendi, eiusque vsu alios excludendi, de ea disponendi, amissamque vindicandi. Ex hac definitione argumentor:

Cui nec est ius alios rei vsu excludendi, nec disponendi, nec vindicandi, ei non est dominium.

Ei, qui mare occupauit, non est ius alios maris vsu excludendi.

dendi per §. 12. nec disponendi, per eandem §. nec vindicandi, quia cessante possessione statim ius amittit per §. 11. Ergo qui mare occupat, non est dominus.

Quum itaque tot contradictionibus se inuoluat Grotius: quid de tota re sentiendum?

Ego quaestionem: *an mare sit in dominio?* eiusdem naturae puto, ac illam, an in dominio sit terra? Terra aequae communis est natura, ac mare. Iam videamus, quatenus terra sit in dominio. I. In terra aliqua sunt inexhausti vsus, e. g. gleba, transitus innoxius per terram, et ea manent communia omnium. Et hinc nemo temere actionem instituet contra eum; qui ex agro suo glebas sustulit, vel per agrum non constitum iuerit. Ita et mare omne commune manet, quatenus est vsus inexhausti. Inexhausti vero vsus est nauigatio, et aquae haustus. II. Quemadmodum deinde terra non tota in dominio est uiuus, nec esse potest, nisi humanum genus sublatum velis: ita nec mare potest esse totum in dominio vnus. Hinc ridicula est quaestio de dominio Oceani. III. Sicut terrae pars, quatenus eius vsus exhaustus est, potuit per occupationem adquiri: ita et maris pars, quatenus est vsus exhausti. Talis vero est piscatio. Qui ergo in parte maris eam occupauit, is excludere alios potest, et, si gens integra id fecit, eius idem ius est: modo vere piscatio illa exhausti vsus sit. IIII. Vti in terra dominium distinctum est ab imperio, adeoque vt et res nullius in terris tamen imperio subiaceant, e. g. viae publicae; loca deserta, metalla nondum quaesita: ita et mare etiam a priuatis non occupatum, admittit imperium, quatenus est accessorium territorii. V. Vti imperium manet, etiamsi et exteris accessum non denegemus, denegare tamen possumus, si e rep. videatur: ita et imperans per mare nemini temere denegabit nauigationem, sed denegabit tamen, si salus rei publicae exigat. VI. Quemadmodum exteri, qui in territorio nostro sunt, sunt subditi temporarii: ita qui in mari nostro nauigant. Hinc nullum est dubium, quin puniri a Belgis possit, qui in mari hoc australi piraticam exercuit, vel homicidium commisit, quamuis sit exterus. Haec doctrina probe cohaeret, et his paucis obseruatis thesibus tota quaestio recte decidetur, quum alias sit immensae obscuritatis, nisi recte formetur status controuersiae.

§. 13.

§. 13.

Iam ad imperium maris auctor progreditur: idque concedit num. 1. 2. adquiri potuisse: probatque

1. A natura occupationis. Vti enim imperium in terrae partem acquisitum vel per vltro-neum, vel vi extortum populi consensum: ita et imperium maris, vel per vltro-neam submissionem, navigationem, dum vltro imperium agnouerunt, vel per coactionem, dum imperans nauibus armatus omnes imperium suum agnoscere coëgit.

2. Ex consensu gentium. Nam et Argiuos, et Spartanos, et Athenienses, et Tyrios sibi imperium in partem maris vindicasse, ex historia docet. Qua de re egregia sunt, quae ex scriptoribus antiquis collegit IO. HENR. BOECLERVS in *diff. Minos, maris dominus*. Immo, quod probe notandum, quum vulgo contendant, Romanos ita mare habuisse commune, vt nullum sibi in illud imperium vindicarint, idque demonstrare audeant ex *l. 4. §. 1. D. de leg. Rhod. de iact.* singulari ac pererudita dissertatione eam legem illustrauit IAC. GOTHOFREDVS, et ex illa ipsa demonstrauit contrarium, quod nulla gens strictius exercuerit imperium in mare, quam Romani.

§. 14.

Vidimus, quatenus maria et flumina et in dominio imperioque esse possint: iam porro de effectibus huius domini et imperii agit auctor, quorum praecipui sunt,

1. *Ius imponendi vectigalia*, §. 14.

2. *Ius circa has res, earumque usum disponendi*. §. 15-18.

I. Primus effectus est *ius imponendi vectigalia*: cuius iuris aequitatem Grotius suo more probat 1. ex eo, quod dentur in compensationem impensarum in defensionem nauigantium factarum a re publica; 2. ex moribus et consensu gentium. Ostendit enim, et Romanos, et Byzantinos, et Athenienses exegisse a nauigantibus vectigalia.

De vtraque ratione quid sentiendum sit, alibi vidimus: Trium gentium mores non faciunt ius: et, si omnes gentes consensisse doceo, tantum probo, quid factum sit, non quid fieri debeat. Et si defensio nauigantium est fundamentum vectigalium,

lium, cur tempore belli navigantes suis impensis conducere tenentur naues praesidiarias, (*convoyers*)? cur et tempore pacis exiguntur vestigalia? cur et iis locis exiguntur, ubi nullum est a piratis vel hostibus periculum, e. g. in fluminibus mediterraneis?

Dicimus itaque ex eadem ratione, ex qua vestigalia in terris exiguntur, exigi etiam possunt in mari ab eo, cui maris imperium est. Qui mari nostro utuntur sunt subditi temporarii, et lucrum captant ex usu rei nostrae. Ergo acquisitum est, ut et partem lucri conferant ad utilitatem rei publicae nostrae.

§. 15.

II. Pergimus ad alterum effectum, *dispositionem* puta circa has res, et earum usum. Qui enim dominus est, quique imperans, ille re sua vitur liberrime, eique usui pro arbitrio leges praescribit. Ergo id et fluminum mariumque domini et imperantes faciunt. Quaeritur itaque

1. *An possit per foedera caveri, ne quis, nisi certis locis, nec ultra certum terminum naviget?* Talia foedera passim exstant in historia Romana, et maxime memorabile est, quod cum Carthaginensibus initum, apud Polybium initio historiae, quo cautum, ut neutra pars ultra promontorium pulchrum navigaret. Simile foedus cum Antiocho factum refert Liv. *Hist. lib. XXXV III. sub fin.*

num. 2.

Videri posset, hoc foedus libertati naturali repugnare, quum navigatio sit res inexhausti usus, et hinc communis merito habeatur. Sed resp. minime iuri libertatique naturali illud repugnare. Nam quisque potest iuri in favorem sui introducto renunciare, adeoque et pactione promittere, se ultra certum terminum non navigaturum.

Nos addimus, et inuitis vicinis imperantem maris posse leges de usu navigationis praescribere, e. g. ne naues armatas mari immittant sine litteris (*passseports*), ne merces aduehant hostibus sub poena confiscationis cet. Si id inuito altero fieri potest, quidni et per foedera et pactiones?

§. 16.

num. 1.
2. 3.

II. Quaeritur, *quid iuris sit, si flumen limitaneum alucum et cursum mutet,*

mutet, an et imperii terminus mutetur? E. g. Rhenus iam in superiore parte Germaniae est limes inter Germanos et Gallos. Iam si cursum mutaret, et non amplius cis Argentoratum fluere, sed ultra: an ideo Argentoratum accederet Germaniae?

Resp. auctor, distinguendum esse inter agros *diuisos*, *assignatos*, et *arcifinios*. Quod discrimen tale explicant scriptores de limitibus, vt IUL. FRONTINVS, AGGENVS VRBICVS, cet.

Diuisi sunt, qui habent limites manufactos, e. g. vallum, columnas, cippos, lapides signatos.

Assignati, qui ad certam mensuram dati, e. g. huic principi in feudum data sunt decem millia iugerum. Et hi duo vocantur in iure nostro agri *limitati*. L. 16. D. de acquir. rer. dom.

Arcifinii sunt, qui nec manufactis terminis inclusi, nec ad certum numerum dati, sed naturali termino, e. g. silus, flumine, finiuntur.

Duobus prioribus casibus mutante cursum flumine, nihil domino terrae accedit vel decedit: postremo omnino decedit. Hinc si e. g. ditio Brunsvico-Luneburgensis ad Albim esset limitibus arte factis inclusa, et Albis cursum mutaret et ad orientem per terras Brandenburgicas fluere inciperet, nihil accederet ducatu Luneburgensi, quia ditiones essent limitatae. Ast si Rhenus cursum mutaret occidentem versus ultra Argentoratum: haec vrbs de iure restituenda esset Germanis, quia per pacem Badensem Rhenus constitutus est limes, et ditiones factae sunt arcifiniae.

§. 17.

III. Tertia quaestio est *de alvei mutatione plena*. E. g. si ^{num. 11} quum antea flumen fuerit vnus leucae, iam sit sex leucarum, vel, quum antea fluere supra superficiem terrae, iam terram per aliquot leucas subeat, et alio loco erumpat, quale quid constat fieri in Hispania in flumine Guadiana?

His casibus nihil mutatur circa dominium, si fluuius sit limes, sed manet medium fluminis terminus vtriusque ditionis. Id elegante argumento demonstrat Grotius. Ait enim, si flumen plane exaruisset: media pars alvei pertineret ad vnum, altera dimidia ad alterum. Ita et si flumen fiat latius, vel si alia mutatio contingat.

Heineccii Prael. Grot.

Z

Sed

num. 1. Sed quid si de eo quaestio oriatur, *an ditio sit arcifinia, an limitata, pro qua parte est praesumptio?* Resp. pro ea, quae ditionem dicit arcifiniam. Ratio in promptu est. Flumen, quod duas diuidit ditiones, limitaneum esse, est res iuris. Ditionem vel terminis manu factis inclusam, vel ad certam mensuram datam esse, est quaestio facti. Res facti numquam praesumuntur, sed probantur. Ergo ostendendi sunt termini manu facti, demonstrandae exhibendaeque sunt litterae inuestiturae, (*die Lebens-Briefe*), vel tabulae foederum et pactionum, ex quibus constet; agros esse limitatos, non arcifinios.

§. 18.

III. Quaeritur, *an semper flumen ex parte dimidia ad vnam, ex altera ad alteram ditionem pertineat?* Idque recte negat auctor. Saepe enim contingit, vt vnus populus sibi ante per occupationem flumen adquisuerit, quam altera gens litus occuparit oppositum.

Eius modi exempla passim obuia sunt. Sic e. g. Visurgis quamvis ditiones Oldenburgicas et Frisicas Orientales, diuidat, tamen non est communis, sed in solidum ad Oldenburgicam terram pertinet.

Ordinarie tamen praesumitur flumen limitaneum commune. Elegans exemplum est in flumine Vidasso (*Bidasson*) qui Hispaniam a Gallia diuidit in Biscaiae finibus. In medio illo flumine est insula fassanorum, quae quum pro parte dimidia Hispanici, pro altera parte Gallici iuris sit: is locus visus est commodissimus, in quo anno 1659. pax Pyrenaea iniretur. In media insula posita mensa legati Gallicani in suo, Hispanici itidem in suo territorio adsederunt, et sic omnis euitata est de iure ~~opede/ae~~ controuerfia.

§. 19.

num. 1. Diximus supra; res nullius cedere occupanti, easque duorum generum esse, vel natura, vt aer, vel factio hominis per derelictionem. Quum itaque haftenus de prioribus actum, iam et de rebus pro derelictis habitis agendum esset: sed auctor eum tractatum reseruat capiti sequenti quarto: et sub finem capititantum monita quaedam subiungit.

Primum est, quod aliquando dominium plenum sit penes
sub

subditos, aliquando tantum utile, directo rei publicae, vel populo, vel principi competente. Id fieri potest pluribus modis. Inprimis tamen tribus:

1. Si subditi sua omnia possident sub nexu feudali a principe vel republica accepta: tunc vassalli sunt domini utiles, dominus directus princeps vel res publica.

2. Si subditis tantum superficies data, reservato rei publicae solo, pro quo solvendum annuum solarium. Tunc superficiarii sunt domini utiles, res publica est domina directa. Elegans exemplum de Carthagine est apud IUSTIN. *Histor. lib. XVIII. cap. 5.* Vid. STRABO *Geograph. lib. XII.*

3. Si princeps totam terram adquisiuit, eamque deinde subditis vel victis concessit iure emphyteutico pro canone annuo. Id quod Romani facere solebant in prouinciis. Ager enim omnis fiebat populi, isque vel cultus erat, vel incultus. Si cultus dabatur pro annuo canone, tunc agri dicebantur vectigales: si inculti, emphyteutici. Eleganter id omne ex antiquitatibus Romanis illustrauit celeberrimus PETRVS BYRMANNVS in libello egregio *de vectigalibus populi Romani*. Eodem modo ex historia noua notum, Reges Castiliae occupasse Americam, ac deinde agros pro canone assignasse colonis Hispanis. Hic ergo rex est dominus directus, coloni dominium tantum utile habent.

Secundum monitum est, quod his casibus, deficiente domino utili, res non fiat nullius, sed ad dominum directum redeat. Deficere autem videtur dominus utilis, si heredes non relinquat, vel masculos, ut in feudis, vel nullos plane, ut in superficie, et emphyteusi.

Tunc dominium directum et utile consolidantur, uti loquuntur iureconsulti.

CAPVT III.

DE DERELICTIONE PRAESVMPTA, ET EAM
SEQVVTa OCCVPATIONE, ET QVID AB VSV-
CAPIONE ET PRAESCRIPTIONE DIFFERAT.

§. 1.

IAm superiore capite monuimus, occupationi locum esse in rebus nullius. Res nullius esse vel *natura sua*, quae antea in nullius fuere dominio, vel *ex facto hominis*, scilicet *ex derelictione*. Quando enim dominus rem suam eo animo abiicit vel deferit, ut eam in rebus suis habere nolit, tunc fit res nullius, et cedit occupanti. Vnde negandum, res pro derelictis habendas, quas abiiciunt ebrii, furiosi, iocantes, naufragi, quibus non est animus derelinquendi.

Ea derelictio vel *vera* est, ubi animus iste manifesto declaratur, vel *praesumpta*, quae ex negligentia domini colligitur. E. g. thesaurus habetur pro re derelicta, quamvis reuera domino non fuerit consilium illum derelinquendi, sed sibi seruandi et custodiendi, quia dum iste nec effodit thesaurum. nec eundem heredibus vindicauit, ipso facto eum deseruisse censetur.

Ex hac praesumpta derelictione etiam defenditur *usucapio*. Qui enim intra longum tempus in rem suam non inquisiuit, nec eam, quum potuisset, vindicauit, is eam dereliquisse censetur, adeoque res cedit occupanti: et cui potius, quam bona fide, iusto titulo, sine interruptione possidenti?

Hinc ea occasione agit Grotius de *usucapione*, quae, vti ex iure civili notum, est adiectio domini per continuationem possessionis temporis lege definiti. L. 3. D. de *usurpat. et usucap.* Et de ea quaeritur

1. *An locus habeat inter gentes et summos imperantes.* § 1. 2.
2. *Ex quibus signis colligatur, rem a populo vel summo imperante pro derelicta habitam?* §. 3-7.
3. *Quid ad obiectiones sit respondendum?* §. 8-11.
4. *An usucapioni locus sit inter principem et subditos?* §. 12-14.

§. Quae

5. *Quae vsucapione adquiri possint?* §. 15.

1. Quod ad primam quaestionem attinet, 1. haud pauci sunt scriptores, qui vsucapionem iuri naturae plane aduersari existimant, ex ea ratione, quod, quum dominum sit ius perpetuum, iniquum sit id solo tempore alicui adimi, quum tempus, tamquam idea abstracta et relata nihil operari possit. Ita ipse CVTAC. ad l. 1. *D. de usurpat. et vsucap.* Sed hoc facile refelles. Neque enim alicui eripitur dominium ob solum temporis lapsus, sed ob praesumptam derelictionem. Quid enim certius, quam eam rem habere nolle, qui intra decem annos eam non indagat?

2. Sunt, qui vsucapionem nihil iniqui habere fateantur, sed eam tamen negant locum habere in controuersis gentium. Hinc

VASQVIVS *lib. II. cap. 51. n. 8.* negat ei locum esse 1. inter gentes. E. g. ius imp. in terras Venetorum non sublatum est, quamuis Veneti illas per aliquot saecula possederint. 2. Inter reges. E. g. rex Britann. adhuc titulo vitur regis Franciae, quum per tot saecula domus Valesia et Burbonica in possessione sit. 3. Inter regem et subditum extraneum. E. g. si mercatori Gallo aliquid deberet imp. nullam praescriptionem locum habere. 4. Inter subditos diuersorum imperantium. E. g. si Gallus mercator debeat mercatori Belgae. 5. Nec contra imperantem ratione subditorum suorum. E. g. si iuris dictionem nobilis dicat se praescriptione adquisiuisse. Vnus ergo casus remanet, ex mente Vasquii, quod subditi inter se possint vsucapere. Eius ratio est, quod vsucapio certi temporis lapsu non intelligitur. Tempus illud definit imperans. Ergo est auctor vsucapionis. Ergo nec ipse, nec exteri hac lege tenentur.

Sed contrarium defendit Grotius, et ostendit, omnino et inter gentes huic iuri locum esse, idque duplici probat argumento.

Primum est, quia sic controuersiae inter gentes forent aeternae, adeoque bellorum numquam non in promptu sit occasio, quum tamen societas humana pacem et tranquillitatem exigit.

§. 2.

Alterum argumentum sumit a consensu gentium. Ad praescriptionem enim prouocarunt Hebraei *Iud. XI. 26.* (qui locus

est admodum notabilis,) Lacedaemonii, Athenienses, Macedones, Romani.

Sed facile haec controuersia potest componi. Vasquius loquitur de vsucapione iuris ciuilis: et ea inter gentes non habet locum. Quo iure enim gens genti legem praescriberet? Grotius de praescriptione iuris gentium: et haec omnino et inter gentes obtinet.

Discrimen in eo consistit. Vsucapio iuris ciuilis requirit certum tempus, e. g. in mobilibus trium; in immobilibus inter praesentes decem, inter absentes viginti annorum. Hoc tempus quum lege ciuili definiatur, alios obstringere non potest, nisi subditos. At praescriptio iuris gentium nihil aliud est, quam derelictio praesumpta rei, per longum et indefinitum tempus haud repetitae.

§. 3.

II. Iam ergo merito quaeritur, *ex quibus signis huius modi derelictio iudicetur?* Neque enim aliquid praesumi potest, nisi signa adsint, vel rationes, hoc vel illud praesumendi. Maxime hoc loco signis opus est, quia quaeritur de animo derelinquendi, qui in sensus non incurrit, adeoque ex signis vnice colligitur. Inter haec signa ex mente Grotii primum locum occupant I. VERBA. *Ac de verbis quidem*, inquit sub finem paragraphi, *expedita res est*. Et id verum. Nam si declararet gens, se hanc prouinciam amissam, vel id ius ab altero quasi possessum recuperare nolle, nemo dubitabit, animum derelinquendi adesse. Sed hoc signum huc non pertinet. Si quis enim verbis declarat mentem, ea derelictio non est praesumpta, sed vera. Praesumitur aliquid, quando leges aliquid colligunt vel fingunt, vel ex aequitate, vel ex aliis signis physicis vel moralibus. Si vero adsit declaratio expressa, nihil colligitur, nihil fingitur, sed derelictio vera adest.

§. 4.

Alterum signum sunt FACTA; quae et inter priuatos et inter gentes arguunt derelictionem.

Quaest. 1. Inter priuatos huc pertinet 1. *abictio*. Quis enim rem abiicit, quam velit sibi retinere? Sed tamen recte addit Grotius
circum-

circumstantias debere ponderari, e. g. personae, an infans, furiosus, ebrius abiecerit? causae impulsivae, an forte ex ebrietate vel ioco id factum? temporis, an tempore incendii, ruinae, naufragii abiecerit? Tunc enim hoc signum non sufficit. 2. *Redditio chirographi*. Resp. haec est remissio, non derelictio, et quidem tacita, non praesumpta. Rectius dixeris, debitum pro derelicto haberi, si creditor chirographum lacerarit, inciderit, abiecerit. 3. *Contractus de re nostra iniustus*. E. g. Titius possidet hortum meum, ab eo illum emo. Eo ipso videor hortum pro derelicto habuisse. Verum et hic adiicienda exceptio, nisi mihi res sit cum eo, qui vi vitur, e. g. si rem raptam a latrone vel pirata redimo.

Inter gentes loco signi est scientia et patientia. E. g. sciunt *num. 2.* Lacedaemonii, Athenienses sibi vindicare ius maris sui, nec contradicunt: videntur ius illud dereliquisse. Idem obtinet inter imperantes et subditos. Scit imperans, Maeuium in agris suis ius venandi exercere. Non contradicit per diuturnum tempus: ius illud imperans videtur pro derelicto in illis agris habere.

Sed hic merito notanda exceptio, nisi iustus sit imperantis error. Potest enim ille existimare, Maeuium id ius habere ex concessione maiorum, ex inuolutura, titulo oneroso. Si error patefceret, nihil Maeui proderit scientia et patientia domini.

§. 5.

Tertium signum sunt NON FACTA, quo praecipue refertur *num. 1. 2.* 1. *silentium*. Nam qui tacet, quum loqui posset et deberet, consentire videtur. Locus insignis *num. XXX. §. 12.* de voto, ab eo, qui in aliena potestate est, suscepto.

2. *Abiecta spes recuperandi*, e. g. si lupus agnum rapuit. Sed id falsum. Spes est amor boni futuri, quod nobis repraesentamus tamquam facile obtinendum. Ergo spes abiecta est amor boni futuri, quod nobis repraesentamus tamquam difficulter, vel plane nullo modo obtinendum. Ergo spes siue abiecta siue praesens est amor. Amor vero semper cupit rem habere. Hinc impium esset agnum alienum lupo ereptum sibi retinere, impium bona naufragorum sibi vindicare.

Sed et, quod de silentio dictum, cum exceptione intelligendum. Nam praesupponenda 1. scientia tacentis 2. vltroreum *num. 3.* silentium.

lentium. Nihil ergo operatur, quod vi et metu periculi quis tenet. E. g. Nobilis crudelis e rusticis quaesuerat, an in agris suis aliquis sit, qui ad alium pertineat? Rustici tacebant metu periculi. Repetebat quaestionem: tacebant denuo, sed murmurabant. Postea data occasione meliore instituebant actionem. Nobilis opponebat exceptionem vsucapionis. Rustici replicabant, se vsucapionem interrupisse murmurando. Exstat de hoc casu rariore elegans dissertatio IO. FRIDEMANNI SCHNEIDERI de interruptione vsucapionis per murmuracionem.

§. 6. 7.

Quaeritur autem, an non et tempus quoddam certum exigatur, ut res tacite derelicta et vsucapta censentur?

Distinguendum inter vsucapionem inter priuatos vel iuris ciuilibus, et vsucapionem iuris gentium.

Vsucapio inter priuatos tempus habet definitum lege ciuili; e. g. iure Romano in mobilibus triennium, in immobilibus decem annos inter praesentes, viginti inter absentes; iure Saxónico in immobilibus 31. anni, 6. hebdomades, et 3. dies indistincte requiruntur.

Vsucapionis vel praescriptionis iuris gentium nullum certum et definitum tempus est, quia nulla lege illud definiri potuit ita, ut omnes ea obstringerentur. Sufficere ergo creditur tempus immemoriale.

Sunt, qui putant, immemoriale tempus esse centum annorum, quia haec sit vita hominum longissima. Sed sufficit quantumcumque tempus, modo ex senioribus nemo meminerit, rem aliter se habuisse.

Huius immemoralis praescriptionis ideo magna vis est, quod inde magna nascitur praesumptio, rem pro derelicta habitam esse, quam nec ipse, nec eius heredes tanto temporis spatio non vindicarint, quum dubitari nequeat, quin non vna vindicandi occasio se interea obrulerit.

§. 8.

III. Iam obiectiones quasdam soluit Grotius, quae opponi posse videntur huic doctrinae de vsucapione vel praescriptione iuris gentium, quam in praesumpta rei derelictione consistere diximus. Obiiciunt

I. Nemi-

1. Neminem praesumere suum iactare, adeoque signa illa ^{num. 1:} maxime, quae in non facto consistunt, non sufficere ad amittendum dominium.

Resp. Grotius, bene sperandum esse de hominibus, nec putandum, eos hoc esse animo, ut rei caducae causa hominem alterum velint in perpetuo peccato versari: id est, non credendum esse, dominum iuris sui tam tenacem esse, ut alterum per tot annos velit in peccato vivere. Sed haec, si quid video, nihili sunt. Nos respondemus, de voluntate et consilio hominum ex effectu iudicari. Effectus testatur de causa. Nec aliter in moralibus interna aestimare possumus, quippe quae in sensus haud incurrunt. Iam argumentamur:

Qui suum non iactat, is illud vindicat.

Qui patitur alterum usurpare, et tacet, is non vindicat suum.

Ergo qui patitur alterum usurpare, et tacet, is suum iactat.

Vbi itaque ipsa adsunt rerum argumenta, quid opus praesumptione.

2. Obiicitur in specie, quod ad imperia attinet, ea tam esse ^{num. 2:} pretiosa, tam hominibus cara, ut absurdum sit, praesumere, quemquam illa pro derelictis habere velle.

Resp. Grotius, 1. At imperii etiam magna esse onera, quae saepe subigere possunt imperantes, ut imperio, quo privati sint, aequo animo carere malint, quam cum periculo de eo litigare. Elegans in primis est, quod de Antiocho, Syriae rege, narrat VALER. MAX. lib. XIII. cap. 1. quod gratias egerit Romanis, qui se magna oneris parte leuarint. Nos addimus

2. Saepe pertaesos principes imperii vltro se principatu abdicasse, vel ob vitae tranquillae studium, quale celebrat BORTIVS:

Stet, quicumque volet, potens

Aulae culmine lubrico:

Me dulcis satures quies,

Obscuro positus loco

Leni perfruar otio;

vel ex conscientia infirmitatis, quae prohibet ipsos, quo minus fraena imperii tenere possint, vel ob superstitionem, ut cucullo monastico induantur, vel ob subditorum iniurias. Sic imperio

Heineccii Prael. Grot.

A a

rio

rio aequo animo et vltro se abdicarunt Sulla, dictator perpetuus, PLVTARCH. in eius *vit.* pag. 414. Diocletianus et Maximianus imperatores, LACTANT. *de mort. persecut.* cap. 10. seq. Lotharius imp. PITHOEVS in *Annal. Franc.* pag. 322. Carolus V. imp. GODELEVAEVS *de abdicat. Caroli V.* Christina regina Sueciae, Io. Casimirus rex Poloniae, Philippus V. rex Hispaniae, et alii. Vid. OLSEN. *Diff. de principe magistratu se, abdicante.* Quod ergo factum est toties, quidni fieri posset? et quum non rara sit derelictio imperii vera, quidni et locus sit praesumtae? vbi tot signa concurrunt.

nam. 3. Accedit 3. quod, si inter priuatos ea vsucapio et derelictio praesumitur, ne dominia rerum in incerto maneant, multo magis interlit generis humani, ne in incerto sint imperia. Quum enim controuersias priuatorum iudex componat, de controuersis de imperio non nisi sanguine et cladibus humani generis transigatur? Ergo ex hypothese argumentamur:

Si non iniqua vsucapio iuris ciuili, quia interest societatis humanae, ne dominia in incerto sint: multo minus iniqua erit vsucapio imperiorum, quum humani generis intersu, ne imperia in incerto maneant?

nam. 4. 4. Denique vbi duae sunt praesumptiones: fortior vincit infirmior: illa vero infirmior, quae nullo signo nititur, vel, vt Grotius loquitur, cuius nulla editur significatio idonea. Iam hic duae adsunt praesumptiones: altera, neminem praesumi suum iactare; altera, rem, quam quis tempore immemoriali non vindicat, pro derelicta habendam. Illi praesumptioni nullum administratur signum. Supponimus enim, illum rem negligere, tacere, nec possessionem alterius interrompere. Huius vero signum clarissimum est, quod non vindicet, quod taceat. Est ergo haec praesumptio fortior, adeoque vincit infirmior. Q. E. D.

§. 9.

Addit et 5. quintam rationem Grotius, putatque, hanc vsucapionem non modo iuri naturae esse consentaneam, sed et videri *iuris gentium positum*, vel *voluntarii*, id est gentes sponte et communi consensu statuisse, et legem sibi hanc condidisse, vt possessio immemorialis transferat dominium.

Sed huius modi ius gentium positum vel voluntarium iam supra

supra profligauimus, docuimusque, gentes nec separatim, nec coniunctim posse vt legistatores concipi : nec ex historia constare, vmq̃uam ea de causâ in vnum conuenisse, vt ius sibi nouum constituerent. Ergo haec transeant.

§. 10.

Maiores momenti est quaestio, *an nondum natis ius suum* num. 1. *sacite tali derelictione possit decedere?* E. g. imperium Constantinopolitanum debetur iure Palaeologis, ex qua familia hodiernum aliqui supersunt in Graecia. Iam fingamus, horum maiores id imperium pro derelicto habuisse : an idem damno erit posteris tum nondum natis ? Si negabimus, tum nullius vsus erit vsucapio vel derelictio praesumta, qua non certa sunt rerum dominia, sed controuersiae in eodem statu manent. Si adfirmabimus : tunc iniquum quid adfirmabimus. Nam non valenti aegre non currit praescriptio.

Proluxe respondet Grotius, e. g. nondum natorum nullum num. 2. ius fuisse, ergo nec quidquam iuris eos amittere : *populum ius* 3. 4. *nondum natis potuisse de imperio statuere, quod pater dereliquerat : aliud esse ius naturae, quod dicat dominatum derelictione praesumta expirare ; aliud ius ciuile, quod horum possumorum rationem habeat, eosque fingat natos, et iura iis omnia salua relinquat.*

Haec quidem non mala, sed minus sufficere videntur ad soluendam quaestionem. Potius itaque respondendum, posteros nullo iure gaudere, nisi quod iure hereditario a maioribus ad eos transmittitur. Quod itaque maiores non amplius habuerunt, id nec potuerunt transmittere. Atqui, quod dereliquerunt, non habuerunt amplius. Ergo quod dereliquerunt, non potuerunt transmittere. Ergo Palaeologorum nullum ius est.

§. 11.

Quaeritur porro, *an et populus aduersus populum, rex aduersus regem, immo et rex aduersus subditos hoc vsucapionis praesidio tutus sit?* Recte id adfirmatur. Quae enim sunt iuris gentium, ea inter gentes et earum rectores obtinent. Vsucapio, vti supra demonstratum, est iuris gentium : debet ergo et inter gentes, earumque rectores, locum habere. Hinc e. g.

A a 2

prae-

praescriptione immunitatem a vestigalibus in freto Danico recte tuentur Bataui aduersus Danos. Hinc rex Prussiae recte se praescriptione defendit aduersus Polonos circa ius colligendi electrum. Hinc recte principes quidam Germaniae subditis opponunt exceptionem praescriptionis, si vrgent, comitia debere conuocari.

Obiicitur : quae ab initio sunt irrita, et iniusta, illa ex iustitiae non conualescunt. Resp. verum id esse, nisi accedat iusta causa. Hic vero noua causa accedit, ex vna parte longi temporis possessio, ex altera patientia et silentium.

§. 12.

num. 1. 1. Pergimus ad partem IIII. vbi disquirunt auctor, *an leges civiles de vfucapione etiam principem obligent?* Veteres glossatores adfirmant. Grotius recte negat. Nam

1. Leges civiles praescribuntur subditis. Atqui imperans respectu sui nec imperans, nec subditus est. Ergo sibi nec leges praescribit, adeoque illae non obligant principem.

2. Si princeps sibi leges de vfucapione tulisset, posset etiam sibi indulgere contra legem, (quod vocant dispensare,) si dispensat, cessat obligatio.

3. Finis vfucapionis civilis est, vt dominia inter subditos sint certa: princeps non est subditus, ergo et eius causa non data est vfucapio.

Et hinc frustra sunt, qui regalia, domanialia bona, etc. possidentes aduersus principem prouocant ad praescriptionem ordinariam iuris civilis. At audiendi sunt, si immemoriam praescriptionem allegent, quippe quae quum sit iuris gentium, etiam principes obligat.

§. 13.

Disimus de regalibus : *an ea vfucapione adquiri possunt?* Resp. regalia accipiuntur vel *in sensu iuris gentium*, pro iuribus maiestatis, vel *in sensu feudali* pro iuribus quibusdam fiscum locupletantibus, e. g. iure venandi, piscandi, metalla fodiendi. De posterioribus nullum est dubium, quin possint vfucapione adquiri etiam a priuatis, vti in Polonia ius salinas fodiendi est penes priuatos nobiles de Morstein per praescriptionem. De prioribus

bus porro distinguendum, sintne iura maiestatis incommunicabilia, an communicabilia? Illa sunt, sine quibus maiestas consistere non potest, e. g. ius ferendi leges: haec quae solua maiestate et ab aliis exerceri possunt, e. g. iuris dictio, ius munerum quaedam conferendi. Illa nulla praescriptione adquiruntur: haec adquiri possunt. Quae enim possunt in dominio possidentis esse, ea possessione recte adquiruntur.

Addatur observatio de confusione communicationis et diuisionis iuris maiestatis: et negandum esse moneatur, quod ius de non adpellando subditis competere possit.

§. 14.

Quaeritur porro contra monarchomachos, *an praescribi possit libertati?* E. g. Russi se subiecerunt imperio monarchae sui sine restrictione. Imperantes isti etiam sine interruptione per aliquot saecula id imperium exercuerunt, et sic si titulus deesset, etiam vfucapione tuti haberi possent. At monarchomachi negant praescribi posse libertati: adeoque semper fas esse putant populis excutere iugum, et se in pristinam libertatem vindicare. Quaeritur itaque, *an verum id sit?* Ita argumentantur monarchomachi:

Aut vi quaesitum imperium, aut populi consensu.

Si vi, tunc vim licebit vi repellere, quandocunque fuerit occasio.

Sin populi voluntate et consensu, tunc populus poterit voluntatem mutare, et abrogato imperio monarchiae libertatem restituere.

Sed hoc dilemma falsum. *Aut vi quaesitum imperium, aut consensu.* Recte. *Si vi, tunc vim licebit repellere.* Illatio haec falsissima. Nam et vis iusta esse potest, cui non est resistendum; et, si iniusta fuerit ab initio, potest iustus titulus nasci ex pacto, siue expresso, siue tacito, subsequente. *Sini voluntate populi, tunc populus voluntatem potest mutare.* Falsissimum denovo. Contractus enim vel pactio hic est bilateralis, quae solui non potest vnus, sed vtriusque consensu. Quis diceret emtionem venditionem, quia venditoris voluntate initur, etiam solui, si venditor voluntatem mutet? Nugae.

§. 15.

V. Superest pars quinta capitis, vbi quaeritur, *quaenam res hoc modo per vsucapionem adquiri queant?* Resp. omnes, quae possunt possideri. Ex possessione enim nascitur vsucapio.

Ex quo sequuntur duae regulae. 1. *Quae non habent quotidianum exercitium, non possunt praescriptione adquiri vel amitti.* E. g. gaudet quis iure patronatus, vel conferendi munus ecclesiasticum. Auis eius ministrum ecclesiae constituit, qui sexaginta annos eo functus est officio. Iam dum ei successor designatur, quaeritur, an id ius praescriptione expiravit? Minime.

2. *Quae merae facultatis sunt, non subiacent praescriptioni.* Res merae facultatis sunt, quae arbitrio meo subsumunt, e. g. emere apud hunc vel illum mercatorem, cet. An mercator, si per triginta annos ab eo solo emerim, sibi ius me cogendi, ut porro emam, adquisiuit praescriptione? Minime.

CAP. V.

DE ADQUISITIONE ORIGINARIA IVRIS IN
PERSONAS, VBI DE IVRE PARENTVM, DE
MATRIMONIIS, DE COLLEGIIS, DE IVRE
IN SVBDITOS, SERVOS, CET.

§. 1.

Adquisitio originaria est, rerum, quae in nullius adhuc dominio fuerant. Si pro dominio substituere potestatem, tum et ad personas adplicari poterit definitio. Nam et has nostras esse dicimus ob potestatem aliquam, qua in illis utimur, e. g. liberos, servos, uxores, ciues. Tres autem causas constituit Grotius, ex quibus haec adquisitio nascitur,

a) *generationem, qua adquirimus liberos*, §. 2-7.

b) *consensum, quo adquirimus coniuges*, §. 8-16.

ciues et collegas, §. 17-25.

in liberos adoptiuos, §. 26.

in servos, §. 27-31.

c) *ex*

c) *ex delicto personae*. §. 32.

I. GENERATIONE adquiruntur liberi a parentibus. Et quidem quum ad generationem utique et pater et mater concurrant, utrique etiam potestas in liberos est. At, quum tamen imperium duobus commune facile fiat mater discordiarum, quum unus velit, quod alter nolit: sequi ait Grotius, ut in dubio praefendum sit patris imperium ob sexus differentiam.

Haec Grotius. Vbi tamen plura monenda. Nam 1. falsum est, solam generationem producere patriam potestatem. Quum enim a) parentes sint liberi, ipsi quoque procreant liberos, et nemini obnoxios, sibi pares, non inferiores. b) Spurii generantur a patre et matre aequae, ac legitimi, nec tamen vlla gens patri potestatem in spurium concessit. c) Si sola generatio est causa patriae potestatis, sequitur, ut et serui potestatem habeant in liberos ex se genitos, quod absurdum.

2. Falsum quoque est, ex praesentia sexus deduci posse praerogativam patris. Aut enim praerogativa illa sita est in animo, aut in corpore, aut in utroque. Non in animo, quia saepe Nabal ducit Abigaëlem. Non in corpore, quia huius praesentia nihil conducit ad educationem. Nec in utroque, quia saepe contingit, ut et corpore, et mente superet vxor maritum.

Ergo aliud principium quaerendum esse, iam alii viderunt.

Hobbesius ad occupationem inclinatur. Infantes nati, inquit, sunt nullius. Res nullius cedunt occupanti. Mater prima occupat. Ergo et praecipua est eius potestas. Infantem a se occupatum etiam cum patre communicat. Ergo et hic acquirit potestatem, sed materna inferiorem. Sed hoc multo absurdus. Quae nullius sunt cedunt occupanti. Quatenam? res, non personae. Omnes liberi homines sunt nullius: an ideo cuius occupanti cedunt? Nugae.

Hinc vera huius iuris ratio est EDUCATIO. Infanti opus est educatione, alias illi esset pereundum. Educationem illam natura, vel ipse potius Deus demandavit parentibus, dum ipsis amorem erga liberos incredibilem impressit. Quum vero ea educatio non possit fieri sine potestate quadam dirigendi liberorum actiones: ergo Deus, qui voluit, ut liberi a parentibus educerentur, idem etiam voluit, ut parentibus esset potestas liberorum dirigendi actiones. Quae ipsa est patria potestas iuris naturalis.

§. 2.

§. 2.

Iam porro quaeritur, *quanta sit parentum in liberos potestas*. Grotius primo tempora distinguit §. 2-6. deinde statum naturalem et civilem §. 7.

I. Tempora tria distinguenda monet cum Aristotele: 1. *tempus infantiae*, quum nullum adhuc est animi iudicium, 2. *tempus post infantiam*, ubi quidem scit filius, quid agat, sed tamen adhuc manet pars familiae, 3. *tempus quo filius ipse familia excedit*.

Iam observat Grotius, maximam esse parentum potestatem in liberos infantes, paullo minorem in adultiores, omnino minimam in eos, qui e familia exceßerint; adeoque hoc ius crescente liberorum aetate decrefcere et imminui. Recte omnino ita censet Grotius. Quis enim existimet, patri fas esse, filium iam emancipatum et honoribus fulgentem virga castigare? Sed non animadvertit vir acutissimus, ita se principium suum destrueret. Si enim potestas parentum est ex generatione, sequitur, ut ea per omnem vitam sit eadem. At posterius est falsum. Ergo et prius. Ex nostra autem hypothefi res clara est. Fundamentum patriae potestatis est educatio. Ea maiore labore fit in infante, quam in adulto, ergo et potestas dirigendi actiones decrefcere debet procedente aetate, et demum fere expirare post liberorum discessum ex familia.

Iam videbimus, quanta sit potestas parentum singulis his temporibus?

1. Primo tempore observat Grotius 1. omnes actiones liberorum absolute dirigi a parentibus. Recte. Nam tunc ipsi nihil agere possunt.

NUM. 1.

2. Parentibus quoque competere omne ius administrandi horum liberorum bona. Ob eandem rationem. Administrandi, inquam. Nam quod leges civiles statuerunt, omnia liberorum bona adquiri parentibus, id ideo non est ex iure naturae, quia secundum hoc et infantes aliquid proprii possidere possunt. Facilius tamen cum iure naturae conciliari potest consuetudo multis gentibus communis, quod usus fructus bonorum aduentitiorum cedat parentibus, quum his non invidendum videatur hoc educationis praemium.

§. 3.

§. 3.

II. Secundo tempore parentes dirigunt actiones liberorum ad familiae statum pertinentes, non reliquas, quae iam rationes ipsius filii exigunt: vel, ut magis perspicue rem exprimamus, officia inter parentes et liberos iam incipiunt fieri reciproca. Parentibus nihil iniuriae debent inferre liberi, at nec liberis parentes. Illi nihil debent agere inuitis parentibus, sed nec parentes cogere liberos ad quidquam, quod vel eorum naturae, vel rationi repugnat.

Inde facile deciditur quaestio, *an possint Iudaeis et haereticis liberi inuitis intercipi, ut baptizentur, et in vera religione educantur?* Resp. minime. Nam infantium actiones omnes vi patriae potestatis dirigere possunt parentes. Ergo et religionem. Sin vero de adultis sermo sit, multo absurdior quaestio est, quia ad religionem cogi nemo debet. At nec parentes tunc possunt. Hinc si filius Iudaei adultus ultro, et conscientia cogente Christianam religionem amplecti velit: pater frustra repugnet, quia haec actio non ad familiae statum, sed ad ipsum filii iudicium pertinet. Vid. P. ABRODII *tract. de patr. potest.*

§. 4.

Ex eodem principio nostro sequitur, ut utroque tempore parentes gaudere debeant iure coercendi, quia sine eo educatio procedere haud posset. Sed tamen et hic ad aetatem respiciendum. Infans aliter coerceri potest, ac adultior. Ille et virga castigatur, hic minime. Ille etiam ob delicta inuoluntaria, hic ob voluntaria tantum.

§. 5.

Incidit et quaestio, *an parentes liberos et alienare possint?* Resp. minime, quamvis Grotius id concedere videatur, si lex civilis non impediatur. Nam planum est argumentum:

Quod quis non habet, alteri dare non potest.

Dominium in liberos parentes non habent.

Ergo parentes dominium in liberos aliis dare non possunt.

Minor clara est. Nam patria potestas consistit in potestate dirigendi actiones liberorum, non in dominio.

Heineccii Prael. Grus.

B b

Hn

Hinc videmus, cur veteres Romani huius modi ius patri concesserint : quia nimirum is liberos vere habebat in dominio iuris Quiritium, vti praeclare demonstratum ab ill. ВѢН-КЕРШОЕКЮ in *Opusc. de iure occidendi liberos*.

§. 6.

III. In tertio tempore filius est *ἀντὶς*, id est, sui iuris. Cessante enim educatione, cessat et ius actiones dirigendi. Cessante enim causa cessat effectus.

Sed tamen remanet et hic parentum veneratio : non ob educationem adhuc durantem, sed ob eandem olim susceptam. Gratos enim quum esse deceat liberos, hinc etiam soluta patria potestate iis omnem reuerentiam praestare, nihil sine eorum consilio suscipere, et eos maximi semper facere tenentur.

§. 7.

Deinde distinguit auctor inter ius naturale et civile. Nam permulta superaddiderunt leges civiles, quae ex iure naturae deduci nequeunt, veluti

1. Quod ea potestas sit perpetua, et non nisi morte patris vel voluntaria filii emancipatione finiretur ;

2. Quod eadem se extenderet ad nepotes, pronepotisque ex filio ;

3. Quod soli patri ea potestas competeret, non item matri ;

4. Quod in iure vitae et necis, facultate ter venumdandi filios, et omnia per eos acquirendi consisteret.

Haec omnia enim Romanis propria fuisse, ipse agnoscit IUSTINIANVS in *pr. Inst. de patr. potest.*

§. 8.

II. Sequuntur personae, quas PER CONSENSVM adquirimus, inter quas primum locum tenent *uxores*. Vnde iam de coniugio agitur ab auctore §. 8-16. et quidem

1. Queritur, *quanta sit mariti in uxorem potestas* ? Resp. auctor, imperium inter coniuges non esse commune, sed penes maritum, in rebus saltem coniugii et familiae. Iam illud imperium mariti omnes leges diuinae et humanae agnoscunt, nec de iure naturae vllus veterum dabitavit. At de fundamento huius

huius imperii non omnes item sentiunt. Sunt, qui illud positum existimant in praestantia sexus masculini. Sed ea saepe non tanta est, ut ideo imperium marito competere possit. Alii ex pacto. Sed si pacisci possunt coniuges, ut imperium sit penes maritum, pacisci etiam poterunt, ut sit penes vxorem: quod tamen negabunt multi ob *Eph. V. 23.* et similia dicta. Verum itaque fundamentum vidit Grotius, nempe, quia vxor fit pars familiae mariti, non maritus pars familiae vxoris. Quando autem in familiam mariti transit, eo ipso etiam marito imperium et directionem in se concedit, non se-
cus ac is, qui se arrogari patitur.

2. Quaeritur, *quid sit de natura coniugii?* Resp. Grotius, *num. 2.* coniugium esse talem habitationem maris cum femina, quae feminam constituat quasi sub oculis et custodia mariti. Idque inde probat, quod talis cohabitatio etiam inter animalia quaedam bruta obseruetur, veluti inter columbas.

Sed nescio, quid sibi hic velit Grotius. Quaestio est, quid sit de natura coniugii? Id aliter doceri nequit, quam per definitionem. Definitio autem haec coniugii admodum manca est. Nam si vir caelebs conducat sibi ancillam, tunc cohabitatur mas cum femina, tunc femina constituitur sub custodia et oculis maris, nec tamen inter eos coniugium esse, quisquam dixerit.

Ergo rectius dicitur, esse coniugium viri et mulieris coniunctionem ad liberos procreandos educandosque comparatam. Quidquid itaque ex hac definitione fluit, id est de natura coniugii: quod inde non fluit, ex iure positivo vel civili est; qualia exempla sunt in *n. 1. huius paragraphi, c. g.* quod maritus possit vota vxoris soluere, quod apud quosdam populos maritus bona vxorum vendere possit, cet. Ex hoc itaque fundamento facile deciduntur reliquae quaestiones.

§. 9.

3. Nam quaeritur porro, *an et polygamia, et diuortium sit num. 1. contra naturam matrimonii?*

1. De polygamia Grotius agnoscit, illam non posse esse contra ius naturae. Recte. Nam et maris cum pluribus feminis coniunctio potest esse ad procreandam educandamque sobolem comparata, adeoque illa nihil continet, quod sit definitioni coniugii contrarium.

Bb 2

Dein-

Deinde idem liquet ex eo, quod in V. T. tolerata fuit polygamia Iudaeorum. Nam et patriarchae, veluti Iacobus, Dauides, cet. plures vxores habuerunt, et ipse Deus pro beneficio suo reputat, quod Dauidi plures vxores dederit. 2. *Sam. X. 1. 8.* Id vero fieri non posset, si polygamia esset iuri naturae contraria.

mem. 1.

2. Idem de diuortio dicendum. Nam nec hoc repugnat iuri naturae, modo ex causa iusta fiat. Quum enim matrimonium sit maris et feminae coniunctio, sobolis procreandae educandaeque causa inita: sequitur, 1. vt, quemadmodum mutuo consensu initur, ita et mutuo dissensu dissolui sua natura possit, 2. vt, si alteruter coniugum ineptus sit ad procreandam educandamque sobolem, vel ns contaminatus vitiis, vt in societate cum eo viui commode nequeat, dissolui possit matrimonium.

Et hinc ipsa etiam lex V. T. concessit diuortia, ipso faciente Christo *Matth. V. 32. XVIII. 9.* An vero Deus aliquid praecepisset contra ius naturae immutabile? Minime.

Quamuis vero et polygamia et diuortium non repugnet iuri naturae, nec legi voluntariae V. T. vult tamen Grotius, Christi legem naturam coniugii ad perfectiorem normam rede- gisse, et non modo diuortium, sed et polygamiam prohibuisse. Diuortium quidem *Matth. V. 32. XVIII. 9.* polygamiam autem 1. *Cor. VII. 4.* dum et vxori dat ius in corpus mariti. Ex quo sequitur, vt quemadmodum maritus prohibere potest, ne vxor corpus communicet cum pluribus: ita eodem iure vti possit vxor ratione viri.

Accedunt et alia argumenta, veluti quod Christus locis citatis pronocat ad institutionem primaeuam: Deus autem iunxerat vnum matrem et vnam feminam in societatem indissolubilem. Item, quod Paulus dicit, vxorem debere habere *1. Thim. 3. 2.* virum proprium. Haec omnia itaque recte se habent.

Sed in eo Grotius errorem sibi familiarissimum immiscet; quod Christum nouam et V. T. legibus contrariam legem condidisse arbitrat. Nam, 1. falsissimum est, Christum esse nouum legislatores, quum potius sit veteris legis interpretes. Notum, quid ipse Christus de ea re dicat *Matth. V. 17. seq.* 2. Ipse Seruator, dum prouocat ad primaeuam institutionem, satis aperte docet, non nouam a se legem dari, sed illam renouari; et a pscudermentia pharisaeorum vindicari.

Sed

Sed quid dicemus de concessione diuortii et polygamiae in V. T. Respondet ipse Christus: *Moses vobis haec concessit propter duritiam cordis vestri*. Fuit ergo conuiuentia Dei, qui multa tolerabat in populo illo durissimi ingenii, quae non probabat.

Hinc facile etiam carebimus recensu illo plurium gentium, ^{num. 4.} quae et diuortii libertatem suis permiscere, vti Romani, vel polygamiam, vti Aegyptii, Persae, Graeci antiquiores. Nam 1. gentium mores, vt saepe diximus, non faciunt ius gentium. 2. Facile his opponi possunt gentes moratiores, quae polygamiam improbarunt, vt Romani, Graeci recentiores, Germani. 3. Ipsae gentes semper laudabiliorem monogamiam existimauerunt, quam *πλὴνυμίαν*, ceu ex TACITI libello *de moribus Germanorum* patet.

§. 10.

4. Transít Grotius ad consensum parentum, et quaerit, ^{num. 1.} *an sine eo ratum sit coniugium?* Non iam quaestio est, an consensus ille merito exigatur? et an non peccent liberi contra honestatem, qui illum negligant? sed quaeritur, *an ita de necessitate sit, vt eo non impetrato matrimonium sit irritum?*

Recte id negat Grotius. Nam 1. non omne, quod honestati repugnat, irritum est. E. g. parum honestum est, plus donare, quam vires patrimonii ferunt, sed ideo haec donatio non est irrita; non admodum honestum videtur, senem vxorem ducere, vel ob solas diuitias nubere, sed ideo huius modi nuptiae non irritae habentur. 2. Id nec ex definitione nuptiarum, nec ex definitione patriae potestatis fuit. Non ex illa: nam potest coniunctio maris et feminae esse coniugium, possunt et liberi procreari et educari, quamuis non consenserint parentes. Non ex hac, quia patria potestas, vt paullo ante diximus, educatione sola nititur. Liberi autem inrituri nuptias in eo sunt, vt educatione non amplius indigeant, sed eo ipso excedere solent familia paterna.

At ius Romanum nuptias irritas esse iubet, nisi patris consensus praecesserit. *pr. Inst. de nupt.* Sed facile respondetur. Hoc non ex iure naturae, sed ex lege ciuili esse: idque probabitur 1. ex eo, quod patris solius consensus exigitur eo iure, non matris, quam tamen iure naturae sit par vtriusque paren-

^{num. 2.3.}

tis in liberos potestas. 2. Quod nec opus sit filio emancipato patris consensu, quum tamen emancipatio iure naturae non tollat venerationem debitam parentibus. 3. Ipsum ius diuinum, quamuis parentum consensum requirat, tamen irritas non pronunciat nuptias sine consensu parentum contractas. Id quod Grotius probat exemplo Esau, *Genes. XXXVI.* qui quum inuitis parentibus nuptias inauspicatissimas contraxisset, non tamen a parentibus prohibitus est, vxores illas male conciliatas in matrimonio habere et retinere.

§. II.

§. Quaeritur, *an etiam ii, qui iam in matrimonio viuunt, aliud inire possint?* Vbi recte Grotius distinguit inter ius naturae et gentium et ius diuinum positium.

Iure naturae quum licitum sit diuortium, licebit etiam matrimonium soluere, et aliud inire, modo grauis aliqua et idonea causa id suadeat.

At iure diuino positio quum per Christi interpretationem nefas sit, repudium vxori dare, non nisi morte soluitur matrimonium et diuortio propter adulterium, vti vulgo ex *Matth. V. et XVIII.* colligunt.

Vnde merito quaeritur, *an ex his textibus id sequatur?* Nos negamus ob has rationes:

1. Aut solum adulterium soluit matrimonium, aut et aliae causae. Si posterius: habemus, quod volumus. Sin prius: non potuit Paullus *1. Cor. VII.* nouam diuortii causam assignare, malitiosam desertionem. Atqui assignauit. Ergo non solum adulterium soluit matrimonium. Quumque expresse dicatur in textu *Matth. V. 32.* *παρά τοῦ λόγου πορνείας*, et *XVIII. 9. εἰ μὴ ἐκ τῆς πορνείας*: consequens est, vt *πορνεία* hic non significet solum adulterium.

2. Quid autem significet, praeclare ostendit SELDENVS *de vxor. Hebr. lib. III. cap. 22.* idque ex ipsa connexionem patet. Pharisei tentaturi Christum, hanc ei quaestionem proponebant: *an fas est cuiquam repudiare uxorem suam κατὰ πᾶν τὸ αἰνίον, ob quancumque causam?*

Nimirum erat haec inter Iudaeos eius temporis maxima controuersia. Schola Schammaitana id negabat, et diuortium non nisi ob causam *turpitudinis* concedebat, vti Moyses loquitur *Deut.*

XXVIII.

XXIII. 1. Contra Hillel, eiusque schola, docebat, ob quamcumque causam licitum esse diuortium. Prior sententia viris probis et iustis placebat, id est, paucis: posterior plebi, cui grata erat illa diuortiorum licentia. Quumque fama percrebuisset, hanc sententiam scholae Hillelis voce caelesti fuisse probatam, ipsum synedrium magnum eam publica auctoritate ratam habuit.

Dum ergo pharisaei interrogant: an fas est homini repudiare uxorem ob quamcumque causam? perinde est, ac si dixissent: tunc probas sententiam Hillelis? Si adfirmasset, tunc multis videri potuisset Seruator vir parum sanctus et pius: si negasset, occasio illis fuisset eum tamquam haeticum denunciansi synedrio.

Quid ergo Christus? respondet pro Schamaitanis: dico vobis, qui repudiat uxorem, nisi in *ῥατὴν*, adulterium committit. Ex quo sequitur, 1. ut *ῥατὴν* hic sit quaevis res turpis, et fini matrimonii contraria, maxime cum 2. ea significatio vocis sit Hellenistis frequentissima, et hi fere omnia delicta appellare soleant *ῥατὴν*, uti cum adparatu probauit Seldenus. Quod et 3. inde liquet, quod Paullus 1. Cor. VII. alteram causam diuortiorum, nempe malitiosam desertionem addidit, quod sane non potuisset, si *ῥατὴν* significaret adulterium.

§. 12.

6. Iam noua et ea quidem vexatissima nascitur quaestio de incestu nuptiis, seu gradibus prohibitis. Quam fere omnes gentes honestiores abstinerint a nuptiis consanguineorum; a) quaeritur, an ea prohibitio sit iuris naturae?

Negat id Grotius n. 1. excepto coniugio inter parentes et liberos, de quo n. 2.

Negat, inquam, hanc prohibitionem esse iuris naturae. Nam 1. ea non fuit ex definitione connubii antea explicata. Liberi procreari et educari possunt etiam a parentibus consanguineis.

2. Rationes, quas vulgo adferunt, sunt nullius ponderis. E. g. quod ΠΛΥΤΑΡΧ. *Quaest. Rom.* 108. et AUGUSTINVS de ciuit. Dei, lib. XV, cap. 16. existimant, eas nuptias prohibitas, ut latius spargantur amicitiae, nec intra vnam familiam consistant adiutitates. Ratio enim haec magis politica est, quam iuris naturae.

3. Immo

3. Immo aliquando hae nuptiae vtilissimae videntur, e. g. si iam liberi ex priore matrimonio adfint, et nouerca sit vxoris defunctae soror, sane tolerabilior erit nouerca, quam extranea. Ita etiam si virgo sit *ἑταίρα*, id est, ex asse heres, consulitur familiae, si agnato nubat, vt patrimonium penes familiam maneat. Quod hoc casu ipse Deus praecepit, *Ruth. cap. 4.* nec non lex Attica apud *DEMOSTH. in orat. ad Leobaretem.*

num. 1. Attamen inter adscendentes et descendentes matrimonia ipso iure naturae prohibita videntur,

1. Quia turbantur respectus, e. g. si filius vxorem ducat matrem, tamquam filius eam venerari debet, tamquam maritus eidem imperare. Ita et liberi inde nati erunt patris liberi, et simul fratres vterini, matris filii et simul nepotes ex filio. Quae confusio respectuum rectae rationi et matrimonii naturae repugnare videtur.

2. Quia pudori naturali repugnant huius modi nuptiae. Nam quem non puderet cum matre congredi?

num. 3. At posterius argumentum non maximi momenti esse videtur, quamuis Grotius ad obiectiones quasdam respondeat. Nam
1. Diogenes et Chrylippus prouocabant ad animalia quaedam ab incestu non abhorrentia, e. g. gallos gallinaceos.

Sed resp. Grotius: quamuis ab his nuptiis non abhorreat natura brutorum, abhorreere tamen naturam humanam, adeoque id sufficere ad probandum, quod repugnet iuri naturae, quod et testimoniis Xenophontis, Mich. Ephesii, Lucani probat.

quod. 4. 2. Socrates apud Xenophontem in *Memorabilibus Socratis* existimat, nihil turpe inesse his nuptiis, praeterquam inaequalitatem coniugum, esse enim eos aetate dispares, et hinc plerumque matrimonia huius modi fore sterilia.

Resp. Grotius: sic et prohibenda fuisse matrimonia inter senem et iuenculam. Et sane si pater sit annorum 35. filia annorum 15. quis dixerit, sperari non posse liberos.

num. 5. Denique vt Diogenem et Chrysippum eo fortius stringat; obseruat, et bestias quasdam ab his commixtionibus abhorreere. Idque probat partim testimonio *ARNOBII lib. V. aduers. gent.* partim exemplo apud *ARISTOT. Hist. anim. lib. VIII. cap. 47.* et *OPPIAN. in Cyneg. lib. I.* qui referunt, equum Scythicum cum

cum matre committendum, refragatum, nec vmquam adduci eo potuisse, vt cum matre congredetur, nisi equa inuoluta pannis.

Haec sunt, quibus pudorem illum naturalem probat Grotius, quod eius argumentum tanti fecit LAMBERT. VELTHVYSEN in *Principiis iusti et decori*, vt non solum graduum prohibitionem, sed et totum ius naturae ex pudore naturali deriuandum putaret.

Sed paucis moneo: 1. pudorem esse adfectum indifferenter, et saepe pudere homines boni aequae, ac mali. E. g. bonum est, fateri peccata, et veniam eos rogare, quos offendi: sed pudet.

2. Pudor apud omnes non est idem. Pro ratione enim temperamenti alium facile, alium difficulter pudor occupat. Sic Romanos pudebat matrimonii cum propinquis; Persas non pudebat. Ergo inde nihil arguitur.

3. Historia illa de equo admissario lepida est, sed admodum dubia. Sane quod olim factum, cur non hodie fit? Non solent hodie equi tam religiosi et casti esse.

§. 13.

b) Haftenus de iure naturae: iam de iure positiuo vniuersali. *num. 1.* Quaeritur ergo, *an non saltem hoc prohibeat huius modi nuptias?*

Respondet Grotius, omnino prohibere, prouocans ad *Leu. XVIII. et XX.* Quumque nonnulli existiment, has leges esse mere forenses, adeoque non obstringere Christianos, contrarium triplici argumento demonstrat,

1. Quia sub finem istorum capitum dicat Moses; et Cananaeos ob haec delicta terra expulsos. Vnde argumentatur:

Quicumque delinquant, eos lex quaedam obligat.

Cananaei incestis nuptiis contractis deliquerunt.

Ergo eos obligauit lex.

2. Quia hae leges in N. T. repetuntur. Sic e. g. Paullus *1. Cor. V. 1.* incestum damnat inter priuignum et nouercam, et eas nuptias ipsis gentilibus abominabiles fatetur. Iam quum leges forenses in Nouo Testamento nullius auctoritatis sint: adparet sane, has leges non esse forenses, sed morales.

3. Quod et Hebraei eas leges naturales esse existiment, *num. 3:*

Heineccii Prael. Gros.

Cc

quia

quia et verecundia naturalis ab his nuptiis abhorreat, et facile alias conuictus inter has personas quotidianus occasionem dare posset stupris, nisi prohibita essent hae nuptiae.

Sed tertium hoc argumentum admodum dilutum est. Nam pudorem naturalem nihil probare, iam supra ostendimus. Alterum autem naturae humanae repugnat, de qua recte poeta: *Nititur in vetitum*. An minus periculi a stupro erit inter personas coniunctas, quod prohibitio accedat?

num. 4.

c) Iam noua nascitur quaestio, an *Leuit. XVIII. et XX gradus prohibeantur, an personae tantum?* Illud plerique putant, quos et nos sequimur: hoc e recentioribus Schilterus et alii quidam. Rationes nostrae sunt:

1. Quia vbi eadem ratio, ibi eadem est iuris dispositio. At ratio sita est in propinquitate carnis, quae eadem est in duabus personis eiusdem gradus. Ergo et hic valet prohibitio, etiamsi persona *Leuit. XVIII.* non expressa sit. Sic e. g. ibi v. 13. prohibetur matrimonium cum matertera, non cum auunculo: et tamen, quum eiusdem gradus sint, quis dubitet, quin matrimonium et inter hos non subsistat?



2. Quia haec natura omnium legum est, vt ob rationis latitudinem late interpretandae sint, quia non omnes casus exprimi queunt.

3. Quia hanc interpretationem suadet v. 6. vbi occurrit regula generalis, quam postea exempla sequuntur. Vbi vero regula occurrit cum exemplis, ibi liquido extensiuu interpretatio locum habet.

num. 5.

Redit Grotius ad Hebraeos, qui has leges *Leu. XVIII.* vniuersales putare n. 3. diximus. Iam addit Grotius, eisdem has leges arcescere ab ipso Adami tempore, vt tanto facilius reddi possit ratio, cur omnes homines obligent. Alias enim, inquit, non posset reddi ratio, cur Deus et gentiles puniuerit ob incestus nuptias.

Sed haec sola coniectura est Hebraeorum, nullo nixa fundamento certo et historico: vnde nec ei immorabimur.

num. 6.

Iam ad alias gentes, quas itidem huius modi nuptias damnassee obseruat. Hinc ex Mich. Ephesio, Diod. Siculo, Platone, Dione Prusacensi demonstrat, communem hanc fuisse omnium gen-

gen-

gentium sententiam, praeterquam Aegyptiorum, Persarum, et aliquot Barbarorum.

Quamvis autem huiusmodi inductio, vt saepe monui, non probet ius gentium, nec adeo certum sit, omnes gentes in eo conspisse, quam et de Cimone Atheniensi referat Cornelius Nepos eum sororem habuisse in matrimonio, idque licuisse facere legibus Atheniensium: hic tamen haec observatio alicuius momenti est. Nam quum et Romani, et aliae gentes eisdem fere gradus, quos *Leu. XVIII.* prohiberi intelligimus, prohibuerint, et tamen ratio sola nullam huius prohibitionis suggerat rationem: merito quaeras, vnde hanc notitiam sibi adquisuerint gentiles? Et recte *n. 7.* respondet Grotius, per veterem legis diuinae famam, vel per traditionem. Gens enim res huiusmodi a gentibus vicinis didicit. Ab Hebraeis Phoenicii, ab his Graeci, ab his Romani, et sic porro. Exemplo esse possunt res plures, e. g. quod omnes gentes numerent per decurias, quod omnes tempora metiantur per septimanas. Vid. GROT. in opusculo *de veritate relig. Christianae*, vbi et alia huius generis collegit.

§. 14.

d) Addit et alia monita Grotius, veluti, quod in vterioribus gradibus aliquando persona prohibetur, altera conceditur, quum sint eiusdem gradus. Sic e. g. prohibitum est ducere amatam. *v. 12.* At non prohibitum ducere fratris filiam. Nec rara inter Hebraeos fuere huius modi matrimonia. Quaeritur itaque, *quae ratio discriminis?*

Grotius sequitur Hebraeos, et hanc assignat causam, quod in fratris domos minus pateat aditus, quam ad aedes auorum et auarum: adeoque hic maius sit stupri periculum quam illic. Sed haec nihili sunt. In promptu est ratio solidior, nempe turbatio respectuum. Amata est loco matris, ergo non potest decore vxor esse eius, a quo filialem venerationem iure exigeret. At in nuptiis cum fratris filia non turbantur respectus, quia facilius haec marito praestabit obsequium, quam eum quodammodo patris loco venerari debeat.

Altera observatio est, leges de incestu inter adscendentes et descendentes, nec non de matrimonio fratrum et sororum sem-

per irrita reddere huius modi matrimonia : at reliquas leges plerumque poenam tantum irrogare. Id probat ex canonibus apostolicis, qui tantum deponi iubent clericum, alios poenitentiae ecclesiasticae subiiciunt, si incestum admisissent.

Sed hoc non ubique receptum. Plerumque enim omnia matrimonia *Leuit. XVIII.* prohibita irrita sunt. In reliquis locus est dispensationi principis.

num. 3-4.

Tertia observatio est, quod pleraeque gentes ultra gradus *Leuit. XVIII.* prohibitos et alios quosdam prohibuerint, tamquam sepimentum legis, ne ob vicinitatem violarentur leges *Leu. XVIII.* Sic. e. g. inter patruels Deus non prohibuit matrimonium, nec inter consobrinos : quia tamen proxime hoc matrimonium accedit ad nuptias fratrum et sororum, illud prohibitum reperimus *l. 3. C. Tb. de incest. nupt.*

Sed hac ratione abusi sunt pontifices Romani, qui initio ad septimum, deinde ad quartum gradum suae computationis prohibuerunt nuptias, tantum ut principes haberent obnoxios, et pro dispensatione extorquere possent pecuniam. Vid. THOMASII *not. ad Lancellot. Institut. iur. canon. tit. de nuptiis.*

§. 15.

num. 1.

Haftenus de vero coniugio : iam quaedam de concubinato adduntur. Hic ante omnia status controuersiae recte formandus. Non iam loquimur de muliere, quae marito alieno succumbit ; haec enim non concubina est, sed pellex : nec de ea, quae furtim cum caelibe rem habet ; hoc enim scortum est : sed de femina, quae sine sollemnitate nuptiali se viro iungit, ita ut inter hos sit coniunctio perpetua sobolis procreandae educandaeque causa inita. De hac coniunctione quaeritur, an iuri naturali repugnet ?

Id recte negatur. Nam 1. definitio matrimonii supra data etiam huic quadrat concubinato, atque inde sequitur, concubinatum esse verum matrimonium iuris naturae, quod in nuptiis nullam sollemnitatem exigit, quamvis non sit civile, adeoque, et effectibus civilibus destituatur. Hinc concubina non gaudet iure vxorum, non capit partem hereditatis, liberi ex ea procreati non sunt in patris potestate civili, non sunt heredes sui, quamvis iure naturae sint vere liberi, et hiic vocentur liberi naturales.

2. Ho-

2. Honestae esse possunt huius concubinae causae, e. g. ^{num. 1;} disparitas conditionis. Sic saepe magni principes amant honestam feminam, sed plebeiam, quumque eam vxorem habere nequeant, eam ducunt quasi vxorem, quem concubinatum vocari nouimus matrimonium ad morganaticam. Ita enim concubina loco vxoris adscita aliquando est, ne nouerca liberis induceretur. Id quod factum nouimus ab Antonino Phil. imp. vt est apud IUL. CA-
PITOLIN. eius vit. cap. vlt.

§. 16.

Denuo ad quaestionem delabitur Grotius, *an matrimonia contra* ^{num. 1. 2;} *has leges inita irrita sint semper?* Sed quia de hac quaestione ad §. 14. n. 2. actum est: iterum hic actum agere nolumus.

§. 17.

Egimus haftenus de personis, quae nostrae sunt per consensum. Consensus iste duplex est, vt Grotius supra §. 8. n. 1. docuit, vel consistit in confociatione vel in subiectione. Per confociationem fiunt nuptiae, de quibus haftenus, et *vnuerfitates*, de quibus in posterum.

Eae iterum duplices, vel *priuatae*, vel *publicae*. *Priuatae*, quae habent pro fine vtilitatem priuatam, e. g. societas mercatorum : *Publicae*, quae vtilitatem publicam. Et hae denuo vel *in populum* fiunt, vel *ex populo*. Si multi confociantur in populum, tunc ex hac confociatione nascitur *res publica*: sin multi ex populo confociantur, inde fit *vnuerfitas*, *collegium*, *corpus*, cet.

1. Quia omnes confociati constituunt vnā personam moralem, ea voluntatem suam exferit vel per paucos, vel per plures, vel per omnes. Primum esset iniquum, tertium impossibile; ergo reliquum manet secundum.

2. Quia alias numquam ad liquidum perueniretur. Nam qui in collegio sunt, sunt aequales. Aequalis aequali legem praescribere nequit. Ergo nec poterit vrgere, suum suffragium sapientius esse suffragio alterius. Ergo nec ponderari possunt suffragia, sed numerari, adeoque plura suffragia semper vincunt pauciora.

3. Res ipsa et experientia docet, infelicissimas esse vnuerfitates, vbi aliud obtinet. E. g. cur in Polonia nihil ad liquidum perducī potest? cur omnia comitia sine fructu dissuunt? Quia ibi vnus omnium suffragia rescindere potest.

§. 18.

Regula II. *Si par est suffragiorum numerus, nihil agitur.* Quum enim suffragantes sint aequales et eiusdem conditionis et potestatis in re publica, sequitur, ut vna pars alteram cogere non possit, ut sibi adfentiatur. Excipiuntur tamen casus

1. *Si calculus Minervae accedat*, id est, si pares fiant condemnantium et absolventium sententiae: tunc enim reus absolvitur. Vocatur *calculus Minervae*, si cui iudicum vel praesidi facultas datur, suffragium suum addendi vel condemnantibus vel absolventibus. Dicitur autem calculus Minervae, quia quum Clytemnestra maritum Agamemnonem occidisset, filiusque utriusque Orestes mortem patris ultus, matrem interemisisset: parricidii accusatus in areopago pluribus sententiis iudicum condemnatus est, quam absolutus. Minerua itaque calculum addidit absolventibus, ut suffragia fierent paria, quo facto absolutus est. Eo calculo nihil acquius est. Vid. IO. HENR. BOECLERII *Diff. elegantissima de calculo Minervae*, quae habetur in *Diff. acad. tom. I. pag. 200.*

2. Si paria suffragia sint, et alteruter possideat. Tunc enim in dubio melior est conditio possidentis, quia in eius persona duo iura concurrunt, alterum certum possessionis, alterum dubium tituli, quum alter solum titulum dubium, pro se alleget.

§. 19.

Reg. III. *Duae sententiae pari suffragiorum numero nixae, si sint eiusdem naturae, coniungendae sunt, ut id valeat, in quod utraque pars consensit.* Id evenit, 1. quoties in quantitate tantum differunt suffragantes, e. g. Titius ab vna parte condemnatur in decem, ab altera in 20. tunc decem ab eo exiguntur, quia in hos utraque pars consensit. 2. Quoties in modo rei non conveniunt, et uterque modus coniungi possit. E. g. vna pars censet, reum esse priuandum officio, altera eundem relegandum.

Vnde plane huic regulae non est locus, si sententiae diuersae sint naturae. E. g. vna pars Titium condemnauit in viginti, altera relegari iussit. Hic iniquum esset coniungere sententiam, quum

quum altera pars in alterius sententiam diuersae naturae non consenserit.

§. 20.

Reg. III. *Absentium nulla habetur ratio.* Videri hoc posset iniquum, quia et absens est membrum collegii, adeoque et scripto posset dare suffragium.

Sed facilis responsio. Sententiae dicuntur praeuia deliberatione et consultatione. Qui vero abest, is consultationi non interfuit, nec audiuit alterius partis rationes, adeoque nec sententiam dicere potest, sine praeiudicio praecipitantiae. Saepe domi quis ita adfectus est animo, ut pronus sit in sententiam, quam facile dimitteret, si alterius rationes audiuiisset. Exemplo esse potest Iulius Caesar, qui in causa Ligarii eo proposito audiebat Ciceronem, ut hominem condemnaret: sed audita ea oratione ita mente perturbatus, commotusque est, ut absolueret.

§. 21.

Reg. V. *Qui prior in collegio fuit, in ordine quoque prior est.* Sunt enim pares. Inter pares nihil potest praerogatiuum dare, quam aetas, uti videmus in fratribus, sociis, collegis.

Fallit tamen ea regula, si in collegio sint diuersi ordines, nam tunc ei tantum aetatis inter se habent rationem, qui sunt eiusdem ordinis. E.g. consilium aulicum imperatoris constat ex nobilibus et eruditis, nobiles numquam postponuntur eruditis, quum sint aetate posteriores, at inter nobiles ipsos aequae ac inter eruditos aetatis vel temporis habetur ratio.

§. 22.

Reg. VI. *Vbi non omnium eodem modo interest, ibi in suffragiis seruatur proportio non arithmetica, sed geometrica.*

Iustissimum enim est, ut proportio seruetur inter id, quod cuiusque interest, et numerum suffragiorum, ne ii, quorum parum interest, suffragiorum numero vincant reliquos.

Sic e. g. si tres sint heredes, vnus ex semisse, reliqui ex quadrante, iniquissimum esset, si vnus, qui ex maxima parte heredes, duorum reliquorum suffragiis stare cogeretur.

Et inde est, quod in re publica Belgii foederati non sunt pa-
ria

ria omnium prouinciarum suffragia, sed vti Hollandia plus reliquis contribuit, ita plura habet suffragia.

Attamen id non vbique obseruatur. Nam in Germania princeps minimus aequae virile suffragium habet, ac princeps potentissimus, idemque in Heluetia obseruatur, vbi res publica Bernensis, reliquis omnibus potentior, non plus pollet suffragio, quam reliquae.

§. 23.

Haftenus regulas de suffragiis dedimus. Pergit iam Grotius ad *potestatem ciuitatis in subditos, qui in ciuitate manent* §. 23. *in eos, qui ciuitate excedere volunt*, §. 24. *et in exsules*. §. 25.

De potestate ciuitatis in subditos recte docet, eam tamquam totum integrale in singulas partes ius maximum habere, adeoque de omnibus ciuium actionibus externis, leges condere posse. Recte addit, de actionibus externis. Internae enim non cadunt sub imperium ciuile, adeoque absurdum est leges praescribere velle intellectui, quid credere, quam religionem tenere debeat.

Potest equidem ciuitas religionis cuiusdam, statui suo incongruae, exercitium prohibere, (sed hoc externum est), potest etiam eos, qui certam religionem profitentur, terris suis excludere, nec eis concedere aditum: at cogere homines, vt hoc credant, quod ipsis videtur incredibile et impium, id plus quam tyrannicum est. Vtrumque demonstro. I. Omnes actiones externas ciuium ciuitati subiectas esse, ita probō:

Vbi consensus et consociatio est in vnā voluntatem, ibi omnes actiones ciuium externae ciuitati subiectae sunt.

In ciuitate est consociatio omnium in vnā voluntatem, Ergo, cct.

Minor clara est. Aequae absurdum enim esset, in ciuitate vnumquemque agere, quod sibi libeat, quam membrum aliquod corporis non subesse directioni mentis. Vnde et toties in libro Iudicum id repetitur, tamquam signum anarchiae: eo tempore non erat rex in Israel, vnusquisque agebat, quod rellum videbatur.

Minor patet ex ciuitatis origine et natura, de qua infra pluribus.

I I. Religionem vel fidem non subesse ciuitatis imperio ita probamus:

Quid-

Quidquid cogi nequit, id nec legibus subest.

Intellectus, ad quem nō credere pertinet, non potest cogi.

Ergo intellectus, adquem cet. legibus non subest.

Minor clara. Intellectus est potentia necessaria; non possum ipse intellectum cogere, ut credat circulum habere angulos, bis tria esse centum, cet.

§. 24.

Altera quaestio est, *an civibus de ciuitate abscedere liceat, sine venia?*

Hic primo obseruat, in quibusdam ciuitatibus id non licere, num. 1. veluti in Russia. Immo et in Germania, et Polonia loca quaedam sunt, vbi id non licet. Sed res facilis est. Distinguendum inter subditos, qui simul serui sunt, et subditos liberos. Serui sunt subditi 1. in imperiis despoticis vel herilibus, quale est Russicum, Turcicum, Persicum, cet. 2. in imperiis, vbi soli nobiles ingenui, plebei seruilis conditionis, vti in Polonia, vel 3. vbi rustici saltim sunt seruitutis iugo adstricti, vt in Westphalia, ducatu Meklenburgico, Holsatico, in Lusatia. Hi ergo omnes, quum sint glebae adscripti, possunt cogi, vt in ciuitate maneant, et si fugam capessant, vindicari a dominis, Vid. HERTIVS in *Diss. de homin. propr. tom. II. Opuscul.*

Vbi autem ciues sunt liberi, ibi alia obtinet distinctio. Aut num. 2. §. enim gregatim abscedere conantur, aut vnus vel alter. Priore casu id potest impediri, posteriore non item. I. Ratio prioris membri est, quia quum semel ciues consenserint in id, quod salus, rei publicae exigat, consensisse etiam intelliguntur, se non discessuros, vbi periclitetur ea discessione res publica. Et hinc quum ex municipiis Italicis tam multi Romam migrarent, vt vrbes pene inanes relinquerentur, lege Mucia Claudia cautum est, vt omnes cogerentur in patriam redire. II. Ratio posterioris membri est, quia ex vnus vel alterius discessu nihil detrimenti caput res publica, adeoque nemo cogendus in ciuitate manere, cuius membrum esse nolit. Sed tamen res ipsa docet, id non licere;

1. Si quis ad hostes velit deficere, quia haec proditiōis species.
2. Si aeris alieni vel delicti causa abscedere, quia haec fuga esset.

Heineccii Prael. Grot.

D d

3. Si

3. Si periculum eius personam exigit. Hinc miles in obfidione vel imminente praelio frustra missionem flagitat.

§. 25.

Tertio quaeritur, *an et in exsules ciuitati, unde profecti, ius sit?* Negat Grotius. Nam exsilium est amissio ciuitatis. Si ergo ciues esse desierunt, nec vlla in eos potestas est ciuitati.

Sed tamen et exsules comiter venerari patriam tenentur, nec ad hostes deficere. Notum est illactabile et triste fatum baronis de Paikul, crurifragio puniti a rege Sueciae Carolo XII. qui ex Liuania exsul, ad Russos et regem Poloniae se contulerat, et bellum fouerat aduersus Suecos. Supplicium durum et iusto feruierius est: nec tamen sine noxa fuisse existimandus Paikul.

§. 26.

Diximus supra, consensu in potestatem nostram redigi personas vel per confociationem, vel per subiectionem. Ex confociatione oriuntur matrimonia, vniuersitates, ciuitates, collegia, de quibus haftenus: per subiectionem fiunt *liberi adoptiui*, §. 26. *serui*, §. 27-30. *populi deuicili*. §. 31.

Arrogationis fundamentum est libera subiectio. Homo enim sui iuris quum se possit addicere in seruitutem: quidni etiam in potestatem patriam, multo mitiorem et vtiliorem?

Sed de adoptione paullo subtilior quaestio est, an pater possit filium suum alii dare in adoptionem? Videtur enim patrium ius esse personalissimum, quod non magis alii cedi potest, quam ius in uxorem. Et hinc Grotius diserte negat, naturam hoc finere, et hinc tantum concedit, vt pater filium alendum det alii.

Sed resp. patria potestas iuris naturalis, vt supra docuimus, nihil aliud est, quam ius dirigendi actiones liberorum ob educationem. Quum ergo alius saepe ipsis parentibus aptior sit ad dirigendas filii actiones: quidni huic ius patrium cedi posset? Si pater per aliquot annos paedagogo ius suum recte cedit, quidni et alii in perpetuum, si id filio vtile fore intelligat?

§. 27.

num. 1.

Altera subiectionis species, eaque ignobilissima, est in seruitute.

uitute. Quamuis enim Romano iure liber homo non sit in commercio, adeoque nemo se possit in seruitutem mancipare: ius naturae tamen id non impedit. Cuilibet enim licet iuri in sui fauorem introducto renunciare, adeoque et libertati.

Vnde et legem hanc Romanam apud alias gentes non valuisse, obseruat ipse Grotius.

Possset videri, seruitus iuri naturae repugnare. Sed id merito negatur. Seruitus enim 1. in se nihil aliud est, quam obligatio ad perpetuas operas. Si non iniustum est obligari ad annuas operas, quidni et ad perpetuas?

2. Ipsa quorundam natura ad seruitutem aptissima et tota comparata est, ita vt nec actiones suas dirigere, nec victum et amictum sibi lucrari possint. Vnde Aristoteles, quamuis parum accurate, quosdam natura seruos esse dixit. Hi homines si alieno beneficio et arbitrio viuunt, quid hoc iniqui est?

3. Ipse Deus seruitutem probauit, tum in V. T. inter Israelitas, tum in N. T. per Paullum 1. Cor. VII. 20. 21. 22.

§. 28.

An autem ius naturae dominis etiam ius vitae et necis in seruos concedit? Negat Grotius, additque rationem, quia nemo possit hominem occidere, nisi capital commiserit.

Sed facile patet, Grotium hic mutasse statum quaestionis; quem primus recte formauit THOMAS. in *Fundament. iur. nat. et gent.* Nimirum ius vitae et necis non est promiscua occidendi licentia, sed ius coërcendi delinquentes etiam supplicio capitali. Quum enim principi competat ius vitae et necis in subditos: quis tamen dixerit, eum posse promiscue saeuire in vitam ciuium? Esset haec iniuria et tyrannis, non ius vitae et necis. Si ergo delinquentes coërcere non iniustum est: ergo in se nec iniustum est, si id ius conceditur dominis in seruos.

Sed tamen quum id non sit iuris naturae praeceptum, sed permissum, omnino ciuitas id ius dominis recte adimit, 1. quia facile degenerare potest in tyrannidem, quia 2. aliquando delicta manerent impunita, ne domini seruorum iacturam facerent.

§. 29.

Progreditur auctor ad nobilem quaestionem, vtrum paren-

De 2

tem

tem sequatur partus feruilis? Legibus ciuilibus fere certum est, partum sequi ventrem, adeoque ex duorum dominorum seruo et ancilla prodatum ad dominum ancillae pertinere. Sed iure naturae communem esse partum arbitratur Grotius, quia vterque parens sit causa partus.

Ego neutrius puto iure naturae esse, sed liberum; nullus enim hic titulus est, cur dominus eum, qui liber natus est, sibi vindicet: homo autem semper liber nascitur.

nam m. 2.

Sed obicit Grotius, vernam seruum merito fieri in compensationem alimentorum, quae a parentibus accipere nequeat. Sed resp. 1. seruum et peculium habere posse, unde vernam alat; 2. alimenta puero. serui filio, data non esse tanti, vt in comparationem venire possint seruitutis perpetuae.

§. 30.

Obseruat Grotius, esse quosdam seruitutis gradus, quos paulo adcuratius describemus. Nam

1. Est seruitus mercenaria, omnium mitissima, quia et mercedem accipit seruus, et non nisi operas conuentas debet.

2. Est statu-libertas, seu libertas sub conditione vel ex die concessa, quia libertatem sperant.

3. Est eorum, qui se addicunt vltro, nam hi vendi non possunt iure naturae qui personam domini elegisse videntur.

4. Est eorum, qui venditione adquisiti, nam hi in commercio sunt.

5. Est captiuorum, nam hi ob animum hostilem et fugae periculum durius haberi possunt.

§. 31.

Tertio et victae gentes se subiiciunt per deditionem. Est autem *deditio* vel *perfecta*, Germanis vocata *auf Gnade und Ungnade*, quando dedititii sibi nullas condiciones stipulantur, alia *imperfecta*, quae fit sub certis conditionibus.

Priore casu quamcumque conditionem iis imponere potest victor, modo non in eos saeuat. Mortis enim euitandae causa sese dederunt: et dum ens recipit victor, non potest illos occidere, quia in hanc conditionem consensit.

Posteriore casu adcurare implendae sunt condiciones. Ex pacto enim et hosti obligamur, qui hic non vt hostis, sed vt homo consideratur. Vnde iuri naturae et gentium aduersantur, qui dedititios sub conditione receptos durius habent,

§. 32.

§. 32.

III. Ultima causa, ex qua ius in personam nascitur, est delictum. Sed quamvis facile largiamur

1. Ex legibus civilibus delicti causa aliquos servos fieri, vt iure Romano incensos, feminas serui amore bacchantes, liberos ingratos, qui se pretii participandi causa venundari passi; cet. nec negemus

2. leges has iustas esse posse, quia quum iure naturae delicta morte puniri possint, nihil obstat, quo minus et seruitute puniantur. Tamen

3. nego iure naturae ob delictum quemquam fieri servum eius, quem delicto laesit, quia delictum vt actus transiens etiam poenam transeuntem requirit, non seruitutem, quae est conditio perpetua. Iuri naturae huius modi seruitus non repugnat, sed tamen non est iuris naturae, quae saepe auctores confundunt.

CAPVT VI.

DE ADQUISITIONE DERIVATIVA FACTO
HOMINIS, VBI DE ALIENATIONE IMPERII,
ET RERVM IMPERII.

§. 1.

Supra diximus, acquisitionem vel originariam esse; vel derivatiuam. Originaria adquirimus, quae antea in nullius dominio vel potestate fuerunt, et quidem vel quoad rei substantiam per occupationem, vel quoad eiusdem incrementa per accessionem. Deriuatiua autem adquisitio pertinet ad rem, quae iam in alterius dominio est, et ad nos transfertur per traditionem, aliosque modos, de quibus paullo post. Haecenus ergo actum de modis originariis, iam de derivatiuis agendum.

Adquisitio derivatiua denuo duplex est, et vel *facto hominis* fit, vel *facto legis*. Facto hominis 1. *per traditionem*, de qua §. 1-§. 13. 2. *per testamenti factionem*, de qua §. 14. De acquisitione, quae fit facto legis, agetur capite sequente.

D d 3

Possit

Posse aliquem per traditionem dominium rei suae in alium transferre, expediti iuris est. Nam 1. id fluit ex definitione domini, quae et ius de re disponendi comprehendit. Atqui non potest quis dicere, se de re sua libere disponere, nisi habeat ius alienandi, dominiumque suum transferendi in alium.

2. Id ius etiam inde potest demonstrari, quia unicuique licet rem suam derelinquere. Si id potest ita fieri, ut res cedat cuius occupanti: quidni possem et in alterius fauorem dominio meo renunciare?

Sed tamen, ut translatio domini subsistat, quaedam et in dante requiruntur, et in accipiente.

In dante requiritur actus externus, ex quo colligi possit; eum, alterum dominum esse velle. Cogitationis enim nulla certa notitia est.

sup. 2.

Ex quo facile deciditur quaestio, *an traditio praecise requiratur?* Iure civili res certa est: neque enim potest hoc iure ius in re nasci ex solo contractu, sed ex subsequente traditione: Sed de iure naturae id negandum videtur. Recte. Nam 1. quid opus est traditione, ubi de voluntate tradendi constat? sane qui vult antecedens, vult et consequens. 2. Quid iniquius est, quam me iure meo excidere ob intermissum actum, qui non est in mea potestate, sed in potestate alterius, quocum contraxi? E. g. emi a typographo librum, solui pretium, sed librum non tradidit, pollicitus se eum mihi cras traditurum: accepto pretio librum Maeuio vendit et tradit. Non possum iure civili vindicare librum tamquam meum, quia mihi nondum traditus est; quum tamen traditio non a me, sed ab illo fieri debuerit. Sic ob intermissum actum, qui in potestate non mea, sed alterius erat, dominio rei pecunia mea emtae priuor. Quid iure naturae iniquius?

Hinc recte dixeris, haec esse ex iure civili, quod et plura alia, e. g. iudicalem resignationem, effestucationem, in Geldria receptam, seruileque ritus inuexit, ne homines dicerent, se non animo deliberato transfuisse dominium. Haec de requisito ex parte dantis.

§. 2.

Ex parte accipientis itidem requiritur voluntas signo quodam declarata, quia 1. translatio domini est actus *διωριστος* vel bilateralis, 2. quia beneficium nemini obtruditur, et 3. quia *in cer-*

incertum alias esset , an placeat conditio , sub qua tradenda res, eiusque transferendum dominium.

Acceptat autem aliquis vel *expresse* per declarationem subsequentem , e. g. dono tibi librum , ego accepto : vel *tacite* , per rogationem antecedentem , e. g. dona quaeso mihi hunc librum : dono. Hic etsi alter non iterum acceptet , acceptallie tamen videtur , dum rogauit , in antecessum.

Sed de tacita obseruandum , eam sufficere , si idem datur , quod rogatum , non , si minus vel plus. E. g. vende mihi , quaeso , hos quatuor equos : vendo tibi vnum : vel , vende mihi duos : vendo quatuor.

§. 3.

Iam haec suo more ad negotia publica transfert Grotius ; et quaerit , an et imperium alienari possit , siue totum , §. 3. siue per partes. §. 4-13.

De toto regno iam supra lib. I. c. 3. §. 12. vidimus , illud vel *patrimoniale* esse , vel *usu fructuarium*. Si patrimoniale est , est in dominio summi imperantis , adeoque ab eo potest alienari. Sin vsufructuarium , tunc nec potest a rege alienari , quia non est in proprietate et dominio regis ; nec a populo , quia regi iam est ius , quod ei inuito auferri nequit.

Potest ergo ab vtroque simul , quia sic nullius interest , cui ius sit alienationem impediendi. Sed de hoc supra iam actum.

§. 4.

Iam de partibus summi imperii quaeritur , an et illae alienari queant ? Et respondet Grotius , id fieri non posse nisi ipsa illa pars consentiat. Ratio est , quia 1. qui se ciuitati vel regno adfociarunt , censentur formam rei publicae et modum imperandi elegisse , ergo ex pacto non possunt reiici , et iis aliud obtrudi imperium. 2. Potest et fieri deterior partis alienandae conditio , dum imperii minus potentis pars sit. Et hinc merito id illa inuita fieri non potest. Hinc quum rex Franciae ; Ioannes , Philippo , filio iuniori , Burgundiae ducatum et comitatum daret , id non prius fieri potuit , quam consentirent Burgundiae ordines. CONF. SERRAN. *Hist. Franc.* in *Carolo sap. et Francisco I.* Ita et notum , quum Albertus , landgrauius Thuringiae , totam provinciam Thuringicam venderet Adolpho Nassouio .

foiio, imperatori Romano, non solum filios, sed et ipsos ordines Thuringiae se opposuisse, et armis quoque se defendisse.

§. 5.

Quum vero officia imperantium et subditorum tum inuicem, tum inter se sint reciproca: sequitur, vt nec pars quaedam imperii reliqua parte inuita se separare possit. Nihil aequius, quum id fluat ex ipsa regula fundamentali iuris naturae: *Quod tibi non vis fieri, alteri ne feceris*. Quam iniquum esset, si res publica Belgica vnā ex prouinciis foederatis inuitam et innocentem foedere excluderet: tam iniquum foret, si vna reliquis inuitis discedere vellet.

Excipitur tamen et hic necessitas, quae non habet legem: e. g. si pars quaedam ciuitatis bello oppressa a ciuitate liberari nequeat, potest sibi consulere.

§. 6.

Hic obiectionem remouet Grotius:

Si necessitate urgente pars potest se separare a toto imperio, totum imperium autem necessitate quidem urgente partem recte alienat, sequitur, vt parti in totum plus liceat, quam toti in partem.

At posterius est absurdum.

Ergo et prius.

Sed respondet Grotius admodum subtiliter et scholastice, 1. partem esse in toto imperio, tamquam in subiecto adaequato indiuisibiliter, vt anima sit in corpore, 2. partem vt iure, quod ante societatem habuerit, non item corpus.

Sed haec nihili. Tu dixeris, haec fluere ex pacto. 1. Qui se imperio aggregant, ii sibi stipulantur defensionem a toto, non autem cuiquam permittunt facultatem se alienandi. Ergo totum imperium non potest alienare partem inuitam, 2. Imperium, quod partem recipit in communionem rei publicae, promittit defensionem, ergo ea non praestita, vel quando praestare eandem nequit, cessat partis obligatio, et hinc sibi consulere potest.

§. 7.

Aliud autem est pars imperii, aliud locus vel regio quaedam in imperio. Pars constat ex regione, et hominibus illam incolen-

incolentibus, et imperio subiectis; locus vel regio et hominibus vacare potest. Illam inuitam ciuitas alienare nequit, haec libere alienatur.

Ex quo colligit auctor, partem territorii desertam a ciuitate vel populo libero recte alienari, et quidem vel a rege et populo simul in regnis vsufructuariis, vel a rege solo in patrimonialibus.

Ratio satis clara. Vbi nemo est, qui contradicere possit, ibi aliquid iure fit. Hic autem territorii pars vacua hominibus nec potest contradicere, nec conqueri, sibi factam iniuriam, adeoque iure illud alienatur a populo.

Populo autem ius est contradicendi, si ex possessione huius modi terrae rei publicae periculum immineat, e. g. si montana regio vendatur, et emtor eam castellis et praefidiis muniat.

§. 8.

Quum itaque partem imperii alienare nefas sit sine eius consensu : quaeritur, *annon exceptionem admittat haec regula?*

Sunt quidam ex Ictis in margine allegati, qui duplicem comminiscuntur exceptionem, 1. vbi necessitas totius corporis id exigit, 2. vbi suadet utilitas insignis.

Sed recte Grotius utramque exceptionem reiicit. Nam

1. qd necessitatem se pars illa corpori adgregauit. Ergo absurdum esset, si urgente huius modi necessitate alienaretur; et contra naturam pacti reiiceretur a corpore.

2. Ob utilitatem nihil contra pactum fieri a ciuitate potest cum detrimento tertii : ergo nec ob utilitatem alienari potest pars imperii, nisi ea alienatio vtrique utilis, et pars illa consentiat. Absurdum enim esset, vnum paciscentem pactum violare posse sub praetextu utilitatis.

§. 9.

Quum ergo alienatio partis imperii prohibita sit : quaeritur, *an alienatio et infeudationem ac oppignorationem comprehendat, adeoque et illae prohibitaee sint?*

Regulae de ea re paullo adcuratius formandae. Regnum vel patrimoniale est, vel vsufructuarium.

1. In patrimonialibus imperaus, quum alienare possit pro
Heineccii Prael. Grot. E e lubi-

lubitu, potest et infeudare et oppignorare, nec quisquam id iure impedit.

II. In usufructuariis quum omnis alienatio prohibita, prohibita etiam infeudatio et oppignoratio, nisi consensu populi, vel eorum, qui populum repraesentant, statuum. Sic e. g. princeps ecclesiasticus adhibere tenetur consensum capituli; rex vel princeps pares curiae, vt in iure feudali vocantur.

Porro sciendum, feuda vel de nouo constitui, vel antiqua renouari, vel aperta nouo vasallo concedi. III. Primo casu valent regulae paullo ante expositae. IIII. Secundo casu non opus est populi consensu; immo iniuriam facit dominus vasallo, si inuestituram deneget, quia ex contractu tenetur. V. Tertio casu et usufructuario conceditur infeudatio in rebus infeudari solitis. I. Feud. 6. II. Feud. 35. fin.

Sed quaeritur, cur in infeudatione et oppignoratione idem iuris sit, quod in alienatione, quum tamen in infeudatione dominium directum, in oppignoratione plenum dominium reineatur? Resp. 1. quia dominium directum omni vtilitate priuat dominum. Omnes enim fructus capit vasallus, adeoque multum vtilitatis subtrahitur ciuitati vel rei publicae. 2. Quia in oppignoratione non solum possessio naturalis amittitur, sed et ea recuperari nequit, nisi re veluti iterum emta.

§. 10.

Vidimus haftenus, quatenus prohibita sit alienatio partis imperii: succedunt iam aliquot limitationes et ampliaciones, vti a ICtis vocantur.

I. Limitanda est regula in casu functionum ciuiliu, quas ex mente Grotii populus in perpetuum iure hereditario concedere potest, non item princeps usufructuarius, siue electione, siue lege ad successionem vocatus, quia temporarii regni effectus non nisi temporarius esse possit.

Sed hoc falsum, et periculo non caret istud principium, effectum temporarii regni non posse esse perpetuum. Quid fiet ergo paci et foederi ab huius modi rege inito?

Tu dic: omnes principes et rectores ciuitatum possunt officia et munera ciuitatum in perpetuum et iure hereditario concedere, si id mori ciuitatis ferat: non vbi contraria consuetudo est. Nam

1. Res

1. Res non est tanti, vt ideo comitia statim indicentur totius populi.

2. Quod semel consuetudine inoleuit, in id populus consensit tacite. Quid enim interest, suffragio populus voluntatem suam declaret, an rebus ipsis et factis? l. 32. §. 1. D. de legib.

3. Vbi consuetudo huius modi non obtinet, ibi princeps sequi tenetur officiorum naturam, quae in se non perpetua sunt, sed cum persona expirant.

§. II.

II. Ampliatio pertinet ad bona principum domanialia. Principes possident bona triplicia. Alia enim pertinent ad patrimonium, (*Chatoull-Güter*) alia ad fiscum, (*Domainen*), alia ad aerarium.

Ad patrimonium pertinet, quidquid princeps possidet non tamquam princeps, sed tamquam priuatus, e. g. quod habuit ante principatum, tamquam priuatus, quod sua pecunia emit, tamquam priuatus. Sic e. g. principes Frisiae orientalis patrimonium habent *Efens* et *Grietsiel*, quia id possederunt iure alodii, antequam ad principatum peruenissent.

Ad fiscum vel domanium pertinet, quidquid ad sustentandam principis aulam destinatum, vnde etiam in episcopalibus vocantur *Tafel-Güter*, eoque non solum pertinent iura quaedam pinguiora, e. g. venationis, metalli fodinarum, mulctandi, cet. verum etiam praefecturae quaedam et praedia, *Cammer-Güter*, *Fürstliche Ambachten*, cet.

Ad aerarium pertinent, quaecumque sustentandis reipublicae oneribus inferuiunt, vt tributa, vestigalia, cet. Quod discrimen et modos acquirendi egregie exposuerunt *KLOCKIUS*, *THOMASIVS*, et *CONRINGIVS*.

In patrimonio princeps est dominus, in fisco usufructuarius, in aerario nudus administrator.

An ergo haec bona alienare potest? Patrimonium potest, domanialia, et quae ad aerarium pertinent, non potest, quia hic nullum dominium habet, quod possit in alium transferre.

Immo ne populus quidem alienare potest domania, quia principi est ius in illis quacūtum: quum tamen possit populus

E c 2 de

de aerario disponere, in quo tanto plus iuris habet populus quanto minus princeps habet.

Et hinc ius illud nascitur reuocandi domania, nulla obstante praescriptione, quod saepe familias grauiter adfligit.

§. 12.

Monet iam Grotius, non confundenda esse patrimonialia cum iis, quae in fructu sint. Nam e. g. metalli fodinae sunt in fructu, quia sunt domanium, et hinc a principe alienari nequeunt; at pecunia, quae inde reddit, est in dominio et patrimonio principis, et potest hic de ea pro libitu disponere. Quod exemplum clarius rem illustrat, quam quae adduxit Grotius.

§. 13.

Redit auctor ad oppignorationem, et quum antea docuerit, eam fieri non posse a principe sine consensu populi: iam limitationem addit, nisi princeps plenum habeat et absolutum imperium.

Nimirum in huius modi principatibus et regnis aliquando contingit, ut tributa ob necessitatem publicam non possint tam celeriter colligi. Hinc princeps pecuniam mutuam sumit, et aliqua bona publica vel domanialia oppignorat: quae postea populus luere tenetur. *An id fieri potest?* Omnino. Nam proinde est, siue subditi tributa inferant in aerarium, siue iis luant bona oppignorata.

§. 14.

num. 1. Reliqua est posterior pars capitis de testamentis. Nam et hic factio hominis dominium ab vno ad alterum transfertur. Hic quaeritur,

1. *Quid sit testamentum?* Est alienatio rei conditionalis et reuocabilis, retenta interim possessione et plenissimo fruendi iure. Ita Grotius, sed falso. Definitio enim meras continet contradictiones. Alienatio est translatio domini. At testamentum non transfert dominium, quamdiu testator viuit. Immo se inuicem tollunt alienatio et reuocabilitas, alienatio et nullius iuris in heredem translatio. Falsum quoque est, testatorem sibi retinere tantum possessionem et ius fruendi. Retinet enim ipsum dominium

aium plenissimum, quia non possidet nomine heredis, sed suo, et habet praeterea ius vindicandi rem ab vnoquoque, etiam ab ipso herede. Quis autem dixerit, possessorem vindicare rem posse?

Hinc rectius dixeris, testamentum esse ultimam voluntatem de eo, quod quis post mortem suam fieri velit. Iure civili haec definitio non sufficeret. Sufficit tamen, si abstrahas a iure civili.

2. *An iuris naturae sine testamenta?* adfirmat Grotius, quia licet vnicuique alienare sub conditione, reuocabiliter. Sed hunc eius conceptum iam destruximus. Nam 1. testamentum demum valet, quum iam velle amplius nequit testator. Id tam inconcinnum est, ut voluntas nostra incipiat, postquam velle desimus, id est, postquam non volumus. 2. Nullum potest reperiri fundamentum obligationis, cur mortui voluntati parere teneamur. Quod adeo verum est, ut LEIBNITIVS in noua methodo iuris prudentiae hic recurrendum putet ad immortalitatem animae; quasi vero animae damnatae obligemur, aut quasi beata curet, quid hic geratur. 3. Absurdum est, leges de successione ab intestato tolli voluntate priuati, maxime quum 4. pleraque testamenta ex inuidia, odio, et aliis vitiis oriuntur.

Ergo iure naturae tunc valida videntur testamenta, si quis viuis transfert dominium rerum suarum vel possessionem. Sed tunc testamentum non erit irreuocabile.

3. *An et exteri testentur?* Recte Grotius huius modi prohibitionem ex iure civili esse ait. Sed tamen non sequitur, si iure civili exteri non possunt testari, id posse eos facere iure naturae; quia iam ostendimus, non absolute testamentificationem esse iuris naturae.

Ergo hypothetice respondendum erit. Posito enim, testamentificationem esse iuris naturae, et quatenus est iuri naturae consentanea, eatenus nulla est iure naturae inter ciues et peregrinos differentia, et testamentificatio his aequae, ac illis, concedenda.

CAPVT VII

DE ADQUISITIONE DERIVATIVA, QVAE
FIT PER LEGEM, VBI DE SVCCESIONE
AB INTESTATO.

§. 1.

Adquiritur aliquid vel facto hominis; vel facto legis. Lex vel naturae et gentium est, vel ciuilis.

Iam de lege ciuili non agitur, 1. quia modi fere infiniti sunt variarum gentium legibus variis introducti; 2. quia et modi quidam acquirendi ciuiles iniusti sint, veluti bona naufragorum colligendi ius, quod multae gentes sibi vindicant.

Hoc ius defenditur alioquin his argumentis:

1. Quod mare sit sub imperio populi, ergo et bona naufragorum tamquam accessorium maris facta. Resp. eodem modo colliges: metalli fodinae sunt principis: ergo si annulus incidit in hanc cauernam, ille fit principis; si annulus meus incidit in fontem Titii, fit Titii. Quali pro accessorio sit habendum, quod nec natura, nec industria hominis rei accedit.

2. Res pro derelictis habitae sunt nullius: cedunt ergo occupanti. Resp. si nullius sunt, quidni cedunt omnibus, sed fisco? Cur ipsi domino rem suam occupanti eripiuntur a fisco? Et quis umquam audiuit, rem pro derelicta haberi, quam velim inter res meas habere?

3. Aequum est, has res pro defensione maris cedere fisco. Resp. immo iniquum est, a miseris exigere praemium vel mercedem, et non potius ab illis, quibus defensio profuit.

§. 2.

cap. 1. Porro lege naturali et gentium dupliciter adquirimus, vel *expletione iuris*, vel *successione ab intestato*.

Expletio iuris est ius accipiendi et sibi vindicandi aliquid alienum, pro eo, quod sibi debetur. Id non vno modo fieri solet, veluti

1. Priuata

1. Priuata auctoritate, a) per retentionis ius, e. g. Titius mihi debet 100. commodauit mihi libros magni pretii, ego hos libros nego me redditurum, donec satis tegerit. Et hoc modo defendunt exemplum Israëlitarum, vasa aurea et argentea Aegyptiorum pro mercede operarum debita retinentium. Vide locum *TERTULL. lib. II. aduers. Marcion. cap. 10. in nota allegatum.* b) Per pignoris capionem. Sic e. g. moribus obtinet tantum non vbique, vt si hominem vel quadrupedem damnum dantem in meo deprehendam, tunc pignus capere possim, idque iudici offerre, tamdiu retinendum, quoad mihi fuerit satis factum.

2. Publica auctoritate, a) per arrestum, si debitoris mei res iussu iudicis retineantur, donec mihi fuerit satis factum. b) Per repressalias, si gens nobis vel nostris subditis satis factionem denegat, et nos subditorum alienorum rebus et bonis tam diu manus iniicimus, donec fuerit satis factum.

Sed quaeritur, *an licita sit huius modi iuris expletio?* Resp. *num. 2* affirm. sed certis casibus.

1. Si aliter rem recuperare non facile possim. E. g. si debitor in fuga sit, vel in prouincia remotiore habitet, quis enim tunc vitio vertat, si iure retentionis vel arresti utamur?

2. Si alias incerta foret probatio. E. g. si boues agrum meum depascentes deprehendo, eosque abigo, et deinde conqueror, vicini boues mihi damnum dedisse: (negabit hic, boues suos fuisse. Quis ergo vitio mihi vertet, si pignus ceperim?)

3. Si plane a iudicibus nullum auxilium sperandum, e. g. si exteri iudices nobis denegent iustitiam: tunc enim locum habent repressaliae, de quibus infra.

Ratio vna omnium horum iurium, quia quemadmodum mihi ius priuatae defensionis reuiuiscit, vbi iudicis non est copia: ita eodem modo et ius priuatae satis factionis, si a iudice nihil spei.

§. 3.

Alter modus acquirendi ex facto legis est **SUCCESSIO AB INTESTATO**, eaque vel *priuatorum*, §. 3-11. vel *imperantium*, §. 12. *ad fin.*

Primo quaeritur, *quodnam sit successionis ab intestato fundamentum?*

Si

Si omnes leges ciuitatum variarum inter se comparamus, in successione ab intestato duplicem earum finem deprehendimus. Alii enim populi ad familias, earumque conseruationem, respuerunt, vti veteres Romani: vnde non succedebant emancipati, non cognati, sed soli liberi sui, et his deficientibus, agnati; quia ex lege Voconia ne filiae quidem et agnae admittentantur. Ita et apud Israëlitas filiis tota hereditas cedebat, filiabus sola dos debebatur. Vid. BYNKERSHOEK *Obferuat. lib. II. cap. 1.* SELDEN. *de success. Ebr. lib. 1. cap. 1.*

Alii populi successionem ab intestato referebant ad voluntatem defuncti praesumptam. Vnusquisque enim praesumitur res suas ei relinquere velle, quem habuit carissimum. Aut enim res voluit nullius esse, aut fisci vel aerarii, aut iis obtingere, quos duce natura maximi fecit. Atqui primum absurdum, sic enim cederent occupanti, adeoque nemo per vitam sciret, annon inimico, annon stulto acquirat. Secundum absurdum; sic enim fiscus postremo solus omnia occuparet. Ergo praesumptio est, relicta illa bona voluisse defunctum illis, quos habuerit carissimos. Et hoc fundamentum videtur iuris naturalis et gentium.

Si ergo potro quaeras, quos habere videamur carissimos: experientia docet, amorem descendere, si non habeat, quo descendat, tunc ascendere, si nec ascendere possit, ad latus diuergere. Ergo successio 1. est *descendentium*, 2. his deficientibus *ascendentium*, ac denique 3. nec his superstitibus *collateralium*.

§. 4.

num. 1. Prima ergo et praecipua est successio *liberorum* vel *descendentium*. Huius successionis fundamentum Grotius constituit in obligatione ad alendos liberos: sed perperam. Nam colligi non potest: parentes liberis debent alimenta: ergo et bonorum partem debent. Ita enim succederent tantum parentibus liberi infantes, impuberes, et minores, non adulti, et maiores, nec hi tantumdem sibi capere possent, quam illi. Immo agnati sic plane non succederent. Accedit, quod potius in contrarium argumentari liceat, parentes iam alimentorum onere premuntur, ergo non imponendum illis nouum onus liberis relinquendi bona. Ergo potius verum fundamentum est, quod paragrapho antecedente exposuimus; nempe, quod amor descendit.

dit. Elegans ea de re est locus ARISTOTEL. *Ethic. lib. VIII. cap. 12. magis adicitur causa gignens erga genium, quam genium erga gignentem. Nam quod ex aliquo ortum est, id ei quasi proprium est. Post hos autem magnum momentum situm in eodem sanguine et eadem radice.*

Sed rem tamen expendemus. Quaerit Grotius, *an parentes alimenta debeant liberis?* Negant alii, alii adfirmant. Grotius utrosque conciliare conatur distinguendo inter obligationem perfectam, vel iustitiam expletricem, et imperfectam, seu attri- butricem. Non priore, sed posteriore parentes obstringi ad alimenta praebenda putat.

Verum videtur omnino obligatio perfecta esse. Idque pro- bo 1. a fine Dei, qui dum liberos imbecilles, et sui ipsius in- curiosos creavit, voluit eos ab aliis ali : dumque parentibus tam tenerum eorum amorem inseruit, praecise voluit, ut a pa- rentibus alerentur. Quod vero voluit Deus, id pro lege na- turae est, adeoque alendi obligatio, ex lege est, et proinde perfecta.

2. Ex effectu. Ita enim argumentor :

Si obligatio ad alendum tantum imperfecta esset, nemo posset pu- niri, si ea infanti denegaret, eumque perire fame pateretur.

At puniri potest.

Est ergo alimentorum obligatio perfecta.

Idem Grotius illustrat instinctu illo naturali brutorum : nul- lum enim est animal, quod pullos non alat eoque saltem, do- nec ipsi sibi offulas quaerere possint. Quamvis itaque bruta id non faciant ex lege vel obligatione interna, sed ex naturali instinctu : certe tamen inde licet argumentari.

Si ex hoc instinctu naturali patet, Deum velle, ut bruta alant pullos : multo magis ex amore hominibus insuo sequi- tur, ut parentes alant liberos.

Quaerit porro, quid de liberis ex damnato coitu natis sen- tiendum ? an ei illi alendi ?

Ali illos vetat IUSTINIANVS *Nov. XXXV VIII. cap. 15.* Quod absurdum plerisque videtur. Nam quum penes illos nulla culpa sit, sed penes parentes : quo iure poena illis irrogabi- tur, et tam dura quidem, ut fame pereant ?

Sed quidquid sit de verbis Iustiniani durissimis : sane eius sententia tam dura non fuit. Voluit enim, ut alimenta acci-

Heineccii Prael. Grof.

F f

perent

perent non civilia, secundum parentum conditionem, sed naturalia et necessaria, quae sufficiant vitae conservandae. Alii aliter.

Nobis sufficit, quod ex iure naturae certissimum sit, hos quoque liberos alendos. Haec enim obligatio est ex conditione liberorum sibi alendis non sufficiente. Quum ipsi se alere nequeant, ab aliis secundum intentionem Dei alendi. Sed a quo? In liberis iustis et legitimis hoc ipsum ostendit instinctus parentum naturalis: idemque adest erga liberos illegitimos. Si vero in parentibus supprimatur, aut in odium mutetur, id inde est, quod parentes ex damnato huius modi coitu metuant poenam. Sufficit ergo, parentes esse liberorum huius modi causam. Gignens vero causa semper erga genitum adscitur, vii paullo ante ex egregio loco Aristotelis vidimus.

num. 4. Denique et liberos vltiorum graduum alendos, recte obferuat Grotius. Dum vero id Iustiniani testimonio probat ex *l. vlt. C. de bon. quae lib.* quippe qui hoc propter ipsam naturam fieri oportere ait, rem non sitis demonstravit. Nostrum fundamentum est solidius. Amor descendit, et, quo magis descendit, eo flagrantior esse solet. Vnde magis plerumque nepotes amant aui, quam liberos parentes. Ergo ex hoc ipso instinctu naturali recte colligas, eos, si parentes praemortui sint, ad alendos illos adstrictos esse.

§. 5.

num. 1. Iam de parentibus. De iis concedit Grotius, quod sint alendi, sed non putat tantam esse obligationem, quam superiorem, additque rationem, quia liberi in hoc mundi theatrum prodeuntes nihil secum adferant, parentes iam aliquid lucrari potuerint.

Nos ita dicimus. Obligationem aequae perfectam esse liberorum, alendi parentes, quam parentum alendi liberos. Quum enim illa solo instinctu naturali nitatur, huic accedit et alia causa, nempe gratitudo; liberi enim simile beneficium a parentibus acceperunt. Immo ex regula iusti concludi potest. Liberi inopes et rerum omnium indigi noluerunt negligi a parentibus: ergo nec hi negligendi a liberis. Quod tibi non vis fieri, alteri ne feceris.

Sed in eo est differentia, quod quum obligatio parentum sit ordinaria

ordinaria et absoluta, quia liberi alimentis semper indigent, liberi obligentur extra ordinem et hypothetice, si scilicet parentes sint inopes.

Hinc iam quaerit Grotius, *an et parentes ab intestato succedant*? Negat Grotius, et magnam dicit differentiam inter parentum liberorumque successionem. num. 2.

Hos ait succedere ipso iure naturae, adeo, ut apostolus ex ipsa ratione arguat: *si estis liberi, eritis etiam heredes*, et PAULUS in *1. 7. D. de bon. damnat.* id ex lege et ratione naturali deriuat, quod succedant liberi.

Sed dupliciter hic videtur peccare Grotius, 1. quod principium suum deserit. Liberi succedunt parentibus, quia ab his alendi. Parentes non succedunt, quum tamen alendi. Ergo aut principium Grotianum falsum erit, aut conclusio, aut utrumque.

II. Quod negat, parentes succedere liberis naturali iure. Quum enim totius successionis fundamentum, ut supra dictum, sit amor praesumptus, liberis vero non exstantibus, neminem magis amare praesumamus, quam parentes: hos quoque liberis deficientibus succedere aequum est. Verba Pauli apostoli interpretanda de ordine naturae, secundum quem parentes liberis non deberent esse superfluites.

§. 6.

Vidimus hactenus succedere liberos; et, his deficientibus; parentes. Liberi sunt vel *primi*, vel *ulteriorum graduum*. Quaeritur itaque, *an et hi succedunt*?

Resp. distinguendum, an nepotum parentes adhuc superfluites sint, nec ne. Si superfluites sunt: ipsi nepotes per regulas rectae rationis non admittentur, quia ipsi iam per parentes heredes sunt. Si parentes praemortui, merito admittuntur, quia tunc aequae amantur ab aui, ac ipsi liberi. Immo aui liberorum suorum veluti imaginem in nepotibus intuentur, et sic eodem loco sunt apud auos, quo parentes eorum adhuc viui fuerunt.

Ex quo simul recte colligas, nepotes tantumdem accipere ex hereditate auita, quantum accepturi fuissent parentes eorum, si vixissent. Vnde omnes leges agnoscunt nepotes non succedere in capita, sed in stirpes iure repraesentationis.

§. 7.

Sed hae regulæ : sequuntur exceptiones. Prima est, *si parenter vel abdicent, vel exheredent liberos.* *Abdicatio* erat, quando quis liberos male feriatos ex conspectu suo abire, et suo nomine non appellari iubebat. *Exhereditatio*, quando liberi quidem in potestate manent, sed sollemniter testamento exheredes fiunt. Illa Graecis, haec Romanis notior.

Facta hac abdicatione vel exheredatione expirat ius succedendi. Nam succedunt liberi ex praesumpta voluntate parentum, quia hi illos maxime diligere praesumuntur. Atqui praesumptio semper cedit veritati, quæ tunc adest, si declarant parentes, se liberos nec amore, nec successione dignos iudicare.

Ex quo tamen simul patet, 1. nec abdicationem, nec exheredationem valere tacitam, quia parentes iniuriarum obliuisci potuerunt. 2. Eandem factam esse debere ex iusta causa, ob ingratitudinem, quod et Iustinianus merito iussit observari, quum olim liberi pro lubitu, et saepe sine ratione in gratiam novæ exheredes scriberentur.

§. 8.

num. 1. Altera exceptio est, *si liberi sint incertæ originis.* Nam tunc denique cessat praesumptio voluntatis parentum, quippe qui ignorantur.

Equidem de matre raro nasci potest dubitatio : sed de patre tanto frequentius nascitur. Elegans est locus Menandri a Grotio eam in rem adductus.

Sed quia saepe pater aequè nescit, se parentem non esse ; ac, se esse : immo saepe patres zelotypiae oestro perciti vxoris pudicitiam sine ratione in dubium vocant : hinc leges civiles plerumque non testimonium patris sequuntur, sed praesumptiones virgines. Hinc regulæ : *pater est, quem iustæ nuptiæ demonstrant.* Qui concubitus falsus est cum muliere, is tenetur infantem alere, cet.

In *Historia ducis d'Offuna*, Hispani ingeniosi et acuti, legimus, ad eum, quum regno Neapolitano pro-rege praeesset ; venisse patrem, et rogasse, ut sibi liceret liberos ex vxore natos abdicare, quia dubitet, se patrem esse. Vxor pudica et honesta

nesta vocata ad pro-regem; adseuerabat, liberos esse patris; quia quotidie eodem secum lectulo vtatur, nec vmquam potuerit vel in suspicionem se adducere. Pater haec omnia fatebatur, sed negabat tamen, se certum esse, quia liberi non referant faciem suam, vxorem quoque esse formosam, et hinc periculo insidiarum expositam. Pro-rex quum videret, hominem zelotypia insanire: quaerebat ex eo, an acquieturus sit, si ei demonstraret, quod liberi non alterius sint, quam eius. Adfirmante hoc patre, pergebat: an tu fateris, liberos tuos esse vxoris? Fateor, inquit. Iam tibi vxori praecipio, vt liberos huic sollempniter dones. Faciam, inquit haec. Ergo iam certissime, inquit pro-rex, tui sunt. Lepida et iocosa decisio, sed quo offendere voluit pro-rex, non posse circa hanc quaestionem omnia ad viuum refecari, sed standum esse praesumptionibus.

Tertia exceptio est in liberis naturalibus, per quos non intelliguntur spurii, quorum parens incertus, nec ex damnato coitu nati, veluti adulterini, incestuosi, sed ex concubina editi. num. 2.

Hi et ipso iure ciuili succedunt matri: patri non item, nisi ex iure nouissimo in sextante vna cum matre, si adhuc exstat.

Sed quum supra demonstratum sit, inter nuptias et concubinatum iure naturae nihil esse differentiae, facile patet, nec hanc prohibitionem ex iure naturae, sed ex iure ciuili esse. Iure naturae naturales aequae succedunt, ac legitimi, quia nuptiae nihil conferunt ad instinctum illum et amorem a natura impressum.

Quarta exceptio est ex pacto, si ineatur concubinus vel matrimonium ad morganaticam, ea lege, vt liberi non succedant, sed certa bonorum portione contenti sint. Tales coniunctiones frequentissimae apud Romanos, Ebraeos, Germanos, Brabantos, de quorum iure deuolutionis supra dictum.

Quaeritur autem, an huius modi pacta non repugnent iuri naturae quum liberis auferant ius successionis? Resp. neg. Nam fundamentum succedendi non aliud est, quam praesumpta parentum voluntas, petita ex amore liberorum insigni. Praesumptio autem cedit veritati, id est, voluntati expressae, pactis declaratae. Quia tamen abusus harum coniunctionum non leuis esse potest: hinc iure ciuili saltem priuatis plerisque locis interduntur.

§. 9.

mem. 1. Post liberos et parentes, vel his potius non exstantibus; vocantur proximi collaterales.

Quum autem hi duorum generum sint, *agnati*, a patre, et *cognati* a matre coniuncti: quaeritur, *qui praeferantur?*

Notum est, veteres Romanos agnatos solos admisisse: sero praetorem cognatos vocasse ex edicto, *vnde cognati*. Novum ius inter agnatos et cognatos nihil statuit discriminis, sed ad solam proximitatem gradus respicit. Denique aliae gentes respiciunt ad originem bonorum, et in paternis praeferunt agnatos; in noviter adquisitis utrosque simul admittunt.

Iam si quaeras, quodnam ius rationi, id est, iuri naturae quam maxime sit consentaneum? Grotio postrema sententia placet.

Id probat, 1. ex praesumpta defuncti voluntate, qui censetur voluisse, ut bona eo redeant, vnde venerint.

mem. 2. 2. Ex lege gratitudinis. Ea nihil aequius. Quum itaque defunctus beneficium acceperit a maioribus vel paternis, vel maternis: sequitur, ut obligatus sit ad gratitudinem, adeoque bona paterna illorum; materna horum posteris relinquere teneatur. Defunctis enim gratia referri non potest, nisi in eorum liberis.

3. 4.

Id quod porro illustrat Grotius exemplo iuris Romani, quod olim fratres consanguineos in paternis, vterinos in maternis bonis praetulit, et deinde concludit, si non essent eorum posterii, a quibus bona ad nos pervenirent, tunc proximitatem gradus spectandam.

Haec est doctrina Grotii, sed non extra omnem dubitationis aleam posita, et hinc nec ab omnibus admissa, plerique enim naturalissimam putant successionem, quae ad solam gradus proximitatem respicit. Idque probant, 1. ex praesumpta voluntate defuncti, quae non alio nititur fundamento, quam proximitate gradus, quae in cognatis ac agnatis eadem est. 2. Quia haec dispositio fere locum habeat in immobilibus: in pecunia enim, aliisque mobilibus saepe admodum dubium est, vnde ea pervenerint, quum tamen hic de successione omnium bonorum quaestio sit.

Ad argumenta Grotii facile respondetur. 1. Non praesumitur defun-

defunctus voluisse, ut quos aequè amet, si inaequaliter succedant. 2. Gratitude debemus defunctorum posteris, sed non praecise, ut succedant: a genere ad speciem gratitudinis non valet consequentia. Ita unius cuiusque benefactoris liberi praetendere possent successionem in bonis clientis.

§. 10.

Iam de bonis nouiter quaesitis, quae communia agnatorum num. 1. 2. cognatorumque esse fatetur Grotius. Recte, nam 1. fundamentum successionis est, ut bona habeat, quem defunctus habuisse censetur carissimum, is vero proximus est gradu.

2. Successio veluti tacitum testamentum est. Vti enim in expresse testamento quos amamus, et maxime honoramus: ita et tacite heredes instituire videmur, qui nobis sunt carissimi.

Possit obijci, saepe hanc praesumptionem fallacem esse: nam quum fratrum quoque gratia rara sit, multo rarior cognatorum esse solet. Sed resp. praesumptioni tamdiu locus est, donec aliud probetur. Amor est internus, nec potest, nisi signis externis, declarari: quod quum non fecerit defunctus, standum est praesumptioni.

§. 11.

Quaerit porro auctor; *quum hic ordo successionis sit iuris naturalis, cur tam saepe legibus civilibus mutetur?* num. 1.

Resp. quia hae leges 1. sunt iuris naturalis permissui, non praeceptiui, huius modi autem leges possunt attemperari statui rei publicae, possunt mutari pactis et moribus. Hinc

1. Iure civili ius repraesentationis valet in fratrum fororumue liberis, iure Saxonico non valet.

2. Iure civili fratres germani praeferruntur unilaterales: aliis iuribus non praeferruntur.

3. Iure civili non distinguitur aetas et sexus: aliis iuribus, veluti Hebraeo, praeferruntur primogeniti postgenitis, filii filiabus.

In his determinandis multa permittuntur legislatoribus.

Iam vero ad alteram capitis partem progreditur Grotius: num. 2. et, uti semper solet prius ius naturae proponere, idque deinde ad applicare quaestionibus illustribus: ita et hic transit ad ius pu-

publicum vniuersale, et quaerit, *an in successione in principatus et regna singulare quid obtineat?*

Recte obseruat, distinguendum esse, an singulares eam in rem essent leges fundamentales, pacta familiae, mores et consuetudines, an nihil horum existet. Priore casu valere regulam: *omnes imperantes in regno probare successionem, quam subditis ipsi praescripserunt.* Sed addendum erat: *quatenus naturae regni non repugnat;* nam regni naturae, vti paulo post videbimus, repugnat, vt diuidatur inter plures eiusdem gradus; quum nihil impediatur, quominus priuatorum hereditates diuidi possint. Dicendum ergo de hac successione in regnis paulo accuratius.

§. 12.

Regna vel patrimonialia sunt, vel usufructuaria. In patrimonialibus regnum veluti priuati patrimonium consideratur, adeoque imperanti de illo. licebit pro lubitu disponere, non requisiti populi consensu.

Ratio ex ipsa natura dominii accessenda. Dominii enim ea vis est, vt possit dominus de re sua disponere. Hinc sequitur;

1. Vt diuidi possit etiam in partes minimas. Quum reges Hispaniae Mauris sensim expulsis regnum sibi patrimoniale constituissent, non dubitarunt illud diuidere pro lubitu. Sic saepe vno tempore florebant reges Portugalliae, Algarbiae, Legionis, Castiliae, Arragoniae, Nauarrae, et hi iterum aliquando regna diuidebant in partes minimas.

2. Vt feminae et excludi possint, et admitti ab imperante. E. g. in Russia adsunt filiae principis, nulli filii. Si voluerit imperator, filiae excluduntur, et admittitur nepos: si voluerit, etiam hic excludet filias.

3. Vt et adoptiui succedant. Hinc primi Romanorum imperatores imperium armis quaesitum considerabant tamquam patrimonium, et ideo etiam adoptiui vocabantur. Immo certum est, imperatores de nouo electos dici solitos Caesares, Flauios, Antoninos, tantum vt per adoptionem transisse in has regnatrices familias viderentur.

4. Vt et nothi admittantur. Luculentum est exemplum Alphonsi, regis Arragoniae, qui Neapolin, tamquam regnum armis Arragonum quaesitum Ferdinando notho concessit.

5. Vt et extraneus, a primo acquirente sanguinem haud tra-

trahens, voluntate imperantis succedat. E. g. in Russia iam ante aliquot annos iurarunt subditi, se quemcumque imperator successorem dicturus sit, eum sine contradictione recepturos.

§. 13.

Quid autem, si imperans de regno non disposuerit? Tunc eam successoris rationem probasse videtur, quam regni natura fert.
Hinc

1. Regnum non diuiditur. Praesumitur enim rex statum rei publicae etiam in subditis probasse, quem probauit in se ipso: maxime quum diuisio illa et reges impotentes reddat, et ipsi regno periculosa videatur.

2. Masculi excludunt feminas eiusdem gradus, immo et propiores, si per legem fundamentalem feminae imperare nequeant. Quum enim ad regnandum requiratur constantia, et animi magnitudo, quae raro cadit in feminas: sequitur, vt eae non admittantur, nisi in subsidium, et si leges fundamentales permittant. Hinc quamuis Russia sit regnum patrimoniale, feminae tamen non succedunt, quoad masculi adsunt: et in Turcico imperio feminae plane excluduntur, quamuis regnum prorsus sit patrimoniale.

3. Ius primogeniturae valet. Quum tamen regnum diuidi nequeat per *thes.* 1. nec feminae admittantur, quoad masculi adsint, per *thes.* 2. et tamen omnes filii sint ratione originis eiusdem conditionis: sequitur, vt inter eos differentiam facere debeat aetas, adeoque primogenitus masculus reliquos excludat.

Attamen postgenitis assignanda est pecuniae summa, vel praedia danda sunt, vnde commode possint viuere, quemadmodum et filiabus dos debetur. Haec bona vel pars terrae si ita dentur, vt possessor simul regalia, sed sub principe regnante exerceat, vocatur *paragium*. Sin ex praediis tantum redditus capiat, nulla autem iura maiestatis exerceat, vocatur *appanagium*, a pane, quem inde habent. Sic duces Burgundiae olim erant in ducatu et comitatu Burgundiae *paragiati*; at fratres electoris Hannoverani sunt *appanagiati*. Vid. SCHILTERI et THOMASII *Differentiones de differentia paragiorum et appanagiorum*.

Ex quo simul patet, iniustissimum esse Turcarum et aliarum

Heineccii Prael. Gros.

G g

gen-

gentium orientalium institutum, dum post genitos vel trucidant, vel oculis priuant, vel perpetuo carceri mancipant, ne turbas dent in re publica. Necessitate se excusant, sed frustra, quum regnorum Europaeorum facies ostendat, posse et sine his artibus tyrannicis postgenitos in officio contineri.

§. 14.

Hactenus de regnis patrimonialibus. *Quid de usufructuariis? an et ibi imperans potest de regnis disponere?* Negatur, quia disponit solus dominus, qualis non est rex usufructuarius. Hinc recte ab Austriaca domo impugnatum est testamentum regis Hispaniae, Caroli II. quia regnum Hispanicum a linea Austriaca non fuit bello quaesitum, sed matrimonio. Vid. BUDDEI *Selecta iuris naturae et gentium, ubi num. 8. dissertatio de testamentis summorum imperantium, speciatim Caroli II. Hispaniae regis*. Cui opposuit quaedam VLR. OBRECHTVS, Ictus Argentinoratenfis, in *Excerptis historico-iuridicis*: sed quibus *Dysquisitione vltiore de iure gentis Austriacae in regnum Hispaniae* ita satis fecit Buddeus, vt causam perorarit.

Potest tamen fieri, vt populus huius modi regi facultatem de regno disponendi vltro permittat: et tunc recte et iure disponit. Recentissima hanc in rem sunt bina exempla reginarum, alterum Elisabethae, reginae Angliae, quam saepe rogauerat parlamentum, vt successorem sibi nominaret: alterum Christianae, reginae Sueciae, cui eandem facultatem fecerant Sueciae ordines. Illa ex causis politicis ea potestate vti noluit, ne turbae darentur, se viua; haec autem vsa est, et nominato sibi successore Carolo Gustavo, comite Palatino, in Italiam secessit. Vid. PVFENDORFF. *Histor. Sueciae*.

Quid vero si nihil huiusmodi factum? Tunc observanda regula: successio desertur ex praesumpta populi voluntate. Quumque populus eam eligere censeatur succedendi rationem, quae sit utilissima rei publicae: sequuntur inde aliquot regulae, quas hac et sequentibus paragraphis explicat Grotius.

Regula I. *Regnum esto indiuiduum.* Nihil enim et regibus et populo diuisione regni molestius. Regibus, quia plerumque de finibus oriuntur controuersiae, ceu exempla filiorum Constantini M. et Ludouici Pii docent. Populo, quia sic regni potentia

tia imminuta, singulae partes facilius opprimuntur, ceu apparet exemplo veterum Anglo-Saxonum, a Danis et Normannis oppressorum.

§. 15.

Regula II. *Succesſio ſtat inter eos, qui deſcendunt a primo adquirente.* Praefumitur enim 1. populus eam familiam regnatricem elegiſſe, non aliam. 2. Agnati a primo adquirente non deſcendentes nec iure hereditario poſſunt ſuccedere, nec titulo ſingulari. Non titulo ſingulari, quia non eliguntur a populo: nec vniuerſali, quia a maioribus in eos nihil iuris tranſmiſſum. Ergo plane non ſuccedunt.

Hinc quamvis magnae Britanniae rex hodiernus ſit ex domo Brunſuiceniſ et Luneburgeniſ: tamen exſtincta eius poſteritate regnum non deuolueretur in agnatos Guelphibitanos, quamvis et ipſi ſint duces Brunſuiceniſes, quia non deſcendunt a Sophia electrice, matre regis hodierni, tamquam primo adquirente.

§. 16.

Reg. III. *Non ſuccedunt extra legitimum matrimonium nati.* 1. Nam nothos origo contemptos reddit, cet. 2. Non ſatis certae originis ſunt, quum concubinis et pellicibus parum fidei et honeſtatis ineſſe ſoleat. Hinc tempore Iacobi II. Stuarti capitis damnatus dux Monmuthanus, quod regnum adſeſtaſſet, quum eſſet filius nothus Caroli II.

Solent huius modi nothi vel patris titulum gentilitium retinere, vel nouo indui, ita tamen, vt priore caſu dignitate diſferant. Sic nothus Caroli V. dictus Ioannes de Auſtria, non archidux Auſtriae. Antonius ſpurus Burgundiae ducis, Philippi Boni, dictus eſt Antonius baſtardus de Burgundia, non dux Burgundiae. Hodie nothus regis Poloniae dicitur *Comte de Saxe*. At in Gallia plerumque nouo ducatu vel comitatu honorantur, e. g. *Duc du Maine*, *Comte de Thoulouſe*. At ſucceſſionis incapaces ſunt proſus.

§. 17.

Regula IIII. *Maſculi praeferuntur feminis.* Ea regula non tantum valet in regnis, vbi feminae per leges fundamentales

G g 2

plane

plare excluduntur, verum etiam ubi admittuntur. Exstante enim masculino eiusdem gradus, femina non admittitur. Sic in Britannia non admittitur Maria et Elisabetha, filiae Henrici VIII. quamvis essent natu maiores, quamdiu viveret Eduardus filius, quantumvis impubes.

Ratio est, quia et 1. constantia maior esse solet in masculis, et 2. fortitudo peritiaque gerendi belli maior, et 3. minus etiam periculum, ne per matrimonium regnum ad externos deoluatur.

§. 18.

num. 1.

Reg. V. *Natu maximus vel maxima antefertur postgenitis.* Rationes sunt, 1. quia rei publicae utilitas exigit, ne regnum diuidatur, 2. quia inter pares nulla potest esse, nisi aetatis, praerogativa.

Est autem *ius primogeniturae* triplex, aut enim inuictum 1. lege publica, quemadmodum in Germania inter Electores saeculares Aurea Bulla; aut 2. ex iure naturae, ob praesumptam populi voluntatem, uti in regnis plerisque; aut 3. patris familiae, uti inter principes quosdam Germaniae. Et haec locum habent, si antea ius contrarium inualuerat. Tunc vero nihil fieri potest, sine omnium, qui familiae pars sunt, consensu, quia illis iam ius quaesitum est.

Ceterum facile adparet, non esse ius primogeniturae iuris naturalis absoluti, (nam sic iniusta esset electio et diuisio,) sed permissui, et suae fortis, ut ita dicamus. Vnde nec peccauit populus Francorum, qui Ludouico Pio diuisionem regni inter tres filios concessit. Conf. BYDD. *Diff. de successionib. primogenitor.* in *Select. iur. nat. et gent.* num. 3. pag. 149. sqq.

num. 2.

Quaeritur autem, an et ius *repraesentationis* locum habeat circa ius primogeniturae? Saepe enim contingit, ut extincto ante patrem filio primogenito, et nepotes exstent ex illo, et eiusdem fratres. *Quinam praeferuntur?* Resp. nepos primogenitus ex filio primogenito excludit filium secundo genitum, iure repraesentationis. Ratio est, quia ius primogenito semel quaesitum, ad omnes eius posteros transit iure hereditario, nec fratribus prius ius aliquod reuiuiscit, quam extincta linea primogeniti.

Idem obtinet, quamvis primogenitus iuri suo renunciaret. Nam posteris hoc nihil praedudicat: quia renunciatio haec fit in fauorem fratris, non in fauorem posterorum eius. *Friderici I.*

electo-

electoris Brandenburgici filius, Ioannes, suafu patris renunciabat iuri suo, idque transferebat in fratrem. Si Ioannes reliquisset posteros, nihil ipsis obstitisset, quo minus ius suum repetere possent.

§. 19.

Quærit porro auctor *an regnum sit pars hereditatis*? Idque adfirmat, sed addit, esse separatum quid a reliqua hereditate, quemadmodum distincta in feudis sit hereditas feudi et allodii.

Rationes etiam indicat, cur populi liberi regna voluerint esse hereditaria, 1. quia interfuerit imperii, ut imperantibus ex ipso sanguine auctoritas accederet. Facile enim contemnuntur homines, noui regno admoti, veluti Michaël Wisnowiezki rex Poloniae. Et inde est, quod veteres reges originem ad deos referrent.

2. Ut eo commodior esset educatio. Facilius enim artes regnatrices addiscunt inter sceptrum et purpuram educati, quam quia a stua ad imprium trahuntur.

3. Ut regnum eo carius haberent, quod suum esse scirent. Non enim abs re obseruauit BARCLAY in *Icone animorum*, raro reges electis magnam curam gerere rei publicae, et opibus corradendis magis intentos esse solere, quam populi saluti.

Sed quamuis haec vera esse possint, (aliquando enim res aliter se habet, nec temere dixit Ol. Cromwellus, principum liberos nescire imperare): falsum tamen est, regnum hereditarium esse partem hereditatis. Loquitur enim Grotius de regnis usufructuariis. Quis autem dixerit, usufructuarium esse heredem rei usufructuariae, si vel maxime testamento cautum esset, ut usufructus ad filium transiret?

Quare paullo incautius Grotius confudit ius succedendi in regno, et ipsum regnum. Quemadmodum ius vtendi fruendi potest ad heredem deuolui, si velit testator, sed non ipsa res, ex qua usus fructus percipitur: ita et ius succedendi potest esse hereditarium, (vnde et filii primogeniti vocantur *Cron-Prinzen*, *Erb-Prinzen*, *Land-Prinzen*;) sed non ipsum regnum usufructuarium.

§. 20. 21.

Ponit porro Grotius casum, *si diuersa sit successio in feudis*

et alio die, et regnum antea successionem probatis, quae in alio die servatur, an postea mutetur successio, si regnum fiat feudale? Et recte respondet Grotius, id negandum esse. Regnum enim fit feudale, non ratione successionis, sed ratione nexus clientelae, et servitiorum quorundam domino praestandorum.

Sic e. g. Neapolitanum regnum olim erat patrimoniale, et sic omnes succedere poterant, quos succedere vellet rex. Postea papa eo rem redegit, ut feudale fieret, et reges Neapolitani sibi fidelitatem et servitia quaedam, nempe quotannis equum album cum marsupio aureis repleto, iurarent. Et tamen circa successionem nihil mutatum. Regnum enim illud etiam ad feminas devoluitur.

Vnde aliud obtinet circa regna, quae semper fuere feudalia, quale Bohemicum. Ibi enim successio feudalis obtinet, masculique soli succedunt: nisi alii mores feudales in locis illis inuenerint. Quamvis enim ius feudale Langobardicum sit commune, non valet tamen, nisi in subsidium, quemadmodum ut ius Romanum non valet, si leges provinciales et statuta aliter rem definiuerint.

§. 22.

quod. I. 2. Sequitur alia divisio moribus recepta, quae vocatur *linealis*, eaque denuo diuiditur in *cognaticam*, seu Castilianam, *agnaticam* seu Francicam, et *mixtam*, seu Narbonensem.


Cognatica his regulis constat, 1. ut primum vocentur liberi ultimi possessoris primi gradus, tam viui quam mortui, eatenus, ut succedant nepotes iure representationis.

2. Ut inter plures primogenitus praefertur postgenitus, masculus feminae.

3. Ut liberis deficientibus succedat proxima linea: ita tamen, ut masculina linea femininae praefertur.

4. Ut non e linea transitus fiat in aliam lineam. Exemplum dabit schema sequens:

Philip:



Hic mortuo Philippo IIII. non poterant succedere Galli, quia secundum regulam secundam masculus praefertur feminae. Mortuo Carolo II, succedere debuisset Delphinus Galliae, nisi mater et avia renuocassent vna cum patre et avo. Ergo succedere debuissent Leopoldi filius- natu maior Iosephus, eoque renunciente, Carolus; imp. hodiernus. Ea linea extincta successio debebatur Sabaudis: his extinctis Parmensibus, nisi omnia turbasset Caroli II. testamentum.

§. 23.

Sucessio linealis *agnatica*, vel Francica est, qua seminae omnes, ex iisque nati in perpetuum excluduntur.

Eius ratio haec est, quod alias verendum esset, ne per matrimonia regnum ad externos deuolueretur, sicuti factum in Hispania, Britannia, Suecia.


Hic quoque, quamdiu adsunt aliqui ex priore linea masculi, non succedent alii ex sequente linea. Sic e. g. in Gallia quamdiu Ludouici XIII. posteritas adest, tamdiu non succedere possunt duces Aurelianenses. His superstibus numquam vocabuntur Bourbonii, Condaei, Conti, et sic porro.

In his regnis principes sanguinis regii, quibus vlla spes successionis est, vti solent titulis imperantis, nisi officia personalia complectantur. Sic omnes principes sanguinis regii in Gallia dicuntur *principes Franciae*, omnes principes appanagiati Austriae, *archiduces Austriae*, et sic porro.

Denique successio linealis Narbonensis est, vbi successioni seminarum locus est, sed non, nisi omnibus masculis extinctis. In cognatica quidem seminis praeferebantur masculi eiusdem lineae, in Narbonensi autem masculi omnes etiam diversarum linearum praeseruntur. Talis est successio in principatibus Austriacis, Brunfuicensibus.

§. 24.

Hi sunt modi praecipui. Nec tamen dubium est, quin et alii inuehi possint pro arbitrio gentium, quia, vt saepe monui, haec omnia sunt iuris naturae non absoluti, sed veluti suaforii, permissui, cet. Sic alicubi pares gradu ordine succedunt; et excludunt remotiores, vt adeo veluti aetatis tantum habeatur ratio, e. g.



Hic

Hic ex nominibus adparet, quo ordine succedi solent. Talem successionem olim in Russia fere obtinuisse, genealogiae docent.

Alibi senior familiae indistincte vocatur. Aliquando et alternatio placet, quae vocari solet *die Muschirung*, vt fratres indiuisim imperent, sed singuli per vices dirigent. Aliquando forti locus est, vt is, cui fors fauet, principatum obtineat, et uxorem ducat, reliqui appanagiati et caelibes maneant, nisi vbi principis coniugium sit sterile. Tale pactum auus regis Britanniae hodierni, Georgius, cum fratribus iniit.

§. 25.

Sequuntur adhuc quaestiones quaedam, quae ad successionem pertinent, veluti 1. *an filius a patre possit exheredari?* Resp. de regnis patrimonialibus, quia in dominio imperantium sunt, res dubio caret: At de usufructuariis id negandum. Vnde nemo dubitauit, quin Russiae imperator exheredem facere potuerit filium vnicum, si ponas, causam exheredationis iustam fuisse. At si alij reges id vellent conari: filius nihilominus succederet iure optimo, nisi simul populi lege fuerit exclusus.

Ratio est, quia in regnis usufructuariis liberi non succedunt beneficio patris, sed prouisione ipsius legis, quae eos ad imperium vocat. Hinc supra diximus, regna huius modi non esse hereditaria, quamuis ius succedendi sit hereditarium, id est, ordine successionis ab intestato deferatur.

§. 26.

Quaeritur II. *an regnum possit abdicari?* Id facile expeditur:

1. In regnis patrimonialibus quisque est regni dominus. Dominus autem potest iuri suo renunciare, eaque renunciatio et liberis nocet, quia hi non, nisi beneficio patris, succedunt, tamquam heredes. Quod vero quis non habet, id ad heredes transmitti non potest.

2. In usufructuariis distinguendum, vtrum iam liberi existant, an post abdicationem et renunciationem nascantur. Priori casu liberis non consentientibus non praeiudicat renunciatio patris. Posteriori casu omnino nocet, quia iis ius nullum adhuc quaesitum erat eo tempore, quo pater renunciabat.

Hincicii Prael. Grat.

H h

Hinc

Hinc illustris decidenda controuersia. Diximus, extincto Carolo II. rege Hispaniae succedere debuisse Delphinum, nisi mater renunciaasset. At obieiebant Galli, matrem quidem pro se renunciare potuisse, sed non pro liberis. Recte respondebant Austriaci, verum id esse, si iam liberi exstissent, quibus ius quaesitum fuerit: sed eam vna cum rege Ludouico XIII. iurato renunciaasse, antequam nuptiae fierent.

§. 27.

num. 1. Quaeritur III. si controuersiae de successione nascantur, quem penes sit decisio?

Decisio duplex est: aut enim datur per modum iuris dictionis, aut per modum arbitrii.

Per modum iuris dictionis nec rex, nec populus decidere potest has controuersias, quia semper, qui ius dicit, illud dicit subditis, non paribus. Vnde et vetus prouerbium: *de successione regum iudicat Deus et gladius.*

num. 2.

Per modum tamen arbitrii omnino ea causa pie permittitur vel regi, vel populo: quia nato bello euitari nequit regni et humani generis clades. Quamquam, si verum fateri velimus, ea opera plerumque frustranea sit, quum corruales plerumque ad gladios ruant, nec vel rex, vel populus exsequutionis gaudeat iure. Exemplum est in Lusitanica historia. Obtruncato in Africa Sebastiano rege, Henricus cardinalis, senex regnum administrabat, qui quum prouideret, se mortuo rem ad arma venturam, corruales inuitabat, vt coram se iure disceptare mallerent. Litigatum diu inter Hispanum, Antonium Lusitanum, et Sabaudum, sed eo euentu, vt mortuo Henrico Hispanus facile armis sibi ius diceret. Reliquis non ius deerat, sed classes et exercitus.

§. 28. 29.

Quaeritur IIII. an filius in regno natus praefereendus sit illi, qui patre adhuc priuato suscepti sunt. Vocatur ille Graecis *υποκυβερνητης*, et saepe ea de re disceptatum est in regnis fere omnibus. Exemplum adduxit Grotius, in quibus memoratu dignissimum est Germanicum, quia quamuis ibi nullum ius successione, tamen Henricus Rixofus, Henrici Aucupis filius, praeferrí volebat fratri Ottoni M. quia hic ante regnum natus sit. Vnde bella perpetua.

Grotius

Grotius recte negat *representantibus* vllum ius esse, quomuis eius ratio nulla sit. Non enim sequitur, succederent liberi ante regnum geniti in regnis diuiduis: ergo et succedere debent in indiuiduis. Ab vna enim specie ad alteram non valet consequentia. Vera ratio est praesumpta voluntas populi, qui, dum voluit succedere liberos regis primogenitos, nec distinxit conditionem nascendi, procul dubio voluit, vt et ante regnum genitus succederet.


Exceptiones tamen quaedam notandae. 1. si lex fundamentalis contraria exstet, vt Spartaec, 2. si regnum vel feudum datum sit regi vel principi, et nascituris.

§. 30.

Quaeritur V. *an locus sit iuri repraesentationis eatenus; vt nepos ex maiore filio praefereendus sit filio minori?* Sed quaestio iam supra decisa, et plane superuacua est. Aut enim succeditur secundum ordinem ab intestato, tunc res dubio caret, siquidem semper in hoc obtinet ius repraesentationis in linea descendente: aut obtinet successio linealis, tunc non potest transiri e linea in lineam, adeoque frater natu minor succedere nequit, nisi maioris linea extincta, adeoque et hic iuri repraesentationis locus est.

§. 31.

Hinc facile reliquae quaestiones omnes soluuntur, e. g. VI. *si superstes sit frater regis minor et alterius maioris fratris filius, vter praefertur?* Resp. vtique maioris filius, qui, si ordine ab intestato succedatur, iure repraesentationis subit locum parentis: sin linealis est successio, ad fratris minoris lineam transiliri nequit, quum super sit linea fratris natu maioris.



§. 32.

VII. *Rex reliquit fratris filium, et patrum: vter praefertur?* Fratris filius, ob eandem rationem. Exceptio est, vbi plane non est locus iuri repraesentationis, sed gradus proximitati. Patruus enim gradu par est, vti schema docet: ergo aetatis vel sexus habenda ratio.



H h a

§. 33:


§. 33.

VIII. *An nepos praefertur filiae?* Vtique, quia sexus femininus non nisi in subsidium admittitur, si in linea eadem nullus adsit masculus. Exceptio est, vbi promiscue femina gradu propior admittitur, quod rarissimum.



§. 34.


VIII. *Rex reliquit minorem nepotem ex filio, maiorem ex filia, vter praefertur?* Resp. in lineali minor ex filio, in hereditaria maior ex filia: ex eadem ratione;



§. 35. 36.


X. *Pater reliquit neptem ex filio primogenito, et filium postgenitum, vter succedet?*

Resp. Si linealis successio obtinet; fil. neptis praefertur, quia ex vna linea non fit transitus in alteram. Vbi iure hereditario succeditur, neptis est eiusdem conditionis, ac filius, ob ius repraesentationis, adeoque ob sexus praesentiam ab hoc excludetur. Quod exemplo Arragonico illustrat Grotius.



§. 37.

XI. *Rex reliquit ex fratre maiore nepotem, ex fratre natu minore nepotem; v- frater ter praefertur?* Resp. in lineali successio-maior ne neptis: in hereditaria nepos, quia inter pares praefertur masculus feminae.



CAPVT VIII

DE ADQUISITIONIBVS, QVAE VVLGO DICVNTVR IVRIS GENTIVM.

§. 1.

HAftenus actum de acquisitionibus iuris naturae: sequuntur illae, quae sunt iuris gentium, quamvis is ordo parum accuratus sit. Quamvis enim ius naturae et ius gentium non sint diuersa, et hinc Icti recte modos acquirendi diuidant in naturales et ciuiles: Grotius tamen addit tertiam speciem, acquisitiones iuris gentium, quia ipse, ceu supra docuimus, statuit ius gentium a iure naturae diuersum.

Quum autem ex eius mente nulla sit acquisitio iuris gentium, praeter eam, quae per bellum fit, ipse vero eam tractationem referuet libro tertio: facile patet, nullum acquirendi modum in hoc capite explicari, qui ex Grotii mente sit iuris gentium. Et inde est, quod rubrica se ita habet: *de acquisitionibus, quae vulgo dicuntur iuris gentium*. Et reuera hic agitur de acquirendi modis iuris naturae, et quidem

1. *de speciebus occupationis*, §. 2-7.
2. *de speciebus accessionis*, §. 8-24.
3. *de speciebus traditionis*, §. 25. 26.

§. 2.

Occupationis prima species est I. captura ferarum; auium; piscium. Vbi 1. quaeritur, an ferae sint res nullius?

Notum est, Ictos hic distinguere inter feras et pisces viuariis inclusos, et in siluis vel stagnis circumuagantes. Illos dicunt res nullius, hos in dominio esse fatentur. l. 3. §. 14. D. *de acquir. possess.*

Sed dicit Grotius, hodie plerasque gentes et feras in siluis vagantes, et pisces in stagnis et fluminibus non pro rebus nullius habere, idque ipsi iustissimam videtur habere rationem. Nam

H h 3

1, Pisces

1. Pisces in stagno aëque includuntur, ac in viuario, haecque non differunt tantum vt laxius et angustius.

2. Siluae etiam possunt esse bene circumseptae, eoque casu ferae non magis erunt in dominio, quam si domi includantur. Ita Grotius.

Sed videtur Grotius Neruam Ictum in *leg. alleg.* non satis intellexisse. Quaestio enim est, an ferae et pisces nostrae dici possint? Id negant veteres, et dicunt, esse res nullius, adeoque cedere occupanti.

Obiici poterat, atqui haec animalia esse in siluis et stagnis nostris, adeoque nostra esse. Respondet Ictus, sed tamen non posse nostra dici, quia numquam possessionem eorum adprehenderimus, adeoque ea non occupauerimus. Id vero facile probatur. Possessio adprehenditur corpore et animo. Atqui feras in siluis et pisces in stagno corpore non occupauimus, ergo eas eosque non possidemus.

Aliud dicendum de feris captis, quas domi vel in horto; vel in alio loco clauso habemus: aliud de piscibus in viuario. Haec enim animalia semel occupauimus animo habendi, ergo eorum possessio vera nobis acquisita.

Interim verum est, hodie aliter philosophari homines, et furti reos esse, etiam qui e stagnis alterius pisces, vel e siluis alterius feras capiunt: sed non ex rationibus ab auctore adductis, sed quia in terris per vniuersitatem occupatis nihil censetur nullius, quod non inexhausti vsus est.

§. 3.

2. *Quamdiu ferae nostrae sint?* quaeritur. Hic denuo examinat Ictorum sententiam, qui l. 3. §. 1. *D. de adquir. rer. domin.* statuunt, desinere feras in nostro dominio esse, simul ac nostram effugerint custodiam.

Sed id omnino non solum rationi, sed et principiis iuris naturae repugnat. Ratio et ius ciuile inculcat, quod semel nostrum est, id solo animo retineri, e. g. res amissas, seruos fugitiuos. At hic quaeritur de fera nostra amissa, fugitiua, furto intercepta: quo iure dicimur eius dominium amisisse?

Si obiiciatur, videri rem pro derelicta habitam, quia difficilis sit persequutionis: facile resp. 1. derelictam videri rem, eo abiectam animo, vt eam nostram esse nolumus: hunc animum vero

vero hic non adesse. 2. Praesumptionem cedere veritati, e. g. si quis ferae signa vel crepundia addiderit.

3. *Quando ferae per occupationem nostrae fiant?* Resp. occupatio fit corpore et animo simul. Qui vulneravit, nondum corpore occupavit fugientem bestiam, ergo is nondum est dominus, adeoque illa ab alio potest occupari.

§. 4.

Quum vero occupatio corporalis requiratur: porro 4. quaeritur, *an ea solis manibus fiat, adeo ut non prius nostra sit fera, noster piscis, quam si manu tetigerimus?* Et facile resp. quod quis per alium facit, id ipse fecisse videtur. Ergo et quod in decipulis, laqueis, retibus ab eo positis habetur, eius est, nec sine furti crimine ab alio potest furripi: 1. modo instrumenta nostra sint, 2. in loco licito posita, 3. fera ita inclusa, ut se non vindicet in libertatem, 4. aliquid in retibus reperiatur, quod non sit in alterius dominio, e. g. equus, vacca, capra. Elegans referatur exemplum de vitulo, naufragio amisso, et mari extracto, apud PLAUTUM in *Rudent. act. III. scen. 3.*

§. 5.

5. *An haec omnia hodiernum recepta?* Id refellit experientia. Plerisque enim locis non sunt ferae nullius, sed principis, vel eorum, quibus princeps ius venandi concessit. Et hinc non cedunt cuius occupanti, siue manibus adprehenderit, siue decipulis retibusque ceperit. Hinc, ut diximus, furti rei sunt, et qui feras, et pisces furripiunt. Illi in Germania tertium deprehensi, si venatoribus resistent, laqueo puniuntur, alias ad operas publicas condemnantur: hi extra ordinem puniuntur.

Nonne id iniquum, et contra ius naturae quod feras nullius esse monet? Resp. minime 1. ius naturae dicit feras esse nullius, quae nondum sunt occupatae. Atqui populus, dum per vniuersitatem occupavit provinciam, occupavit etiam, quidquid provincia illa complectitur, adeoque ferae sunt populi. Quum vero quae nostra sunt, aliis cedere possimus: populus non facit iniuste, quod, quum ipse commode eo iure uti indiuisim non posset, illud cesserit principibus, ut inde dignitatem suam sustinerent.

2. Pro-

2. Promiscuum ius occupandi feras est iuris naturae permiscui. Ergo legibus nouis potest restringi et tolli.

§. 6.

Per occupationem adquiruntur II. *alioquin*, id est, quae dominum non habent. Sed hic plures limitationes addendae. Nam locum habet haec occupatio,

1. Si occupatio fiat corpore et animo simul. Id quod denuo elegante illo exemplo insulae Acanthi colonis vacuae demonstrat Grotius, quae non cedebat Andriis, qui priores sagittam iniecerant, sed Chalcidenfibus, qui priores intrauerant. Historia est apud PLUTARCH. in *Quaest. Graec. cap. 29.* Negat quidem hanc regulam esse iuris naturae. Nic. HIER. GYNDLINGVS in *Grundlingianis*, sed non nisi ex ea ratione, quod contra humanitatem sit, alteri id praeripere, quod se occupaturum vel verbis, vel tacite declarauerat. Sed procul dubio errat. Nam 1. quod inhumanum est, non statim iniustum habetur, vt pauperi non donare. 2. Ipse agnoscit occupationem fieri debere: sed quis dixerit factam occupationem ab eo, qui vult occupare? Quod facere volo, nondum feci.

2. Si finant id leges ciuiles, quae illam naturalem permiscuam tollere possunt. Hinc absurdum esset, priuatum occupare velle hereditatem *alioquin*. Lex enim vult, vt non existente herede villo, fiscus succedat. Simile quid animaduertimus in lapillis, electro, mari eiectis.

§. 7.

Eodem refert Grotius III. thesauros, de quibus tamen res maxime dubia, inuentori illi cedant iure occupationis, an domino fundi iure accessionis. Prius dicendum videtur, quia thesauri sunt res nullius: posterius, quia accessorium sequitur suum principale. Vnde et vtrumque fundamentum coniunxisse videtur Hadrianus imp. dum sanxit, vt thesaurus inter inuentorem et dominum fundi diuidatur. Vid. SPART. in *Hadrian.*

Si quaeras, *utrum fundamentum sit aequius?* Grotius praefert prius, et statuit, thesaurum naturaliter esse inuenientis. Et sane thesaurus est res derelicta, res derelictae sunt nullius, quae nullius sunt, cedunt occupanti. Sed ex altera parte negabatur;

gabatur; thesaurum esse nullius, qui in alieno fundo reperitur, quum accessiones fundi pertinere videantur ad fundi dominum. Verum facile resp. id negandum esse de accessionibus subterraneis, quae tamquam res individuae et communes rectius vel fisco vindicantur, vel inuentori.

Et hinc etiam Grotius observat, apud multas gentes thesauros fisco vindicari. Dum autem addit Germanos, fallitur, deceptus loco *iuris provincialis* vel *Speculi Saxonici cap. 35*. Ibi enim non est quaestio de thesauris, sed de metallifodinis.

§. 8.

Haec de occupatione. Sequuntur quaedam species *accessionis*. Per *accessionem* autem intelligitur incrementum, quod vel naturae beneficio, vel industria humana rei nostrae adiungitur; vnde et in *naturalem, industrialem*, atque *mixtam* dividi solet. Naturalis exemplum est *alluvio, insula, alveus derelictus*, de quibus §. 8-17. *foetura*: §. 18. *industrialis specificatio, confusio, commixtio* §. 19. 20. et *adiuvellio* §. 21. *mixtae, plantatio, insitio, aedificatio*, §. 22. *possessio b. f.* §. 23. 24.

1. De alluvione, insula, alveo derelicto quid tradat ius Romanum, notum est. Nempe 1. alluvio cedit proximo fundo, non item si vi fluminis fundo aliquid adiectum. 2. Nova insula in medio flumine nata est eorum, qui vtrunque praedia possident: si alterutri ripae propior, tunc eius est, qui ex ea parte fundum habet. 3. Alveus derelictus etiam communis est pro modo praediorum.

Haec quum veteres ICI omnia tribuant iuri naturae et gentium: quaeritur, *an vere sint iuris naturae et gentium*. Idque negat Grotius, quia multas falsas hypotheses posuere. Nam

1. Supponunt, ripas esse partem fundi, et hinc incrementum latens seu alluvionem fundo accedere. Id vero falsum; Nam ripae sunt publicae; ergo et alluvio publica erit. Quod et perisque locis observatur.

2. Insulas supponunt natas ex terra proxima, ergo ei accedere debent. Id denuo falsum. Potius incertum est, vnde particulae terrae ablatae sint. Hinc ratiocinari debuissent ita: flumen est publicum, ergo et insula in flumine nata. Id quod etiam multis locis observatur.

3. Supponunt, alveum derelictum iam definire esse publicum;

Heineccii Praet. Grat.

I i

cum;

cum, quia non amplius sit flumen. Sed id aequè absurdum, ac si quis existimet, curia incendio deleta, aream non esse amplius ciuitatis, quia desierit esse curia.

Ergo certissimum est, haec omnia non ex iure naturae et gentium, sed ex iure ciuili esse.

§. 9.

num. 1. *Quid ergo de his rebus statuendum?* Grotius recte obseruat; 1. populum terras adquisiuisse per vniuersitatem, et ex eo demum tempore in terris illis dominia priuatorum coepisse. Id satis certum. Neque enim Nomadum more gentes Europaeae circumuagantur, et cuique faciunt potestatem, terram, quam velit occupandi, vti sit apud Tartaros, sed in rebus publicis viuunt. Ergo tota terra est populi: partes autem sunt in dominio priuatorum, *quatenus adquisitae*. Quaecumque enim non adquisita, ea manserunt populi.

Inde ergo sequitur, 1. alueum derelictum non esse priuatorum. Hi enim flumen numquam adquisuerunt, adeoque nec ciuitatem illam, per quam flumen ruit. Quum itaque omnia a priuatis non adquisita sint publica: talis etiam erit alueus derelictus.

num. 2. 2. Inde sequitur, vt et alluio non sit priuatorum, sed publica. Fundos enim adquisuerunt priuati vlque ad ripam, non ipsam ripam, quae fluminis pars est, adeoque publici iuris. Ergo talis etiam erit alluio. Quod et praxi Hollandorum probat auctor, cui nos et Germanos addimus.

Addimus et aliam rationem. Ipsi veteres ICTi agnoscunt; alluioni locum esse tantum in terris arcifiniis, non in limitatis. Atqui priuati agri nusquam sunt arcifinii, sed semper limitati. Ergo nec in iis locum habet alluio.

num. 3. 3. Sequitur, vt et insulae sint publicae. Nam et flumen, in quo nascuntur, numquam adquisuerunt priuati. Si ergo verum est, accessorium sequi suum principale: verum erit etiam, insulam nouam pertinere ad populum, vel principem, cui populus concessit.

Obiiciunt, quae nullius sunt, cedunt occupanti. Sed resp. sic falsum erit, vicinis praediis accedere insulam: nam et tertius occupare poterit. Aut ergo nullius est insula, aut est alicuius; si nullius est, non praecise vicinis cedit praediis, sed cuilibet occu-

occupanti : si alicuius, id non aliter esse potest, nisi per accessiōem. Atqui insula est accessio non terrae proximae, sed fluminis: ergo insula eius est, cuius est flumen.

§. 10.

Quaerit porro auctor de inundatione : *an ea dominium mutet?* Idque recte negat. Romani Icti, qui hic iterum praefecerunt, ac si velint ius naturae et gentium inculcare, distinguunt inter inundationem grauiorem, quae diutissime durat, et momentaneam. Haec dominium non mutat, inquiunt, illa mutat, adeo, vt ne piscari quidem liceat in fundo inundato.

Sed rectius dicitur, inundationem numquam dominium mutare. Nam 1. magnae et paruae inundationis non possunt esse diuersi effectus morales. 2. Non potest mihi dominium rerum mearum auferri sine facto meo. 3. Quamuis praescriptione alias ius meum excludatur, id tamen locum non habet, vbi nulla mea negligentia est, id est, vbi rem meam vindicare non potui.

Concedit tamen Grotius, id legibus ciuilibus mutari posse; et statui, vt si intra certum tempus non exsiccet terra, eius dominium amittatur. Nec id iniustum, quia plerumque exsiccatio tot requirit sumtus, vt publica pecunia ad eam rem opus sit. Quum ergo priuati exsiccare, nec sumtus restituere nequeant, et intersit tamen rei publicae ne terra mari permittatur: omnino aequum est, vt terrae ab imperante exsiccatae imperanti cedant.

§. 11.

Obiectio sequitur, quam remouet Grotius. Posset quis ita ratiocinari:

Si particularum per alluionem alterius fundo adiectarum dominium amittit prior dominus, sequitur, vt et fundi inundatione abstruti dominium merito amittatur.

At prius verum est.

Ergo et posterius.

Sed facilis responsio. Negatur consequentia. Nam in alluione non possum scire, cuius ex agro hae vel illae particulae abreptae sint; hinc nec eas vindicare. At fundum meum esse exsiccata terra scire possum, et demonstrare.

Ex quo colligunt ipsi Icti Romani, id, quod vi fluminis

ab agro meo auulsum est, meum manere. §. 21. *Inst. de rer. diuis.*

§. 12.

num. 1. Ita se res iure naturae habet. Sed leges ciuiles in his multa mutarunt. Nam iure Romano et quorundam locorum statuario, alluio a fluminibus facta conceditur priuatis, dum modo eorum agri sint arcifinii.

Id iure fieri facile probatur. Quum enim, vt supra ostendimus, iure naturae et gentium alluio sit populi, vel imperantis, quis neget, eum huic iuri suo renunciare, idque in priuatos transferre posse. Idem potest princeps, si regnum sit in eius patrimonio. Sin vsufructuarius sit, recte quidem renunciat iuri suo, sed non in praeiudicium populi et successoris. Vnde ab hoc tamquam domanium semper potest reuocari.

Quum autem distinctio hic obseruetur inter agros arcifinios et limitatos: quaeritur, *quales in dubio praesumantur?* Et resp. territoria publica in dubio semper praesumuntur arcifinia, nisi contrarium probetur, idque ostendimus supra. At agri priuatorum, quia mensura eorum certa et definita est, semper praesumuntur limitati, donec contrarium probetur: idque rarissimo probari poterit, nisi agri sint nouales.

num. 1. *Quomodo vero probabitur, agrum priuatum esse arcifinium?* Resp. 1. ex libris vetustis censualibus, si in illis dicantur ad flumen vsque pertingere. 2. ex litteris feudalibus, si in iis terra detur sine expressa mensura ad flumen vsque; 3. ex possessione vel quasi iuris alluionis immemoriali, si ostendi possit, semper post hominum memoriam agro huic aliquid accessisse; nec vmquam eam accessionem a re publica vindicatam; 4. ac denique ex ipso loci situ, si inter flumen et agrum nec sapientum, nec via intercedat, quibus ager a flumine diuellatur.

§. 13. 14.

Eodem modo se res habebit in nouis insulis. Quamuis enim eas iure naturae et gentium populi esse docuerimus: possunt tamen et aliis per leges et priuilegia concedi.

1. *Per leges.* Quales sunt Romanae, itemque Geldricae, per quas potest vnusquisque nouam insulam occupare, si vehiculo inuassens ex ripa per flumen in insulam contendat.

2. *Per*

2. *Per privilegia.* Quale luculento privilegio gaudet elector Palatinus, vt omnes nouae insulae in Rheno, siue in suo, siue extra territorium natae ad fiscum eius pertineant. Quamuis si tale quid contingeret extra eius territorium, dubitem, an id-ei concessuri sint vicini principes, quia iis superioritas territorialis per *Instrumentum pacis Westphal. art. gaudeant*, concessum est indistincte.

§. 15.

Pergit auctor ad vasallos, et quaerit, *an iis quoque iura fluminalia competant?* Sed res expedita est. Quidam acceperunt a domino superioritatem territorialem, ita, vt tantum possint in terris suis, quantum rex in toto regno. Et tales vasalli sunt principes imperii in Germania. Aliis feuda dantur sine superioritate territoriali, quamuis aliquibus regalibus gaudeant, e. g. iuris dictione omnimoda, quales sunt plures comites, quorum comitatus a principibus conceduntur in feudum. Sic e. g. Comites Bentheimenses gaudent in comitatu suo variis regalibus, sed non superioritate territoriali, quia subsunt episcopo Monasteriensis.

Qui vasalli sunt cum superioritate, eorum est totum territorium, ergo et flumina, adeoque et iura alluionis, insulas occupandi, cet. merito exercent.

Qui posterioris generis: nihil habent, nisi quod expressum in litteris inuestiturae. Ergo si huius modi iura exercere volunt, docere debent, ea sibi concessa esse a domino. Hinc superius dixi, in Marchia Brandeburgica nobiles inuestiri solere abueo Albis, (*mit der alten Elbe*.)

Possunt tamen et hi reliquorum subditorum iure vti, si ius ciuile haec iura priuatis concedit, eorumque agri sunt arcifinii; id quod iterum ex litteris inuestiturae iudicandum. Exstat elegans tractatus IO. OETINGERI *de iure et controversiis limitum et finium regundorum*, qui in his regionibus haud paruum praestare vsum poterit.

§. 16. 17.

Sequitur nona obiectio. Quum enim supra ostensum, alluionem non esse priuatorum: obiciunt ICTI Romani: quem penes est incommodum, penes eum et commodum esse debet. Atqui priuati sentiunt incommodum fluminis. Ergo et commodum. Resp. Grotius acute. 1. Regula vera est, si commodum

I i 3

ex

ex re mea nascatur, e. g. quia ex agro tributa soluo, merito etiam fructus capio. At hic commodum non est ex agro, sed ex re aliena, nempe flumine.

2. Si vera esset hoc casu regula, deberet idem dici de agris limitatis, quos tamen ipsi veteres ICTi exceperunt.

Addo: 3. si hic locum habet canon, locum etiam habebit in vi fluminis, quod ICTi denuo negant.

§. 18.

II. Sequitur altera species accessionis *foetura animalium*, de qua quum ICTi veteres regulam reppererint, *partus sequitur ventrem*: quaerit auctor an id iuri naturae et gentium sit *consentaneum*?

Negat id Grotius. Nam 1. si accessorium sequitur principale: quis negarit, vtrumque parentem natura esse principale. 2. Si ad causam respicimus, negari denuo nequit, vtrumque parentem esse foetus causam, nec sine vtriusque concursu nasci, posse viuum animal.

Sed fallit tamen hoc, 1. si pater incertus sit. Ridiculus casus de gallina aliena oua excludente apud BESOLDVM in *Thesauro practico*. 2. Si dominus animalis masculi mercedem pro opera ab animali suo praestita acceperit. Quod inter rusticos obseruatur, vbi vnus communem bouem, totius gregis maritum, alit.

§. 19.

num. 1.

III. Tertia species accessionis est *specificatio*, per quam intelligitur actus, quo quis alienae materiae nouam formam introduxit, adeoque nouam inde speciem fecit.

Dici non potest, quantum de ea inter se digladiati sint veteres, Proculiani et Sabiniani. Illi enim dicebant, formam esse materia nobiliorem, adeoque specificantem fieri dominum. Hi materiam dicebant esse principale, cui forma tamquam accessorium adiungitur: ergo potius dominum materiae praeferebant. Denique Iustinianus rem ita decidit, vt si res ad priorem formam reduci possit, dominus materiae ius suum retineat, sin minus, specificans. Exemplo esse possunt, qui ex alieno argento poculum, et qui ex aliena lana pannum confecerit. Controversiam eleganter pertractauit MERRILL, in *comment. Luculeno ad L. Iustiniani Decisiones*.

Quaeri-

Quaeritur ergo 1. *quid ius naturae et gentium ea de re statuam.* 2. *tuas?* Resp. Grotius, rem iure naturae merito fieri communem pro rata materiae et operae. Idque probat inde, quia et res confusae et commixtae fiant communes.

Sed 1. magna est differentia inter commixtionem et specificationem. Ibi duae coniunguntur materiae, quarum quaeque in dominio fuit, ergo non potest non massa esse communis. Hic autem forma non est substantia, ergo nec in dominio. 2. Ita nihil responsum. Id enim nemo negat, materiam esse Titii, formam Maevii specificantis: sed id quaeritur, cui ius sit rem retinendi, alterique soluendi pretium? Id ex Grotii decisione non fiet liquidum.

Ergo rectius ostendit THOM. in *Dissertatione* elegantissima de pretio affectionis in res fungibiles non cadente, distinguendum esse, an materia sit res obvia et fungibilis, an tam rara, ut non facile recuperari possit? Priore casu specificantem bona fide fieri dominum: si enim dominus materiae eiusdem quantitatis et qualitatis materiam recipit, non est, quod conqueratur. Sin vero materia sit rarior, e. g. electrum insignis raritatis, tunc nihil aequius est, quam ut artifex domino materiae speciem relinquat, pretio operae soluto. Res tam clara est, ut mireris merito, veteres de lana caprina litigare voluisse.

§. 20.

Quaeritur 2. *an iuris naturae sit, ut mala fide specificans speciem amittat?*

Id quoque Grotius non sine ratione negat: nam ademptio illa est poena, poenas autem non definit ius naturae et gentium. Sic quidem iuris naturae est ut puniantur homicidae: sed utrum laqueo, an gladio, an exilio puniendi sint, non determinat.

Si superius principium de materia, re fungibili, et in quam non cadit pretium affectionis consideres, poena haec videtur paullo atrocior. Domino enim materiae nulla sit iniuria, si tantundem eiusdem bonitatis materiae accipit, quia in rebus fungibilibus tantundem est idem.

§. 21.

CONNANVS, qui luculentos *Commentarios iuris civilis* scripsit, lib. III. cap. 6. existimat, aequitatem naturalem requirere, ut minus

minus accessorium habeatur maioris, e. g. purpura vestis, gemma annuli, et hinc et argentum auro alterius adferruminatum vel mixtum fiat domini auri. Quaeritur itaque, *an id fundamentum habeat?*

Resp. Grotius negando. Idque probat inde, quia dominium est qualitas moralis, quam non mutat maius et minus. Sic e. g. qui casam habet, non minus eius dominus est, quam alter palatii: et qui vigesimam partem praedii habet, non minus dominus est, quam qui partes eiusdem possidet nouendecim. Ergo nulla est ratio, cur illi magis ius suum auferri possit, quam huic.

Accedit, quod maius physice non semper est maius moraliter, vel contra. E. g. parua auri massa moraliter maior est, magna mole ligni, et gemma mole exigua saepe moraliter superat magnam auri argentiue massam. Si ergo Connanus intelligit maius et minus physice: tunc iniqua erit decisio: si maius moraliter, tunc falsa erunt exempla. Purpura enim saepe veste pretiosior, gemma annulo pretiosior, cet.

§. 22.

III. Quarta accessionis species est *plantatio et satio*. Notum enim est, iure ciuili cautum esse, si quis alienum agrum suo semine conscuit, aut suum agrum alieno semine, quod tunc, quod solo implantatum, solo cedat. Quaeritur *an idem consensaneum sit iuri naturae?*

Negat Grotius, idque ex ratione ipsa probat, qua veteres vsi sunt. Existimant enim, quod implantatum solo, id alimentum ex solo capere, adeoque fieri eius, cuius sit solum. Vnde etiam concessere, vt posset quis plantam tollere, si nondum radices egerit, quia tunc nondum attraxerit alimentum. Atqui, respondet Grotius, alimenta non totam substantiam rei absoluunt, sed partes, quae crescenti plantae vel semini pullulanti paulatim accedunt: ergo nec tota planta vel messis erit domini, adeoque planta erit communis pro rata.

Idem etiam V. de *inaedificatione* iudicat: quis enim dubitet, aliquod ius commune pro rata duos habere in aedificio, quod alter bona fide extruxit, quam alterius sit fundus? Ergo constituetur eo ipso ius superficiei. Sed hic clarum est, hanc definitionem iure ciuili esse inuectam: nam rationem ipsi ICI reddunt, id ideo cautum, ne vrbs ruinis deformetur; quam rationem ius naturae ignorat.

§. 23. 24.

Sexta species est VI. *bonae fidei possessio*. Notum enim est, iure ciuili eum, qui bona fide rem alienam ex iusta causâ adquisiuit, quamuis dominus non sit, tamen fructus lucrari perceptos et consumptos, et reddere tantum exstantes: contra malae fidei possessorem ad restitutionem fructuum perceptorum et percipiendorum condemnari. *An hoc iuris naturae et gentium?*

Resp. neg. Quid enim aliud bonae fidei possessor exigere potest, quam vt indemnus seruetur? Atqui indemnus praestabitur, dummodo ei impensae in culturam rei factae restituantur. Ergo non debet lucrum ex re aliena capere, siquidem ius naturae non patitur, vt quis cum alterius detrimento fiat locupletior.

Quod ad malae fidei possessorem attinet, is fructus percipiendos restituit in poenam. Atqui poenas non determinari a iure naturae et gentium, iam supra ostendimus. Ergo haec omnia ex iure ciuili esse manifestum est.

§. 25. 26.

Haftenus de speciebus quibusdam occupationis et accessionis: reliqua est pars capitis vltima *de traditione*. De ea tradit ius ciuile, ex solo contractu non transferri dominium, vel aliud ius in re, sed per subsequentem traditionem. Pauci excipiuntur casus, veluti vltimae voluntates, hypotheca, adiudicatio ex tribus iudiciis diuisoriis, familiae eriscundae, communi diuidundo, et finium regundorum, vbi traditio non requiritur. *Quaeritur itaque, an ea omnia fiat iuris naturae et gentium.*

Negat et id Grotius: 1. quia voluntas vtriusque iure naturae ad dominium transferendum sufficit. 2. Quia si naturale esset hoc ius, nec exceptiones illae admitti possent. Nulla enim ratio est, cur magis legatum fiat nostrum sine traditione, quam aedes nobis venditae et nondum traditae. 3. Quia traditio haec tantum, est signum translati domini, ideo inuentum, vt lites euitentur. Sed ea de re iam supra sententiam nostram exposuimus *lib. II. cap. 6. §. 1. 2.*

Demum concludit auctor hoc caput, reddita ratione, cur haec tam accurate expenderit? Videlicet, vt adpareat non omnia esse iuris naturae et gentium, quae talia esse dicunt veteres

Heineccii Prael. Grot.

K k

I Cti.

ICti. Quae obseruatio probe tenenda. Saepe animaduerti, in disputationibus iuridicis hoc loco * editis passim testamenta, aliaque huius generis ex iure naturae et gentium deriuari, tantum, quia id adserunt veteres. Quis, quaeso, ius naturae et gentium ex corpore iuris probet. Eius modi theses aliter probari nequeunt, quam ex sana ratione, non ex auctoritate. Sed ita aduersus iuuenes a doctoribus solius iuris ciuilis notitia aliqua imbutis.

* Franequerae vero tum adocebat diuus Heineccius.

CAPVT VIII.

QUANDO IMPERIA VEL DOMINIA DESINANT.

§. 1.

Vidimus hactenus varios modos, quibus acquiratur vel dominium, vel imperium. Quum itaque contrariorum contraria sit ratio: consequens est, vt etiam dicendum sit, quibus modis amittantur et dominia, et imperia; id quod fit hoc capite. Tales modi plures sunt. E. g. 1. *derelictio*, de qua supra actum, 2. *rei interitus*, 3. *personae interitus*.

De hoc agitur in praesenti, et demonstratur, exstincta persona exspirare etiam dominium. Causa in promptu est. Dominium est ius adeoque attributum personae: non entis enim nulla sunt attributa. Ergo nec personae exstinctae vllum est ius vel dominium.

Et hinc si quis moriatur nullo relicto herede, cui vel defunctus, vel ipsa lex hereditatem addicant, res eius fiunt nullius iure naturae, serui liberi fiunt, quamuis leges ciuiles fisco addicant hereditates caducas.

§. 2.

Quod itaque de vna persona verum, id et de tota familia. Quamdiu ex illa superest vel vna persona, illi ius familiae saluum est, tota familia exstincta illud cessat. E. g. notum est, familiam Carolingicam in Francia et Germania satis libere imperasse. Ea in Germania exstincta nouus constituebatur rex
Con-

lus in sanguinem, sanguis per varias excretiones in lympham; succum nervosum, carnem, ossa, cet. mutatur. Vt adeo dici possit, vel parum vel nihil nobis iam superesse eius materiae, quam in hunc mundum ex vtero materno attulimus.

Iam dicimus. Quemadmodum nihilominus idem corpus manet, quamvis novae sint eius partes, eadem navis, quamvis post ducentos annos ne festuca quidem ex prima materia supersit: ita idem manet populus, quamvis nullus ex primis, qui illum constituerunt, hominibus supersit.

num. 3.

Male itaque ratiocinatur Piso apud TACIT. *Annal. lib. II. cap. 55.* Quum enim Atheniensibus Germanicus multum honoris detulisset, Piso, eius inimicus, illos increpans obicit, quod contra decus Romani nominis non Athenienses tot cladibus extinctos, sed collatam illam nationum comitate nimia coluisset. Absurde, populus enim non moritur, sed idem manet, licet alii accedat, immo licet in aliam paene naturam mutetur. Sic Franci fuere Germani origine: in Gallia, quam devicerant, Romanis et Gallis mixti, eorum mores, naturam, et linguam adoptarunt, et ideo tamen nihilominus manent Franci.

Haec doctrina magni momenti est. Nam inde possumus rationem reddere, cur foedera cum populis inita, iura populis concessa sint perpetua. Et hinc si vel maxime demonstrari potest, ex iis, quibuscum pax vel foedus initum, neminem vivere supersistem, foedus tamen vel pax ideo violari non potest.

§. 4.

Quamvis vero populum non mori haftenus demonstratum sit: id tamen intelligendum de eo, quod sit ordinarie et per se. Nam per accidens aliquando et integri populi extinguuntur. Idque fit vel *extinctis partibus*, §. 4. vel *sublato toto corpore*, §. 5. vel *soluta forma*. §. 5.

Primo id fit extinctis partibus, e. g. 1. inundatione. Tale quid de magna insula Atlantica referunt veteres, eam totam cum vniuerso populo mari absorptam. Si ergo Atlantici iuribus pinguisimis usi essent, illa dudum fuisset extincta.

2. Si ciuitas chasmate vel terrae motu hauriatur, cuius rei exempla sunt apud Tertullianum, Senecam, et alios. Recentissimum est opulentissimae ciuitatis Plurs in Heluetia, quae a mon-

te.

te proximo obruta, omnes ciues vno momento sub ruinis aedium suarum sepulti sunt. Iam lacus est, vbi ciuitas fuit.

3. Si populus sponte se interimat. Triste Saguntinorum exemplum est apud Florum, et alios scriptores Romanorum. Ii enim diuturna obsidione pressi ab Hannibale, quum nulla spes salutis superesset, vino se inebriarunt ex communi ciuitatis decreto, incensisque aedibus viui se omnes combusserunt, ita vt ne vnus quidem in hostium potestatem perueniret.

§. 5.

Idem fit sublato corpore, non partibus corporis meralis. Nam si populus dissuit, ob pestilentiam, bellum, vel aliam calamitatem publicam, populus esse desinit. Sic interiit pridem populus Israeliticus, res publica Ebraea, regnum Iudaicum, quamuis innumeri vbique Iudaei supersint.

Hoc tamen cum grano salis accipiendum. Nam si ob periculum vel calamitatem ad tempus fiat huius modi discessio, cum animo redeundi: non ideo populus exstinguitur, sed pristina iura sua retinet. Exemplo esse possunt ciuitates illae olim fortissimae, Spira, et Wormatia. Vtraque dirissime combusta a Gallis, ciues per vniuersam Germaniam dispergebantur. Reddita pace, domum redierunt; vrbes illas restaurarunt, vt iura aliquantulum respirare videantur. An ideo omnia pristina iura amiserunt? Minime.

§. 6.

Denique et forma aliquando perit, per seruitutem. Nam ciuitatis forma est nexus inter imperantes et subditos. Sublato illo nexu, et populo vniuerso in seruitutem redacto, populus esse desinit, et fit accessio populi victoris.

Exemplum est in Israelitis a Nebuchadnezare Babyloniam abreptis, in Thebanis ab Alexandro sub corona venditis, in Capua in praefecturam a Romanis redacta.

§. 7.

Quaeritur, *an idem per solam migrationem contingat?* Negatur. Ratio: vbi nec partes populi intereunt, nec totum corpus, nec forma, ibi nec populus interit. Atqui per migrationem, cet. Ergo cet.

Kk 3

Abfurde

Abfurde ergo quis dixisset, interiisse populum Francorum ideo, quod in Galliam transisset, populum Langobardorum quod in Italiam, populos Anglo-Saxonicum et Friscum, quod in Britanniam transissent.

§. 8.

nam. 1. Quaeritur porro, *an et mutata rei publicae forma desinat aliquis populus esse?* Intelligimus vero hic non formam internam, quae consistit in vnione voluntatum, (ea enim extincta omnino et populus extinctus videtur, vid. supra §. 6.) sed externam, quae vel in monarchia, vel in aristocratia, vel democratia, vel quadam earum mixtione consistit. *Si ergo haec mutatur, an tunc populus idem esse desinit?*

Negatur, quia tunc nec partes pereunt, nec totum corpus; nec nexus inter imperantes et subditos. Manet enim imperium, quamuis non sit apud eundem vel eosdem. Populus consideratur vt corpus, imperans vt caput. Manet vero corpus, manet caput, siue vnus, siue plures imperent.

num. 2. Hinc iam variae soluantur quaestiones. Sequitur enim inde, 1. vt si populus aes alienum contraxerit, mutata rei publicae forma, nihilominus illud teneatur exsoluere, quia idem manet populus. Sic e. g. Romanus populus non desinebat creditoribus suis debere, eiecto Tarquinio, et consulibus constitutis.

2. Vt mutata imperii forma nouus imperans eundem locum teneat, quem tenuere superiores imperantes. Hinc cum Phocenses Philippo Macedonum regi summum in ciuitate sua imperium detulissent, eodem loco in Amphictionum confessu is sedebat, quo olim federant magistratus Phocenses. Sic et rex Prussiae tamquam dux Magdeb. princeps Halberstad Mindensis, Caminenfis, cet. eadem loca in comitiis occupat, quae olim occupauerat archiepiscopus Magdeb. et episcopi Halberstadiensis, Mindensis Caminenfis, cet. nisi quod in scamno saecularium, vt vocant, addidet.

3. Vt foedus antea cum populo contractum, mutata rei publicae forma non tollatur. Exarsit inde bellum Latinum. Latini se Romanis subiecerant sub Tarquinio. Eo eiecto nolebant amplius subesse Romanis, quia non cum consulibus, sed cum rege Tarquinio foedus iniissent. Quaeritur, an rationi consentanea fuerit

fuerit haec eorum sententia ? Id merito negatur ; quia idem manet populus.

§. 9.

Quaestio noua oritur , *an populus esse desinat per vnionem* ? Id Grotius negat , sed paullo distinctius respondendum.

Vnio fit tripliciter , vel 1. *per communem imperantem* , vti hodie Germania , Hungaria , Boëmia , Neapolis , Sicilia , communi imperanti subsunt , et tamen nullus populus alteri obnoxius est. 2. *Per foedus* , vt hodie vnitae sunt septem prouinciae Belgicae , 13. ciuitates Helueticae. 3. *Per subiectionem* , eamque vel *plenam* , ita vt suo imperio excidat populus subiectus , vti olim prouinciae Romanorum , hodie prouinciae 1a Gallis deuictae , vel *minus plenam* , quae suum sibi imperium retinet , e. g. Prussia , Curlandia , quae eatenus se Polonis submisere , vt subessent propriis ducibus , Polonorum clientibus.

Iam facile patet , non desinere populum per vnionem primam , nec per secundam , nec per quartam , quia hic manet nexus inter imperantem et subditos. At in casu tertio nexus ille cessat , vt hinc sit populus accessio dominantis rei publicae. Hinc hodie vrbes et terrae , quas res publica nostra in Flandria et Brabantia adquisiuit , non constituunt singulares populos , vti septem prouinciae , sed tamquam subditi sunt accessorium populorum foederatorum.

§. 10.

Quid vero si diuisio fiat ? Tunc omnino populus esse desinit. Fiunt enim populi duo vel plures , quorum nullus ab altero dependet. Quotcumque enim sunt summa imperia , tot sunt nexus inter imperantes et subditos , ergo et totidem populi. Sic e. g. olim Hispani non constituebant vnum populum , sed tot , quot erant regna independentia. Sic quum Galli et Germani sub Carolo M. et Ludouico Pio essent vnus populus , sub nomine Francorum notus , post Ludouici Pii tempora diuersi facti sunt populi.

Excipitur tamen casus , si diuisio ita fiat ; vt nihilominus vni superiori nexu clientelari obstricti maneant. E. g. Germania in multos principatus , comitatus , et res publicas diuisa est ; quia
tamen

tamen omnes clientelari nexu obstrictae sunt imperatori et imperio, hinc manet vnus populus Germanicus.

§. II.

Iam sequitur nobilis, vt auctor ait, quaestio, sed ex cuius decisione satis adparet, eum in Gallia et inter pontificios scripsisse. Quaeritur, an Romanum imperium translatum sit ad Germanos? Id negat auctor, et putat, populum Romanum eundem esse, qui olim fuerit, sui iuris, et nullo modo subiectum Germanis. Videmus rationes.

1. Germania magna nunquam fuit sub Romano imperio, ergo in reges Germanorum non potuit transferri imperium Romanum. Nulla consequentia. Nam 1. Romanum imperium non se subiicit Germanis, sed tantum se obstrinxit isle populus, se eundem imperatorem habiturum, quem Germani habeant regem; idque pactum initum sub Ottone M. 2. Saepe populus ad incitas redactus, qualis sub Carolo M. et Ottone M. erat populus Romanus, se subiicit alii, vel saltim alterius populi clientelam rogat.

2. Mutatio et translatio imperii non praesumenda; sed probanda. Probabimus ergo. De translatione, sub Carolo M. facta, ne ipsi quidem Galli dubitant. Vid. NATAL. ALEX. *Histor. eccles. saec. VIII.* Pactum cum Ottone M. initum integrum existat apud GOLDASTVM in *Constit. imper. tom. I. pag. 34.* et ex parte in ipsum ius Canonicum migravit, d. 63. c. 23. Hinc Auctor vitae Mathildis coaeuus cap. 5. apud LEIBNITIVM tom. I. *Script. rer. Brun'vic.* totus populus Romanorum se sponte subiugauit ipsius dominatui, et sibi soluebant tributa, et post illum ceteris suis posteris.

3. Populus Romanus olim elegit imperatores, siue in comitiis, siue per senatum. Id quod tale probare conatur per n. 2. 3. 4. Et hinc colligit, nec hodie Germanos eligere posse Romanorum imperatorem, sed ipsos Romanos, et qui eos repraesentat, pontificem. Sed haec omnia falsa. Nam 1. ex historia notissimum, olim imperium inter Romanos fuisse successuum, adeo, vt et adoptiui admitterentur. 2. Post Neronem elegerunt legiones Iudaicas, et hinc postea quoque electionem plerumque per milites factam, ita tamen vt filii succederent patri. 3. Transla-

Translatum in orientem imperium itidem successuum fuisse, et imperatores ibi semper inconsulto populo Romano imperasse.

3. Si concedatur, populum Romanum imperatorem sibi eligere potuisse: potuit sane id etiam in reges a Germanis electos transferre, et iuri suo renunciare.

4. Denique quum negare saluo pudore nequeat, in Carolum M. et Ottonem M. translatum esse imperium, aequae ac in eorum posteros, addit tamen sub finem n. 3. *ita tamen, ut ius sibi aliquod retineret*, cet. Rectius saeculo XII. GUNTHERVS in *Ligurino lib. III.*

*Quemcumque sibi Germania regem
Praescit, hunc diues submisso vertice Roma
Suscipit, et verso Tyrrim regit ordine Rhenus.*

5. Non potuisse aliquem Romanum imperatorem esse sine coronatione episcopi Romani. Ergo electionem ab electoribus factam tantum constituere regem Germanorum, coronationem pontificis imperatorem. Sed ea omnia 1. rationibus politicis refragantur. Nam coronatio numquam dat ius imperandi, sed est signum imperii iam legitime delati. Non quis coronatur, ut sit rex, sed quia iam est rex. 2. Hodie a temporibus Caroli V. coronatio Romana omittitur, et tamen reges Germanorum dicuntur ab ipso pontifice *electi* Romanorum imperatores.

6. Episcopum Romanum vacante imperio inuestituram tribuere feudorum imperii Romani. Id falsum. De furto aliquando id ausus est in ducatu Hetruriae et Parmensi, (et quid non audet pontifex?) sed semper contradixerunt imperatores, qui et utrumque ducatum sibi hodiernum vindicant tamquam feuda imperii. Vid. GUNDELINGII *Diss. de iure imperat. et imperii in ducatu Hetrur.* et BOEHMERI *Diss. de iure imperii in ducatum Parmensem.*

§. 12. 13.

Diximus supra morte exstingui dominium. Iam sequuntur binae exceptiones:

1. Ex iure civili, quod dominium in herede continuetur,isque cum defuncto pro vna persona habeatur: Sed id, ut dixi, ex iure civili est.

2. Ex iure gentium, quod victor continuat iura victi. Sed hic distinguendum. Non continuat victor iura victi personalia: Hinc non fit vxoris victi maritus, non liberorum victi parens.

Heineccii Prael. Gros.

Ll

cet.

cet. Continuat tamen iura victi in re, scilicet, quae habuit in re publica, e. g. ius venandi, piscandi, ius ex foederibus quaesitum. Sed de his infra libro III. erit agendum pluribus.

CAPUT X.

DE OBLIGATIONE, QVAE EX DOMINIO ORITVR.

§. I.

num. 1.

Diximus haftenus de dominio, quomodo et adquiratur, et desinat, seu amittatur. Dominium vero quum sit ius aliquod in re: non potest non certos effectus producere. Isti effectus consistunt in obligatione aliorum. Si enim dominus sum, alii obligati sunt, ut me non turbent, ut mihi rem meam reddant, ne ex meo lucrum capient, cet. Et de his obligationibus erga dominum agitur hoc capite, ubi

1. praemittuntur duae regulae huc pertinentes, §. 1. 2.

2. ex his regulis varii casus et quaestiones solvuntur, §.

3. ad fin.

num. 2.

Regula I. haec est: *qui rem nostram in sua potestate habet, efficere tenetur, quantum in se est, ut in nostram potestatem veniat.*

Regula acquissima est, et ex pacto deriuanda. Res omnes olim erant in communione. Postea homines introduxere dominia. Id fieri aliter non potuit, quam per pactum, quo alter alteri promissit, siue expresse, siue tacite, quod quisque occupasset, id eius futurum. Atqui eius non esset, si unicuique liceret rem alienam sibi retinere: ergo tenetur, qui habet, reddere, vel operam dare, ut ad priorem dominum perveniat. Ex quo patet, hanc obligationem perfectam esse, et ex ipsa regula aeternae veritatis fluere, *pacta sunt servanda.*

Additur tamen, *quantum in se est*, quia (1. nemo tenetur ad impossibile. Hinc si verus rei dominus investigari nequit; in dubio omnino est melior conditio possidentis. 2. Quia nemo tenetur id suis impensis facere. Nam uti ego non possum saluam iustitiam cum alterius damno locupletari, ita nec alter debet cum

meo.

meo. Ergo si intelligam, dominum rei, quae apud me est; Romae vivere, is debet suo sumtu rem recuperare.

Quaeritur autem, *an circa regulam discrimen sit inter bonae num. 3. et malae fidei possessorem?* Ratio dubitandi est, quod, qui rem alienam bona fide et iusto titulo adquisiuit, non peccauit, adeoque et iactura rei suae puniri nequeat. Resp. non hanc obligationem ex delicto esse, sed ex re ipsa, et hinc nihil interesse, siue quis bona, siue mala fide possideat. Rem meam repeto, non quia alter iniuste eam adquisiuit, sed quia mea est. Repeto non ex delicto, sed ex pacto illo primaueo inter homines, de quo n. 2. diximus.

Ex eo sequitur, vt omnes contractus posteriores huic obligationi cedant, e. g. depositum, commodatum est reddendum. Et tamen si quis rem alienam apud me deposuerit, vel mihi commodarit, eam reddere non teneor deponenti, vel commodanti, sed vero domino superuenienti, et rem suam vindicanti.

Rationem huius iuris hanc reddit Grotius, quod haec obligatio sit ex contractu illo primaueo et antiquissimo, de quo n. 2. vnde ei cedere debeant contractus recentiores et posteriores. Sed commodior et propior dari potest ratio. Nam contractus non valent, vbi contrahens iure contrahendi destituitur. Atqui de rebus alienis contrahens iure omni destituitur contrahendi. Ergo eius contractus non valent, adeoque dominus praefertur merito deponenti vel commodanti, qui nullum ius rem alienam deponendi commodandiue habuerunt.

Sed obiici posset, 1. dominium non esse ex iure naturae, sed ex instituto hominum, contra ex iure naturae esse regulam, quod pacta sint seruanda. Resp. negando antecedens, et distinguendo. Non est dominium ex iure naturae absoluto, Deus enim omnia creauit in communione primauea: est tamen ex iure naturae hypothetico. Posito enim, homines dominium introduxisse, sequitur etiam, vt dominus in rei suae possessione non sit turbandus. Contra ius naturae numquam dicit, contractus esse seruandos, vbi persona nullum contrahendi ius habet.

2. Neminem debere locupletiores fieri cum alterius damno, at locupletiores fieri dominum, si ego eius rem titulo onero-

so adquisitam gratis reddere teneat. Resp. negamus dominum fieri locupletiozem, nam rem suam recipit. Nec alter gratis id facit: pretium enim repetit ab auctore suo. Sed forte is non adest, vel non soluendo est. Resp. tunc id infortunium ferre non potest dominus, sed imputare sibi debet is, qui cum ignoto contraxit.

Recte ergo tradunt ICTi, possessorem rem alienam restituentem ne *supers* quidem exigere posse, id est, ne honorarium quidem, (*einen Recompens.*) quia dominus rem suam non teneatur bis emere. Aliud si *supers* promissum: tunc enim inuentor illud ex pacto exigit.

§. 2.

num. 1. Sequitur regula altera: *qui rem alienam bona fide possidet, in tantum tenetur ad restitutionem fructuum, in quantum iis factus est locupletior.*

Ratio est, quia cuius res est principalis, eius quoque sunt accessiones, id est, fructus. Ergo si hos retineret possessor; fieret cum alterius damno locupletior. Iam quum hoc iniquum sit, sequitur sane, vt tantum restituere teneatur, in quantum factus est locupletior.

Hinc varias conclusiones elicit auctor, e. g. sequitur inde

num. 1.3. 1. Vt ex actu serui insistoris teneatur dominus, non solum ex iussu et mandato, sed etiam si se ignaro contraxit, modo in rem suam versum sit. Cur? nemo debet cum alterius damno fieri locupletior.

2. Vt qui pro altero fideiussit et soluit, licet pro ignorante, possit actione negotiorum gestorum utili indemnitate petere. Cur? ex eadem ratione.

3. Vt qui pecuniam mihi surreptam a seruo, tamquam rem peculiarem consumsit, mihi teneatur ad restituendum, ex eadem ratione.

4. Vt si cum pupillo contraxerim, agere aduersus illum possim, si sit locupletior factus, quum alias contractus huius modi ex parte pupilli nullam producat obligationem.

5. Vt si a creditore pignus alienum fuerit venditum, in tantum teneatur domino, in quantum factus est locupletior. Et quae

quae sunt alia huius generis exempla. Innumera enim in iure vniuerso, maxime in materia de quasi contractibus, passim occurrunt.

§. 3.

Haec prior pars capit. Sequitur iam altera, in qua varias quaestiones ex his principiis soluit auctor. Nam

1. Queritur, *an bonae fidei possessor rei alienae teneatur ad restitutionem, si ea perierit?* Resp. minime. Nam 1. res perit suo domino, 2. bonae fidei possessor, vt supra §. 2. diximus, tenetur tantum, quatenus factus est locupletior. Atqui dum nec rem habet, nec pretium, non est factus locupletior, sed pauperior, ergo nihil restituit.

§. 4.

Qu. 2. *an bonae fidei possessor restituat fructus exstantes?* Resp. omnino, 1. quia accessorium sequitur suum principale, 2. quia alias cum alterius damno fieret locupletior.

Sed distinguendum tamen monet auctor inter fructus rei, et fructus industriae, quia hi, inquit, non rem, sed industriam sequuntur. Sed id recte intelligendum. Qui e. g. agrum meum habet, et eum colit, et conueit, procul dubio mihi debet messem, sed industriales fructus sibi capit, id est, non accipio messem, nisi soluerim impensas in culturam et semen factas. Alias enim dominus cum bonae fidei possessoris damno locupletaretur.

§. 5.

Qu. 3. *an bonae fidei possessor teneatur ad restituendos fructus consumptos?* Resp. quatenus factus est locupletior. Tunc autem censetur factus locupletior, si iis ad necessitatem, non voluptatis causa, e. g. piris, pomis, leporibus, cancriis, cet. usus est, quia in promptu fuerunt, non factus est locupletior, quia iis facile caruisset, nisi fuissent in promptu.

§. 6.

Qu. 4. *an teneatur bonae fidei possessor ad restituendos fructus percipiendos?* Negatur, 1. quia nec rem habet, nec pretium. 2. quia non factus est locupletior.

Obiici posset, male eum egisse, quod hos fructus neglexerit. Resp. bonae fidei possessor se putat esse dominum, et hinc quoque in suo arbitrio positum credit, velitne fructus percipere, nec ne. Aliud ergo in malae fidei possessore, qui cum sciat rem esse alienam, merito et percipiendos fructus restituit.

§. 7.

Qu. 5. *an si quis rem alienam sibi donatam alii iterum donarit, verus dominus ab hoc pretium resciscere possit?* Neg. quia 1. rem restituere non potest, quam non habet, nec 2. pretium, quia donando non factus est locupletior, secundum §. 2.

Excipitur tamen donatio remuneratoria, vel necessaria. Nimirum donationem diuidimus in simplicem, quae fit ex mera et sola liberalitate, et remuneratoriam ac necessariam, quae salua exstimatione omitti nequit, e. g. quam sponsus facit sponsae. Posteriore casu, si quis rem alienam donat, omnino fit locupletior, dum suae rei parcit, adeoque tenetur ad restituendum, per reg. 2. §. 2.

§. 8.

Qu. 6. *Si quis rem alienam emitam iterum vendiderit, an restituere debeat vero domino pretium?*

Resp. aut eodem pretio rem vendidit, quo emit, tunc nihil restituit, quia nec rem habet secundum reg. 1. §. 1. nec locupletior factus. reg. 2. §. 2. aut maiore pretio vendidit, quam emit, tunc lucrum debet restituere, quia in tantum factus est locupletior, reg. 2. §. 2. E. g. emit quis anulum viginti florenis, eum iterum vendidit 30. florenis: tunc quia 10. florenis factus est locupletior, tantundem etiam restituit.

Sed hoc si non dolose alienauerit. Nam si quis bona fide rem alienam emit, et, posteaquam intelligit, verum dominum vindicaturum, eandem dolose vendit, licet eodem pretio, quo emit, tunc totum pretium restituit, quia dolo ius naturae non adhsit. Et hinc est, quod iure civili is, qui dolo possidere desit, pro possessore habetur.

§. 9.

§. 9.

Qu. 7. *an, qui rem vero domino restituit, pretium eius, quod ipse expendit, recipere possit?* num. 1.

Resp. minime, 1. quia ne *supra* quidem exigere potest, §. 1. n. 5. ergo multo minus pretium, 2. quia dominus non esset dominus, si rem suam de nouo emere, et pecunia sua dominium eius recuperare deberet; 3. quia emtor rei alienae, si in bona fide sit, potest ab auctore vel venditore suo pretium repetere, quippe qui ei ad euictionem tenetur.

Excipit tamen auctor casum, si ne dominus quidem rem suam recuperaturus fuisset sine pretio quodam oblato, tunc illud bonae fidei emtori solui aequissimum esse. E. g. adferri aliquis iussit merces ex India: piratae nauem intercipiunt, et merces vendunt. Mauius bona fide aliquas res emit, verus dominus eas vindicat. Tunc aequitas suadere videtur, ut partem pretii restituat emtori, quia sine *λύσις* vel pretio res suas ne a piratis quidem recepisset.

Ita Grotius. Sed ego distinguere malle inter regulas iusti et honesti. Ex regula honesti res certa est, non autem ex regula iusti, quae dominum non iubet res suas bis emere. Hinc laudabitur eius virtus, qui partem pretii restituet, sed non dicetur iniustus, qui non restituet. Qui enim iure suo utitur, nemini facit iniuriam.

Hinc confectaria quaedam eruit auctor, veluti 1. quod qui *num. 17* impensas alieni funeris fecit, eas iure ab heredibus repetat, quia hi facti locupletiores; 2. quod negotiorum gestor lucri causa aliena negotia administrans tamen iure repetat tantum, in quantum ablens factus locupletior, 3. quod ei, cuius res nauis leuandae causa iactae sunt, reliquis, quorum res seruatae; merito teneantur ad contributionem secundum legem Rhodiam de iactu. Dum enim alterius detrimento res suas seruauerunt; facti sunt locupletiores. Sed haec facilia, et ex ipso iure citili nota.

§. 10.

Qu. 8. *Si rem alienam emerim bona fide; et postea, ubi intellexi, dominum eam vindicaturum, eam restituerim venditori, ut mihi pretium redderet: an ita liberor?* 10

Neg.

Neg. 1. quia dolo possidere desii, doloque ius naturae non adquisivit, 2. quia obligatio restituendi adest, simulac comperi, rem esse alienam. *Reg. 1. §. 1.* Dum ergo rem non domino restitui, furtum commissi.

§. 11.

Qu. 9. *an, qui rem alienam, cuius dominus ignoratur, possidet, eam teneatur pauperibus dare?* Ita vulgo docent casuistae, Caietanus, Soto, et alii. Satis callide. Nam, quinam illis sunt pauperes? Clerici et monachi, quia votum paupertatis conceperunt, inprimis Franciscani vel fratres minimi, qui ideo id nomen adsumere, ut in eos quadrare videretur dictum *Servatoris: quidquid feceritis uni ex minimis fratrum meorum, id mihi fecistis.*

Sed ius naturae id non docet, 1. quia in re aliena nulli ius est, praeter dominum. 2. quia ubi dominus ignoratur, ibi nullus adesse videtur dominus: non esse enim, et non apparere, in iure pari passu ambulant; 3. quia in dubio melior conditio est possidentis.

Interim uti semper pium est, benefacere pauperibus; ita et res inventas illis concedere pium est, modo ne quis existimet, pauperibus ius aliquod esse, illas sibi vindicandi.

§. 12.

Qu. 10. *an, quod ob turpem causam datum, restituendum sit causa non secuta?*

Neg. 1. quia res non est aliena, quippe cuius dominum ipse verus dominus in accipientem transtulit. 2. quia, licet conditionaliter data sit, si quid turpe fiat: tamen implementum huius conditionis exigere non potest dominus, quum sit contra leges, adeoque moraliter impossibilis.

Quia tamen iure conditio impossibilis contractui vel pacto adiecta, contractum reddit nullum: hinc nec accipiens rem ob turpem causam acceptam retinere potest. Et hinc plerumque illa a magistratu vel fisco in poenam eripitur.

§. 13.

Qu. 11. *an res alias pretio oblato retinere iniuncto domino possimus?*

MEDI-

MEDINA de restitutione, qu. 10. id affirmat, si res sit fungibilis. Grotius autem refellere conatur *Medinam*, et dicit, in rebus fungibilibus tantumdem esse idem, si consensus domini accedat, e. g. in mutuo, non autem iuvito domino.

Sed *Medinae* decisione nihil aequius est. Nam certissimum est, res fungibiles non admittere pretium affectionis. Demonstravit id *THOMASIVS* in *Diff. de pretio affectionis in res fungibiles non cadente*. Iam ubi nullum est pretium affectionis, ibi tantumdem est idem.

Quam ridiculus esset, qui mihi indignaretur, quod ei eiusdem bonitatis, quantitatis, et fabricae chartas restitutionem, non autem eam ipsam, quam a tertio bona fide emerint? Hinc hodie omnes auctores adientuntur *Medinae* contra Grotium, cuius decisio tunc demum iustam habet rationem, si vel villa in rem cadere potest affectio.

CAPVT XI.

DE PROMISSIS.

§. I.

Supra diximus, alium esse modum acquirendi, alium titulum. Modus acquirendi est causa dominii proxima: titulus est causa eiusdem remota. Ille iure civili tribuit ius in re; hic ius ad rem: ille producit actionem realem; hic personalem, e. g. si praedium emptum mihi traditum est: traditio est modus acquirendi, titulus emptio.

Quum itaque supra actum de modis acquirendi: sequuntur iam varii tituli. Inter quos primus est *pactum* vel *promissio*. Agit auctor

1. de modis promittendi, §. 1-4.
 2. de personis promittentibus, §. 5-7.
 3. de rebus quae promittuntur, §. 8-9.
 4. de promissionibus per alios factis, §. 10-13.
 5. de acceptatione §. 14. 15. ac denique,
 6. de effectu promissionum. §. 16. fin.
- I. De modis promittendi notum est, promitti aliquid posse vel *num. 1.*
Heineccii Prael. Grot. M m per

per modum pacti nudi, vel per modum contractus. Per modum pacti, si res futura promittitur; per modum contractus, si praesens adest obligandi causa, quam veteres vocant *συνάλλαγμα*. Iam itaque

1. Quaeritur, an et nuda pacta sine causa praesenti, ubi nullum est *συνάλλαγμα*, obligent?

Si de iure civili Romano quaestio esset, facile responderetur, pacta nuda nec obligationem, nec actionem producere, sed exceptionem tantum ex edicto praetoris. At hic non quaeritur de iure civili, sed naturali. Omnes agnoscunt, iure naturae inter pacta et contractus quoad effectus nullam esse differentiationem. Solus FRANC. CONNANVS, qui *Commentarios iuris civilis* satis doctos scripsit, lib. I. cap. 6. et lib. V. cap. 1. in alia omnia it, statuitque, nec iure naturae pactum vel promissionem nudam producere obligationem.

§. 1. Eius argumenta haec sunt: 1. quia hic in pari culpa versentur promittens et is, cui promittitur: ille, quia sine iusta causa praesente promittit, hic quia temere promittenti credit.

2. Quia ita periculum immineat omnium, fortunis, et saepius homines ex temeritate et ostentatione, quam animo deliberato promittant.

3. Quod alias nullum esset discrimen inter honestum et iustum. Honestum esse, huius modi promissa servare, sed non iniustum, si non serventur. Videri haec singulorum virtuti et pudori relicta.

4. Quod saepe promissa ipsi stipulanti sint inutilia, et hinc et ob eam causam cesset obligatio.

Ergo, inde concludit Connanus, iure naturae nullam promissionem obligare, sed tantum ex legibus civilibus. Has autem non pactis nudis adscribere, sed contractibus tantum.

Ceterum id falsum esse, multis argumentis demonstrari posset. Grotius utitur

1. Argumento ab absurdo, et ita ratiocinatur: si verum est, pacta nuda iure naturae non valere, tunc sequitur, ut nec foedera inter gentes ullius momenti sint: nam ea plerumque in sola futuri promissione consistunt. At posterius est absurdum. Ergo et prius.

2. Simile absurdum inde deducit, dum ita argumentatur: si pacta iure naturae non valent, tunc obligationem suam nanciscuntur.

tur ex lege. *Aqui lex ipsa in ciuitatibus democraticis est pactum.* l. 2. D. de legib. Pactum ex mente Connani est inualidum. Ergo pacta quaedam valent, ob pacta, quae non valent. Quid absurdus excogitari posset?

3. Supra demonstrauius, ipsum dominium in alium transferri sola voluntate nostra. Quidni et obligatio personalis?

4. Idem Grotius demonstrat ex consensu sapientum, *can-* num. 4. que in rem laudat testimonia Ictorum l. 1. D. de pact. l. 1. D. de pecun. constit. cet. Ciceronis, Horatii, Platoniorum. Sed hic quidem consensus sapientum tantum abest, vt ius faciat, vt ne gentium quidem consensus, vti saepe diximus, pro iure sit.

Potius itaque videbimus, quid ad Connani argumenta respondendum sit. Ea hoc ordine refellit Grotius, vt 1. praemittat tres gradus promissionum, quos vulgo confundunt, n. 5. deinde vero 2. singula argumenta expendat n. 4.

I. Primus gradus est *asseritio*, explicans de futuro animum; qui nunc est. Et hic est actus *μονωπλευρες*, vnilateralis, ex quo nemini ius nascitur. E. g. si inter sermones familiares dixerim, Titium aliquando heredem instituam. Hic tantum explicauimus animum meum, quid futurum me statuerim, sed nihil promitto.

Et de hoc primo gradu obseruandum, *voluntatem hominis ambulatoriam esse usque ad mortem*, nec vlli fieri iniuriam, si Titium heredem non scribam. Ratio duplex est, 1. quia ex actu *μονωπλευρου* nemini ius quaesitum est, vt possit mutationem hanc impedire; 2. quia nemo sibi ipse legem dicere non potest, a qua recedere non liceat. Legem enim ferre est superiorum, legi parere inferiorum. Nemo autem ratione sui ipsius vel superior est, vel inferior, ergo nemo sibi ipsi legem dicit, adeoque semper quis voluntatem suam mutare potest.

II. Secundus gradus est, quando voluntas non solum explicatur, sed et determinatur, et ea determinatio certo et perspicuo signo explicatur. Hic quoque est actus *μονωπλευρες*, et iure naturae nos obligat, sed alteri ius nullum est rem a nobis exigendi. Dicitur alias *pollicitatio*. E. g. vocato notario cum testibus declaro, me Titio aedes donatas velle. Titius non adest, nec acceptat. Vnde non pactum est, sed pollicitatio. Quaesitur, *an obligatus sim?* Sine dubio, turpe enim est promissa non seruare. *An autem alter habet actionem ad aedes a me exigendas?* Minime, quia est actus *μονωπλευρες*, ex quo nullum alteri ius quaeritur.

M m 2

Si

Si obliuicias, absonum videri, me obligari, alteri vero non esse ius exigendi: facilis est responsio, omnia officia imperfecta obligationem producere, sed non dare ius exigendi. E. g. obligatus sum ad eleemosynas dandas, sed non ideo pauper eas a me iure exigit.

§. 4.

num. 1. Tertius gradus est, vbi voluntas de futuro non solum determinata est, et luculento signo explicatur, verum etiam ab altero acceptatur.

Hic autem actus *בְּרִית* vel bilateralis est, et inde alteri ius nascitur, et plena ex parte nostra obligatio.

Ratio est, quia tum hoc modo paciscimur, aut dominio nostro nos abdicamus, quod fit promissione de dando aliquo, vel libertatis nostrae parti renunciamus, quod fit promissione de faciendo. Atqui quilibet potest iuri in sui fauorem introducto renunciare, et ad renunciata tunc non datur regressus.

Id illustrat Grotius ex ipsa Scriptura sacra vbi 1. dicitur, ipsum Deum promissa violare non posse; quanto magis homines, qui legibus subsunt. 2. Salomon dicit, promittentes illaqueari verbis oris sui. *Proverb. V. 1. 2.* Promissum *עֲוֶלָה* dicitur *Ofereth, vinculum.*

num. 2. 3. Iam itaque ad Connani argumenta. Primum est, in pari culpa versari promittentem et eum, cui promittitur. Resp. verum id esse, si non deliberato animo, non serio, sed per sermones et iocum fiat promissio. Et hinc leges Romanae stipulationem, tanquam certum signum promissionis seriae constituisse. Enimvero inde non sequitur, vt sine stipulatione promissio non possit esse seria et ex deliberato animo certoque consilio profecta. Iam itaque respondemus: si paciscentes in pari culpa sunt, et alter temere et non serio promittit, alter temere promittenti credit, tunc concedimus nullam esse obligationem. At quis dixerit, pactum nudum esse promissionem temerariam et minus seriam?

Alterum argumentum nullius momenti est. Dicit, inde magnum fortunis nostris imminere periculum, quia prompti sint homines ad promittendum. Resp. prompti sunt homines ad promissiones et secundi generis, sed inde nullum imminet fortunis periculum. Primi enim generis promissio potest reuocari; alterius generis nullum tribuit ius exigendi. Ad tertii generis
pto-

promissa non magis promti erunt homines, quam ad contrahendum, si nouerint, obligationem inde nasci.

Tertium ergo plane inuili est. Sic futurum putat Connanus, ut nihil discriminis super sit inter iustum et honestum. Sed quidni? An non multa alia sunt officia misericordiae, liberalitatis, gratitudinis, quae ex solis honestatis regulis fluunt?

Denique quartum argumentum fere ridiculum est. Possunt pacta nouumquam utrique inuitalia esse: Ergo non producunt obligationem. Nam 1. idem dici potest de contractibus: quis enim neget e. g. contractum emtionis venditionis utrique aliquando inutilem esse? et tamen ea ex mente ipsius Connani obligationem producit. 2. Si utrique inutile erit pactum, tunc illud possunt mutuo consensu tollere.

Maneat ergo certum fixumque, nullum esse iure naturae inter pacta et contractus discrimen, sed illa aequae, ac hos, obligare, modo sint seria, et ex animo deliberato profecta.

§. 5.

II. Pergimus ad alteram partem huius capituli de *personis* num. 1. *promittentibus*, ubi regula generalis: *in promittente requiritur rationis usus*. Qui enim promittit, debet animum habere vel dominio, vel libertati suae naturali renunciandi. Illum animum habere nequit, qui rationis usu destituitur. Ergo hic pacisci et promittere non potest. Ex quo sequitur,

1. Ut amentis, furiosi, infantis promissio nulla sit. Circa furiosum tamen obseruanda exceptio. Nam saepe sunt dilucida furoris interualla. Quum ergo iis durantibus furor cesset: quaeri potest, *an tunc promittere possit furiosus?* Plerumque id indistincte affirmatur. Sed rectius distinguitur inter actum *transientem*, et qui explicari statim potest, e. g. donatio, emtio, venditio, et *permanentem*, ubi actio explenda per distinctas praestaciones, e. g. promissio matrimonii, patrocinii forensis, cet. Ille a furioso expediri potest, durante dilucido interuallo, hic non potest. Vid. PUFENDORFF. de iure naturae et gent. lib. III. cap. 6. §. 3.

2. Ut minoris promissio valida sit. Quamuis enim ius civile minorenni concedere soleat restitutionem in integrum: id beneficium tamen ignorat ius naturae. Minor enim non destituitur ratione, scit, quid agat. Ergo saltem naturaliter obligatur.

nu. 3. 3. Sed quaeri solet, *quando puer ratione uti incipiat* ? Resp. id non iure naturae, sed iure civili esse definiendum. Ratio est, quia ius naturae non nisi regulas vniuersales suppeditat. De hac re autem nihil vniuersaliter statui potest. Nam pro diuersitate ingenii, temperamenti, patriae, vel climatis, alii citius adolefcunt et sapere incipiunt, alii tardius. Ius civile ergo hic sequitur id, quod in singulis locis vt plurimum fit.

An, cum ius civile circa eam rem non sit vbique idem, quid obtineat, si diuersarum rerum publicarum ciues contrahant ? Et resp. sequendum esse ius loci, vbi contrahitur. Ergo si in mari, vel in insula contrahatur, vbi nulli coloni reperiuntur, tunc res redit ad simplicitatem iuris naturalis, adeoque non ad aetatem contrahentium respicitur, sed disquiritur, an contrahentes vsum rationis habuerint, cuiuscumque aetatis sint.

§. 6.

num. 1. Secundo in promittente requiritur, vt velit promittere. Voluntati vero obstant error et metus, hinc de illo §. 6. de hoc §. 7. agitur.

Notum est, quam multa Icti praecipiant de errore circa substantiam et accidentia contractus, de dolo dante caussam contractui et incidente, de contractibus bonae fidei et stricti iuris.

Sed haec omnia cum sint iuris mere civilis : merito quaeritur, quid hic statuatur ius naturae ?

Grotius existimat, omnem errorem, sine culpa nostra admissum, promissum vitare. Idque probat

num. 2. 1. a simili. Si lex fundatur in praesumptione facti, quod factum reuera se ita non habet, ibi lex non obligat. E. g. in l. 5. C. de seru. fugi. dicitur, si mancipium reipublicae sollicitatam aufugerit, tunc sollicitatorem non modo daturum pretium, sed et defensorem ciuitatis adactum iri ad mancipia restituenda. Cur ? Fundatur ea lex in praesumptione, quod defensor ciuitatis negligens fuerit in persequendo mancipio. Si iam ergo demonstrari potest contrarium legis, nulla erit obligatio. Quum itaque hoc circa legem obtineat : idem etiam obtinebit circa legem, pacta, et promissa, vt si fundata sint in praesumptione certae qualitatis, si ea non adsit, obligatio quoque cesset. E. g. promitto centum pro poculis argenteis;

genteis , fundo hic promissionem in eo , quod pocula sint argentea. Si ergo aenea sint , merito cessabit obligatio.

2. Idem probat inde , quia omnis promissio certa ratione conditionalis est. Promittimus enim sub conditione , si haec rei qualitas adsit. Iam conditionale promissum non existente conditione non obligat , ergo nec promissum ab errante factum.

At hanc regulam fere destruunt exceptiones. Nam 1. promissum errantis obligat , si ipse sua culpa errarit , rem non recte considerando. E. g. vendebat aliquis aedes : emtor omnes eius partes viderat , et placuerant. Postea errasse se dicebat circa materiam , putasse se totas aedes esse lapideas , quum partes superiores sint lignae. Errauerat hic sua culpa.

2. Si erratum in re , in qua promissum non fundatur. E. gr. Emit aliquis equum , putavit eum esse Holsaticum , iam Frius adparet. Si cetera recte se habeant , frustra ad hunc errorem provocatur.

Ergo rectius dicitur , *in dubio semper error nocet erranti* , nisi 1. sit error inuincibilis , 2. alterius dolo excitatus.

§. 7.

Iam de metu quaeritur , *an is pactum vel promissum vitiet ?* Veteres ICti existimabant , promittentem ex metu obligari : postea praetor dabat restitutionem in integrum vel actionem quod metus causa. Ergo iure civili stricto metus actum non vitiat , sed iure praetorio rescinditur.

Ratio repetenda ex philosophia Stoica , cui dediti erant ICti. Nam Stoici statuebant , sapientem affectibus carere omnibus , eum nec metuere , nec sperare , nec gaudere , nec lacrimare : si in Phalaridis tauro sit , tamen dicturum , eia quam suaue est , quam nihil curo. Hinc colligebant , eum , qui metuit , non esse sapientem , sed stolidum , stolidum autem non debere fructum capere stultitiae suae.

Iam omnes existimant , haec ratione carere , idque luculenter demonstravit GYNDLINGIUS in *Diff. de efficientia metus iniusti in statu naturali et civili*. Et tamen Grotius defendit sententiam Stoicorum et ICtorum , putatque , ex metu initum pactum omnino obligare. Rationes has habet , 1. quia hic re vera sit consensus. Coacta voluntas etiam est voluntas , immo quam maxime voluntas ; 2. quia hic non est consensus conditionalis , sed purus. Vult enim se a periculo liberare.

Possit

num. 3.

Possent obici, dari tamen restitutionem in integrum. Resp. Grotius, id esse ex iure ciuili. Hoc saepe actus iustus rescindere ob rei publicae vtilitatem, e. g. contractus minoremnum, cet.

Sed haec doctrina non est publici saporis. Metus est affectus, qui non in stultos solum cadit, sed in sapientissimos quoque. Repraesentato enim malo futuro, et difficulter declinando, necessario metus oritur. Iam ergo non quaeritur, an ego conserim, sed an alteri ius fuerit metum incutiendi, eoque modo consensum eliciendi. Si illi ius est, tunc et promissum metu extortum valet, e. g. si debitor morosus metu carceris promittat, se intra octiduum soluturum. Sin alteri nullum ius est, promissum quoque nullum est. Hinc alio tempore allegaui elegans epigramma MARTIALIS lib. II. ep. 59.

Quid si me tonsor, dum stricta nouacula supra est?

Tum libertatem diuitiasque roget,

Promittam, nec enim rogat illo tempore tonsor,

Latro rogat, res est imperiosa timor.

Sed fuerit curua cum inta nouacula theca,

Frangam tonsori crura manusque simul.

Hanc doctrinam ipse auctor agnoscere tenetur in verbis §. 2. sed illud simul verissimum censeo. cet.

§. 8.

num. 1.

Sequitur pars III. capitis de materia vel re, quae promittitur. De ea primo notanda regula: res promissae debent esse in potestate promittentis. Si enim non sint in potestate illius, sunt impossibiles. Impossibile autem nulla est obligatio. Hinc sequitur,

1. Rerum illicitarum promissionem esse nullius effectus. Vnde enim nascitur obligatio promittentis? Ex iure naturae, quod dicit pacta sunt seruanda. At idem ius prohibet res illicitas. Ergo fieri nequit, vt idem ius simul prohibeat homicidium, et tamen promittentem homicidium, adigat, vt promissum praestet.

num. 2.

2. Inde sequitur, vt valeat promissio rei futurae, et nondum existentis. Quamuis enim iam non sit in potestate promittentis, sufficit tamen, quod in posterum esse possit.

3. Vt si promiserit quis factum alienum, non teneatur, nisi .vt

vt omnem diligentiam adhibeat. Impossibile est enim alienam operam praestare. E. g. promitto hanc virginem tibi nupturam.

4. Vt non valeat promissio matrimonii a coniuge facta. num. 37
Auctor quidem contrarium sentit, et existimat, ius civile solum rescindere hanc promissionem, quum tamen exitum habere possit: sed probe tenendum, hanc promissionem iuri naturae repugnare, quia promittitur res illicita, matrimonium nimirum ab eo, qui id iure non potest. Si dicas, promittitur res futura, in eum euentum, si casus exstiterit. Respondeo, et hanc promissionem turpem esse, quia ita sperat et optat coniugis mortem, cui per omnem vitam se praestiturum promisit.

Accedit et alia ratio politica. Nihil enim periculosius est huius modi promisso. Non enim moriente coniuge; promittens facile eo adduci se patitur, vt manum illi inferat, et manu euacuet thalamum.

§. 9.

Quaeritur porro, *an valeat promissum rei natura vitiosae?* Id recte negatur, quia, vti iam dixi, non potest ius naturae adistere promisso facti, quod ipsum ius naturae prohibet.

Ex quo sequitur, vt huius modi ex promisso nulla nascatur obligatio. Hinc nec qui assassinium promisit, tenetur ad soluendum. Pactum enim nullum est: rei nullius autem nulli sunt effectus.

At et hic dissentit auctor, et putat, id quidem verum esse de pacto non impleto: sin iam alter pacto satis fecerit, ei omnino pretium deberi, idque probat exemplo Iudae, qui Thamari, quam meretricem putabat, conuentam mercedem soluit. *Genes. 35. 11.*

Sed exempla non probant ius. Sufficit, quod huius modi pactum nullum sit. Si nullum est, nullam potest producere obligationem. Persoluit ergo Iudas mercedem scortationis promissam, sed non persolvere debuisset, si noluisset. Vterque paciscens autem obligatur ad poenam.

§. 10.

Quaeritur, *quid sentiendum de promissione rei iam tum debitorae?* E. g. debitor debet iam antea. 100. et iam creditori solutionem promittit.

Heineccii Prael. Grot.

N n

Resp.

Resp. tanto magis debet, quia ad vetus debitum accedit noua obligatio ex promisso. Si promisso per stipulationem sit, tunc ius ciuile fieri dicit nouationem, quia quum antea deberetur ex contractu mutui, iam deberi incipit ex stipulatione. Sed hoc ius naturae ignorat, quia omnes contractus sunt eiusdem generis. Idem ius ciuile si pactum nudum repetatur, id vocat pecuniam constitutam. Sed et id ius naturae ignorat, quia, vt supra demonstraui, non differunt pactum et contractus.

Sed quaeritur, si vi creditor debitori suo extorqueat promissum, an tunc obligatio nascatur? Resp. minime, quia haec est vis iniusta. Sed an ideo a solutione liberatur debitor? Non, quia iam ante promissum debuit. Puniendus tamen, qui vim adhibuit, pro modo circumstantiarum.

§. 11.

Iam sequitur quarta pars capituli de promissione per se, vel alium facta. Potest quis promittere vel per se, vel per alium.

Si per se, tunc requiritur certum signum, vel actus externus, ex quo voluntas promittendi colligatur, id est, verba, litterae, cet.

Addunt nonnumquam iura sollemnitatem, e. g. apud Romanos responsionem congruam ad quaestionem, id est, stipulationem, apud veteres Germanos manus oblationem. Sed haec signa non sunt iuris naturae, quia sunt arbitraria, et apud diuersas gentes diuersa. Sufficit iure naturae, si mens et consilium adit promittendi, idque consilium eluceat ex signis externis quibuscumque.

§. 12.

An vero et per alium quis recte promittit? Resp. omnino; quia quod quisque per alium facit, illud ipse fecisse videtur, modo voluerit, alium pro se promittere, quae voluntas ex mandato colligitur.

Id mandatum vel generale est, vel speciale. Generale, si quis alterum ei negotio praeposuit, in quo opus sit contractibus et promissis. Vnde scimus, institutore contrahente ius ciuile dare actionem institutoriam, magistro nauis contrahente, exercitoriam. Speciale, si quis alterum mandato instruit, ad hoc pactum vel promissum suo nomine faciendum.

Ratione

Ratione effectus ea differentia est, quod in generali ratum debeat habere, quidquid agit mandatarius, modo res ad negotium, cui praepositus est, pertineat. At speciale mandatum non vltra obligat dominum, quam mandavit: non ergo si mandatum excessit. Ratio est, quia illo casu alter, qui cum mandatario nostro contraxit, nesciuit, quam illi potestatem fecerimus: at hoc casu id satis scit ex procuratorio vel mandato.

Rem duplici exemplo illustrat Grotius. Quod speciale mandatum non obstringat dominum, si mandatarius limites mandati transcendit, patet exemplo legatorum. Legatus duplici munitus mandato agit, 1. litteris ad principem vel rempublicam directis, quae vocantur *das Creditiv*. In illis rogatur princeps, ut huic ministro nostro fidem habeat, tamquam ipsi mandanti. 2. Litteris ad ipsum legatum directis, (*die Instruktion*.) ubi praescribitur legato, quantum promittere debeat, vel concedere alteri parti. *Quid si fines huius instructionis transcenderit?* Tunc non est pactum, sed sponso, et tunc vel legatus dixit, se non esse instructum, sed promittere sub spe rati: tunc nulla ei, cui promissum, debetur satisfactio: aut simulavit, sibi instructionem esse, et promisit: tunc debetur satisfactio. Apud Romanos illa in eo consistebat, quod legatus nudus, reuinctis in tergum manibus traderetur alteri parti. Exemplum est in sponso Numantina et Caudina apud LIVIUM, de quibus alio loco.

§. 13.

Alterum exemplum, quod docet, generale mandatum mandantem obligare ad omnia rata habenda, est actio exercitoria et institoria. Institor enim et magister navis sunt mercatoris mandatarii generales certis negotiis praepositi. Inde sequitur, ut quod ratione istius negotii cum illis agitur, id ipse dominus egisse videatur.

An ergo actiones exercitoria et institoria, sunt iuris naturae? Resp. omnino, sed qualitas tamen quaedam his actionibus accessit ex iure civili, nempe quod singuli praeponentes teneantur in solidum. Et hinc apud Hollandos id non receptum esse monet, ne homines negotiatione maritima absterreantur.

§. 14.

Quinta capituli pars agit de *acceptatione*. Hac opus esse, facile probatur. Pactum est negotium bilaterale. Ergo non sufficit vnius consensus. Si ergo utrumque consentire decet: alterius sane est promittere, alterius promissum acceptare.

Ea vel *expressa* est, quae verbis post promissionem declaratur; vel *tacita*, quae ex antecedente rogatione colligitur. Nam si ego rogo centum, alter eos promittit, in antecessum videor acceptasse: modo tantumdem promittatur, quantum rogatum. Nam si rogatus centum, promittam viginti, acceptatione specialius opus est.

Obiiciunt: atqui pollicitationem rei publicae factam sine acceptatione obligare. Vid. tit. D. de pollicitat. Resp. auctor, id iuris civilis esse. Posset addi, re vera hic loco rei publicae ipsam legem promissum acceptare, quemadmodum et acceptat pro pupillis et amentibus.

§. 15.

Quaeri etiam solet, *sufficiatne acceptationem factam esse, an praeterea requiratur, ut innotescat illa promittenti?* Subtiliter auctor resp. videndum esse, quid actum sit, nam posse utraque sub conditione conveniri, si alter acceptet, et si innotuerit, illum acceptasse. Deinde videndum ait, an promissio sit mutua, an unilateralis. Ibi necessarium esse, ut mihi innotescat acceptatio, hic praesumi, illum acceptasse.

Sed non opus est his ambagibus. Semper requiritur, ut acceptatio mihi innotescat. Non esse et non apparere in iure pari passu ambulant. Sed innotescit mihi vel per signa alterius expressa, e.g. verba, litteras, cet. vel per praesumptionem, si alter tam sit indigus, ut non possit adspernari promissum.

§. 16.

Agi iam incipit de revocatione promissi. Ea vero fieri potest 1. nondum sequuta acceptatione: Ea enim nondum facta; nondum est pactum, sed actus unilateralis, in quo voluntas ambulatoria est usque ad mortem, uti nuper demonstratum.

2. Mortuo eo, cui promissum, ante acceptationem. Quamvis enim obligatio ex promisso etiam ad heredes transeat: non tamen.

tamen transit obligatio a defuncto nondum adquisita. Aliud, si modo spes adit, e. g. si sub conditione promissum, et defunctus acceptavit promissum.

§. 17.

3. Mortuo mandatario ante negotium explicatum. Mandatario, inquam, non internuncio vel tabellario: quia in mandatario industria personae eligitur. num. 1. 2.

Proluxus hic est auctor in ratione huius iuris investiganda; eamque in eo quaerit, quod illius verbis posita fuerit obligatio. Hinc *n. 2.* addit auctor, si praesumptio sit, mandantem voluisse mandatum valere, etiamsi moriatur mandatarius. Qualem praesumptionem adesse existimat in legatis et promissis ad pias causas.

Sec haec nihili. Non valet promissum nec factum, nec acceptatum. Mandatario promittentis mortuo, nec factum est promissum, nec acceptatum: ergo non valet, nisi id per alium fieri iubeat mandans. Praesumptio hic nihil operatur, quum mandans, dum non per alium promittit, satis declarat, se iam nolle promittere. Et doctrina de causis piis maxima ex parte pontificiis principiis superstructa est.

§. 18.

An et acceptatio fieri potest per alium? Hic non quaeritur de alio, cui mandavi, id enim extra dubium est, sed de eo, qui pro me sine mandato acceptat. num. 1. 2.

Distinguit Grotius, mihiue promissum sit, an alteri. Si mihi, tunc soluendum esse, quod alterius bono acceptavi: sin alteri, tunc denuo distinguendum putat, an mandato acceptandi instructus sim, nec ne. Posteriori obligatum esse promittentem, sed alteri ius non nasci, nisi ratam habuerit acceptationem.

Iam videbimus exempla. Dixit aliquis: promitto tibi, me fratri tuo filiam vxorem daturum. Ego accepto. An recte? Omuino, quia non fratri, sed mihi promisit. Contra dixit aliquis: promitto fratri tuo, me ei filiam vxorem daturum; hic fratri promittitur: si ego mandato instructus accepto, valet promissum. Sin sine mandato: promittens obligatur, sed fratri tum

N n 3 demum

demum ius nascitur, si ratam habuerit acceptationem meam. Et id quidem rectissime. Non prius enim fit pactum, quam accesserit utriusque in idem placitum consensus.

§. 19.

Qu. an liceat et onus adicere promissioni in meum vel tertii commodum?

Facilis responsio. Si id fiat ante acceptationem, licet. Nam alteri ius nondum quaesitum est. Si post acceptationem: id frustra fit, quia alteri ius per acceptationem quaesitum auferri nequit.

Immo quum alias rogatio antecedens pro acceptatione fit, hic tamen res secus se habet. E. g. rogo, ut mihi filiam despondeas. Despondeo, si soror tua nupierit fratri meo. Hic non prius obligatur promittens, quam alter hoc onus acceptarit.

§. 20.

Qu. an promissum, cui error, metus, cet. causam dedit, possit conualescere? In iure civili in multis valet regula: quae ab initio nulla sunt, ea ex postfacto non conualescunt. At promissa conualescunt.

1. Si causa cesset. E. g. Titius promissit Maeuiae matrimonium, quia putauit, eam possidere viginti millia: postea adparet, eam ne mille quidem possidere. Interim ea ab agnato heres instituitur, et accipit 20000. Fingamus nulla fuisse sponsalia ob errorem, non amplius tamen nulla erunt, cessante erroris causa.

2. Si noua accedat paciscendi voluntas. E. g. Titius ambiens munus publicum, a patrono cogitur promittere matrimonium Titiae. Postea opponit exceptionem, quod metus causa. Interea personae in gratiam redeunt, et Titius Titiam amare incipit. Videtur iam de nouo rata habuisse sponsalia.

Sed unum moneo, hac quaestione, quod ad errorem attinet, raro opus esse, quia supra contra Grotium demonstraui-mus, promissum huius modi non esse ipso iure nullum, sed in dubio errorem nocere debere erranti. Quid enim imputari potest Titiae, si numquam gloriata de diuitiis, diues tamen ipsa est sponso?

§. 21.

§. 21.

Qu. *an causa expressa opus sit ad validitatem promissorum?*
 Notum est, iure civili si alicui dederim chirographum, falsus sim, me ei debere centum, tamen non posse actionem ex hoc chirographo institui, nisi causa debendi, e. g. mutuum, emptio venditio cet. expressa sit. *An itaque idem ius naturae exigit?*

Resp. neg. quia iure naturae mihi licet, dominium rerum mearum et sine causa ex mera liberalitate in alium transferre, e. g. donare. Iura civilia id inuenerunt, quia saepe potest latitare causa falsa, et vitiosa, e. g. debeo tibi centum, nimirum ex alea. Ius naturae hanc subtilitatem plane ignorat.

§. 22.

Ultima quaestio iam occupata est. Quaeritur nimirum, *an factum alienum promittens, eo non secuto, teneatur ad id, quod interest?*

Neg. quia factum alienum promittens non ultra se obstrinxit, quam quatenus sibi futurum sit possibile. Impossibile enim nulla promissio est. Iam nihil amplius ei possibile est, quam ut omnem operam nauet. Ergo ea nauata liberatur.

Exceptio tamen est, 1. si dixit personam alterius in sua potestate esse, 2. si in dolo sit, 3. si promiserit indemnitate.

CAPVT XII.

DE CONTRACTIBVS.

§. 1.

HActenus de pactis: iam de contractibus. Quum vero iam supra demonstratum sit, pacta a contractibus ratione effectus non differre: existimari posset, frustra auctorem distincte de utrisque egisse. Sed quamuis non differant pacta et contractus iure naturae, ratione formae, qua utrobique mutui consensus requiritur, nec ratione effectus quia utrobique nascitur obligatio: differunt tamen ratione obiecti. Paciscimur enim de rebus omnibus, contrahimus tantum de rebus, quae sunt in commercio.

cio. Hinc e. g. nuptiae pactum sunt, non contractus. Emtio venditio contractus et pactum iure naturae dici potest.

Caput nostrum constat tribus partibus. Nam explicatur

1. *quotuplices sint actus humani ad aliorum utilitatem tendentes*, e. g. *contractus*? §. 1-6.

2. *quid contractus*? §. 7.

3. *quid iustum circa contractus*? §. 8-26.

1. *Actus humani* sunt vel *simplices*, vel *compositi*, quos et §. 5. mixtos vocat.

Simplices sunt, ubi vnus contractus est, e. g. emtio venditio.

Compositi, ubi negotium ex pluribus contractibus compositum et conflatum est, e. g. loco alicui praedium rusticum, et pro pensione mihi stipulor dimidiam partem fructuum. Tunc negotium conflatum est ex locatione conductione et societate. Vnde huius modi conductor dicitur colonus partiarus. l. 25. §. 6. *D. loc. cond.*

§. 2.

Simplices denuo sunt vel *benefici*, vel *permutatorii*, seu *onerosi*.

Benefici, quando ex vna tantum parte onus, ex altera commodum est, e. g. commodatum.

Onerosi vel *permutatorii*, ubi par vtriusque commodum et onus, e. g. in emtione venditione.

Benefici vel *meri* sunt, vel *mutuam habent obligationem*. *Meri*, ubi nulla est alterius obligatio, e. g. mutuum, quo solus debitor obligatur, creditor nullo modo. *Mutuam habentes obligationem*, ubi vterque obligatur, vnus absolute et simpliciter, alter ex accidente, e. g. in commodato, deposito.

Benefici meri aut in *praesens absoluuntur*, si statim accedat traditio, e. g. si dono, et statim trado, vel in futurum prominent, si promitto, sed differo traditionem.

Benefici, qui *cum obligatione mutua sunt*, aut de re sine alienatione disponunt, vti commodatum, depositum, vel de facto, e. g. mandatam.

§. 3.

Haftenus de actibus beneficiis: sequuntur onerosi, in quibus par vtriusque commodum et incommodum. Hi vel *dirimunt partes*, vel *communione induunt*.

Dirim-

Diremtorii sunt tres illi, quos innominatos vocant Icti, *do vt des, facio vt des, facio vt facias.*

De communicatoriis videbimus §. 4.

Nam antequam ad hos progrediatur auctor, quaestionem mouet, *an inter contractus nominatos et innominatos sit iure naturae differentia?*

Iure ciuili multum differunt. Nam 1. contractus nominati singuli suam producebant actionem: innominati omnes vnā communem actionem habent praescriptis verbis. 2. In contractibus nominatis locus non est poenitentiae, in innominatis locus est, et.

Sed recte negat auctor, iure naturae aliquid interesse. Nam 1. quid aliud est emptio venditio, quam contractus *do vt des*? 2. quid aliud locatio operarum, quam contractus *do vt facias*? 2. Vtrique contractus aequae antiqui et naturales sunt, immo permutatio omnium antiquissima. 3. Perinde est, siue mihi pro re et facto meo pecunia numerata detur, siue alia res, dummodo mihi satis fiat.

Iam ergo singulorum contractuum diremtoriorum species recenset auctor. Nam in contractu *do vt des* aut

1. Res datur pro re, et tunc dicitur *permutatio*.
2. Pecunia pro pecunia, et tunc dicitur *cambium, collybus*.
3. Res pro pecunia, tunc dicitur *emptio venditio*.
4. Vfus rei pro re, vt in *pacto antichretico*.
5. Vfus rei pro pecunia, vt in *locatione conductione*.
6. Vfus rei pro re in eodem genere restituenda, *mutuum*.
7. Vfus rei pro re in eadem specie restituenda, *commodatum*.

Contractus *facio, vt facias*, innumeras habere potest species, nec hae singulare nomen admittunt, quia facta sunt innumera.

In contractu *facio vt des*, aut datur pro facto

1. Pecunia, vt in *locatione operarum*.
2. Aut pro indemnitate praestanda pecunia, vt in contractu *adsecurationis*.
3. Aut pro facto alia res, tunc retinet nomen *facio vt des*, e. g. in aduocato alienam causam agente.

§. 4.

Versamur adhuc in diuisione contractuum, quorum alii beneficii sunt, alii onerosi. Hos iterum in diremtorios et commun-

Heineccii Prael. Gros.

O o

nica-

nicatorios diuissimus. De diremtoriis haftenus. Communicato-
rios quod attinet, ii vel res communicant, vel facta, vel vtra-
que. Et tunc inde nascitur contractus, *societas*. Ea, prout varii
sunt fines varia acquirit nomina. Sic si plures coeunt vitae com-
munis et deuotionis causa, vocatur *coenobium*, si mercaturae
causa *eine compagnie*, si nauigationis causa, *eine admiraltaet*.

§. 5.

Hi sunt contractus simplices: sequuntur compositi vel mix-
ti, 1. quando negotium non ad vnum contractum referri potest,
sed ex pluribus veluti conflatum est. E. g. vendo Maeuio ae-
des, sed ipsi remitto dimidiam pretii partem. Hic mixtura ven-
ditionis et donationis. Fabro promitto mercedem, vt mihi ex
suo ligno domum construat, habemus negotium mixtum ex lo-
catione et emtione. Sic et cambium ex variis contractibus con-
flatum. Inter remittentem et transantem est contractus do vt
des, inter transantem et praesentantem pactum cessionis, inter
praesentantem et acceptantem constitutum, inter transantem et
acceptantem mandatum.

§. 6.

2. Sunt etiam mixti contractus, quando duo vel plures con-
tractus coniunguntur, quorum vnus principalis, alter est acces-
sorius. E. g. mutuo accedere possunt contractus pignoris, fide-
iussionis, chirographarius.

Mixta esse huius modi negotia facile adparet: nam inter de-
bitorem et creditorem intercedit contractus mutui, inter debito-
rem et fideiussorem stipulatio.

§. 7.

Iam II. quaeritur, *quid sit contractus*? Paucis re defungitur
Grotius, dum dicit, omnes actus aliis viles, praeter beneficos,
contractus esse.

Sed ea nec iusta definitio, nec descriptio est.

Rectius dixeris, *contractus* est conuentio super re, quae in
commercio est, inita.

Dico *conuentio*, nam id est genus, cui subsunt species binae;
pactum et contractus.

Addo

Addo *super re, quae est in commercio*. Ita enim contractus differt a pacto, vti supra diximus.

§. 8.

Iam sequitur III. pars, de eo, quod iustum est circa contractus. Hic praemittitur regula generalis: *in contractibus debet esse aequalitas*.

Id facile demonstratur. In contractu alter alteri quid praestat, quod ex legibus humanitatis non debet. Quicumque huius modi quid praestat, is iure suo exigit satis factionem. Satis factio est, vbi par pari refertur. Vbi id fit, ibi est aequalitas. Ergo in contractibus requiritur aequalitas.

Ea vero se exserit partim in actu contrahendi, partim in re, de qua contrahitur. Actus vel contractum praecedit, vel ipsum contractum ingreditur. Iam de singulis.

§. 9.

Actus praecedens contractum, 1. vt alter alteri rei vitia num. 1. candide aperiat. Id fieri oportere demonstro. Ostendimus §. 8. in contractibus requiri aequalitatem. Ergo contra iustitiam agit, qui maius pretium sumit, quam res exigit. At maius pretium sumit, qui rei vitiis dissimulatis pretium sibi solui patitur rei haud vitiosae. Ergo tenetur alteri alter vitia indicare.

Hinc recte Graeci utebantur prouerbio: *contractus lumen decet*.

Obiici posset: neminem teneri ad veritatem dicendam cum suo detrimento coniunctam. Resp. id verum esse, si alteri neque perfectum, neque imperfectum ius sit, veritatem a me exigendi. Hic autem contrahens a contrahente hoc iure exigit.

Sed loquimur de rei vitiis, non de circumstantiis, quae rem num. 2. ipsam non attingunt, Eas enim si dissimulat contrahens, non quidem satis humanus est, sed tamen nec iniustus. Elegans exemplum apud CICERONEM est *de offic. lib. III. cap. 12*. Vir bonus Alexandria magnum frumenti numerum aduehit Rhodum; in summa annonae difficultate. Si idem sciat, complures mercatores Alexandria soluisse, nauesque in cursu frumento onustas petentes Rhodum viderit, dicturumne id sit Rhodiis, an silentio suum quam plurimo venditurus? Antipater putabat, eum id dicere debere, negabat Diogenes Babylonius,

O o 2

Resp:

Resp. inhonestum esse id celare, sed non iniustum, quia haec res non pertinet ad rei vitium vel interiorem naturam quam solam debet indicare contrahens.

num. 3. Deinde excipienda vitia, quae vel in oculis incurrunt, vel aliunde nota sunt. Tale quid videmus,

1. Si vitia sint externa, e. g. aedes venduntur ruinosae.

2. Si ipse emtor rem paullo ante possedit. Quo pertinet exemplum ex eodem Cicerone *de offic. lib. II. cap. 16.*

3. Si qualitas sit rebus omnibus communis, e. g. quod aedes sunt tributariae.

§. 10.

Deinde II. et id contractum debet praecedere, ut sponte uterque decreuerit contrahere. Si enim alter sponte, alter coactus contraheret, nulla inter contrahentes esset aequalitas. Hinc iam supra monuimus, contractum vi et metu extortum ipso iure nullum esse, si metus iniuste excutiat.

Perinde vero est, siue vis sit explicita et crassa, siue implicita et subtilis, veluti si servus roget libertatem, dum nouacula supra est, si medicus, dum coeci oculos vngit, contractum celebrare suadet. *l. 3. D. de extraord. cognit.*

§. 11.

num. 1. Haec ergo praecedere debent contractum. Actus, qui ipsum contractum ingreditur, ita describitur a Grotio: *nemo contrahens plus exigit, quam par est.*

Nihil hac regula iustius. Contrahens contrahenti debet satis factionem. *9. 8.* Qui minus dat, quam par est, is non satis facit, et qui minus accipit, quam par est, ei non satis fit: ergo tantum dandum, quantum par est.

Sed 1. id locum tantum habet in contractibus onerosis, vel permutatoriis. In beneficiis enim alter in se solum onus sponte suscipit, adeoque hic nulla requiritur aequalitas pretii, quia pretium plane non intercedit.

2. In onerosis quoque cessat haec aequalitas, si alter sponte quid de iure suo remittit. Sic e. g. Plinius sponte Corelliae agrum minori pretio vendidit. *Plin. lib. VII. ep. 11.* quo casu ne ius quidem civile rescindit contractum ob enormem laesionem, *l. 11. C. de rescind. vendit.* quia laesus non dicor, si sponte aliquid remitto.

3. Etiam

3. Etiam benefici contractus admittunt pretium. Non enim iniustum est, commodantem, depositarium, mandatarium mercedem sibi stipulari: sed tantum contractus tunc in aliam speciem degenerat.

Ceterum eleganter ex Chrysostomo obseruat Grotius, eum, *num. 1.* qui contra hanc regulam peccat, furtum admittere. Quid enim aliud est acceptatio iniqui pretii, quam ablatio fraudulosa rei alienae inuito domino, lucri faciendi causa facta?

Quod autem de Hermia narrat, eam, ubi res vendita minoris iudicata videretur, pretio aliquid adiecit: id quidem laudandum, tamquam honestum, sed non iniuste agit, qui tantum offert, quanti res iudicatur, quia volenti non fit iniuria: modo iudicans pretium vsu rationis polleat, iustaeque aetatis sit. Quid enim si plane donaret?

§. 12.

Diximus supra, aequalitatem se exserere, vel circa actum *num. 1.* contrahendi, vel circa rem, de qua contrahitur, (§. 8.) De actu contrahendi tum praecedente, tum ingrediente contractum hactenus diximus: proximum est, ut rem ipsam, de qua contrahitur, consideremus.

Si res sine culpa contrahentium vitiosa adpareat, id damnum contrahentes sibi inuicem rescire debent. Ratio ex eodem fundamento fluit. Nam 1. quum in contractu requiratur aequalitas (§. 8.): non sufficit pretium esse aequale rei, sed rem quoque oportet esse aequalem pretio. Non autem aequalis est, si vitiosa. 2. Regula iusti est *quod tibi non vis fieri, alteri ne feceris*. Iam venditor non vult defraudari iusto pretio; ergo nec emtor debet circumueniri re vitiosa.

Obiicitur: ius tamen Romanum non ob quodcumque rei vitium, vel quancumque pretii inaequalitatem contractum rescindere, sed tantum ob laesionem enormem. *l. 2. C. de rescind. vendit. Resp. 1.* leges civiles non omnia ad viuum rescire possunt. Sufficit, modo illa vitia inhiuantur, per quae detrimentum capere possit res publica. 2. Interest rei publicae, ne litibus innumeris fatigentur iudices. Ergo nec expedit ei, ut ob quancumque laesionem minimam actiones dentur.

O o 3

Sed

Sed inde non sequitur, eum non iniuste agere; qui vel in re minima alterum secum contrahentem laesit.

§. 13.

num. 1. 2. Supra diximus, regulam hanc de aequalitate proprie locum habere in contractibus onerosis: quaeritur ergo, an in beneficiis plane exsulet aequalitas?

Resp. non omnino. Nimirum distinguimus inter id, quod ex ipso contractu per se fluit, et quod ex post facto vel per accidens. Mandans e. g. non obligatur ex ipsa natura contractus, quia est gratuitus et beneficis: sed obligatur tamen per accidens et ex postfacto, si mandatarius impensas fecit, tunc enim mandans ei debet indemnitatem.

Sed quaeritur, si res commodata apud commodatarium perierit, an tunc teneatur ad refarciendum? Id adfirmat Grotius, modo res non fuisset apud ipsum dominum peritura: idque inde probat, quia commodans non solum rem alienam habeat, sed et vtilitatem et commodum inde capiat. Verum perspicue falsum. Nam 1. casum nemo praestat, ergo nec commodatarius. 2. Vtilitatem capit ex re aliena, sed volente domino gratis. 3. Si teneretur ad refarciendam rem, quae periit, nihil interesset inter emtorem, qui pretium nondum soluit, et inter commodatarium, quod absurdum.

Ergo in contractibus beneficiis nihil praestandum, praeter culpam, eamque vel maiorem, vel minorem, prout vel maius, vel minus commodum ex huius modi contractu quis capit?

num. 1. Hinc non satis accurate auctor dicit, haec omnia quidem legibus Romanis congruere: sed ex aequitate naturali proficisci. Nam commodatarium casum praestare, nec aequitati naturali congruit, nec legibus Romanis l. 18. 19. 20. D. commod.

§. 14.

Sed quaeritur porro, quomodo iustum rei pretium definiendum sit?

Grotius eius fundamentum facit indigentiam. Sed hoc fundamentum admodum vacillat: nec enim ea, quibus maxime indigemus, pretiosiora sunt. Quantum margaritis pretium fecit luxuria? quantum vnionibus?

Nos

Nos itaque rem paullo adcuratius expendemus. Pretium supponit 1. rem alicuius usus esse, siue ad vitam commode exigendam, siue ad luxuriam, voluptatem, cet. Nam si nullius usus sit, nullius quoque pretii esse censetur.

2. Supponitur, rem non esse inexhausti usus. Si enim in tanta adsit copia, ut omnibus sufficiat, tunc, licet vtilissima nullum admittit pretium. Haec vero rei tantum pretium aliquod conciliant. Quod autem pretium intenditur vel remittitur, id est

3. ex raritate. Quo enim rarior res, eo carior. Rarior autem dicitur, a) quod non, nisi rarius, reperitur, ut ambra, adamantes maiores; b) quod copiosus quidem reperiatur, sed non nisi in regionibus distitis, ut piper, cinnamomum; c) quod maximo cum periculo aduehatur, e. g. per mare; d) quod cum summo labore et periculo reperiatur, ut Mercurius, vel argentum viuum; e) quod res qualitatem quamdam vel a natura, vel ab arte humana accepit, quam nusquam vel raro alibi reperias.

Recte enim obseruat auctor n. 2. habendam esse rationem laborum et expensarum, quos fecerint mercatores.

Hinc facile redditur ratio, 1. cur res ad luxuriam pertinentes maioris vendantur, quam frumentum, aliaeque res vtilissimae. Quia nimirum illae prouida Dei cura sunt rariores.

2. Cur res vilius vendatur, si sit magna venditorum copia; magna emptionum inopia? Quia tum non est rarior.

3. Cur libri fisco addicti, haereticorum, atheorum sint cariores? quia rariores.

4. Cur antiqua monimenta, nummi, marmora, statuae, codices manuscripti tanto pretio vendantur? Quia rariores. Ea in re tam stulta nonnumquam est hominis affectio, ut res nihili aestimet, tantum quod antiquae, et rariores sint. *Restat eam in rem elegans LVCIANI dialogus sub titulo: in indoctum es multos libros coementem.*

§. 15.

Iam de quibusdam contractibus speciatim agit auctor, et ^{num. x.} quidem de emtione, §. 15. 16. 17. de locatione, §. 18. 19. de mutuo, §. 20-22. de adsecuratione, §. 23. de societate §. 24. ad fin.

De

De emtione tria obseruat auctor I. quod per illam dominium iure naturae sine traditione transferatur. Iure enim ciuili aliud obtinere nouimus, secundum quod non prius transit dominium, quam re tradita.

Prior sententia facile probatur ex fine contrahentium. Qui vendunt, id agunt, vt transferant dominium, et qui emunt, vt idem nanciscantur. Quum ergo vterque in dominium transferendum consentiat, quid opus est noua consensus declaratione per traditionem?

Ergo statim omnino iure naturae transfertur dominium, nisi aliter pacti sint contrahentes, quod fieri posse, nemo negauerit. Ex quo sequitur,

1. Vt facta emtione, solutoque pretio, iure naturae res emta statim mea sit, vt a venditore alii vendi traditue nequeat.

2. Vt periculum statim ad emtorem pertineat, quia res perit suo domino. Haec recte cohaerent, quum contra ius ciuile neget, emtorem ante traditionem fieri dominum, et tamen concedat, periculum et commodum rei venditae transire ad emtorem, quae sane vix conciliaueris.

num. 1. 3. Vt male statuat Grotius, re bis vendita, ex duabus venditionibus eam valituram, quae in se continuit praesentem dominii translationem.

Quum enim ipse fassus sit, iure naturae traditionem non requiri, sed sine ea quoque transferri dominium: sequitur, vt prior venditio iure naturae semper praefenda, altera vero indistincte nulla sit, siue traditio accesserit, siue non accesserit. Si enim posterior venditio nulla est, sane non iuuabit emtorem, quod rem accepit traditam. Venditori enim post priorem contractum nec vendendi, nec tradendi potestas fuit.

Miscet ergo, hic Grotius ius naturae et ciuile quod ad transferendum dominium requirit traditionem.

§. 16.

Alterum; quod de emtione venditione tractat Grotius, est quaestio II. *An et monopolia concedi possint saluo iure naturae?*

Monopolium est priuilegium, quod vni conceditur, vt soli; exclusis aliis, ius sit certas res in re publica vendendi.

Per

Per se ergo et sua natura nihil habet iniqui. Si enim licet principi concedere priuilegia, licebit etiam indulgere monopolium. Nec iniquius est, vnum vendere, quam multos, dummodo iusta rerum copia pro iusto pretio venum proslet.

Ergo in se nihil vitii habent monopolia, aequae ac lusus; vinum. Vti vero lusus et vinum, vtut in se bona, per accidens mala fieri possunt, si quis iis male vtatur: ita idem contingit in monopoliiis. Ea mala fiunt ob has causas,

1. Quia sic non semper iusta proslet rerum abundantia.

2. Quia pretium a monopola plerumque statuitur enorme, idque pro lubitu intenditur.

3. Quia hic multis praeripitur occasio, lucrandi victum, si omnibus interdicitur negotiatio, praeter vnum.

Hisce obseruatis facile respondebitur ad propositam quaestionem. Monopolia iure naturae permixta sunt, modo haec tria vitia euitentur. Nimirum 1. si non omnium rerum, sed earum, quibus non quotidie opus est, monopolium concedatur, e. g. gemmarum, vinorum, aromatum, cet. 2. si iustum monopoliae praescribatur pretium, quod ei excedere non liceat; 3. si ceterarum rerum, quibus quotidie opus est, vt frumenti, pannorum, lini, cet. negotiatio et commercium promiscue omnibus concedatur.

Ceterum quod auctor prouocat ad Iosephi monopolium circa frumentum, id huc non spectat. Nam id non concessum vni fuerat per priuilegium, sed erat monopolium necessarium. Quum enim nusquam esset frumentum, necessario solus Pharaos vendebat. Talis casus etiamnum contingere potest tempore pestis, obfessionis urbium, cet. vt vnus tantum rerum necessarium copiam habeat. Tunc tantum abest, vt illi priuilegio monopolias opus sit, ad res suas vendendas, vt potius a magistratu ad vendendum cogi possit.

§. 17.

Postremum, quod auctor obseruat, est III. quod pecunia; in emptione venditione non functionem recipiat in materia sola, nec in speciali appellatione aut forma, sed in genere magis communis: id est, si rarior est pecunia, tunc eius pretium intenditur; sin copiosior, tunc remittitur. Hinc facile patet:

Heineccii Prael. Grot.

P p

1. Cur

1. Cur olim tam paruo pretio vendita sint bona; nunc carissima? E. g. Thuringia saeculo XIII. vendita est 20000. florinis, quae hodie pro 100. millionibus non venderetur. Ratio est, quia Indiis nondum repertis aurum argentumque erat rarius.

2. Cur tempore belli pecuniae pretium intendatur. E. g. in Germania, durante bello tricennali, vnus thaleri tantum erat pretium, quantum hodie quatuor.

3. Cur in ditibus emporiis minores vsurae dentur, quam in aliis locis. Sic e. g. in Hollandia maximae vsurae habentur 3. vel 4. pro 100. in Germania 6. pro 100. sunt vsurae ordinariae.

§. 18.

Iam de locatione conductione, de qua obseruat Grotius 1. quod, vti in emtione periculum statim transit ad emitentem, ita et in conductione ad conductorem. Sed haec non ita liquida, adeoque paullo adcuratius expendenda sunt. Periculum est vel in re vel in fructibus. De re certum est, eius dominium non transire ad conductorem, adeoque eum nec casum praestare, sed solam culpam, e. g. si aedes conductae incendio deletae sint.

At fructuum dominium transit ad conductorem. His ergo per-euntibus, damnum est penes conductorem. Hec facile intelliguntur. Sed iam porro obseruandum. locationem conductionem esse contractum, quo merces datur pro vsu rei. Ergo si re vti potui, debeo mercedem, si vti non potui, et merces cessat. *Vti re*, significat, et fructus e re percipere. Ergo distinguo, an fructus perceperim, an sine culpa mea percipere non potuerim. Si percepi, fructus mihi pereunt, e. g. si collecta messe horreum incendio fatali consumitur. Si casu quodam, e. g. sterilitate, tempestate, locustarum multitudine agros depascente nihil percepi, tunc nihil debeo mercedis. Ratio plana est. Quo iure enim locator hic pensionem pro fructibus exiget, quos ne ipse quidem, si non locasset, percipere potuisset.

Hinc recte ius civile concedit conductori remissionem pensionis ob damnum fatale. l. 15. §. 1. seq. l. 25. l. 33. D. loc. cond. Conductio enim sua natura in se continet tacitam condi-

tionem, si fructus percipiam, si re vti potero, nisi quis casus fortuitos in se vltro fulceperit.

§. 19.

Obseruat 2. quod locatio conductio quoque admittat mercedem maiorem vel minorem, prout res vel opera magis vel minus obuia est. Sic e. g. si professori iuris in Germania demandatur lis forensis, is triplo plus sportularum accipit, quam aduocatus, quia operas suas locare alias non solet, nisi amicitiae causa. Sic si medicus operam addicit, ad sectionem periculosam calculi, vel herniae, merces plerumque satis grandis est, quia non vbiue obuii sunt, qui huius modi operationes de xtre exsequantur.

At si res ordinariae et vbiuis obuia, vel operae illiberales locantur: tunc aequalitas et proportio inter rem et mercedem obseruanda. Alias laesio iuxta superiores regulas de aequalitate seruanda erit refarcienda. Vnde et locationem conductionem ius ciuile rescindit ob laesionem vltra dimidium. *l. 2. C. de resc. vendit.*

§. 20.

*Pergit auctor ad mutuum, et quaestionem circa mutuum *num. 1.* mouet famosissimam, *an vsurae iure naturae permittae sint?*

Plerique scholastici id negant, solo dissentiente Abulensi, quocum et Grotius facit.

Scholasticorum argumenta haec sunt.

1. Mutuum est contractus gratuitus. Ergo non possunt vsurae peti. Resp. est gratuitus contractus, et, si merces vel vfura accedit, tunc res degenerat in alium contractum, sed non ideo vsurae sunt iniustae. Sic et commodatum est contractus gratuitus. Si quis mercedem a commodatario exigit, ex commodato fit locatio conductio. An ergo ideo iniustum est, mercedem a commodatario stipulari? Eadem est mutui ratio.

2. Pecunia est res sterilis. Et ex ea non possunt vsurae peti. Resp. est res sterilis physice, quia nummus non parit nummum: sed non est sterilis ciuilitate, quia in commerciis et negotiationibus pecuniam lucrantur pecuniae.

3. Res in mutuo datur pro re. Res restituitur in eodem *num. 2.*

P p 2

gene-

genere. Quo iure plus exigit creditor. Resp. si centum dantur mutuo, et centum redduntur, tunc res pro re redditur, Sed vsurae dantur pro vsu istorum centum.

Manifesto est iuris naturalis, neminem debere cum alterius damno locupletior fieri. Atqui qui pecunia mea negotiatur et lucrum facit, iste locupletior fit cum meo damno, quia interim re mea carere debeo. Ergo aequissimum est, ut mihi aequiorem vsuram praestet.

LVD. SEPTALIVS in libro elegantissimo *de Ratione status* ita probat, genus humanum carere contractibus vsuariis non posse, quia tunc fere cessaturum esset mutuuum. Quis enim cum suo periculo alteri crederet pecuniam, si spes vsurarum cessaret? Nonne vnusquisque potius pecuniam suam arca reconditam teneret?

num. 3.

At iam alia quaestio est, *an iure diuino positum concessa sit vsura?* Idque negat Grotius. Nam saepissime repetitur praeceptum diuinum in lege Mosaiica: *ne foenus accipe a fratre tuo. Exod. 22. 25. Leu. 25. 35. 19. 14.* Id quod tam late acceperunt Ebraei, ut et eum, qui vel leuissimam mercedem acceperisset, item scribam, qui chirographum vsurarium confecisset, excommunicatione dignum iudicaret. SELDEN. *de iur. nat. et gent. secund. disciplin. Ebraeor. lib. VI. cap. 9.*

Si opponas, esse hanc legem Iudaicam, respondet Grotius, esse tamen honestam moraliter, et hinc *Pf. XV.* laudari eos, tamquam beatos, qui sine vsura credant. Immo quum Christianos deceat sanctius viuere Iudaeis, absurdissimum esse, si putemus Iudaeos nos superare posse veritate et sanctimonia.

Sed 1. omnino haec lex mere Iudaica et forensis est: idque clare patet ex *Deut. 23. 19. 20.* vbi dicitur: *ne foenus exerceas aduersus fratrem tuum: aduersus alienigenam poteris exercere.* An vero ius naturae diuinum vniuersale distinguit inter fidei eiusdem homines et alienigenas? Obseruauit haec recte SALMASIVS *de vsur. cap. 20. 21. pag. 618. et de foenore trapezitico, pag. 203. 210.*

2. Honestum moraliter est non sumere vsuras, sed ideo sumere non est iniustum. Sic et debita remittere est honestissimum; sed non ideo iniustus est, qui iure suo vsus dicit: *solve, quod debes.*

§. 21.

Monet porro Grotius, non confundendum esse contractum usurarium cum aliis contractibus adfinibus. Sic e. g.

1. Pactum de indemnitate non est usurarium. Differunt finē. Qui pactum de indemnitate init, is agit de damno vitando: qui usuras sibi stipulatur, de lucro captando.

2. Pactum de opera remuneranda. Si e. g. mercator mihi pecuniam conquirat, et non sine magno labore reperit, qui mihi credant, tunc si mercatori aliquid solvam, id non est usura, sed merces laboris.

3. Pactum de periculo minuendo. Si e. g. alicui credo pecuniam, et mihi non satis cautum est, et inde mihi stipulor certam pecuniam, ne, si fors pereat, damnum sit nimium, ea non usura est.

Sed quamvis huius modi pacta non sint proprie usuraria; tamen a moralistis pontificiis inuenta sunt ad usuram palliandam. His vero palliis nobis non opus est, persuasis quippe, pacta usuraria nec iuri naturae, nec diuino repugnare.

§. 22.

Denique ipse Grotius concedit, legibus civilibus permitti posse usuras, salvo iure naturae et diuino, modo non mordaces, sed modicae.

Exempli loco adfert exemplum Hollandorum, ubi ciuibz generatim octo pro centum; mercatoribus 12. pro 100. concedantur. Et in nota infra addit, *idem in imperio constitutum*.

Sed hic moneo, 1. id falsum esse de imperio, ubi non nisi 5. pro 100. legibus permissa sunt.

2. Falsum quoque esse, quod sub finem subiungit Grotius, si hic modus excedatur, tunc leges quidem impunitatem dare, ius dare non posse. Nam id verum esset, si vel iure naturae, vel iure diuino hic modus constitutus esset. Iam quum numerus definitus non sit, imperantis erit, pro modo circumstantiarum et pecuniae in re publica copia vel inopia determinare legitimam usurae quantitatem.

§. 23.

Pergit auctor ad contractum *adsecurationis*, qui est contractus, quo vnus vel plures pro certo praemio, quod sibi solui curant, periculum naui vel mercium naui impositarum in se suscipiunt.

Hic vnā regulam inculcat ius naturae, vt pro magnitudine periculi, vel longitudine navigationis praemium vel intendi, vel remitti debeat.

§. 24.

num. 1.1. De societate notum est ex iure ciuili quid sit: hic monendum I. quod lucri et damni partes aequaliter diuidendae sint inter socios.

Quum vero *aequalitas* duplex sit, *arithmetica* et *geometrica*; id est, vt vel idem sit vtroque numerus, vel eadem vtrobiue proportio: hinc quaeritur, *quaenam hic obseruanda aequalitas*. Et recte Grotius resp. geometricam, id est, omnes socii aequaliter participant non ratione numeri, sed pro proportionem summae collatae. Inde sequitur,

1. Vt si omnes aequalem pecuniam contulerint, partes quodque damni et lucri aequales sint.

2. Vt si vnus altero plus contulerit, cuius attribuenda sit pars pro rata summae collatae. E. g. si Titius contulit 10000. Maenius 20000. Sempronius 5000. et lucrum commune est 7000. tunc Titius accipit 2000. Maenius 4000. Sempronius 1000.

3. Vt si quis non pecuniam, sed operam conferat, is partem lucri et damni capiat, prout pacti sunt socii, modo operam vt socius, non vt minister vel institor conferat.

num. 3. II. Admitti etiam inaequalitatem, si partes consentiant, modo non fiat societas Leonina.

III. Societatem vniuersorum bonorum nullam respicere aequalitatem. Hinc si e. g. ego cum Maenio inierim societatem vniuersalem omnium bonorum, et in commune ego conferrem hereditatem 100000. floren. Maenius autem non nisi 12000. contulerit, tamen huic in massa communi non minus erit iuris, quam mihi.

§. 25.

§. 25.

III. In societate nauali spectari vel communem defensionem, e. g. si fiat *eine Admiralitaet*, vel communem praedam, e. g. si plures nautae tempore belli (*Commiss-Fabrics*) inter se societatem ineant, ad intercipiendas naues hostiles, et praedam diuidendam.

Hic ius naturae nihil sancit, nisi vt seruetur aequalitas geometrica in diuisione lucri et damni: sed leges ciuiles ea omnia specialius definiunt, e. g. quantum ex praeda praecipuum habeat fiscus, quantum attribuatur collegio iudicum rei nauticae, (*dem Admiralitaets-Collegio*), quantum magistro nauis, quantum singulis nautis.

§. 26.

Denique quaerit auctor, *an iure naturae inaequalitas, in num. 2. quam consensum est, attendatur, quoad actus exteriores?* E. g. dicit Pomponius in lege in margine allegata, in pretio emtionis et venditionis licere se naturaliter circumuenire. Id ius non intelligit de actu interno mentis, quasi dolum adprobet, quia semper detestandus, sed de actu externo, an ille in foro mereatur animaduersionem. Idque negabant veteres. Primus Diocletianus condidit L. 2. C. de resc. vendit. et rescissionem concessit ob laesionem enormem: quaeritur, *an id verum sit, quod naturaliter hoc liceat, id est, iure naturae?*

Resp. Grotius, 1. naturale saepe dici de eo, quod passim *num. 2.* recepti moris est, idque probat ex 1. Cor. 11. 14. vbi de coma est sermo, qui tamen locus est difficillimus.

2. Vtilem quidem hanc esse iuris ciuilis dispositionem, quia *num. 3.* alias infinitis litibus daretur occasio, ob incerta rerum pretia, sed ideo non statim eam permitti iure naturae in foro conscientiae. Paucis verbis, sed emphaticis rem eloquitur scriptor vitae Isidori, dum ait: *iniustitiam hanc esse a legibus quidem permisam, sed quae re ipsa iustum perueriat.*

CAPVT XIII.

DE IURE IVRANDO.

§. 1.

num. 1. **E**Gimus hactenus de promissis et contractibus, ad quorum confirmationem quum saepe accedere soleat iusiurandum: de eo quoque agitur hoc capite.

Praemittit autem auctor observationem: apud ipsos quoque gentiles magnam fuisse iurisiurandi auctoritatem. Animaduertebant enim illi, si illud contemnatur, tunc cessaturam omnem religionem, firmissimum rei publicae vinculum, cessaturum nexum inter imperantes et subditos, qui plerumque iureiurando constringitur, cessaturam denique omnem fidem humanam. Hinc miro consensu docent, 1. iusiurandum esse vinculum fidei humanae artissimum, quod Ciceronis testimonio probat Grotius.

num. 2. 2. Deum esse periurii vindicem. Hinc eos diris omnibus subiacere adseuerabant, qui fidem iuratam fallerent. Sane apud HERODOT. lib. VI. cap. 86. refertur, Glaucum tantum consilium cepisse de intervertendo deposito, quod se iurauerat redditurum: idque propositum et sine effectu punitum esse ita, ut cum domo vniuersa et prole exstingeretur. Refert HEROD. l. c. et IUVEN. Sat. XIII. v. 199. seqq. quod quum rogaret Apollinem, an sibi suaderet id facinus, responderit Apollo:

At iuramento quaedam est sine nomine proles, cet.

Ita Graecos versus vertit Grotius. Sed recte obseruauit Gronovius, male versus esse. In Graeco est *ἔμμη*, quod et iusiurandum significat, et Deum periurii vindicem. De hoc loquitur Apollo, non de iureiurando, cui absurde tribuitur proles.

num. 3. 3. Nihil ad maiorem indignationem prouocare Deum, quam periurium. Est enim affirmatio religiosa. Quid vero veneratione illa, quam Deo debemus indignius, quam eum inuocare testem mendacii?

Equidem CIC. de offic. lib. III. cap. 39. dicit: iam enim non ad iram deorum, quae nulla est, sed ad iustitiam et ad fidem pertinet. Negare ergo videtur, deos irasce periuris, sed poenae tamen

men satis eos subire, quod fidem, qua nihil sanctius, violant.

Verum Cicero ibi disputat ex mente Stoicorum. Stoici autem quum affectus pro malis et vitiosis reputarent, non poterant Deo huius modi imperfectionem tribuere. Sed nos edocti sumus cum a ratione, tum a S.S. in Deo esse voluntatem puniendi malos, eumque ab omni imperfectione esse remotissimum. Id iam sufficit, et Scriptura *αἰσχρονομία* loquens eam voluntatem plectendi malos vocat iram Dei. Singularem ea de re librum scripsit LACTANTIUS *de ira Dei*, vbi Stoicos refellit, sed verbis magis contis et tersis, quam argumentis solidis.

Iam ergo post hanc praefationem Grotius rem ipsam adgreditur, et hoc capite agit

- 1. *de iurisiurandi requisitis*, §. 2-12.
- 2. *de eiusdem effectu vel obligatione*. §. 13. *fin.*

§. 2.

Primo itaque in iurante requiritur animus intelligens et liberatus. Est enim iusiurandum non actus naturalis, qui sine intellectus et voluntatis concursu peragitur, vti circulatio sanguinis, concoctio stomachi, cet. Sed actus humanus, qui semper supponit intellectum et voluntatem. Exinde sequitur

1. Vt qui verba profert sine consilio iurandi, non obligetur. Narrat Ovidius, Acontium, quum Cydippen in sui amorem pericere non posset, pomo in eius sinum proiecto inscripsisse verba: *iuro me nupturam Acontio*. Ea quum legisset Cydippe, ferebat, illam periuri ream esse, nisi sibi nuberet. Sed absurdum. Legere enim verba sine consilio et deliberato animo iurandi, non est iurare. *Iurata lingua est*, inquit Euripides, *mente iuranti nihil*.

Hinc etiam secretarius iudicii praeiens verba iurantibus, non obligatur, quantumvis eadem verba proferat, quae alter reddit.

2. Vt, qui animo iurandi profert, obligetur, etiamsi obligari nolit. Sufficit enim, intellectum et voluntatem iurandi adtuisse. Et hinc absurdum, quod Mediolanenses periurii rei excusandi causa proferebant coram Friderico imp. *iuravimus tibi, sed obligari tibi iuramento numquam volumus*. Rem refert RADEVICVS in *Vit. et reb. gest. Frider. I.*

Observandum hoc contra reservationes mentales Iesuitarum, de quibus alio loco dictum. Ii enim docent saepe, iurantem

Heineccii Prael. Grot.

Q q

non

non obligari, si inter iurandum ad aliud, quam de quo iurat, cogitationibus suis respiciat. Quo nihil sane absurdus.

§. 3.

num. 1. *Quid vero si quis animum iurandi non habeat, et tamen deliberato animo verba iuramenti protulerit? Casus existit, si quis praeter necessitatem temere iurat. Hoc ex consuetudine facit, non ex animo deliberato. Quum tamen sciat se iurare, re vera iurat, quamvis id faciat temere. Quaeritur ergo, an nihilominus obligetur?*

Resp. Grotius affirmando, rationemque addit, quia sciens iuravit. Sed si recte ponas calculum, ea in re pontificiorum hypothese perperam sequitur. Iusiurandum iure naturae non producit obligationem novam, sed obligationem quamcumque confirmat, quia est obligationis accessorium. Id statim demonstrabimus. Iuravit aliquis, se numquam pauperi ulli daturum elemosynam: sane si per se iusiurandum producit obligationem, etiam hic debet illud servare, et tamen, si servat, perpetuo peccat. Quum ergo iusiurandum non producat novam obligationem: consequens est, ut si quis temere iurat, is quidem peccet, sed tamen non magis teneatur, quam si temere, per iocum, et non deliberato animo iurasset.

Addit auctor exceptionem, si alio sensu acceperit iusiurandum is, cui detulit, quam qui praestitit. E. g. Titius petit uxorem filiam Sempronii; hic existimans natu maiorem peti, iurat, se illam daturum: sed postea adparet, deferentem sensisse de natu minore. Quaeritur, an nihilominus hanc teneatur dare?

Resp. minime, quia haec generalis regula est, verba iusiurandi interpretanda non esse secundum sensum iurantem, sed deferentis. Quum ergo hic Titius Sempronio non detulerit iusiurandum super filia maiore nata, sed minore: iusiurandum etiam de maiore nata praestitum temerarium quidem est, quia prius interrogare debuisset, quam filiam peteret; sed tamen non obligat.

num. 3. 4. 5. *Quaerit porro, an in iureiurando admittatur sacra conditio? Hanc quaestionem subtiliter magis quam solide solvit Grotius. Videbimus ergo primum, quid quaeratur?*

Certum est, omnem promissionem complecti conditionem saltem tacitam. E. g. Deus promittit, se praemia piis elargiturum;

rum, sed sub conditione tacita, nisi respiciant impii. Quaeritur ergo, *an et iuramenta huius modi tacitam conditionem admittant?*

Id negat Grotius, idque probat loco *Hebr. 6. 17.* ubi Deus dicitur iurasse, adeoque impossibile esse, ut fallere possit. Unde subtiliter iam philosophatur de quaestione, *an Deus possit mutare decreta sua?* quam quaestionem nostram non facimus, sed rem ipsam expendimus, et contrariam Grotio sententiam hic merito amplectimur.

1. Quia ex hoc loco *Hebr. 6. 17.* nihil sequitur. Nulla est consequentia. Deus fallere non potest, ergo eius iusiurandum non potest continere tacitam conditionem. Nam et de promissis divinis idem dicitur, quod iis fallere Deus nequeat, et tamen Grotius concedit in iis esse tacitam conditionem.

2. Quia, ut diximus, iusiurandum non producit novam obligationem, sed eam, quae adest, confirmat. Ergo si promissum cum tacita conditione intelligendum, cui accedit iusiurandum, hoc quoque non aliter intelligi poterit.

3. Quia tacitae conditiones vel physice vel moraliter sunt necessariae: ergo iureiurando non magis tolli possunt, quam promisso. E. g. *ducam te uxorem*, hoc promissum continet tacitam conditionem, si vixero. Haec physice est necessaria. An ergo et mortuus tenebitur ducere, si iuraverit, se ducturum?

Rem luculento exemplo illustrabimus. Iurauerat Herodes filiae Herodiadis, quidquid rogaret, se illi daturum. Rogabat illa caput Ioannis baptistae. Ex mente nostra peccavit Herodes, dum iusiurandum servavit, quia hoc iusiurandum continere dicimus tacitam conditionem, si rogaverit aliquid aequum, et a legibus permixtum. At ex Grotii sententia non potuit non iusiurandum servare, quia illud non continet tacitam conditionem: immo debuisset Herodes caput suum carnifici offerre, si id rogasset Herodias. Quo nescio an quidquam fingi possit absurdum.

§. 4.

Pergit auctor ad iuramenta extorta dolo, et quae omnino num. 1. non obligare fatetur, partim, quia ius naturae dolo numquam adfuit, partim, quia hic iurans nec sciens nec volens iuravit, quippe de alia re sciens, quam alter, qui eum decepit.

Excipit tamen Grotius casum, si incertum sit, annon quis num. 2. 3. iuraturus fuisset, etsi haud deceptus esset: eoque refert exem-

Q q 2 plum

plum Iosuae, qui cum Gibeonitis simulantibus, se e longinquo fama rerum gestarum excitos aduenisse, foedus percusserat, idque iureiurando firmauerat. Hoc iusiurandum tametti dolo extortum religiose tamen seruabat Iosua. *Ios. cap. 9.* Cur? quia incertum, inquit Grotius, annon Iosua iis iuraturus fuisset, etiamsi ab hoc dolo abstinuissent.

Sed iam hanc rationem Grotii refellit PVENDORFF. *lib. III. cap. 2. §. 7.* Nam 1. quis iudicabit, an errore remoto nihilominus quis fuisset iuraturus? 2. Non quaeritur, an alter obligatus esset, si sine dolo iurasset, sed an iam obligetur, vbi dolo iurandi causam dedit.

Rectius itaque dicitur, iusiurandum dolo extortum valere, modo alteri iusta causa fuerit, actu vtendi. Et talis erat Gibeonitis. Iosua gentes Palaestinae radicitus extirpabat. Gibeonitis iustus metus suboriebatur, ne et sibi idem fatum immineret. Id per foedus auertere conabantur. Veriti autem, ne Iosua foedus adspernaretur, fingeant, se non Palaestinos esse, sed longe distitos. Nihil ergo hic illiciti occurrit, maxime quum Deus interuencionem harum gentium non a solite mandasset, sed sub conditione, nisi se subicerent vitro, ceu ipse Grotius n. 3. demonstrat. Conf. et SELDEN. *de iur. nat. et gent. secund. disciplin. Ebraeor. lib. VI. cap. 16.*

§. 5.

Iam de iuramentorum interpretatione, vbi recte monet Grotius, eorum verba ultra receptum morem non esse extendenda, modo addas limitationem, si scilicet latior iuramenti interpretatio durum quid vel inhumanum contineret: nam si talis casus non adit, interpretatio stricta potius cauillationem sapiet, quam veram interpretationem.

Rem illustrabimus exemplis. Iurauerant Israëlitae, se Beniaminitis vxores non duros. Perierat illa tribus bello praeter pauculos mares. His nisi vxores datae fuissent, aut extincta fuisset tribus vniuersa, aut Beniaminitae coacti fuissent vxores ducere paganas. Vtrumque durum et inhumanum. Ergo strictè interpretandum videbatur iusiurandum. Non dabant filias vxores, sed patiebantur illas a Beniaminitis rapi. *Ios. cap. 21.*

Alexander Lampiscum obfidebat, Quum Anaximenes peteret colloquium, iurabat ille, nihil se eorum facturum, quae hic peteret.

peteret. Hic petebat, ut vrbs dirueretur. Sic servata est. PAVSAN. lib. VI.

Antigonus filio Demetrio dixerat, se interfecturum Mithridatem innocentem, tantum quod somnium sibi de eo obtigisset, quod portendere eius potentiam videbatur. Iureiurando obstrinxerat filium, ut taceret, nec rem eloqueretur. Hic de salute amici innocentis anxius hasta, inspiciente illo, arenae inscripsit: *fuge Mithridates*. PLUTARCH. in *Demetrio*.

At intolerabilis est interpretatio Hattonis, archiepiscopi Magdeburg. Quum enim Ludouicus III. imp. obsideret Bambergam, ubi Adelbertus, comes, rebellis delitescerebat, Hatto petiit cum comite colloquium. Hic illum in arcem recepit. Suasit comiti, ut imperatori se dederet: et iuratus promisit, se comitem, si imperatori supplex fieret, saluum redecturum in arcem. Credit comes iuranti episcopo, et cum illo castris adequitat. Quum haud procul ab arce abessent, dolere se ait Hatto, quod ieiunus profectus sit. Comes rogat, ut secum in arcem redeat, eique dat ientaculum. Hinc denuo ad castra pergunt. Comes capite plectitur, dicente episcopo, se iuriurando satis fecisse, comitemque saluum reduxisse in arcem. OTTO *Fris. Chron.* l. 1.

§. 6.

Alterum iurifurandi requisitum est, ut iuretur de re moraliter licita. Iusiurandum enim 1. ideo obligat, quia Deus id acceptat. At non potest salva iustitia acceptare iusiurandum, quo aliquid illicitum promittitur. 2. Si huius modi iusiurandum obligaret, plus posset iusiurandum quam ipse Deus, cui iuratur. Bene AESCHYLVS in *Diris*:

Neque enim fides iurata plus pollet Ioue.

Peccat itaque iurans, quod iuravit, non autem, quod ius iurandum huius modi violavit.

Huc pertinent exempla Davidis, Nabali iurantis exitium, 1. Sam. 25. nec non eius, qui latronibus silentium iuravit. Si enim istud silentium cum aliorum periculo coniunctum sit, non obstante iureiurando veritas proferenda. C. 18. X. de test. et c. vlt. X. de test. cog. Exemplum est apud GAIL. *Obs.* I, 100. n. 4.

§. 7.

Idem dicendum, si res iureiurando promissa, non quidem *num. 1. 2.* illicita

illicita sit, sed tamen maius bonum impediatur, et quidem moraliter bonum. Ratio est, quia aequè peccat, qui, quod praeceptum est, non facit, quam qui, quod vetitum, facit. Praecepta enim et prohibitiones ad eodem Deo sunt. Hinc si quis iurauerit, se parentibus non benefacturum; sed id potius, quod his dari decebat, in aerarium templi illaturum, iusiurandum impium esset, ipso docente Christo *Matth. 15, 5.* de quo iureiurando Iudaeis frequentissimo, quod *Corban* vocabant, late Grotius *h. l.* et SELDENVS *de iur. nat. et gent. sec. discipl. Ebr. lib. VII. cap. 2.*

Sic et impia sunt iuramenta, quibus quis prohiberi se dicit, quo minus utile humano generi medicamentum possit reuelare. Vid. LVCIANVS in elegantissimo *dialogo, Tragopodagiae.*

§. 8.

Tertium requisitum est, ne res, de qua iuratur, sit impossibilis. Quum enim iusiurandum, uti supra demonstravi, sit accessorium obligationis, at obligatio ad impossibilia nulla sit: sequitur sane, ut et iusiurandum circa impossibilia praestitum non obliget.

Nec tamen negandum, 1. eum peccare et periurii reum esse, qui sciens aliquid impossibile promisit, maxime si res non sit absolute impossibilis, sed respectivè, e. g. si quis iuratus promiserit, se plumbum conuersurum in aurum, se perpetuum mobile facturum, quum sciret, se nec alchymistam esse, nec mechanicum.

§. 9.

2. Eum quoque obligari, qui aliquid promisit iureiurando, quod pro tempore est impossibile, eatenus, ut in pendente sit obligatio, et sese exferat, si impedimentum cesset. E. g. iuravit aliquis, se aggeres exstructurum. Ob perpetuas tempestates et inundationes id impossibile est per totum hunc annum. Tenebitur ergo sequente, si cesset impedimentum. Hoc facile.

§. 10.

Quartum iuriurandi requisitum est forma verborum, ut rectè concipiatur iusiurandum. Nam si iurem per blithri vel per

per calacut, quis dicat me iurasse, quum verba haec nihil significent?

Vt autem appareat, quomodo concipiendum sit iusiurandum: sciendum est, id fluere ex definitione. *Iusiurandum* est religiosa adsertio, qua quis Deum vindicem inuocat, si peierauerit.

Ex ea ergo definitione fuit, 1. essentiale id esse iuriurando, vt Deus omniscius inuocetur, vt si sciens fallat iurans, is poenam ab eo repetat. Tales sunt formulae veteres: *si sciens fallo, tum Iupiter me eiiciat, vt ego hunc lapidem! Deus mihi faciat quaecumque mala, nisi hoc faciam! vt et hodierna: ita me Deus adiuvet! Num satis poenarum dat, qui auxilio diuino destituitur.*

§. II.

2. Inde sequitur, vt iuramenta per creaturas sint absurda. ^{num. 1.} Sic saepe veteres iurabant per parentes, caelum, terram. Socrates iurare solebat per anserem, anatem, columbam. Alii per caput, per oculos, per animam, per barbam, qui mos etiamnum apud Turcas obtinet. Qualia iuramenta dicuntur Socratica. Queritur ergo, *an talia iuramenta nomen iuramenti mereantur?*

Id credit Grotius, quia Christus *Matth. 23. 21.* non expresse prohibeat huius modi iuramenta, sed tantum abusum; immo addat, qui per templum iurat, eum per Deum iurare.

Immo *n. 2.* interpretatur sententiam Hebraeorum, quod ^{num. 2.} huius modi iuramenta non putarint obligare, nisi adiecta poena. Hanc ergo opinionem ait a Christo refutari, ostendique, iusiurandum perinde obligare, siue per templum, siue per Deum iuretur.

Haec Grotius. Sed probe obseruandum, hic non esse quaestionem, annon homo ita iurans obligetur? sufficit enim illum iurandi animum habuisse, immo obligaretur, si plane sine iuramento aliquid pron. iisset: sed quaestio est, *an non haec iuramenta sint absurda, Christianis indigna, idololatrica?* Et hoc facile probatur:

1. Quia hic nulla est religiosa adsertio. Qua enim religione persequimur terram, caput, barbam?

2. Quia istae creaturae nec testes, nec vindices esse possunt.

3. Quia Christus huius modi iuramenta expresse prohibuit. *Matth. 23. 21.*

4 Quia

4. Quia omnes horum iuramentorum interpretationes sunt absurdæ. APVLEIUS de *Deo Socrat.* ea ita interpretatur: iuxta per caput, barbam, anferem, id est, Deum capitis, barbae, anferis creatorem. Ergo creatura nobis creatorem denotabit? Alii dicunt, sensum huius modi iurandi esse, quod si fallamus, Deus vindictam a nobis sumeret in oculis, in capite, cet. Sed et id absurdum. Nam 1. sic poena nonnumquam erit satis lenis, e. g. si barba pereat, vel anfer, vel anas. 2. Sic etiam poena feriet innocentes, e. g. si quis iuret per salutem principis. 3. Absurdum est, Deo iudici ab ipso delinquente præscribi poenam.

§. 12.

3. Inde sequitur, ut iusiurandum concipiendum sit ad vniuscuiusque religionem. E. g. Iudæus non cogendus iurare per Christum, sed per Deum, nec prohibendi gentiles iurare per deos fictitios, Mahomedani per Mahomedem. Sufficit enim, eos iurare per id, quod religiose venerantur. Vid. *Genes.* 31. 53.

Sed an periurium committit gentilis vel Mahomedanus ita iurans? Videri posset, non committere eum periurium, qui ita non peierarit per verum Deum.

Sed resp. omnino eum peierare, quia credit, hunc esse verum Deum. In delictis potissimum ad affectum respicitur. Quemadmodum Mucius Scaevola, quum per errorem ministrum Porfennæ pro Porfenna interimeret, non magis regicida erat, ac si regem occidisset: ita qui per deos falsos, quos veros putat, iurat, aequè periurus est, ac Christianus, qui per Deum verum peieravit.

§. 13.

Sequitur pars capitis posterior de effectu iusiurandi, qui est præcipue finis controversiæ. Vnde et Paulus apostolus dicit: *iusiurandum est finis omnis litis.*

num. 1.

Ratio est, quia qui desert et præstat iusiurandum, illi inter se veluti paciscuntur, quod, si alter iuret, res decisa esse debeat. Pactum vero huius modi obligare, nemo dubitat.

num. 2.

Ex quo sequitur, ut in omni iureiurando duo requirantur; 1. *π ἀληθοῦς*, ut verba congruant animo, seu, quod perinde est, ut quis iuret ex animi sententia, et *π ἡλικίης*, ut factum

ctum congruat verbis, id est, ne iurans falsa vera, vera falsa esse peieret.

Ratio facilis. Nam quum, vt diximus, inter iurantem et deferentem intercedat pactum, pactum autem ex deliberato animo proficisci, et nihil falsum continere debeat, consequens est, vt nec in iureiurando id ferendum sit. Haec facilia.

§. 14.

Alter effectus iurisiurandi est, vt obliget. Obligatio vero aut Deo et homini simul, aut Deo tantum, sed non homini, nasci dicitur. Quam scholasticorum doctrinam sequitur Grotius. Eam considerabimus.

Nimirum scholastici et Grotius distinguunt, vtrum deferenti ius sit, me obligandi, nec ne. Si ius est, tunc et homini et Deo, ex iureiurando meo nascitur obligatio. Sin alter sine iure me obstringit iureiurando, tunc quidem obligatio nascitur Deo, cui iuratum, sed non homini, qui iusiurandum a me exegit. En exemplum. Latro me iurare cogit, me daturum mille. Hic, inquiunt, ius nullum est latroni, ad mille exigendos, sed ex iureiurando tamen meo ius natum est Deo, vt me tamquam periurum punire possit, nisi soluam. At contra si debitor iuratus creditori promisit debitum, et Deo et homini, scilicet creditori, obligatus est.

Sed haec nihili. Supra enim 1. ostendimus, iuramenta non producere nouam obligationem, sed veterem confirmare. 2. Sic alicui soluere cogor, cui non debeo, id est, obligor latroni et non obligor, id quod absurdum. 3. Supra iam diximus, Deum iusiurandum iniustum non acceptare, adeoque nec obligationem inde nasci posse.

Obicit Grotius, Deum puniuisse reges Israël, qui Babylonis fidem iuratam non seruassent, *Ezech. 17, 12. sqq.* Sed resp. hoc iusiurandum non fuisse iniustum. Reges enim Israël is metu Aegyptiorum et ex conscientia impotentiae suae vltro se Babylonis subiecerant.

§. 15.

Nihilominus tamen Grotius refutare iam eos conatur, qui statuunt nobiscum, qui latroni vel piratae iurauit, eum non
ma. 1. 2. g.

Heinaccii Prael. Grot.

R r

teneri

teneri iureiurando. Argumenta Grotii sunt :

1. Fidem iuratam et hosti seruandam. Tunc enim nos non iuramus hosti, tamquam hosti, sed tamquam paciscenti, ab hoste autem piratam non differre. Resp. omnino differre. Hostis enim nobiscum potest iustum bellum gerere, adeoque et ius ipsi est, armis nos cogendi ad iurandum. Latroni et piratae huiusmodi ius numquam est.

2. Et si personae ius deficiat, tamen cum Deo nobis negotium esse. Sed resp. iam ostendimus Deum iniusta iuramenta non acceptare, non magis, quam vota iniusta.

3. Depositum latroni reddendum esse, ergo et iusiurandum seruandum. Resp. miram hanc esse conclusionem. Latro deponens nihil iniuste agit, hinc eum iniuste agere oportet, qui depositum negat. At iniustus est latro vel pirata, dum me cogit iurare. Ergo ego iniustus non sum, dum non praesto, quod iuratus promisi.

§. 16.

num. 1. Querit porro Grotius, *an et perfido sit seruanda fides iurata* ? Recte distinguit, an iusiurandum se primario fundet in promissione reciproca, an non. Priore casu iusiurandum me non obligare, nisi et alter praestet, quod promisi : posteriore absolute me obligari. E. g. iurauit Titius, se heredem instituturum Maeuium, si hic eum a capitis periculo liberasset. Hunc si non liberauit Maeuius, non tenetur Titius. At si absolute iurauit, quamuis id eo intuitu fecerit, vt Maeuium moueret, vt sibi adfisteret, nihilominus obligabitur, etiamsi Maeuius nihil in eius commodum fecerit.

num. 2. Obiici posset : iura tamen rescindere pacta, si inaequalitas praestationum sit nimia. Resp. id verum esse, 1. si contractus sint onerosi. Iurata autem promissio potest nonnumquam merum beneficium continere. 2. Rescindi contractus et pacta, vbi alter inscius laesus est. Qui autem iurat absolute, se aliquid praestitutum, nec ab altero sibi mutuum praestationem stipulatur, is vltro et sciens iuri suo renunciat.

§. 17.

Novam conclusionem ex doctrina sua §. 14. et seq. proposita elicit Grotius. Quia enim ex eius mente, qui iniuste coactus iurauit,

iuravit, Deo quidem, sed non homini obligatur: quaerit, *an et heres iurantis tunc teneatur soluere mille, quos latroni vi coactus iurato promiserat defunctus?*

Et respondet, non teneri heredem, quia hic nec Deo, nec homini obligetur ad soluendos mille. Non homini, cui ne defunctus quidem obligabatur, (§. 14.) nec Deo, cui heres numquam iuravit.

Sed quamvis res vera sit, tamen ea limitatione non opus est, si statuimus cum recentioribus omnibus, iusiurandum vi et metu extortum iniuste, nullum esse, et non magis producere obligationem, quam pactum vi huius modi extortum.

§. 18.

Quaeritur porro, *an non casibus quibusdam sine periurio possum alteri negare, quod promisi.* Resp. omnino

1. Ex mente nostra, quoties iusiurandum iniuste extortum, adeoque nullum est.

2. Si cui iuravi, is ipse natum ex iureiurando ius remittat. E. g. Titius Maeuiae promisit iurato matrimonium, haec suo iuri renunciat.

3. Si quis iuravit intuitu certae qualitatis personalis. Tunc enim, cessante ea qualitate, cessat obligatio. E. g. iuravit aliquis tamquam miles, se vitam et sanguinem ponere pro domino velle: non sane tenetur, si miles esse desit.

4. Si occasio desit. Sic in eodem exemplo miles periurium non committit, si dominus bellum non gerat.

§. 19.

Nova oritur quaestio, *an id, quod contra iusiurandum factum illicitum tantum sit, (ut, qui fecit, peccet,) an et irrium? (ut factum pro infecto habeatur?)*

Subtiliter distinguit auctor, quod aut ius ad rem iureiurando confirmetur, id est, obligatio, aut ius in re, e. g. translatio domini, datio pignoris, constitutio servitutis. Priore casu actus contra iusiurandum susceptus tantum illicitus est, sed non rescinditur: posteriore irritus est.

E. g. si quis promisit, iurato se non acturum, et egit, illicitum egit, sed ideo actio non est nulla. At si quis alteri constituit

tuit seruitutem iurato, et postea impedit, actus eius nullus est.

Ita Grotius: sed vereor, ut recte. Nam et iusiurandum, ut saepe monui, est accessorium obligationis. Quemadmodum ergo quod etiam contra pactum iuratum fit, irritum est, ita procul dubio etiam iuratum.

§. 20.

NUM. 1. Grauior est quaestio, an actus principum contra iusiurandum subditorum, vel iusiurandum subditis praestitum valeant?

Resp. Grotius, superiorem efficere non posse, ut iusiurandum non obliget, sed tamen quia actus non omnes sunt in potestate subditorum: hinc superioribus duplex circa illos competit potestas, 1. circa personam iurantem, 2. circa personam, cui iuratur.

NUM. 2. Circa personam iurantem ea pollet potestate, ut possit

1. Irritum reddere iusiurandum, quod principis vel summi imperantis iuribus aduersetur.

2. Ut possit adimpletionem eiusdem impedire et prohibere. Sic e. g. si subditi homagium iurassent extraneo principi, imperans potest illos iureiurando solvere, quia in eius praediucium subditi se obligare non potuerunt.

Ratio in promptu est. Nam inter personas diuersas obligatio prior posteriorem reddit irritam, quia persona iam vni obligata, alteri se obligare non potest. E. g. si quaedam Titio desponsa est, non potest iam Maevio desponderi. Ergo nec principi suo obligati semel iam et aliis contrario iureiurando se possunt obstringere, adeoque obligatio prior posteriorem tollit.

Eleganter id ex ipsa lege diuina, quae parentibus et maritis permittit, liberorum et vxorum vota et iuramenta soluendi. **NUM.**

30. Si pater et maritus id potest: multo magis princeps.

Sed quid si princeps aliquem soluit iureiurando, quod principis utilitatibus non aduersatur? E. g. Tiberius iurisiurandi gratiam faciebat equiti, qui iurauerat, vxorem se numquam repudiatum, quum haec deprehensa esset in adulterio.

ZACHAR. HYBERS in Dissertationibus, quas coniunctim edidit, etiam vnam habet de gratia iurisiurandi facta, et existimat, principis solutionem iurisiurandi nihil esse aliud, quam concessionem impunitatis in foro externo. Nam obligationem neminem tollere posse, praeter Deum, cui iuratum. Sed ego arbi-

tror

tror nihil aliud esse, quam interpretationem iurisiurandi. Princeps non tollit obligationem, sed declarat, in casu praesente non adesse obligationem. Conf. PVENDORFF. *de iur. nat. et gent. lib. II. cap. 2. §. ult.*

Sic et in personam, cui iuratum est, hanc potestatem habet princeps, ut ei ius ex iureiurando adquisitionem auferat, et impediatur eam, ne ius exercere possit, si id reipublicae videatur interesse. Sic e. g. princeps quidam Germaniae nobilem carcere, minis, et vi adegerat ad transactionem iniquissimam, et talem quidem, qua omnia bona sua concedere tenebatur principi. Ea transactio iurciurando firmata fuerat. Postea nobilis liberatus actionem in iudicio aulico imp. instituit. Princeps opponebat exceptionem transactionis iuratae: imperator autem irritum faciebat iusiurandum vi extortum, i. e. declarabat, principi nullum ius esse ex illo iureiurando. num. 3. 4

§. 21.

Transit iam Grotius ad quaestionem, an iurare Christiano liceat? Nam quum *Matth. 5. 23.* dicat Christus: *omnino non iurabitis*, idemque repetat Iacobus in *Epistola*: posset existimari, iurare plane nefas esse, quod et anabaptistis, Memnonitis, et Socinianis videtur. num. 1.

Sed Grotius ostendit, Christum non prohibere iuramenta omnia, quae faciunt ad veritatem detegendam, sed promissoria tantum de rebus futuris, quia facile contingere potest, ut ne possimus quidem promissa adimplere, adeoque periuri reperiatur. Id probat Grotius

1. Ex opposito: *audistis dictum esse veteribus: non peierabis, sed reddes domino iusiurandum.* Reddere iusiurandum tantum dici potest de promissoriis: ergo et haec Christus intelligit, dum addidit: *Ego autem dico vobis: ne iuratis omnino.*

2. Ex ratione, qua Iacobus apostolus vitur: *ne fallaces repერიамини.* Id enim itidem ad promissoria solum pertinet.

3. Ex verbis sequentibus: *esto sermo vester ita ita, non non.* Vbi ex indole sermonis Hebraei ostendit, ita et non prius pertinere ad promissionem, alterum ad implementum. Solebant enim Hebraei et Orientales promittere verbis: *ita, non*; vel Hebraice: *amen et ain.* Si iam adimpletset quis promissa, dicebatur: *Amen et sic.* Si sefellisset, dicebatur: *Sic et non.* Patet id ex *2. Cor. I. 18. 20.* num. 2. 3

R r 3

4 Ex

num. 4.

4. Ex interpretatione ipsorum Hebraeorum e. g. Philonis et Essenorum. Hi omnes enim dicebant, viri boni esse promissa non iuramentis firmare, sed iniurata adimplere. Dicta eorum ipse Grotius attulit. Ergo inde colligas, Hebraeis hanc doctrinam fuisse communem, et hinc eam Christum quoque proposuisse.

num. 5.6.

5. A consensu gentilium, qui eandem regulam inculcabant, e. g. Pythagorae, Scytharum, Ciceronis, Solonis, Alexidis comici, Hieroclis, Libani, Eustathii, verba repetere, vel alia testimonia accumulare nihil opus est. Sufficit, ex his omnibus apparere, Christum et Iacobum non omnia promiscue iuramenta prohibuisse.

§. 22.

Inde confectarium hoc elicit Grotius, quod in promissis quoduis symbolum vel signum, receptum publice, eiudem efficacitae esse debeat, ac ipsum iusiurandum.

Talia symbola varia erant, et sunt etiamnum e. g. apud Romanos stipulatio, seu sollemnis interrogatio et responsio, apud eosdem et omnes fere gentes oblatio dextrae, apud Russos osculum cruci oblatum.

Et sane vir bonus non iureiurando obligatur, sed conscientia. Non fidem servat, quia iuravit, sed iuravit, quia fidem servare iam vltro decreuerat. Vnde et viri boni iniurati promissis plus fidei habendum, quam scelerati religiosissimo iuriurando.

CAPVT XIII.

DE EORVM, QVI SVMMVM IMPERIVM HABENT, PROMISSIS, CONTRACTIBVS, ET IVRAMENTIS.

§. 1.

num. 1.

S Olet Grotius primum materias singulas generaliter tractare; ac deinde eas adplicare ad quaestiones et controuersias illustres, vel iuris publici. Postquam enim generatim, quid iustum sit circa pacta, contractus, et iuramenta plenius docuit: iam specia-

speciatim disquirat, quidnam circa pacta, contractus, et iuramenta imperantium sit iustum. Et quidem quaeritur,

1. quid imperantibus liceat circa pacta, contractus, et iuramenta propria? §. 1-5.

2. Quid circa actus subditorum? §. 6-9.

3. Quid circa successores? et an ii quoque pactis, contractibus; et iuramentis imperantium obligentur? §. 10-14.

1. Quaeritur, quid imperantibus liceat circa pacta, contractus, et iuramenta propria? Occasionem huic quaestioni dedit IOANNES BODINVS, scriptor vere impius, vt ex eius colloquio *heptapomere*, quod MSC. in bibliothecis illustribus occurrit, adparet. Is lib. 1. de republ. cap. 7. docet, principem non obligari pactis, promissis, et iuramentis suis, nisi quatenus ipsi haec sint vtilia. Eius argumenta sunt:

1. Quia subditos possit princeps aduersus pacta promissa, iuramenta in integrum restituere: inde enim sequi, vt et seipsum restituere possit.

2. Neminem teneri pactis, conuentionibus, iuramentis iniustis. Atqui iniustum esse, quidquid salutis rei publicae et imperantium aduersetur. Ergo principem iis non teneri.

Sed recte scribit GYNDLINGIVS in *Via ad veritatem part. III. num. 2. cap. de pactis*, numquam tam omnem pudorem ponere ipsos principes, quam quidem eruditos. Argumenta enim haec tam sunt subtilia, vt nihil supra. Nam

1. Princeps restituit in integrum subditos, sed non pro arbitrio, quia pacta ipsi non placent, sed quia ea sunt contra leges, e. g. dolo, vi et metu extorta, cum minoribus inita, cet.

2. Falsum est, omnia esse iniusta, quae salutis rei publicae vel priuatae principis repugnant. Saepe enim res publica et princeps iusto bello in eam conditionem rediguntur, vt non possint seruari, nisi pactionibus, quantumvis parum vtilibus. Sic e. g. pax vltima, quam Sueci interant, parum et rei publicae et regi profuit: sed ideo non iniusta.

Attamen et Grotius in eo peccare videtur in defectu, quod principes et pactis vi et metu iniusto extortis, item pactis in minorennitate initis teneri dicit. Prius enim inde est, quod cum Stoicis existimat, pacta vi extorta iure naturae valida esse, quod supra destruximus. Posterius supponit, principem nihil agere sine consiliariis. Sed quid si princeps minorennis captus, et ad pacta iniqua adactus sit?

§. 2.

§. 2.

num. 1. Si ergo quaestio est, *an rex obligentur pactis et iuramentis suis*? observandae quaedam distinctiones, quarum una a Grotio omissa, reliquae ab eo hac paragrapho expositae sunt.

1. Distinguendum inter pacta iusta vel iniusta. Iniusta autem non sunt v. bellica extorta, quia ipsam bellum potest iustum esse, sed e. g. a latronibus et rebellibus extorta, a captivo principe maiorenni sine consensu rei publicae inita, dolo alterius inita. Haec quum ne priuatum quidem obligent, multo minus principem: illa omnino obligant.

2. Distinguendum inter principem, cuius limitatum imperium est, et qui pleno iure imperat. Ille nihil potest, quod ad rem publicam, sine statuum vel ordinum consensu: hic omnia agit suo arbitrio. Si ergo prioris generis princeps aliquid promittit vel inuenit contra salutem rei publicae, id non ratum est, nisi ordines consentiant. Aliud, si princeps libere imperans.

num. 2. 3. Distinguendum inter actus regis quos tamquam priuatus; et eos, quos tamquam rex edit. Illi promiscue obligant, nisi et priuatis conceditur remedium. Hi non, nisi iusti sint, et ab imperante initi, cui plenum est agendi arbitrium.

Iam aliquot exempla allegabimus. In Flandria receptum; ut si moriatur obaeratus, vidua et liberi, si velint venditionem bonorum impedire, marsupium cum clauibus imponant feretro. Quo facto plerumque creditores transigunt, et minorem summam accipiunt. Est ergo hoc remedium civile, aere alieno pressis priuatis in Flandria concessum. Sed refert PONT. HEUTERVS in *Histor. Burgund.* mortuo Philippo audace, duce Burgundiae et comite Flandriae, eius viduam imposuisse feretro marsupium et clauis. *Idne poterat?* Resp. si aes alienum tamquam priuatus, non tamquam princeps contraxerat: potuit vidua vi beneficio priuatorum.

Franciscus I. rex Franciae a Carolo V. captus taedio carceris iniquissima pacta inierat, quibus in ducatum Mediolanensem, Burgundiam, Flandriam iuri omni renunciarat, magnam pecuniae summam promiserat, cet. Vid. P. DANIEL *dans l'histoire de France, tom. III.* Sub finem vitae Francisci I. quaerebatur, an Franciscus I. teneatur? Franciscus I. conquerebatur, i. pacta vi et metu extorta esse. Sed hoc nihili. Erat enim iusto bello

bello in captiuitatem redactus, et Carolus V. ei nullam praeterea vim intulerat. 2. Se pacisci non potuisse sine consensu ordinum. Id omnino momentosum. Quantumuis enim libere imperent reges Franciae, tamen eo tempore alienare nihil poterit sine ordinum vel parlamenti consensu. 3. Se praestitutum, quod tamquam priuatus promiserit, regem enim captiuum non esse regem. Iam promiserat pecuniam, nuptias filii, cet. Et id omnino iuste petebat. Quamuis enim captiuus maneat rex ratione iuris, tamen rex non est ratione exercitii. Conf. L. B. de DANKELMANN. in *Diff. erudit. de pactis principis captiui*.

§. 3.

Quaeritur 2. *quando rex iusiurandum suum in specie possit irritum reddere?* Et hic Grotius ait, posse eum id antecedenter, non consequenter. Quid hoc sibi vult? Resp. sensus est, posse principem, antequam iurarit, ita pacisci cum subditis, et legem fundamentalem condere, eamque iureiurando confirmare, quod in certo casu iusiurandum principis valere non debeat. Si ergo nihilominus princeps in posterum iuret: cum priore iureiurando et lege fundamentali impediri, quo minus posterius iusiurandum seruare possit, quamuis ex Grotii sententia Deo obligatus maneat.

At si, postquam princeps iurauit, is tunc demum huius modi legem fundamentalem condere velit, id fieret in fraudem iurisiurandi prioris, et ei, cui iuratum, ius quaesitum iniuste auferretur, quod absurdum.

Quaestio insignem vtilitatem habet in Germania et Polonia. Notum est, summos imperantes ibi obstringi lege fundamentali, quae in Germania *Capitulatio*, in Polonia *Pacta conuenta* adpellatur. Vtraque pacta imperantes tenentur iureiurando confirmare. In Capitulatione inter alia cauetur, ne quem nobilem, baronem, comitem, aliis principibus subiectum, sin horum praetudicium in principum ordinem adsumat. Fingamus ergo imperatorem alicui iureiurando promississe, se eum principem facturum: id non potuerit, quia antea iurauit, se id non facturum. Peccauit ergo dum iurauit, sed peccaret magis iusiurandum illud posterius praestando.

§. 4.

Quaeritur 3. *an et reges ex promissis suis obligentur sine causa debendi?* Sed haec quaestio facillima. Nam 1. iam supra demonstrauimus, hoc requisitum, nempe causam debendi, manifesto esse ex iure ciuili, adeoque ad principes pertinere nequit. 2. Ratio etiam huius iuris in principe cessat. Nam aut cum alio principe vel re publica ipsi res est, aut cum priuatis. Aduersus alios principes vel res publicas non solent esse liberales, adeo nec quidquam sine causa promittere. Subditis autem benefacere officium est principis: nec melius est, ne ideo ad paupertatem redigantur.

§. 5.

Denique 4. quaeritur, *an et iuribus ciuilibus in pactis et contrahibus summorum imperantium locus sit?* Id negat Vasquius, et cum eo Grotius, et recte, modo distinguas inter ea, quae ius ciuile ex iure naturae et gentium desumit, et ea, quae sunt proprie iuris ciuilis. Illa stringunt principem, non quatenus sunt iuris ciuilis, sed quatenus sunt ex iure naturae et gentium. Haec non stringunt, quia ius ciuile dependet a principe. Principes autem non sibi, sed subditis leges praescribit.

Exemplis res fiet clarior. Nuptiae fiunt consensu. Id iuris ciuilis quidem est, sed ex iure naturae et gentium profisciscitur. At quod fieri debeant nuptiae coram facie ecclesiae, et per benedictionem ministrorum ecclesiae, id iuris mere ciuilis est. Valebunt ergo principis nuptiae etiam sine sacerdotali benedictione, sed non valebunt sine consensu.

Obseruandum tamen, recte facere bonos principes, si se huius modi legibus sponte submittant, ne scandalum praebant subditis.

Hinc facile etiam deciditur quaestio, quam ridicule mouit VASQVIVS *Controu. illustr. lib. II. cap. 51. n. 34. an princeps possit emere sine certo pretio? conducere sine certa mercede?* Consensus enim in idem pretium vel eandem mercedem requiritur a iure ciuili, sed ex principiis iuris naturae et gentium.

§. 6.

Sequitur pars II. huius capitis, vbi quaeritur, *quid principi liceat circa actus subditorum?* Et primo quidem, quia saepe cum ipsis subditis paciscitur princeps, quaeritur, *utrum princeps his pactis vere obligetur, an subditis ius quaesitum auferre queat, et ab obligatione rescilire?* num. 1.

Baldus, quem et alii ICti fere sequuntur, dicunt, principem obligari quidem naturaliter, sed non civiliter. Sed quum haec distinctio obscura sit, videbimus, quid in recessu habeat.

1. Naturalis obligatio aliquando dicitur, quae ex honesti regula; civilis, quae ex regula iusti fluit, e. g. naturaliter obligamur ad dandam eleemosynam, non civiliter. Si eo sensu accipiantur Baldi verba, absurda sunt. Sic enim semper imperfecta erit principis obligatio, nec cuiquam faciet iniuriam, si ab illa resilit.

2. Naturalis obligatio dicitur ea, quae iure naturae quidem firma est, sed ita, ut ius civile ei non adislat: civilis, quae civili iure rata est, quamvis ius naturae eam non agnoscat. E. g. pacta seruari iubet ius naturae, sed ius civile ex pactis nudis non dabat obligationem. Est ergo obligatio naturalis tantum. Contra pactum vi et metu extortum iure naturae irritum est, at iure stricto civili seruandum. Est haec obligatio mere civilis. Si hoc sensu accipias verba Baldi, illa denuo absurda sunt. Sensus enim erit, obligari quidem principem ex pacto suo, sed non, nisi in conscientia, non autem cogi posse. Ergo si imperator violat capitulationem, ordines imperii non nisi ingemiscere poterunt, non autem eum cogere, ut pactis stet.

Quid ergo? Dicimus, obligationem ex principum promissis nasci plenam et perfectam, siue cum subditis agant, siue cum aequalibus. Rationes sunt, 1. quia ius naturae sine distinctione personarum dicit: pacta sunt seruanda. 2. Quia princeps dum paciscitur, non consideratur ut princeps, sed tamquam priuatus, et aequalis.

Obligatur, me agere tamen non posse. Resp. nec eo sensu verum est, principes non obligari civiliter. Nam ab actione ad obligationem non valet consequentia. Agere non possum contra fugitiuum, sed tamen is mihi civiliter obligatur. Pupillus quoque ipse agere non potest, et tamen ei obligatur, qui cum

eo contraxit. Accedit quod in plerisque rebus publicis boni principes se vltro iudiciis supremis submitunt. Sic rex Galliae conueniri potest coram parlamento, elector Saxoniae coram iudicio aulico Lipsiensi.

§. 7.

Quaeritur porro, *an princeps alicui ius quaelibet ex pacto vel iureiurando auferre possit?* Id ordinarie rogatur. Nam ideo principi subiicimur, vt sit, qui iura nostra conseruet et defendat, non vt nobis ipse iura auferat. Sed addit auctor duplicem exceptionem. Nam aliquando princeps id licite facit,

1. Vel poenae causa, veluti quum laesae maiestatis reo bona omnia, simulque et iura auferuntur, et in fiscum transferuntur: quamquam quum effectus huius poenae per indirectum etiam in liberos innocentes transeat, principes parciore esse decet in publicandis bonis.

2. Vi supereminetis dominii. Sed nisi id ius recte describatur, facile degeneraret in tyrannidem. Est ergo ius simile illi, quo vtuntur medici ad vrendum secundumque, si remedia ordinaria non sufficiant. Hinc distinguendum inter statum rei publicae ordinarium et extraordinarium. In statu ordinario est res publica; si pax est, siue omnia se recte habent. At extraordinarius status rei publicae est status morbidus, corruptus, si vel seditiones, vel bella gliscunt. In hoc aliquid licet principi ob necessitatem, si refarciatur damnum, sed non in illo statu ordinario. Hinc potest princeps agrum, quo ad munitionem opus est, sibi sumere, potest nautas cogere ad transmittendos milites, quamuis aliis promissis vel iureiurando obstricti sint. Sed non potest agrum eripere solius vtilitatis causa. Vnde iam aliis obseruatum est, Grotium, eiusque sectatores, quia solius vtilitatis rationem habent, non satis consuluisse subditis contra imperantes, immo ex his principiis facile defendi posse factum Achabi, Nabothis vineam appetentis.

§. 8.

Fuerunt, qui distinguerent, inter ea, quae iure naturae, et quae iure ciuili alicui competant, existimantque priora iura principem ob causas haecenus enumeratas auferre non posse, reliqua vel posteriora posse.

Enim-

Enimvero recte hanc sententiam refellit Grotius. Ius enim hoc subditorum effectus est domini. Dominium autem nascitur, siue modus acquirendi naturalis sit, e. g. dum adquisitio sit per occupationem, siue iuris ciuilis, veluti dum adquisiui per successionem ex testamento. Sufficit enim, me factum esse dominum.

Existimat Grotius, principem et exteris ius quaesitum auferre posse in poenam, e. g. si vectigal defraudando retinuerint, non autem ex vi eminentis domini, quia in res exteriorum nulum sit dominium eminens. Enimvero ipse tamen infra fatetur; tempore belli non iniustum esse exteriorum naues ad transmittendos milites inuitis dominis adhiberi, modo illis soluatur merces. Hinc recte dixeris, hoc ius in omnes se extendere ciues etiam temporarios, quales sunt exteri in re publica nostra commorantes: sed eo discrimine, vt illis res et iura auferri possint in perpetuum, quia sunt ciues perpetui, his ad tempus, quia temporarii.

§. 9.

Inspergit Grotius quaestionem, *an verum sit*, quod nonnullis visum, *contractus principum leges esse?*

Negat id Grotius, et quidem rectissime. Nam 1. leges feruntur et inuitis, contractus fiunt consentiente vtraque parte. 2. Leges non obligant principem, sed subditos: contractus utroque. 3. Leges tolluntur a legislatore inuitis subditis: contractus non item. 4. Immo nullus contractus principis cum principe ratus esset, si contractus essent leges, quia princeps principem legem ferre nequit.

Possunt tamen per accidens fieri leges non ratione contractuum, sed ratione aliorum ciuium, quibus lege publica iungitur, vt ne quid contra contractum agant. E. g. pax Westphalica, contractus locationis conductionis cum publicanis inuitis.

§. 10.

Haftenus de effectu iurisiurandi vel promissi principis intuitu ipsius principis, et subditorum. Sequitur pars III. *quid iuris illi sit in obligandis successoribus?*

Aut succeditur vero iure vniuersali per modum hereditatis;

§ 3

siue

siue patrimoniale sit imperium siue usufructuarium : aut titulo singulari, e. g. per electionem.

Priore casu recte adferitur, successorem obligari promissis et iuramentis antecessoris, quia heres transit in omnia iura defuncti, adeoque et facta eius praestare debet. Et de eo nemo dubitat. Hinc nihil notius, quam successorem heredem conveniri ex contractibus et promissis defuncti.

§. 11.

num. 1.1. At de successoribus singularibus distinguendum ; quod aut defuncti contraxerunt tamquam priuati : et tunc non tenentur ; aut tamquam principes intuitu rei publicae, et tunc tenentur.

Hinc recte Grotius dicit, eos non obligari *directus*, immediate, sed *impulsiue*, mediate, mediante scilicet re publica.

Ratio est, quia imperantibus res publica concessit facultatem contrahendi pro re publica. Et inde est, quod principes nouus electus ex foedere antecessoris obligetur, non autem ad aes alienum eius soluendum, nisi in rem ciuitatis verum sit.

§. 12.

num. 1. Attamen et hic notanda exceptio. Nam quamuis facultatem pro re publica contrahendi principi concesserit populus : ea tamen facultas non est illimitata et infinita. Id 1. in genere probatur, 2. in specie ostenditur, quousque se ea facultas porrigat.

1. Quod restricta sit haec facultas, generatim probatur 1. ex fine ciuitatis. Is non est, vt princeps pro lubitu agat, sed vt id agat, quod salus et securitas publica exigit. Sic e. g. Roma Neroni dederat facultatem imperandi, non occidendi promiscue, non urbem incendendi. 2. Quia omnia pacta habent tacitam conditionem, vt recta ratio seruetur. Rectae autem rationi repugnaret pacisci cum principe, vt ei liceat in nos impune grassari. 3. A simili. Princeps veluti tutor est rei publicae. Tutori autem licet administrare, non spoliare.

num. 2. 2. Sed quousque se ea facultas extendit ? Resp. vt princeps se et rem publicam obliget ob iustam rationem. Non ergo huc quaeritur

1. An pactum a principe initum vtile rei publicae fuerit ?
Nam

Nam saepe et optima consilia male cedunt, et casum nemo praestat.

2. Nec an eo pacto res publica laesa sit? Inter principes enim non semper locum habet aequalitas, ob inaequalitatem virium. Sic saepe potentior foederato impotentiori promittit auxilium 20000. hominum: quum impotentior reciprocè promittat 3000.

3. Sed an pactum probabilem habeat rationem; idque in dubio merito praesumitur, donec contrarium probetur.

Addit auctor nonnullas observationes huc pertinentes, vel- num. 3.
uti, 1. veteres et eos laudare, qui antecessorum promissa praestiterant, vt Titum et Traianum, et eos vituperasse, qui promiscue praestiterunt, vt Vitellium. De Tito vid. SÆTON. in eius Vit. cap. 8. de Traiano PLIN. lib. X. epist. 66. de Vitellio TACIT. Histor. lib. III. cap. 55. Sed distinguendum omnino, an salua re publica praestare possint, nec ne. Accedit, quod Titus et Traianus titulo vniuersali; Vitellius titulo singulari electionis successerunt.

2. Et rem publicam aliquando non teneri praestare promissum principis sui, si iam pateat, illud manifesto vergere in perniciem rei publicae, e. g. si princeps vicino obsequium sine ratione promiserit, eo mortuo res publica non tenebitur praestare, quod promissum, nisi expresse consenserit, vel principem promitti iusserit. num. 4.

Obiici posset, dixisse nos §. 11. n. 2. rem publicam teneri, et per rem publicam etiam successorem singularem: quomodo ergo dici posse, huius modi promissum reuocari? Rectè resp. Grotius, hic promissum non reuocatur, sed ab initio nullum fuit, quia principi facultas huius modi quid promittendi concessa a populo non fuit.

3. Quae de contractibus dicta, eadem intelligenda esse de num. 5. 6.
alienationibus. Si enim res domaniales sine ratione alienauerit princeps, populum vel successorem eas iure reuocare, iam supra demonstrauimus.

Enimuero ea observatio superuacua est, quum alienatio a principe semper fere per contractus, raro per vltimas voluntates fiat. Contractus autem iniri non possunt de rebus alienis. Manifesto autem res alienae sunt domaniales, quippe quae ad rem publicam pertinent, vsufructu dumtaxat principi competente.

§. 13.

§. 13.

Sequitur quaestio, *an successor tollere possit vel reuocare beneficium ab antecessore datum?* Sunt, qui id promiscue fieri posse existimant: quod absurdum, quum sic principi non liceat esse benefico, quod tamen priuato cuius licet.

Rectius ergo cum Grotio distinguimus, de suo, an de rebus ad ciuitatem pertinentibus liberalis sit princeps. Si de suo: id, quod semel datum, reuocare non potest, nisi in poenam vel ex dominio eminente. E. g. si donauit ex patrimonialibus, si utensilibus auro, argento cet. aliquem locupletarit. Sic enim donauit non tamquam princeps, sed tamquam priuatus, adeoque eodem iure tenetur. At princeps beneficus de rebus ciuitatis de alieno liberalis est. Quum itaque huius modi donatio in se nulla sit, sequitur, vt et ipsi, et successores, et res publica eam reuocare pro lubitu possint.

§. 14.

Bella est quaestio vltima, *an contractibus eorum, qui iniuste inuaserunt, teneantur successores iusti.* Habemus exemplum in Anglia, postquam Oliuero Cromwello Carolus II. rex legitimus successerat. Cromwellus multa foedera, multa pacta, etiam Angliae vtilissima inierat cum vicinis gentibus. An iis obstringebantur etiam legitimi reges?

Negat id Grotius, quia princeps legitimus plane non est successor eius modi inuasoris, neque vniuersalis, inquam, successor, nec singularis. Ergo plane non tenetur illius factum praestare.

Addit tamen auctor exceptionem, si in rem versum, id est, si in vtilitatem rei publicae vergit pactum ab inuasore initum. Tunc enim quasi negotia rei publicae vel principis vtiliter gestit, adeoque hic obligatur ex axiomate illo notissimo, neminem debere cum damno alterius locupletiores fieri.

CAPVT XV.

DE FOEDERIBVS ET SPONSIONIBVS.

§. 1.

HAftenus de pactis et conuentionibus principum in genere. Quemadmodum ergo supra pacta priuatorum a contractibus distinximus: ita Grotius et pacta principum distinguit a foederibus et sponsonibus, de quibus hoc capite 15. ita agit, vt

1. ostendat diuisionem huius modi conuentionum publicarum, §. 1-7.

2. doceat, quid iustum sit circa foedera? §. 8-15.

3. Quid iustum circa sponsones? §. 16. 17.

Conuentiones sunt vel publicae, vel priuatae. Publicae, quae nisi iure imperii fieri nequeunt, e. g. foedera, pax, pacta cum hostibus inita, induciae. cet. Priuatae, quae et a quouis priuato iure ineuntur, e. g. emptio, permutatio, donatio, cet.

§. 2.

Publicae denuo diuiduntur in foedera, sponsones, et *pactiones*. Foedera sunt pacta inter gentes iuita: sponsones pacta a legatis vel priuatis sine iussu imperantium inita: omnes reliquae conuentiones vel cum hostibus, vel cum priuatis iuitae a re publica generale nomen retinent *pactionum*.

§. 3.

Inde facile patet, quodnam sit discrimen foederum et sponsonum. *Foedus* initur iussu summae potestatis, adeoque aeque obligat principem et rem publicam, ac contractus a priuato per mandatarium initus. num. 12

At *sponsio* est, quando ii, qui mandatum non habent a summo imperante aliquid promittunt nomine principis vel rei publicae. Quod fieri potest non vno modo, e. g.

1. Si legatus fines mandati excederit, et plus promiserit, quam princeps iussit.

Heineccii Prael. Gros.

T t

2. Si

2. Si dux bellicus ad incitas redactus turpi pacto vel foedere periculum auertere conetur iniussu rei publicae. Tale exemplum est in sponsione Caudina apud Liviū, *Histor. lib. VIII. cap. 8.*

num. 2.

3. Si minor pars populi paciscatur ignorante vel repugnante parte maiore, quale est elegans exemplum in historia belli Gallico-Romani. Galli Senones Romam occupauerant et incendebant, populus maximam partem Veios in castra, pauciores in arcem Capitolinam cum Manlio secesserant. Hi arcem defendebant diutissime: extrema passi pactum inibant de vita illis pro pecuniae certo pondere concedenda. Dum iam pecuniam adpendebant, Furius Camillus cum exercitu superueniens, rem omnem turbauit, negauitque, populi partem pacisci potuisse inuita parte maiore de re, quae ad vniuersam spectet rem publicam.

Equidem si de se tantum pacti fuissent, pactum fuisset ratum, vti quotidie tempore belli videmus validas haberi pacificationes ditionis crassa intactas a duce praestito praesidio, quamuis a superiore non confirmatas. At de summi rei pacisci nemo potest, nisi iussu rei publicae summi imperantis, alias est sponso tantum.

num. 3.

Sed quaeritur, quae ex sponsione spondenti imponatur obligatio? Posset videri, non alia nasci, quam quae ex promissione facti alieni. Ex ea enim tantum teneor ad operam quamcumque nauandam. Sed respondetur, id falsum esse. Hic enim non promitto factum alienum, sed promitto pro alio, ac si ille mandasset, quum tamen non mandauerit.

Ergo distinguendum, praedixertur spondens, se nullo mandato instructum haec promittere, sub spe rati; tunc non tenetur: an dissimularit, et prae se tulerit, se mandatum habere; et tunc tenetur ad satisfactionem. Ea satisfactio vel ad id, quod interest, pertingit, vel, si dolus concurrat, ad poenam. Apud Romanos mos erat tradendi spondentes nudos, reuinctis intergum manibus.

§. 4.

Quum Menippus, regis Antiochi legatus, apud Liuium tria constituat foederum genera: quaerit Grotius, an ea diuiso admittenda sit?

1. . . .

2. . . .

3. Ni-

Ni-

Nimirum ex Menippi sententia sunt, 1. foedera, quibus bello victis leges dicantur, in quibus victoris sit arbitrium, quid relinquere velit victis.

2. Foedera, quibus gentes bello implicitae pacem faciunt; tum plerumque res vero domino reddi, aut lites de iure et possessione rerum conuentione finire.

3. Foedera, quae fiunt inter eos, qui hostes numquam fuerunt, qualia sunt foedera de commerciis, mutua defensione.

Sed haec diuisio eo vitio laborat, quod primum genus foederum id nomen haud meretur, quippe quum foedus sit conuentio inter societates liberas. Gens autem deuicta et perdomita, cui leges praescribit victor, non amplius est libera. Deinde foedus est conuentio. Leges autem praescribere subiectis non est conuentionem vel pacem inire, quum sit actus unilateralis.

§. 5.

Meliorum itaque daturus diuisionem Grotius foedera distinguit in ea, quae nihil adiciunt iuri naturae, et ea, quae aliquid adiciunt. Prioris generis foedera generalia; posterioris specialia dici possunt.

1. *Generalia* sunt, quibus aliquid nobis stipulamur, quod iam tum iure naturae debetur, e. g. ne alter nos laedit, vt amicitiam et vicinitatem nobis commodam percolat, cet. Vocantur haec foedera etiam amicitiae.

2. *Specialia* sunt, quibus aliquid stipulamur, quod non debetur iure naturae, e. g. mutuam defensionem.

Sed quaeri posset, an non foedera generalia sint superuacua, et minus necessaria, quum certum sit, iam iure naturae deberi, quod promittitur? Verum respondet Grotius, ideo veteribus fuisse necessaria, quia post diluuium praeceptum iuris naturae, quod hominem homini insidiari nefas sit, oblitteratum fuerit improbitate hominum.

Hinc eleganter et erudite obseruat, pleraque gentes olim ita a pristina virtute descivisse, vt latrocinari iis non visum sit turpe, modo latrocinia exercerentur aduersus externos, non ad-

uersus ciues. Hinc Scythae, Germani, Parthi, latrocinia sibi laudi ducebant. Hinc apud HOMERUM *Odyss. γ. quaestio: estisne praedones?* vbi scholiastes: *latrocinari apud antiquos non tantum infamia carebat, sed insuper gloriosum ducebatur.* Immo apud PLAVIVM in *Militie glorioso* non semel milites vocantur latrones ex veteri more, quo latrocinari non turpe erat.

Quamuis vero haec recte se habeant: non tamen vera haec est ratio, cur opus fuerit foederibus generalibus, quae potius a natura officiorum imperfectorum et ciuitatum est repetenda. Nam

1. Inter vicinas gentes aut ciuitates vel bellum, vel praeparatio belli, vel infida pax est. Semel autem exstincta amicitia non facile reuiuiscit, nisi huius modi foederibus.

2. Non laedere est officium perfectum: amicitiam et humanitatem praestare alteri, officium imperfectum. De hoc autem certas alter esse nequit, nisi foedere vel pacto illam sibi stipuletur.

num. 3. Hinc etiam facile patet, *an inter pacta haec generalia referenda sint foedera de iure hospitii, itemque de libertate commerciorum?* Gens genti hospitium et commercia iure perfecto non debet, quia non tenetur alterius commoda cum suo detrimento promouere.

Si ergo iure perfecto non debentur: opus est, ut pactis et foederibus sibi hanc libertatem stipulentur gentes et ciuitates. Et sane hoc respectu magis specialia sunt haec pacta, quam generalia. Quis enim dixerit, eum principem contra ius naturae peccare, qui commercia cum exteris prohibet, quod ipse Deus fecit in re publica Israelitica?

§. 6.

num. 1. Iam specialia foedera porro subdiuiduntur in *aequalia* et *inaequalia*.

Aequalia, vbi vtriusque paciscentis par est conditio, e. g. si gentes sibi inuicem promittunt mutua auxilia eiusdem quantitatis.

Inaequalia contra, vbi impar est paciscentium conditio, quale est foedus inter Francos et Heluetios.

Vtra-

Vtraque tum aequalia, tum inaequalia fiunt vel *pacis*, vel *num. 1. 3:*
societatis caussa.

Pacis caussa, quæ pertinent foedera de pace constituenda, de reddendis captiuis, (quæ vocantur *Cartels*,) de induciis, de munimentis quibusdam a tertii milite custodiendis (*Barriere-Tractaten*).

Societatis vel ad commercia pertinent (*commerciën-tractats*) vel ad bellicam societatem (*off-und defensiv-Allianzen*).

Omnia enim hæc foedera vel aequalia, vel inaequalia esse posse, nemo non videt, e. g. in pace modo vtrique restituuntur, quod bello extortum, modo alterutri. In foederibus commerciorum caussa in initio modo vtrique, modo alterutri promittitur a vestigalibus libertas. In bellica societate modo par vtrique imperator militum nauiumque numerus, modo impar.

§. 7.

Inaequalia foedera denuo diuiduntur. Nam aut inaequalia *num. 1:*
sunt ratione praestationum, aut ratione modi praestandi.

1. *Ratione praestationum*, vbi inaequalis est praestationum mutuarum quantitas. E. g. rex rei publicae promittit 30000. res publica regi 10000. milites.

2. *Ratione modi praestandi*, in foedere vni praeminentia quaedam conceditur, e. g. Bauarus foedus cum Gallo inierat, sed hic sibi stipulabatur, vt Dux Gallicanus Bauaricas copias simul duceret in Germania. Sic Carthagenenses quoque foedus post bellum Punicum I. et II. inibant, sed ita, vt tributum annuum Carthagenenses deberent Romanis, nec sine eorum consensu bellum gerere possent.

Hæc inaequalia ratione praestationum vel sunt coniuncta *num. 2:*
cum imminutione imperii, vel sine imminutione huius modi ineuntur. *Cum imminutione coniuncta*, vbi alter foederatus alterius imperium semper et manifesto agnoscit, vti huius modi foedera erant inter Romanos et Carthagenenses, inter Augustum et Herodem, hodie inter Barauos et reges Ceyloniae.

Quæ *sine imminutione imperii* sunt, vel imponunt onus perpetuum, vel temporarium. E. g. foedas Helueticum Heluetiis hoc perpetuum onus iniungit, vt patiteneantur milites a Gallis in suo territorio conscribi: nec tamen eo ipso summum Hel-

uetiorum imperium minuitur. At et Bauaro imponebatur onus, vt pati teneatur milites suos a Gallicano imperatore duci : verum hoc onus erat transiens.

Possset aliquis existimare, foedera huius modi esse iniqua, quia ius naturae in conuentionibus exigit aequalitatem.

Sed resp. opus est ea aequalitate, vbi res certam admittit aestimationem, vt in contractibus priuatorum. At conseruatio imperii est res inaeestimabilis. Hinc quia impar est rerum publicarum potentia, hinc impotentior saepe promittit minus, potentior maius, si huius interest, minorem rem publicam a tertio non opprimi. Sed et impotentior ciuitas saepe vltro subit maius onus, si videat, aliter se saluam esse non posse, nec aliter adduci se passurum potentioorem, vt ei auxilio sit.

§. 8.

Haec prima pars : sequitur altera, vbi quaeritur, *quid iustum sit circa foedera* ? Prima et difficillima quaestio est, *an cum infidelibus liceat foedera inire* ? Notum enim est, quam diu olim Hispani scripserint Francisco I. regi Franciae, foedus ineunti cum Turcis aduersus Carolum V. imperatorem.

Distincte ergo eam quaestionem ad ius naturae et ius diuinum posituum exigit Grotius.

Quod ad ius naturae recte negat, haec foedera repugnare huic iuri sempiterno. Nam ius naturae est commune omnium hominum ius. Si est commune omnium hominum, sane non distinguit illud inter infideles et fideles. Potius quemadmodum aequè iniustum est ethnicum occidere ac Christianum, ita aequè iustum, cum ethnico pacisci quam cum Christiano.

§. 9.

sum. I.

Quid vero *de iure diuino* ? Hic haud pauca sunt S. S. loca, ex quibus sequi videtur, foedera cum infidelibus Deum auersari et prohibita velle. Sed Grotius tamen docet, ea nec *V. T.* nec *N.* repugnare principiis.

Nam I. non improbantur foedera amicitiae cum infidelibus inita, quale est illud Iacobi cum Labano, *Gen. 31. 44. sequ.* Deinde cum Edomitis et Aegyptis foedera Israëlitarum non improbat Deus, quia generatim voluit, ne Israëlita Edomitas et Aegyptios

gyptios auerfarentur. *Deuter.* 33. 7.

Obiici posset, foedera tamen cum populis Palaestinae prohiberi expresse *Deut.* 7. 2. Sed resp. Deum Israëlitis exsequutionem demandasse. Praevaricatio autem fuisset, foedus inire exsequutores cum condemnatis. Ita Grotius. Sed ego existimo, Deum Israëlitis non solum moraliter mala prohibuisse, verum etiam mala politice talia, quia Deus erat summus imperans Israëlitarum, eorumque resp. vere *Dissegratio* dici poterat. Vid. HERN. CONRINGII *Diff. de theocratia Hebr. re publica sine exemplo*. Atqui omnino politice malum erat, Hebraeos ad idololatriam natura procliuēs cum idololatriis in sua terra obuiis foedus inire. Magis consultum erat, omnes has gentes funditus extirpari, ne corrumpereēt Israëlitas. Ratio ergo huius prohibitionis non moralis fuit, sed politica.

2. Nec Deus prohibuit foedera commerciorum caussa cum *num. 1.* infidelibus inita: idque probatur exemplo Salomonis, huius modi foedus ineuntis cum Hieramo, Tyrionum rege. 1. *Reg.* 5. 12. Ilque actus Salomonis expresse ibi tribuitur divinae, quae in Salomone reluxerit, sapientiae. Immo non solum cum Hieramo huius rei caussa foedus initum oportuit, sed et cum gentibus Ophiriticis, ad quas nauigabant tunc homines Salomonis.

Obiici posset: Deum expresse dixisse: *amabis proximum, num. 3. 4.* quod ipsi doctores Ebraei interpretati sunt: odio habebis inimicum. Immo id tam late interpretabantur Iudaei tempore Christi, ut gentilibus ne quidem officia innoxiae utilitatis praestarent, nedum ut cum iis inirent foedera. Vid. querelas gentium de ea Iudaeorum *persecutione* ab ipso auctore hoc *n. 3.* collectas.

Sed recte hic respondet Grotius, fuisse hanc doctorum interpretationem falsissimam, et hinc a Christo efficacissime refutatam, non solum verbis *Matth.* 5. 43. *sequ.* verum etiam ipsis factis. Christus enim cum Samaritide loquutus est humanissime, cum ea bibit, apud eam diuertit, ut re ipsa doceret, non esse sensum legis divinae verum, quem illi adfingebant Iudaei, quod abhorrendum plane sit a gentibus exteris. Addit Grotius, etiam veteres fideles ita legem Dei interpretatos, nempe Dauidem, qui a Saule passus persecutionem ad Philistaeos confugit, et Salomonem, qui in precibus, quibus templum dedicabat, etiam gentilibus concessum dicit, ut in atrio extremo templi orent. 2. *Reg.* 8. 41.

Soli

num. 5. Soli denuo ob rationes politicas excipiebantur gentes Palaestinae, et inter Israëlitas viuentes, ne familiarior iusto consuetudo cum his infidelibus Israëlitas ad idololatriam pelliceret. Vid. quae diximus ad §. 9. n. 1.

Hinc tantum abest, ut cum iis commercia habere potuerint Israëlitae, ut ne licuerit quidem iis officia humanitatis praestare. Diserte enim Moses *Deut. 23. 6. non quacres prosperitatem eorum, nec bonum eorum, vllis diebus tuis umquam.*

num. 6. 3. Nec foedera mutuae defensionis cum gentilibus illicita fuerunt. Sic Abrahamus armis iuuit Sodomaeos, *Genes. 14. 14. sequ.* Ita et Hassamonaei foedus huius modi inierunt cum Romanis et Spartanis. Vid. 1. *Maccab. 14. et 15.* Quamuis enim hi libri non sint canonici: habent tamen auctoritatem historicam, docentque, Hassamonaeos, tamquam legis peritos, huius modi foedera in se non putasse illicita.

Obiiciunt loca 2. *Paral. 19. 2. 25. 7.* vbi increpatur Iosaphatus, rex pius, quod foedus inierit cum rege Israëlitarum, contra Syres. Item 2. *Paral. 20. 37.* vbi itidem increpatur Iosaphatus, quod foedus commerciorum caussa fecerit cum Achozo, rege Israëlitarum idololatra. Videtur ergo Deus plane haec foedera improbare.

Sed resp. 1. non increpatur ipsum foedus, sed Iosaphati leuitas et pertinacia. Deus enim per Micham praedixerat, bellum illud male cessurum, et tamen Iosaphat in foedere persisterat.

num. 8. 2. Israëlitarum idololatrarum eadem erat ratio, ac gentium Palaestinarum inter Israëlitas viuentium. Familiaris enim cum illis consuetudo facile pellicere potuisset fideles ad similem impietatem. Vbi ergo eadem est ratio, ibi eadem legis dispositio.

num. 9. 3. Saepe non tam foedera a Deo reprehenduntur, quam animi consilium, quo haec foedera inita sunt. Saepe enim ea inibant Israëlitae ex diffidentia erga Deum, eoque pertinet exemplum Afae regis. 1. *Paral. 16. 12.*

Quis autem ignorat, ob huiusmodi prauam intentionem actus in se licitos vitari? Exempla habemus 2. *Sam. 24.* de Dauide censum agente, et 2. *Reg. 20. 13.* de fiducia in Aegyptum posita.

num. 10. 4. Denique Israëlitis non opus fuit foederibus, si essent probi, ob promissiones speciales victoriae. *Deut. 18. 7.* Ergo plerumque

rumque aut inibantur ab Israelitis prauis et idololatria pollutis; tunc foedera huius modi Deo placere non poterant, quia nihil, quod sit ab impiis, Deo placet: aut inibantur a probis quidem, sed Deo diffidentibus, nec sic Deo placebant.

Vt paucis dicamus: foedera cum infidelibus non in se erant illicita, sed facile mala fiebant et Deo displicebant pro ratione circumstantiarum.

§. 10.

Pergimus ad scripturam N. T. et quaerimus, *an ei aduersen-* num. 1. 2
tur foedera cum infidelibus? Id merito negat Grotius.

1. Quia Euangelium etiam hostium caritatem per modum praecepti inculcat. *Matth. 5. 43. sequ.*

Quamuis enim salua manere debeat graduum differentia, adeoque aequissimum sit, vt plus amoris praeistemus fratribus, quam aliis: omnibus tamen Christianus debet amorem. Quod eleganter ita eloquitur Paulus apostolus: *benefacite vnicuique-*
que, maxime tamen inquilinis fidei.

2. Nec Christus inhibuit conuictum et conuersationem cum num. 3:
infidelibus. Potius et ipse, et apostoli, frequentissime inter gentiles et Iudaeos versati, cum illis ederunt, biberunt, cet.

Obiici possent loca 2. *Thessal. 1. 15. 2. Cor. 6. 14.* vbi omne commercium cum haereticis et religionis desertoribus videtur prohiberi.

Sed haec prohibent 1. conuersationem totalem, qua corrumpi possent fideles, et ad eosdem errores abripi; 2. prohibent conuersationem haereticorum ob scandalum, quod inde capere possent fideles. Multa autem in se licita mala sunt, si scandalum metuitur fratrum.

Obiici etiam porro posset, non probari in S. S. imperia infidelium sponte inita, nec connubia cum infidelibus inita. Sed resp. 1. improbari illa non tamquam illicita, (alias enim nec retinere Christianus posset coniugem infidelem, nec parere salua conscientia posset regi infideli, quod absurdum,) sed tamquam minus bona. Si enim electio nobis est libera, qualis in coniugio, quis non male verterit homini fideli, coniugem infidelem tot fidelibus sine ratione praeferenti. 2. Improbatur eadem ob euentum, qui sequi potest, tristissimum. Facile enim femina blanditiis muliebribus maritum ad errores suos pelliciet, vti

Heineccii Prael. Grot.

V u con-

contingit Salomoni : facile maritus infidelis uxorem natura simpliciorem imperio maritali vel auctoritate territam ad suas partes protrahet.

§. 11.

num. 1. Satis ergo demonstratum a Grotio, foedera huius modi in se haud esse illicita. Posse tamen fieri mala pro circumstantiarum qualitate, idem demonstrat. Nam

1. Possunt mala fieri, si nimia commixtio contagium infirmis adferat. Hinc diximus, Deum omnem familiaritatem cum Palaestinae gentibus prohibuisse.

num. 2. 2. Possunt mala fieri, si foederibus liuius modi potentia infidelium maximum capiat incrementum, ut deinde communem causam eo facilius opprimant. Sic enim occasione suppeditamus ruinae religionis. Obiter tamen moneo, perversam hic esse explicationem dicti *Matth. 6, 33.* quod non de externa propagatione evangelii, sed de interna cura salutis agit.

num. 3. Et inde concludit Grotius, optandum esse, ne foedera cum infidelibus contra Christianos inita nimis frequentia sint. Nos huic voto subscribimus, observato discrimine inter foedera belli et commerciorum causa inita. Haec enim non tam periculosa sunt fidei, ac illa.

§. 12.

Illud vix ferendum, quod Grotius paragrapho insequente pontificiorum dogmati subscribit, omnes Christianos coniungere debere arma aduersus infideles, et peccare principes in conscientia, qui id praetermittant. Hoc enim ipsum principium est, quo a saeculo XI. pontifices homines ad suscipiendas expeditiones Hierosolymitanas excitabant. Grotii argumenta sunt,

1. Quia omnes Christiani sunt membra vnus corporis, et hinc etiam reliquorum membrorum dolores et mala persentiscere debeant. *1. Cor. 12. 18. 26.* Sed resp. Christiani, qua Christiani, non pugnant armis carnalibus. Qua imperantes pugnant; sed tunc id non iuste fit, nisi permittat ius naturae. Ius naturae autem non permittit bellum ob solam aduersae partis infidelitatem.

2. Esse hanc causam communem. Resp. aut infideles bellum excitant eo consilio, ut Christianos eradicent, tunc causa est

est communis: aut ex politicis rationibus bellum susceptum, tunc non dici potest causa communis, nisi per accidens.

3. Addunt pontificii, vniuersa imperia Christiana constituere vnam rem publicam maximam. Resp. id ipsum est principium pessimum, et ideo inuentum, vt papa se possit caput huius magnae rei publicae constituere. Christianismus non mutat statum rerum publicarum. Ecclesia non est res publica, sed in re publica.

Hinc distinguendum inter bella defensua et offensua. Offensua iniusta sunt, 1. si suscipiantur siue causa contra infideles, tantum quia infideles sunt. Hinc pleraeque expeditiones cruciatae, quas vocant, fuere iniustissimae, nec iustius est bellum Hispanorum contra Americanos. 2. Si suscipiantur contra praeuia pacta et foedera. Triste exemplum vidit Hungaria in Ludouico, vltimo rege Hungariae.

Si defensuum bellum gerendum, tunc iustam causam habent, qui oppressis Christianis adstant, eosque in ordinem cogunt, et huius modi foedus laudabile est: sed non sunt iniusti, qui id non faciunt, quum et in foederibus pangendis populi et reipublicae salus sit lex suprema. Legi meretur BVDEI *Exercitatio eruditissima de expeditionibus sacris.*

§. 13.

Sequitur noua quaestio: *si plures nobis sint foederati, iique nam. i. inter se bellum gerant, vtri opem ferre teneamur?*

Hic tenendum, non foedus nos obligare ad ferendam opem, sed causae iustitiam. Semper enim foedera intelligenda sunt cum tacita conditione: feremus opem, si iniuste quis te adgrediatur, vel si iuste alium adgredieris. Vbi ergo vnus ex foederatis nostris bellum iustum gerit, ibi ei opem ferre tenemur, cuius causa est iustissima.

Excipitur tamen casus, si alteri promissum, ne alteri mittantur auxilia, tunc neutri potest opem ferre, id quod hodie vocant neutralitatem. Sic Venetiae et dux Lotharingiae superiore bello nec Gallorum nec imperatoris partibus accedebant, quia vtrisque foedere obstricti promiserant, se non misuros auxilia.

2. Si vtriusque partis causa iniusta vel certe dubia sit, neutri opem ferre tenemur, sed tunc nos offerre possumus tamquam mediatores et sponsores pacis, id est, possumus modo hu-

V u 2 ius

ius, modo illius ruinam euitare, vt pax, neutro ad incitas redacto, eo facilius coalescat.

Laudanda ea in re res publica nostra, quae superiore saeculo inter Suecos et Danos ita se gessit mediam, vt modo Danis contra Sueuos adesset, modo Suecis contra Danos, prout huius vel illi parti interitus imminabat. Non enim aderat tamquam res publica foederata, sed tanquam sponzor pacis, eo consilio, vt vtramque partem ad pacem redderet procliuorem.

num. 3. 3. Si vterque foederatus bellum cum tertio gerit, tunc vtrique auxilia ferri possunt, siue militibus submissis, siue pecunia. Sic Britannii et Bataui et Caesari et regi Lusitaniae copias submittebant.

4. Rarior est casus, quem tangit Grotius, quod foederatus vtrique foederato praesentiam suam promissit. Quum enim praesentia sit indiuidua, nec pluribus simul commodari possit: quaeri tunc possit, *vtri foederatorum ipse praesens adesse teneatur?*

Et respondet Grotius, tunc potius esse causam foederati antiquioris. Priori enim foederato iam ius quaesitum erat, quum nouum foedus iniretur.

num. 4. Addenda tamen exceptio, nisi posterius foedus simul sit coniunctum cum translatione domini. Nam tunc posterius solet priori pacto anteferri, quia priori satis fieri potest praestitum id quod interest. Et hinc ratio videtur 1. cur venditio posterior, sequuta traditione, priori praeferratur, 2. cur venditio tollat priorem locationem secundum vulgare: *Kauf bricht Miethe*.

Sed si vera fateri velimus, haec ex iure ciuili sunt. Ipse enim Grotius supra adcurate docuit, dominium etiam sine traditione nuda contrahentium voluntate transferri. Id si verum, posterioris contrahentis non melior causa est, quam prioris.

§. 14.

Quaeritur porro, an foedus in tempus initum tacite censetur renouatum?

Resp. minime, 1. quia natura omnium pactorum in diem initorum haec est, vt lapsu diei expirent; 2. quia circumstantiae interea ita mutari potuerant, vt foederati nostri interit potius foedus finire, quam continuari. Exemplum iam videmus in Heluetiis, vbi finito Gallorum foedere cum Evangelicis ciuitatibus nihil praestant Galli, nisi foedus renouetur.

§. 15.

Finitur etiam foedus alterius perfidia. Nam ea foederis natura est, quae pacti. Vtrumque tacitam habet conditionem: praestabo, si tu praestiteris.

Sed notandum, 1. locum esse huic iuri, si alteri prius aliquid praestandum sit. Hinc facta pace Badensi, quum et rex restitutionem Brisaci et Friburgi, et imperator electori Bauariae restitutionem promississet: hic dicebat, se restitutum, si prius restituisset Gallus: hic idem repetebat. Neuter erat perfidus, quia neutri pax priori restitutionem iniungebat.

2. Perfidiam liberare partem innocentem, non perfidum: nam ita fructum caperet malitiae suae. Id et in pactis obtinet. E. g. si diuortium sit ob adulterium, solet parti innocenti permitti nouum connubium, non autem adultero, quia hunc perfidia sua a nexu non liberauit.

§. 16.

Sequitur tertia pars capituli *de sponsonibus*. Quid sit sponsio, num. 2. iam in prima parte diximus. Hic tantum binae expediendae erunt quaestiones:

1. *Si sponsio reprobatur a re publica, in quid teneantur sponsores?* an ad id quod interest, an ad restitutionem causae in statum priorem, an ad dedendum corpus?

Prima sententia videtur ex iure ciuili defendi posse. Nam mandatarius, qui fines mandati transiit, tenetur ad id, quod interest.

Alteri aequissima videtur. Qui enim cum sponforibus pactus est, non aliud damnum incurrit, quam quod iam res non amplius sit in priore statu. Si ergo in eum statum reducatur, ipsi satis factum videtur.

Tertia sententia ex iure faeciali Romanorum est, et 2. exemplis illustribus firmata, sponsione nempe Caudina et Numantina, de quibus supra.

Grotius distincte hanc quaestionem soluit, et hinc 1. probat, summum imperantem huius modi sponsione non teneri. Id manifestum, quia nemo obligatur facto alterius, nisi vel mandatur adiut, vel utiliter gestum sit negotium. Hic vtrumque obligationis fundamentum abest.

Inde colligit, 2. populum nec ad id, quod interest, nec ad restitutionem rei in primum statum teneri. Non ad prius, quia non laesit alios, quibuscum numquam pactus est populus. Nec ad posterius, quia sibi imputare debent, qui occasiorem rei bene gerendae ex manibus dimiserunt.

NUM. 3. 4.

3. Nec exercitum teneri ex hac sponsione, 1. quia nec ipse contraxit, nec mandatum contrahendi dedit. Si enim id factum esset, omnino tenerentur. 2. Quia sibi debent imputare, qui sponsoforum tantum fidem sequuti sunt.

Reliquum est, 4. ut corpora et bona debeantur sponsoforum, et corpora quidem, 1. si prae se tulerunt, quod publico nomine promittant, tunc enim manifestus est dolus, 2. si bona non sufficiant refarciendo damno.

Vnde quum Romani hoc modo et sponsores et bona dederent, recte monet Grotius, aequius esse, ut primum bona dantur, hisque non sufficientibus corpus.

§. 17.

NUM. 1.

Quaestio II. *an obliget sponso summum imperantem ex notitia et silentio?* Alias enim vulgaris regula est, eum, qui tacet, consentire videri.

Resp. distinguendum esse, an pure facta sit sponsio, an sub conditione, si rata haberetur a summa potestate.

Posteriore casu nullam obligationem ex sponsione nasci, passim est. Suspensus enim est pacti effectus a ratihabitione imperantis: eam vel expresse fieri oportet verbis, vel tacite factis: adeoque nudum silentium non sufficit.

NUM. 2. 3.

Si pure factum, tunc denuo distinguendum, utrum solum silentium tenuerit imperans, an factum accesserit, ex quo ratihabitio colligi possit. E. g. si sponsio facta sit, ut naues tradantur, et imperans ante ratihabitionem expressam naues quasdam acceperit.

Fundamentum est, quia qui vna in re pactum probat, id totum videtur probare.

Ad factum autem hic referri nequit non factum. Eoque pertinet elegans exemplum ex Polybio et Livio adductum. Asdrubal promiserat, Carthaginenses Iberum non transituros. Carthaginenses postea negabant, eam sponsonem suo iniussu initam
ratam

ratam esse. Obiiciebant Romani, eos tacite ratum habuisse; quia Iberum non transferint. Carthaginenses respondebant, nullam fuisse occasionem. Et id recte. Ex non facto nulla inferri potest ratihabitio, quia nihil positum hic adest, ex quo voluntas ratihabendi posset colligi.

Posset et quaestio subiungi, *an duces et milites iniussu summi imperantis possint pacem cum hoste inire expediendae salutis suae causa, uti saepe fit in obsessionibus urbium?* Sed quia haec quaestio ad ea, quae in bello licita sint, pertinet, hinc de ea acturi sumus libro ultimo.

CAPVT XVI

DE INTERPRETATIONE.

§. I.

Doctrina de interpretatione veluti vaga ac incertae sedis est. Theologi eam sibi vindicant sub titulo *theologiae exegeticae*. Clericus eam refert ad criticam. Grotius primus ad ius naturae retulit, eumque postea sequuti sunt Pufendorffius, Thomassius, et alii. Propria tamen huius doctrinae sedes est in logica.

Quaeritur itaque, *cur Grotius hanc doctrinam ad ius naturae referat?* et *cur hoc potissimum loco eam pertrahat?* Ratio est, quia haec actum de promissis. Jam de illis saepe nascuntur dubia, quomodo intelligenda sint. Non enim ad verba solum, sed praecipue ad sensum promittentis respiciendum est. Quis vero fuerit sensus, id ex regulis interpretationis est iudicandum. Dici non potest, quanta sit huius doctrinae utilitas in publicis negotiis. E. g. Ferdinandus Catholicus foedus inierat cum rege Galliae de diuidendo regno Neapolitano. Quum Gallis assignaretur Campania, aliaeque provinciae, statim hic oriebatur quaestio, antiquane Campaniae significatio locum habere debeat, an noua? Opus ergo erat interpretatione.

Recte autem notat Grotius sub finem *n. 2.* interpretationem niti signis, signa autem esse duorum generum, verba et coniecturas. E. g. si dubium oritur, quid significant verba Caroli

V. idem,

V. *idem*, quod optat rex Franciae, et ego volo; id ex coniecturis repetendum. Sin quaeratur, quid significant verba: *saluo capite abito*; id ex verbis iudicandum.

Verba iterum vel *simplicia* sunt, vel *complexa* siue *coniuncta*. Vel enim in vocibus simplicibus latet obscuritas, e. g. Titio lego penum: vel in integris phrasibus et propositionibus, e. g. quod optat rex Franciae, et ego volo.

Constat ergo caput duabus partibus. Nam 1. agitur de *verbis tam simplicibus* §. 2. 3. quam *coniunctis*, §. 4-16. 2. de *coniecturis* §. 20. ad fin.

§. 2.

Fundamentum omnis verborum interpretationis est proprietatis significationis. Qui enim nobiscum loquitur, vult, ut verba eam in nobis excitent ideam, quam ipse habet. Ergo rem debet eloqui vocabulis propriis, adeoque valet regula: *verba tam diu accipienda sunt in sensu proprio et nativo, donec absurdum inde non sequitur*. E. g. si quis dixerit, regem hunc esse tyrannum et barbarum, vel si virgo promiserit iuveni per litteras, se eum constanti amore amplexuram: nemo temere per tyrannum intellet regem, per barbarum eum, qui Graecus non sit, per amorem caritatem Christianam. Nam verba accipienda sunt in sensu proprio, quamdiu non sequitur absurdum.

At id notandum, si de proprietate vocis quaeritur, non esse respiciendum 1. ad etymologiam, quia illa saepissime fallit, e. g. schola ab otio dicta; nec 2. ad analogiam, quia et haec fallit, e. g. perire significat interire, ergo deperire, valde interire; nec 3. ad usum veterem, quia significatio vocum mutari potest, ut docent vocabula, tyrannus, fur, sophista, sed ad solum usum, quem penes et arbitrium est, et vis, et norma loquendi. Hinc facile evanescunt cauillationes. E. g. rex Turcarum promittebat praesidio Negropontano, se milites salvis capitibus abire passurum, sed illos medios dissecari iussit. Attila promittebat, se sanguinem in vrbe non fufurum, ciuesque eius partim cremabat, partim diffodiebat. Carolus V. promittebat Phillippo, Hassiae landgrauio, se illum dimissurum sine perpetuo carcere, (ita enim Granuellanus callide in saluo conductu scripserat, *ohne ewige Gefangniß*, pro, *ohne einige Gefangniß*,) et postea multorum annorum carcere illum mace-
rabat.

§. 3.

In specie quoque de artium vocabulis notanda regula: *artium vocabula intelligenda sunt ex sensu eius artis peritorum.*

Hinc inter Ferdinandum Catholicum et regem Galliae, quae Campania sit, optime decidere potuissent geographi: quid claffis sit, optime docebunt nauarchae: quid exercitus, ex duce bellico discemus. Horum ex vsu interpretanda sunt vocabula.

Addenda tamen exceptio, modo qui loquitur praesumatur artis terminos habuisse perspectos. Sic alio tempore dixi, Iacobum Bohemium, quem alii pro haeretico, alii pro philosopho Teutonico venditant, saepe vti vocabulis Latinis, vt essentia, qualitas, scientia, sed cum sutor esset, iis adstringebat sensum pro lubitu. Ita memini, rustico nobilem extorsisse transactionem, cuius instrumento aduocatus Latinam subiecerat clausulam: renuncio omnibus exceptionibus laesionis enormis et enormissimae, quod metus causa, doli mali, cet. Rusticus rescindi transactionem petebat. Nobilis negabat id fieri posse, quia omnibus exceptionibus renunciauerit; verba clara esse, et se merito prouocare ad Ictorum vsu. Sed respondebat rusticus, se Latina non intelligere, adeoque nec scire, quid verba illa velint. Et vicit rusticus.

§. 4.

Aliquando etiam coniecturis opus est in ipsis verbis, 1. si *num. 1.* sint ambigua; siue ambiguitas sit in vno vocabulo, quod dialectici homonymiam vocant, siue in integra phrasi, quod amphiboliam adpellant. E. g. seruum legauit, potest intelligi seruum misit, et seruum testamento reliquit, homonymia latet in voce *legauit*. At si dicitur: quod optat rex Galliae, et ego volo, tunc amphibolia latet in tota phraseologia.

2. Si verba in speciem sibi repugnent, e. g. si quis in testamento scripserit: Titio et Sempronio aedes meas lego. Quam partem Titius habebit, eam Sempronio, et quae huic obtinet, eam Titio do, lego. Fundamentum, cur coniecturis tunc locus sit, est praesumptio pro homine sanae mentis, quod non videatur sibi contradicere. Hinc cessat haec praesumptio.

1. Si pacta, testamenta, scripta, quae sibi contradicere videntur, sint diuersorum temporum. Possent enim homines et principia et voluntatem suam mutare.

Heineccii Prael. Gror.

X x

2. Si

2. Si scriptores meditationi non sint adfueti. Hos enim si-
bi non posse non aliquando contradicere, palam est. Sic mul-
tae sunt contradictiones in Talmude, in scriptis fanaticorum;
cet.

3. Si scriptum ex variis libris diuersorum auctorum sit com-
pilatum, e. g. Corpus iuris. Inde ergo decidenda quaestio: an
in iure nostro sint antinomiae? Willenbachius eas vbique se-
stat. Strauchius quidquid potius concedendum putat, quam
quod dentur antinomiae. Neuter recte. Non praesumendae
vbique antinomiae, quia Tribonianus et collegae nec emotae
mentis, nec stupidi fuerunt: at nec nullas dari suspicandum;
quum Corpus iuris ex libris diuersorum auctorum, diuersis tem-
poribus florentium, diuersis sectis addictorum, a diuersis perso-
nis compilatum.

§. 2. Addit auctor obseruationem, quod nonnumquam coniectu-
rae se sponte ingerant, et tam sint verosimiles, vt pro veris
haberi possint. Eae vocantur *ex scripto et sententia*. Sic e. g.
si Titio legauit 1000. et 100. sint in orbe Titii, mihi ignoti,
vnus autem frater vel familiaris eiusdem nominis, facile se sug-
gerit coniectura, quod de hoc senserim.

Aliae coniecturae se non sponte insinuant, atque hinc cer-
tis locis vel fontibus opus est, quarum tres sunt, *materia*, §. 5.
effectus, §. 6. et *coniuncta* §. 7. 8.

§. 5.

Materia est obiectum, de quo verba loquuntur. Ei enim
consentanea esse debent, quaecumque de illo dicuntur. Vnde
logicis est regula: *talia sunt subiecta, qualia permittuntur esse a
suis praedicatis, et contra*. Iam videbimus exempla.

1. Grotius quam plurima adfert, nos primum explicabimus;
eique adiciemus aliud. Pacti sunt hostes inducias per 30. dies.
Alter interdiu abstinere ob omni caede: sed noctu hostes incau-
tos opprimit, castella intercipit, pagos extpoliat et incendit.
Quaeritur, naturales dies intelligendi sunt, an ciuiles 24. hora-
rum? Resp. quia agitur de induciis, induciae autem nullae es-
sent, si non liceret ab armis quiescere, res ipsa suadet, intel-
ligendas esse dies ciuiles.

2. Addo exemplum Philippi Hassi, quod supra memoraui.
Disputabatur inter landgrauium et Granuellanum, vtrum in sal-

uo

uo conductu, quem vocant, legendum sit, *sine vlla captiuitate*, (*ohne einige Gefangnis*), an, *sine aeterna captiuitate*, (*ohne ewige Gefangnis*?) Ex materia subistrata palam est, priorem interpretationem solam genuinam esse. Quis enim saluum conductum petit, ne perpetuo carcere maceretur, ac non potius, vt plane non captius sit?

§. 6.

Effectus est, qui ex verbis sequitur. Quum ergo nemo censetur velle, vt, quod loquitur vel scribit, nullum sortiatur effectum: recte interpretes regulam tenent: *verba ita interpretanda sunt, vt effectum sortiantur.*

Elegans est exemplum Brusidae; quod ex Thucydide refert Grotius, qui insidens agro Thebano cum exercitu, accepta pecunia promittebat, se agro Boeotiorum excessurum, ac deinde negabat, agrum, quem exercitu suo occuparit, Thebanorum esse. Quis, quaelo, pecuniam dat holli, vt prouinciam retineat?

Sic et absurdum, si verba testamenti: quam partem Titius habebit, Sempronio lego, et quam hic capiet, Titio, ita interpretari quis vellet, quod neuter rem habere debeat, quis enim ideo condit testamentum, vt nullum effectum habeat?

§. 7.

Tertius locus coniecturarum est coniunctorum. Haec vel sunt coniuncta *origine*, vel *loco*. *Coniuncta origine* sunt, quae ex eadem origine, eademque voluntate sunt, et alias quoque vocantur *loca parallela*. Vnde regula: *verba vnius loci obscuriora interpretanda sunt ex loco altero clariore*. Sic e. g. quando in S. S. vno loco dicitur: *baptizabit vos Christus igne*, id facile explicabitur ex altero parallelo: *baptizabit vos spiritu sancto*.

Sic saepe, quod in testamento obscurum est, explanari potest ex codicillis, et contra. Saepe lex Codicis lucem infert legi Pandectarum, cet.

§. 8.

Coniuncta loco sunt duo, 1. ratio verborum; et 2. antecedentia et consequentia. De posterioribus notanda regula: *verba non interpretanda sunt extra contextum, sed consideratis antecedentibus*.

cedentibus et consequentibus. De priore: *lex ita interpretanda, prout eius rationi consentaneum est, vel: ubi eadem ratio, ibi eadem iuris dispositio.*

Sic e. g. quum in *art. 4. pac. Ryswic.* verba obscura sint, quod religio in prouincijs restitotis relinquere debeat in statu pristino: absurde pontifici id pro se interpretantur, quum antecedentia doceant, pro fundamento positam fuisse pacem Westphalicam.

Sic si lex: nemo frumentum exportato, interpretanda, ex ratione legis palam est, prohiberi etiam exportationem farinae.

Recte tamen Grotius monet, distinguendam mentem a ratione, vel, quod perinde est, praetextum a vera causa, quae legillatorem mouit. E. g. scio principem lege prohibuisse calceos ligneos, sub praetextu, quod pedibus inimici sint: sed vera ratio erat, quia rustici ita non soluebant vestigal, quod soluitur ob calceos coriaceos.

§. 9.

Sequuntur quaedam obseruationes de verborum significatione, et quidem 1. voces modo laxius, modo strictius accipi, quas significationes probe obseruare debeat interpres. Sic e. g. heres in iure civili accipitur laxius, eoque vocabulo et masculus et feminae, descendentes, ascendentes, et collaterales denotantur. Sed in iure feudali strictior obtinet significatio. Non enim feminae sunt heredes feudales, nec ex masculis agnatis omnes, sed qui a primo acquirente descendunt.

§. 10.

2. Altera obseruatio pertinet ad odiosa et fauorabilia, de quibus vulgo suggerunt regulam: *fauorabilia late, odiosa stricte sunt interpretanda.* Grotius praeterea tertium genus addit mediorum et mixtorum, et de illis habet regulam: *mixta pro magnitudine boni aut mutationis modo late modo stricte interpretanda.* E. g. si aliquis condemnatur ad crurifragium, indubio id intelligitur de mitiore genere supplicii, quo ceruix primum rota contunditur, non de atrociori, quo tibiae primum franguntur, deinde brachia, cet. Est enim crurifragium res odiosa.

Si princeps concessit privilegium ob bene merita, id interpretandum laxius, est enim fauorabile.

Deni-

Denique si princeps pacis causa pactum vel transactionem cum rebellibus iniit, ea modo laxius, modo strictius explicanda, prout vel maius vel minus bonum est, quod inde nascitur, maior vel minor mutatio, quae hoc pacto tacta est.

Ita quidem veteres omnes, et post Grotium etiam Pufendorfius. Sed Thomafius primus has regulas destruxit singulari dissertatione, contra Vincentium Placcium scripta, quam et *iuris prudentiae divinae* inseruit. Nimirum observauerat vir acutissimus, neminem adhuc definitionem adcuratam dedisse odiosorum et favorabilium. Ipse Grotius in hac paragrapho descriptiones dat satis imptas, e. g. *favorabilia sunt, quae aequalitatem in se habent*, et tamen eo referunt beneficia principis, et quae *communiem spectant utilitatem*; et tamen poenae etiam sunt res odiosae. Sic etiam *odiofa* Grotio sunt, quae *partem alteram tantum aut plus altera grauant*, (ergo beneficia principum erunt onerosa), quae *poenam in se continent*, (ergo poena non spectat communiem utilitatem), quae *actus faciunt irritos*, et quae *de prioribus aliquid immutant*, (ergo testamentum posterius erit odiosum.)

Immo ne possunt quidem definitiones adcuratiores dici. Nam favorabile et odiosum sunt ideae relatae. Hinc diuerso respectu modo favorabilis est res, modo odiosa, e. g. dos est favorabilis respectu generi, odiosa ratione foci; poena odiosa est ratione rei damnati, favorabilis ratione rei publicae. Quum ergo cessent favorabilia et odiosa, cessant etiam mixta.

Ergo regulae sunt nullius momenti. Sed verum tamen est, inquis, poenales leges et sententiae esse strictae interpretationis. Resp. 1. id non semper fit. Nam si poenam lex irrogat exportantibus frumentum, eandem etiam irrogare censetur exportantibus farinam. 2. Si vel maxime id concedimus, quod aliquando leges poenales sint strictae interpretationis: id tamen ex alia fit ratione, quia scilicet humanitas iubet in poenis semper inclinare in mitiorem partem, non quod poenae sint odiosae, sed quod, quantum fieri potest, iudicem deceat abesse a crudelitate et truculentia.

§. II.

Ita 3. apud Rom. magna erat differentia inter actus bonae fidei et stricti iuris. Illos latius, hos strictius interpretabantur,

X x 3

e. g.

e. g. ex contractibus bonae fidei etiam vsurae adiudicabantur; licet non promissae. Quaeritur itaque, *an id ex iure naturae et gentium sit?*

Negat Grotius, et recte. Nam totum hoc discrimen non ex natura horum contractuum fluit, sed ex subtilitate formulariae iuris prudentiae Romanae.

Sed putat rem usum habere, si hodiernum actibus quibusdam certa forma praescripta sit legibus civilibus, e. g. ut traditio fiat effestucatione, ut in Geldria. Tunc enim in dubio eam semper requiri, et actui inesse censeretur. Sin actus per se sit indefinitus, veluti donatio, tunc benignior procedendum, et simpliciter promissorum fidem exigendam. Vera haec quidem: sed nec ista ex iure naturae, verum ex iure civili sunt.

§. 12.

His praemissis iam facile patet, quid sentiendum sit de regulis a Grotio hac paragrapho suppeditatis. Prima est:

I. *In non odiosis verba sumenda sunt secundum totam proprietatem usus vulgaris.* Exempli loco esse possunt, quae ipse Grotius adfert, ut masculinum genus commune notet, e. g. *mei heredes* in dubio notant utrumque sexum. Ita in oratione *pro Caecina* eleganter interpretatur verba edicti: *unde tu deieclus es*. Reus enim non deiecerat Caecinam, sed illum prohibuerat suum adire. Sed utrumque exemplum et fauorabile est et odiosum. *Mei heredes habento*, est fauorabile, *mei heredes soluunto*, est odiosum: et tamen utroque casu sexus uterque intelligitur. Causa Caecinae fauorabilis erat ratione Caecinae restituendi, at odiosa ratione deiicientis. Et tamen utriusque interitu eadem locum habet edicti interpretatio.

II. *In fauorabilibus, si is, qui loquitur, ius intelligat, aut peritorum iuris consilio utatur, verba laxius sumenda, ut etiam includant significationem artis.* Sed sic re vera res fauorabilis fit odiosa ratione eius, qui ius nouit, et is poenam fert scientiae suae. E. g. donat aliquis in aliam prouinciam migraturus alii penum, et pro populari usu intelligit, quae sibi supersint in cella penuaria, ut carnes, pernae, poma, et similia; alter autem dicit, tu iuris peritus es, hinc mihi etiam debes ligua, carbones. Quid stolidius? Et hinc ipse Grotius addit limitationem, quae totam fere regulam destruit sub finem paragraphi.

III. 14

III. In odiosis etiam sermo figuratus aliquando admittitur, quo onus vitetur. Exemplum Grotii est: foederatus promissit auxilia, non debet ea mittere, nisi alterius impendiis. Sed 1. quid hic figurati sermonis? 2. decisio ne quidem vera est. Nam ex circumstantiis iudicandum erit, quis impendia ferre debeat, e. g. si potens impotenti, Gallus Heluetiis promittat 30000. milites impendiis Heluetiorum, onus id erit magis impotentiori rei publicae, quam auxilium.

§. 13.

Sequitur quaestio illustris, an in foederibus sociorum nomine num. 1. veniant ii tantum, qui tunc sunt, an qui et in posterum in societatem nostram admittuntur? Occasionem huic quaestioni dedit foedus inter Romanos et Carthageneses. Finito enim bello Punico pax et hac conditione inibatur: *viriusque populi socii ab utroque populo tuti sunt*. Hannibal postea Saguntinos vexabat, et demum urbem funditus delebat. Querebatur, an foedus a Carthaginensibus fuerit violatum? Carthaginenses negabant, quia Saguntini eo tempore non fuerint socii populi Romani. Romani contendebant, intelligi etiam socios futuros.

Quid Grotius? negat Saguntinos foedere comprehendere, ex ea ratione 1. quia hic agatur de abruptendo foedere, quae res sit odiosa, 2. quia sic Carthaginensibus adimatur libertas hostes armis persequendi, id quod denuo odiosum.

Sed haec decisio nihil est. Nam 1. et odiosa et fauorabilis res est, de qua agitur, odiosa Carthaginensibus, fauorabilis Saguntinis et sociis Romanorum. 2. Qui sociis suis prospectum cupit, procul dubio id facit in futurum, non in praeteritum. Ergo et futuros procul dubio foederatos intelligebant paciscentes. 3. Non est odiosum, Carthaginensibus armis persequendi Saguntinos libertatem adimi: habent enim ius conquerendi iniurias apud Romanos, et si hi iustitiam negassent, tunc possent iure suo uti?

Quum vero semel Grotius vulgarem amplexus sit regum. num. 1. 3. lam, quaerit: an non nefas fuerit Romanis, socios Saguntinos defendere?

§. 14.

Nova quaestione regulas suas de fauorabili et odioso illustrat Grotius. Quaerit, si foedere inaequali conuenerit, ut foederatus

deratus altero inconsulto bellum gerere nequeat, an id late de omni bello, an stricte de offensiuo, quod vocant, intelligendum sit?

Resp. de offensiuo tantum. Foedus enim, inquit, hoc odiosum est, quia id inaequalitatem continet, et libertatem alterius partis nimium coarctat: odiosa vero stricte interpretanda.

Ipse decisio vera, sed ratio decidendi, ut iam saepe monuimus, inepta est. Vera ratio est, quia ex ipsis verbis patet, bellum defensiuum intelligi non posse, quia alias absurdum inde sequeretur, ut voluerint Romani foederatos cogere, ut a quouis impune possint extirpari. Verba autem ita intelligenda, ne absurdum inde sequatur.

§. 15.

Sequitur nouum exemplum. Finitis bellis Punicis, primo et secundo, foedera admodum inaequalia inire tenebantur Carthaginenses: sed tantum illis expresse seruabatur libertas, id est, ut hodie loquimur, *la Souveraineté*: non erant subditi Romanorum, sed foederati inaequales. At quum Cato in senatu Romanis, nulla iniuria prouocatis, suasisset, ut Carthaginem funditus excinderent: mittebantur legati, qui Carthaginesibus hanc conditionem ferrent, ut in alium locum mediterraneum migrarent; ibique nouam urbem conderent. Hi pacem se accurate seruasse clamabant, Romanos autem sibi iniuriam facere, qui tale quid iubeant eos, quibus libertatem diserte confirmassent. Respondebant Romani, se libertatem ciuibus, non moenibus et domibus promississe. APPIAN. in *Punicis*. Quaeritur itaque, *an foedus ita recte interpretati sint Romani?*

Negant omnes, et recte: non quod pactum hoc tamquam odiosum strictae fuerit interpretationis, sed quod hoc fluat ex ipsa natura libertatis et *ἀνεξαρτησίας*. Verum est, eam competere ciuibus, non domibus et moenibus: sed ciues tamen dici non possunt liberi et *ἀνεξαρτητοι*, qui ab alio cogi possunt ad migrandum loco, et sedes alio transferendas. Aequae absurda ergo erat haec interpretatio, acsi quis promitteret vitam, et dicat deinde, vitam animae, non corpori competere, adeoque fas esse corpus destruere.

§. 16.

§. 16.

Pergit Grotius ad famosam quaestionem de pactis realibus et personalibus. Ita non dicuntur pacta ratione originis, quasi ex iure in re sint, nam ita omnia pacta et contractus sunt personalia, sed ratione effectus. Ex quibusdam pactis heredes etiam obligantur, et heredes etiam ius nanciscuntur: aliorum effectus ad heredes non transit. Illa dicuntur realia, e. g. emptio venditio, haec personalia, e. g. pactum sponfalitium. Quum ergo saepe nasci soleat controuersia, reale, an personale sit pactum: certae in promptu esse debent regulae, ynde id diiudicandum.

Reg. I. *Pacta cum populis liberis inita sunt realia.* Ratio, quia ipsum subiectum est immortale et perpetuum. Manet idem corpus, etiamsi magistratus, immo et forma mutetur subinde. Hinc etsi ex libera res publica fiat monarchia: saluum tamen est foedus, quia idem corpus manet. Quemadmodum enim ideo foedus non expirat, quia hoc triennio alii sunt ordinum delegati, quam superiore, et quia ex ordinibus illustribus, qui ante 100. annos rem publicam repraesentabant, hodie nullus superest; ita nec expiraret, si loco ordinum princeps praeficeretur.

Exceptio tamen est, si foedus expresse eum in finem initum, vt rei publicae libertas contra monarchiam defendatur. Hinc expiraret foedus, si ciuitas Heluetica vellet principem creare.

Reg. II. *Pacta cum monarchis inita sunt realia, si vel in perpetuum, vel ita inita, vt expresse heredum fiat mentio. vel heres ita succedat, vt teneatur praestare factum defuncti.* Absurde ergo Perseus negabat foedus cum Philippo initum ad se pertinere, quum et in perpetuum initum esset, et Perseus esset Philippi filius et heres.

Immo temporarium foedus est reale, si tempore nondum elapso moriatur paciscens. Ita enim expressa est paciscentis voluntas, vt et successor obligetur, quoad tempus elapsum sit. Hinc quum Leopoldus imp. cum Turcis iniisset inducias 20. annorum: peccasset Iosephus, si tempore illo nondum elapso belium mouisset.

Heineccii Prael. Groti

Y y

Reg:

num. 3. Reg. III. Grotii haec est : *in dubio foedera fauorabilia perpetua et realia ; odiosa personalia intelliguntur.*

Sed quatenam sunt foedera fauorabilia et odiosa ? Fauorabilia, inquit, sunt foedera pacis, commerciorum, vel defensionis mutuae causa inita : non autem offensiva, quae vocant, ea odiosa habentur.

Sed resp. aequae fauorabile est vindicare iniurias rei publicae illatas, quam se defendere, et pax ex altera parte aliquando aequae odiosa est, ac bellum offensivum.

Dicendum ergo, in dubio foedera omnia praesumi realia, nisi vel personae industria electa sit, vel causa, ob quam foedus initum, cessarit. E. g. si foederati reliqui vni imperium militare ob insignem belli peritiam detulerint, vel si mortuo foederato res publica laedens laesae satis faciat ex asse.

num. 4. Sed obiicitur, societates morte finire, adeo ut si socii se obligarint pro heredibus, hi tamen non teneantur inuiti in societate manere. Cur ergo cogantur res publicae ?

Resp. 1. regula illa de societate est ex iure mere civili. 2. Ratio eius, quod socius socii industriam elegerit, non quadrat rebus publicis, quae foederati potentiam elegerint censentur.

Obiicit BODINVS, *de re publ. lib. V. cap. ult.* foedera iureiurando firmantur. Iusiurandum personam non egreditur. Ergo nec foedus.

Resp. nulla consequentia. Iusiurandum obligationem non producit, (nam et iniurati foederati obligantur ex nudo promisso,) sed firmiorem reddit. Hinc recte Grotius : potest iuramenti obligatio personam tantum obstringere, et ipsa promissio obligare heredem.

§. 17.

Reg. IIII. *rex ex foedere tenetur, et ius retinet, etiam regno expulsum.* Ratio est, quia rex non solum est vocabulum facti, sed et iuris. Rex erat Ludouicus Pius etiam regno iniuste priuatus. Ergo et omnia, quae tamquam Rex agit, rata manent.

Hinc e. g. Carolus II. rex Britanniae, regno eiectus non poterat bellum mouere iis, quibuscum pater foedus iniierat. Et contra, qui patri defensionem promiserant, iam et pro filio bellum suscipere tenebantur. Sed haec quidem in scholis vera sunt.

sunt. Mundus aliter sentit. Principibus regno priuatis idem accidit, quod plebeiis:

Donec eris felix multos numerabis amicos;

Tempora si fuerint nubila, solus eris.

§. 18.

Reg. V. *foedus cum antecessore initum non transit ad successorem iniustum.* Sic Cromwello nullum ius erat ex foederibus cum Carolo I. eiusque antecessoribus initis. Rationes sunt duae, 1. quia foedus initum cum principibus. Tales non sunt inuales, sed tyranni: possessionem habent, non ius.

2. Quia nemo potest duobus hostibus simul vno eodemque foedere obstringi. Atqui foedus cum iustis antecessoribus initum etiam ad successores iniuste regno eiektos transire §. 17. demonstratum est. Ergo non potest transire ad successores iniustos. Absurdum e. g. fuisset, si Belgae ex foedere cum Elisabetha et Iacobo I. inito obstricti fuissent et Carolo II. et Cromwello.

§. 19.

Subiungit Grotius quaestionem Chrysippi notissimam: *si quis ei qui prior ad metam perueneris, praemium promiseris, et vterque eodem momento eo perueniat, utrum praemium nulli, an alterutri, an vtrique debeatur?*

Neutrum accipere iniustum est, nam sic frustra laborem, ad quem sine praemio non obstricti erant, suscepissent. Alterutri illud dari, aequè iniustum, quum sint in pari causa. Vtrique dari non potest, quia non duo, sed vnum praemium promissum. Nemo autem tenetur plus praestare, quam promissit.

Sed resp. superest quantum, ut vterque accipiat, sed vnum illum praemium, quod promissum. Id est, inter se illud diuidunt aequa lance, non quia fauorabilia sunt virtutum praemia, quam rationem allegat Grotius, sed quia supra diximus, ita interpretanda esse verba, ut effectum habeant.

§. 20.

Haftenus ergo satis destruximus regulam de fauorabilibus et *num. 1;* odiosis, ostendimusque, posse plerasque decisiones, quas ex hoc

Y y 2

funda-

fundamento petiit Grotius, ex aliis regulis hermeneuticis desumi. Iam pergitur ad partem capitis posteriorem, et quia haftenus ostensum, quomodo ex ipsis verbis petenda sit interpretatio: iam videbimus, quando ex sola coniectura desumenda sit, quamvis ex verbis immediate hic sensus non fluat.

Secundum has coniecturas interpretatio diuiditur in *extendentem* et *coarctantem*, vel, ut alii loquuntur, in *extensiuam* et *restrictiuam*. *Extensiuam* est, quando lex vel pactum profertur ad casum, qui verbis ipsis non continetur. E. g. septimum praeceptum est: *ne adulterium committito*; an ideo licet stuprum committere? octauum: *ne furtum committito*; licetne ergo defraudare alterum? *Restrictiuam*, quando casus eximitur a lege vel pacto; quem verba videntur comprehendere. E. g. qui sanguinem hominis fudit, eius sanguis fundetur; an et chirurgi venam secantis?

An ergo id licet pro lubitu? an in cuiusque arbitrio positum, vtrum extensiuam, an restrictiuam interpretatione uti malit? Minime, sed certo opus est fundamento, quod non aliud est, quam ratio legis vel pacti.

num. 2. Nascitur inde regula: *quoties ratio legis vel pacti vnica latius patet, quam verba, toties locus est interpretationi extensiuae*. Ratio enim est finis, quem legislator vel pacificens intendit. Ei media debent esse proportionata. Ergo ita interpretanda, ut finem hunc adsequatur. E. g. nemo sine laterna noctu prodeat in publicum. Prodeunt laterna instructi, sed Vulcanum in cornu non gerunt, an incidunt in legem? Nemo frumentum exportato ad hostes. Ciuis exportat farinam, an impune id faciet?

num. 3. Sed ipse auctor iam illustria quaedam exempla adfert. Lacedaemonii, ceu ex *Nepotis Themistocle* patet, Athenienses prohibebant muris cingere urbem: procul dubio ex pacto, siquidem alias ius nullum impediendi habuissent. Quid si Themistocles nouum muniendi modum per aggeres perspectum habuisset, an eo saluo pacto potuisset uti? Minime.

Condidit aliquis testamentum, et Maecium substituit postumo si moriatur. Postea ne nascitur quidem: an Maecius heres erit? Omnino, quia ratio disponendi fuit, quod Maecium vellet heredem esse, si suus non exsisteret.

num. 4. Supra iam habuimus casum, quod Caccina adprehensurus posset;

possessionem prohibebatur praedia adire, et quod, quum interdicto *unde vi* vteretur, disputatum fuerit: an ei locus sit, quum verba interdicti haec sint: *unde tu deiectus es?* Caecina autem non fuerat deiectus, sed non admissus.

Resp. omnino locum esse interdicto, quia praetoris ratio et finis fuit prohibere omnem vim, quo quis suo iniuste priuatur.

Athenis lex erat, patrem testari non posse inuitis liberis. Pyrrhus, filia inuita, non testamentum coniderat, sed adoptauerat, quaestio erat, an in legem inciderit? idque recte adfirmat Iſaeus, quia legislatoris ratio fuit prohibere, ne liberi iniuste exheredes essent.

§. 21.

Eodem pertinet quaestio GELLII Noct. Attic. lib. I. cap. 13. *An mandatarius mandatum possit adimplere per aequipollens?* E. g. iussit aliquis, vt pro se fideiubeam, ego mandavi creditori, vt crederet. Mandauit quis, vt actionem institutam suo nomine ad rem consequendam, ego sine actione rem redigo, vt res tradatur, an ratum habere debet dominus?

Resp. respiciendum esse ad rationem mandati, si mandans finem suum consequitur etiam per aequipollens, rem ratam habere tenetur: sin aliud probabiliter intendit, locum non habet interpretatio extensiva. In exemplis allatis finis mandantis prioris fuit, mutuum accipere, hunc finem adsequitur, siue fideiubeam, siue mandem: posterioris finis erat, rem consequi; eam consequitur, siue actione utar, siue vltro possessor reddat.

At si finis et ratio sit diuersa: tunc aliud statuendum. E. g. mandauit, vt mihi quis emat Puffendorffium, mandatarius Grotium emit.

§. 22.

Iam ad interpretationem restrictiuam. Ei locus est vel ob defectum voluntatis, §. 22. 25. vel ob repugnantiam casus cum voluntate, §. 26. sequi.

De priorē regula I. est: *si ex interpretatione literalī sequeretur absurdum, tunc videndum interpretatione restrictiuā.* Nemo enim legem ferens vel paciscens praefumitur absurda velle, alias

enim non esset sanæ mentis, adeoque nec legislator esse, nec pacisci posset, cet. Qui feram in silva principis occiderit, per triennium ad operas publicas condemnatur. Haec lex si porrigeretur ad eum, qui lupum vel aprum se adgredientem occidit, esset absurda. Ergo opus interpretatione restrictiva.

§. 23.

Regula II. *quoties verba latius patent, quam ratio diserte expressa, toties restrictiva opus est interpretatione.* Quia hactenus saepe turbae factae, nemo post XI. horam aedibus suis egreditor, qui egreditur, multabitur 100. florenis. Egressus aliquis est, ut medicum vocaret ad aegrotum, non multabitur, quia verba laxiora sunt ratione adiecta.

§. 24.

Reg. III. *quoties aliunde constat de ratione legislatoris vel paciscentis, toties secundum illam lex interpretanda restrictivae.* E. g. rex Prussiae inhibuit edicto peregrinationes Gallicanas. Finis regis fuit impedire, quo minus pecunia ex Germania in Galliam frustra et sine fructu inferretur. Quis Prussicus a principe extero mittitur in Galliam sumtibus principis: an in legem incidit?

§. 25.

Reg. IIII. *ubi non actus, sed potentia prohibita, ibi locum non habet restrictio.* E. g. pactum Romani inierant cum Carthaginiensibus, ne hi ultra certum promontorium classem ducere possent. Finis procul dubio fuit, ne bellum maritimum Romanis imparatis nasceretur. Iam fingamus, Carthaginienses non nocendi animo, sed exercendae turbae nauticae causa classem eduxisse, an contra pactum egisse censendi erunt? Omnino: ipsa enim potentia illis adempta, non solus actus, vel, quod magis perspicuum, voluerant Romani paciscentes non solum bellum maritimum, sed et eius periculum et suspicionem hoc pacto excludere.

Quaerit Grotius, *an promissa habeant in se tacitam conditionem, si res maneant, quo sunt loco?* Icti pragmatici id vocant conditionem tacitam, vel clausulam rebus sic stantibus, de qua

qua elegans et erudita exstat dissertatio ICti eximii HENR. de COCCEII.

Negat id Grotius, nisi apertissime pateat, statum illum vnicam fuisse causam promittendi. Recte. Ergo distinguendum erit, an mutatio status rerum pertineat ad essentiam rei, de qua pactum initum, an non. Priore casu promissum ob illam est irritum, posteriore minime. E. g. virgo, cui iuuenis matrimonium promiserat, morbo reddita est tam deformis, ut iam ab ea plane abhorreat, pactum sponsalitiū ergo nullum. Contra si puella ista incendio facta fuerit pauperior, salua erunt sponsalia.

§. 26.

Alterum interpretationis restrictivae fundamentum est repugnancia casus emergentis cum voluntate. Voluntas vero colligitur aut ex naturali ratione, §. 26. 27. aut ex aliis signis §. 28. sequi. Naturalis ratio dicitur *aequitas*, quae est correctio eius, in quo lex deficit ob vniuersalitatem. Sic lex mori iubebat filium Manlii cos. absente patre castris egressum, verba enim legis vniuersalia erant: sed aequitas id debuisset corrigere ob circumstantias.

Ergo aequitas maxime differt a dispensatione vel indulgentia. 1. Illa et iudici obseruanda, haec a solo imperante conceditur; 2. illa nititur iure, haec gratia; 3. illa legem interpretatur, haec eius effectum suspendit.

Quia autem datur etiam aequitas cerebrina, notandae sunt regulae certae, ex certis desumptae indiciiis.

Reg. 1. quoties si verbis inhaerendum esset, aliquid fieret contra naturalia et diuina praecepta, toties aequitas iubet adhiberi interpretationem restrictiuam. Lex iubet depositum reddere; si furioso gladium redderem, ut alteri mortem intenter, fieret aliquid contra legem diuinam. Ergo non reddendus.

§. 27.

Reg. II. si ex litterali interpretatione non quidem illiciti quid, sed tamen aliquid graue atque intolerabile sequitur, aequitas iubet adhiberi interpretationem restrictiuam.

Ratio est, quia, quom natura humana a rebus huius modi grauibz et intolerabilibus abhorreat, non praesumitur aliquis

se obligasse ad grauia et intolerabilia a se non praeuifa. E. g. conductor in se recepit casus fortuitos. Aedes terrae motu corruunt, fruges a locustis depascuntur, non censetur de his infortiis cogitasse.

num. 2. Inde hoc confectarium elicit Grotius, non quoque veram esse doctrinam Ciceronis, quod non sint seruanda promissa iis, quibus promiseris inutilia.

Aequitas enim locum habet, si casus cum voluntate repugnat. Volui autem ego promittere, voluit alter promissum acceptare; adeoque nihil est, quod paciscentium voluntati repugnet. Obiicitur, at promissum inutile alteri esse. Resp. 1. id diiudicare non debet promittens, sed alter, cui promissum est. Deinde 2. si vel maxime inutile sit, non statim est damnosum, vti superiore casu, quo, gladius depositus furioso erat reddendus.

num. 3. Et ita facile intelligitur locus *SENECAE de benef. lib. III. cap. 35.* ab auctore allatus. Nam pleraque exempla a Seneca allata pertinent ad regulam 1. vel 2.

§. 28.

Diximus §. 26. n. 1. voluntatem colligi vel ex naturali ratione, quae dicitur aequitas, vel ex aliis signis. De priore dictum, iam de his quoque agendum.

Horum signorum certissimum est collisio verborum, qualis hic non intelligitur contradictoria per se, qualis est in antinomiiis, in pactis contrariis, sed per accidens, et ex circumstantiis, si casus incidat, vt duae leges vel duo pacta in se non pugnancia simul seruari non possint. E. g. dicit lex, *sabbatum esse sanctificandum*, dicit, *defensionem non omittendam*. Haec non sunt contradictoria. Sed casus incidere potest, vbi alterutra lex violanda, e. g. quum Pompeius Hierosolyma obsideret.

Quaeritur itaque, quae tunc lex, quod pactum alteri sit praefendum? Grotius itaque certas regulas et hic commendat,

§. 29.

num. 1. Reg. I. *lex permissiua cedit praeceptiuae*. Ratio clara. Praeceptiua libertatem restringit; permissiua libertatem indulget. Ex praef-

praeceptiua ius nascitur legislatori, ex permissiua ius nascitur mihi. Ergo circa hanc possum iuri meo renunciare, circa illam non possum ius legislatoris violare.

Reg. II. *lex, quae certum tempus praescribit, praefertur ei, quae generatim aliquid praecipit.* E. g. dies sabbathi celebrandus, laborandum. Ratio est, quia sic vtrumque fieri potest.

Exceptus tamen est casus, si obseruata priore lege occasio alteram seruandi elaberetur. E. g. Christus ipse permittit, vt sabbatho asinus e fouea extrahatur, vt aegroti curentur, cet.

Reg. III. *lex vel passio vetans vincit iubentem.* Leges enim negatiuae obligant semper, leges affirmatiuae tantum occasione. Lex est, *ne furtum comitte*; lex quoque, *da elemosynas*. An potest quis furari, vt elemosynas dare possit? Minime.

Reg. IIII. *specialis lex vel passio generali praefertur.* E. g. Honora parentes, lex est specialis. Aliorum commoda promouere, generalis. Quis dubitet, quin parentum maior habenda sit ratio, quam aliorum?

Reg. V. *lex poenalis vincit imperfectam* (dicitur autem *lex imperfecta*, quae poenam adiunctam non habet, vid. VLP. *Fragm. tit. 1.* item, *lex, quae maiorem poenam irrogat, vincit eam, quae minorem minatur.* Poena enim est malum physicum, quia est passio. Ex duobus malis physicis est minus eligendum. Exemplum habemus in *Nou. CXV.* si quis parentem detulerit vel accusarit, potest exheredari: sed non potest, si detulerit filius patrem ob crimen perduellionis, quia in hoc delicto et silentium supremo supplicio punitur.

Reg. VI. *lex vel passio posterior vincit priorem.* Lex enim et passio posterior priorem tollit,

Addit auctor reg. VII. *passum iuratum praefendum iniuratum, &c.* Sed id perspicue falsum. Iusiurandum enim nouam obligationem non producit. Immo esset hoc medium omnia pacta eludendi, si iuratum iniurato promiscue praefendum esset. E. g. Titius promissit primum matrimonium Maeuiae sine iureiurando, postea Semproniae iurato. An posteriora sponsalia praefenda? Sic semper licebit priora eludere, cet.

Dicendum ergo, in dubio posterius pactum tollere prius, si inter eosdem initum sit: prius vincere posterius, si inter personas diuersas, siue iurata, siue iniurata sint. Ratio est, quia ex priore pacto alteri ius quaesitum est, quod ipsi auferri posteriore pacto cum alio inito nequit,

Eleineccij Praef. Gros.

Z z

§. 30.

§. 30.

Subiungit auctor aliquot quaestiones leuiore; velut 1. *an in dubio contractus perfectus sit, antequam scriptura fuerit confecta?*

Resp. auctor, contractum subsistere sine scriptura, adeoque hanc ad eius essentiam non pertinere. Et id verum.

Sed addenda limitatio, modo consuetudo non inoleuerit plane contraria. Sic e. g. in Germania nulla fit emptio venditio rerum immobilium sine instrumento iudiciali; inter res publicas et principes nullum foedus initur sine instrumento. Hoc semel recepto, omnino praesumitur pactum nondum perfectum, antequam scriptura confecta et tradita sit, quod inter principes vocatur *permutatio instrumentorum*.

§. 31.

2. *An contractus gentium, quantum licet, interpretandi sint ex iure Romano?* Id recte negatur. Non viuimus tempore Bartoli et Baldi, qui ex iure Romano probare conabantur, imperatorem esse dominum mundi. Ius Romanum obligat priuatos, quatenus receptum, non principes. Obligat eos, qui viuunt in eadem re publica, non qui in statu naturali.

§. 32.]

3. *An accipientis verba potius attendenda sint, an offerentis?* Resp. aut alter absolute acceptat, quod promissum, aut cum restrictione. Si prius, quaestioni non est locus, quia consentiunt pacificenter in vnum placitum. Posteriore casu non potest respici ad verba acceptantis, nisi offerens consenserit. E. g. offero tibi 100. tu acceptas. Offero centum, alter dicit, se mille desiderare. Hic ex oblatione mea nec centum, nec mille debeo; nisi in posterius consentiam. Non centum debeo, quia alter non accepit, nec mille, quia non promisi. Ergo nihil debeo.

CAPVT XVII

DE DAMNO PER INIVRIAM DATO, ET
OBLIGATIONE, QVAE INDE ORITVR.

§. 1.

Egimus hactenus de obligationibus. Obligationes nascuntur aut ex pactione, aut ex delicto, aut immediate ex lege, e. g. quod promisi, id debeo ex pacto; si damnum dedi, id relaxare teneor ex delicto; denique, quod pater liberis debet alimenta, id nec ex pacto, nec ex delicto, sed immediate ex lege est. Hucusque de pactionibus actum, iam de delictis.

Delictum vel maleficium Grotius definit culpam omnem, siue in faciendo, siue in non faciendo pugnantem cum eo, quod aut homines communiter, aut pro ratione certae qualitatis facere debent. Sed magis perspicue definiri potest, quod sit factum illicitum aduersus legem dolo vel culpa admissum. Dicimus *factum*, quod vocabulum et non factum comprehendit. Dicimus *illicitum aduersus legem admissum*: dantur enim etiam illicita aduersus honestatem vel decorum admissa, e. g. immodestia, auaritia, superbia, sed ea non sunt delicta, quamuis vitia sint. Addimus, *dolo vel culpa*: si dolose aduersus legem agitur, est delictum verum: sin culpa, quasi delictum. Tale delictum etiam est *damnum iniuria datum*, de quo hoc capite dicimus, 1. *quid sit?* §. 2--5. *qui illud dant?* §. 6--11. *quomodo resarciendum?* §. 12--fin.

§. 2.

Primo quaeritur, *quid sit damnum?* Recte obseruat Grotius, ^{nudi: 11} id a *demendo* dictum esse. Quoties ergo demitur aliquid de eo, quod nostrum est, toties infertur damnum.

Nostrum aliquid dicitur vel *natura*, e. g. vita, sanitas, membra, pudicitia, fama; vel *facto* et instituto humano, e. g. bona, iura. Qui alterutrum ex his surripit, demit, corrumpit, is damnum nobis facit.

Z z 2

Quum

num. 1. Quum autem et iura referantur ad ea, quae nostra sunt: alia autem iura nobis nascantur ex iusto, quae supra Grotius lib. I. cap. 1. vocavit *facultatem*, alia ex honesto tantum et decoro, quae Grotio dicuntur *aptitudo*: quaeritur, *quaenam hic intelligantur, dum et imminutionem iurium damnum esse dicimus?* Et recte respondet Grotius, sola iura ex regula iusti profecta. Hinc qui furatur, qui vulnerat, qui vim infert, is dat damnum, non vero damnum fert qui stipem petens nihil impetrat, nec qui ignem petens repulsam patitur.

Ratio est, quia iura imperfecta re vera nostra non sunt aliter, nisi quatenus alter velit: dependet eorum praestatio ab alieno arbitrio. E. g. debitum exigere possum, nec in debitoris arbitrio est, an id praestare velit: ergo hoc ius reuera meum est. Contra pauper stipem petit, sed non, nisi ea conditione, si alter dare velit. Quod vero ab alterius arbitrio pendet, re vera non nostrum est. Ergo nec damnum datur, si huius modi imperfecta iura nobis denegantur.

§. 3.

Observat tamen Grotius, aliquando concurrere aptitudinem et facultatem, seu, quod perinde est, ius imperfectum et perfectum: id est, quod ex altera parte est ius imperfectum, id ex altera parte et alterius persona perfectum est. Id toties fit, quoties lex praeceptiva poenalis accesserit: lex enim saepe ex officiis imperfectis facit perfecta. E. g. ius imperfectum est, petere honores. Hinc si repulsam feram, damnum id vocare nequeo, quamvis ad hoc officium aptissimus videar. Ergo ex mea persona hoc ius est imperfectum. Contra magistratus, qui eligunt, lege praeceptiva tenentur. Ergo ex eorum persona est obligatio perfecta.

Saepe etiam fit, ut accipere sit iuris imperfecti, petere iuris perfecti, adeoque non is damnum det, qui rem petitam denegat, sed qui petere prohibet. E. g. Romae plures saepe Candidati petebant honores. Qui repulsam tulerant, conqueri de damno sibi dato non poterant. At si quis ciuem honestum prohibuisset honores petere, is omnino damnum dedisset iniuria.

§. 4.

Quum autem nostra sit primo res principalis, deinde eiusdem

dem accessoria, nempe *fructus*: quaeritur, *an et ad illos damnum se porrigat*? Idque recte adfirmat Grotius. Fructus enim rei nostrae aequae iure perfectio nostri sunt, ac ipsa res principalis. Ergo qui eos nobis intercipit, aequae id, quod nostrum est, deminuit, ac qui rem principalem corrumpit, e. g. qui agrum sibi retinet, fructus, quos ex eo agro percipere dominus potuisset, intercipit, adeoque dedit damnum.

Quia tamen nec nos fructus rei nostrae percepissemus sine impensis quibusdam, nos autem non lucrum captare, sed damnum vitare debeamus: hinc sequitur, ut fructuum restitutionem petere non aliter possimus, ac deductis expensis.

§. 5.

Quaeritur, *an et spes hic in censum veniat*? Resp. non omne, quod speramus, nostrum est, et recte Iustinianus noster: *saepe de facultatibus suis amplius, quam in iis est, sperant homines*. Ergo distinguendum erit inter *spem effectus ordinarii et extraordinarii*. Illius omnino habetur ratio in aestimando damno; huius non habetur. Deinde et spes effectus ordinarii vel proxima est, vel remotior. Illa magis in censum venit, quam haec. E. g. qui sementem fecit, sperat messem, haec spes est effectus ordinarii. Ergo qui fruges immaturos corrumpit, tenetur damnum refarcire. At omnes, qui nauigant in Indiam, lucrum sperant et diuitias. Hic extraordinarius nauigationis effectus est. Fingamus porro, nauem in Indiam profectam non procul a portu a pirata interceptam, mercatorem autem petere lucrum immensum, quod ex hac nauigatione sperauit: vix eius ratio habebitur, quia spes haec admodum remota erat. Fingamus contra, nauem ex India reuersam immensas diuitias attulisse, et non procul a portu interceptam: hic erat spes lucro potiundi proxima. Ergo eius ratio omnino habebitur a iudice.

§. 6.

Secunda pars capituli inquit, *quinam damnum dedisse, et ex eo ad restitutionem obligari dicantur*? *Causae*, seu ex philosophia notum, sunt vel *physicae*, vel *morales*. *Physicae* sunt, quae ad effectum concurrunt motu physico, e. g. membra sua adplicando ad furtum aliquod producendum, e. g. fur, qui ipse rem alienam

nam subtrahit. Causae *morales* dicuntur, quae mente tantum; non motu physico ad effectum concurrunt, e. g. ii, quorum ope et consilio furtum factum. Priores obligari, nemo dubitat: iam de posterioribus quaeritur.

Hi concurrunt aut faciendo, aut non faciendo, e. g. furibus opem tulerunt, faciendo concurrunt; qui sciuerunt, alterum furtum facturum, idque non impediuerunt, quum possent ac deberent, non faciendo concurrunt.

Faciendo alii primario, alii secundario obligantur ad resarciendum damnum. De illis regula est: qui iubet, vel consensum requisitum adhibet, vel adiuvat, vel receptum dat, vel qui alio modo de crimine participat, ex damno dato primario tenetur. E. g. assassinator, qui sicarios conducit, pater, qui iubet filium furari, occidere, latronum et furum focii, cet.

§. 7.

De his regula II. est: *qui consilium dat vel laudat, et ostentatur, secundario tenetur.* Consilium enim non est obligatorium.

Sed de hac regula notandum, i. eam pertinere non ad consilium generale, sed speciale, quod simul circumstantias praemonstrat. Qui generale suggerit, poena quidem dignus est, sed ad resarciendum damnum non tenetur. E. g. qui alii suasisit, ut furetur, non praemonstrato loco, ubi furtum commode committi possit.

2. Laudem praecedere debere nouum factum, non sequi. Ita enim ad factum non concurrat. Inde ergo adparet, quid sentiendum de Aesopi facto, qui lapide a puero percussus, puerum laudauit et assensum dedit, spondens alium plus daturum.

§. 8.

Non faciendo iterum aut primatio quis concurrat, aut secundario. De illis obseruanda regula III. *qui prohibere iure perfecto debet et potest, idque non facit, merito ad resarciendum damnum tenetur.* E. g. pater, paedagogus, cet.

Vnde id non pertinet ad eum, qui iure perfecto non tenetur, e. g. vicinus videt fures ingredi in vicini aedes, nec clamat. Inhumanus est, sed damnum non resarcit.

§. 9.

§. 9.

De his tenenda regula IIII. *qui non dissuadet, aut resciet, is secundario tenetur.*

Sed hic denuo respicitur ad obligationem perfectam. Nam e. g. concionator aulicus, consiliarii, ministri primario iure perfecto obligantur dissuadere principi facta illicita, at non pedissequi, subditi, cet.

Ita et iure perfecto non teneor alterum delinquentem deferre vel accusare: at in crimine maiestatis unusquisque tenetur, ubi et silentium punitur.

§. 10.

Quamvis itaque certum sit, etiam causam moralem teneri ad restitutionem damni: regulæ tamen hætenus allatae admittunt limitationem, modo causa moralis vere momentum attulerit ad effectum hunc producendum. Hinc non tenetur,

1. Qui tantum occasionem dederunt infcii, nisi magna concurrat negligentia. E. g. pater iter instituit, filia interea stuprum patitur, patre inscio et nolente. Si tamen sine custode reliquerit filiam iuvenulam et lascivam, excusari nequit. Elegans exemplum est in lege Mosaica, quod qui planum tectum fecerint in aedibus suis, idque non cinxerint clathris, et aliquis inde cadat, reus esse debeat.

2. Qui calcar addidere currentibus, id est, non obscure probarunt facinus, quod committere alter certo decreverit. E. g. Titius audit, Maeuium vulnerare decrevisse Sempronium, id factum probat. Hic sane poena dignus: sed non tenetur ad restitutionem, quia fecisset Maeuius, etiamsi consensus Titii non accessisset.

§. 11.

Quamvis etiam causa moralis aequè obligata sit, ac physica: non tamen illa eodem modo tenetur semper, sed inter reos ratione restitutionis certus ordo observatur. Nam

1. Si reus in alterius potestate sit, is, cuius imperio facinus admissum est, tenetur, e. g. pater, dominus, cet.

2. Deinde causa physica ita, ut si non habet in aere, luat in corpore. Hinc

3. Reliqui, qui consilium dederunt, laudarunt, non prohibuerunt, cet.

Singuli

Singuli tenentur in solidum, inquit auctor, et vno soluente reliqui liberantur, (quod in poena secus se habet,). Sed id tantum verum est de actibus indiuiduis, vbi non constat, quantum quisque ad effectum contulerit: si autem diuiduum est factum; quisque tenetur pro rata. E. g. tres Titium adgressi, vnus vulneris inflixit in capite, alter in brachio, tertius tantum percussit baculo. Si de solstro quaestio est, singuli pro rata tenentur.

§. 12.

Sequitur tertia pars de modo resarciendi damnum. Vbi 1. quaeritur, *utrum quis tantum de effectu delicti proximo, an etiam de remotiore teneatur?* Resp. de vtroque. Nam qui deliquit, vtriusque effectus causa est. Philosophi quidam vocant causam sine qua non. Exempla bina attulit Grotius, priuatum alterum, alterum publicum. Quidam vicini platanum incenderat, ex ea domus arserat. Etiam hoc damnum tenebatur resarcire. Ita et Ariarathes exitum Melani, amni obstruxerat, vt regionem faceret insulam: sed inundatione magna Galatiae et Phrygiae pars perijt. Tenebatur Galatis et Phrygibus ad restitutionem.

Exceptionem tamen patitur regula, si actus in se non illicitus est, sed permissus. Tunc enim qui iure suo vitur, nemini facit iniuriam. E. g. qui fontem in suo fodit, non tenetur vicino, licet venam aquae vicini inciderit.

§. 13.

Exemplo porro homicidii id declarat auctor. Homicida occiso vitam reddere nequit, nec ea recipit aestimationem. Sed tamen tenetur ad resarcienda damna, quae inde ad defuncti familiam redundarunt. Hinc soluit impensas in curationem factas, soluit alimentis familiae, impensas funeris.

Sed alimentorum hodie raro habetur ratio. In Saxonia soluitur pro illis agnatis defuncti pecunia, quae vocatur wergeldum, estque 40. florenorum.

§. 14.

Ad quid tenetur; qui non occidit, sed mutilauit, vel vulnerauit? Resp. ex eodem fundamento §. 12. explicato, teneri eum ad omne damnum, cui occasionem dedit. Hinc et ipse soluit impen-

impensas curationis, restituit id, quod lucrari potuisset, nisi ex vulnere decubuisset.

Quin et, si in posterum ob mutilationem alimentia carere debet vulneratus, horum quoque habetur ratio.

§. 15.

Ad quid tenetur adulter? Resp. auctor cum 1. indemnem praestare maritum ab alenda prole. 2. eundem liberis reliquis teneri ad resarciendum damnum, quod patiantur ob concursum prolis adulterinae ad hereditatem.

Sed Grotius hic non satis adcurate sequutus est LESSIVM, Iesuitam. Decisio enim haec absfona est. Aut constat, prolem esse adulterinam, e. g. si maritus per aliquot annos absens fuerit, aut dubium est, utrum ex patre, an ex adultero suscepta sit. Priore casu maritus alienae proli nec alimenta debet, nec hereditatem: posteriore casu non tenetur adulter prolem alere, pro qua militat praesumptio, non esse legitimam.

Certius est, stupratorem aut dotare debere mulierem, aut ducere, quin et ad praestanda alimenta obstrictum esse, quia hac in re damnum intulit stupratae.

§. 16.

Quid fur praestat? Rem cum accessione, restituit damnum, et praestat lucrum cessans.

Nescio autem, cur Grotius cum Lessio existimet, furem, si res perierit, debere aestimationem non infimam, nec summam, sed mediam. Id enim locum habet in contractibus, si res apud alterum perierit sola culpa. At hic de delicto quaeritur, quod fauorem non meretur, adeoque iustissimum est, ut ex fundamento §. 12. omne damnum, adeoque et summam aestimationem praestet.

§. 17. 18.

Pergit auctor ad dolum et vim. *Quid praestat, qui dolo aut vi promissioni dedit causam?* Resp. aut iam praestitum est, quod hoc modo promissum, aut nondum praestitum. Priore casu reddi oportet cum fructibus: posteriore promittens restituendus in integrum, et ab obligatione absoluendus. Plus enim damni non datum est.

Heineccii Prael. Grot.

A a a

Ex-

Exceptio tamen est, si quis ipse causam dedit, cur vim pateretur. Tunc enim vis non est iniusta, e. g. si debitor morosus causam dedit magistratui illum cogendi.

§. 19.

2. Quum et bellum iure gentium pro vi iniusta habeatur: quaeritur, an et hic alter alteri teneatur ad resarcienda damna, si appareat, eum bellum iniustum gessisse?

Resp. iustitia belli vel interna est, quae ex causa iudicatur; iusta enim belli causa facit iustum bellum, vel externa, quae ex personis et modo iudicatur. Tunc principes et res publicae gerunt bellum iustum, privati, subditi, latrones, iniustum. Iustitia interna occultior est: externa in oculos incurrit.

Quia ergo de occultis difficulter iudicatur, et neutra pars fateri solet, se bellum iniustum gessisse: hinc respicitur tantum ad iustitiam externam, adeoque regula est: qui bellum iustum gerit (in sensu posteriore), is alteri non tenetur ad damna resarcienda: qui iniustum, tenetur, ut rebelles, piratae, cet.

§. 20.

num. 1. 2.

3. Qu. an et imperantes teneantur ex damno per subditos dato? E. g. si principis cuiusdam subditi latrocinia egerint.

Resp. distinguendum, an imperantes et magistratus ea media adhibeant, quibus uti solemus ad haec impedienda. Tunc non tenentur. Secus si latronibus et piratis parcant, eosque non diligenter persequantur.

4. An tunc imperantes teneantur, si tempore belli codicillos dederunt priuatis, ut hostium naues intercipient, hi vero amicorum vel sociorum naues adgressi sint?

Resp. tenentur ad puniendos noxios, ad aliud non tenentur. Sin aufugerint bona eorum noxae dantur. Sufficit enim; quod mandatum plane contrarium dederint.

Id quod Grotius illustrat exemplo militiae terrestris, quae si iniussu ducum damnum dedit, non obligat duces.

Obiicitur, at vfos esse rectores opera malorum hominum, et ex ea causa patremfamilias ex facto seniorum et ancillarum teneri. Resp. in familia facilius fieri posse selectum hominum, quam in exercitu vel nautico vel terrestri, ubi insignis multitudo requiritur.

§. 21.

§. 21.

Queritur, an ex iure naturae sit noxae datio serui vel pecudis? Pufendorffius affirmat: Grotius rectius negat, eamque ex iure civili oriri obseruat. Dominus enim qui in culpa non est, natura ad nihil tenetur, pecus quoque quum delinquere nequeat, ad restitutionem adigi non potest. Sed legislatores eam actionem dederunt, ne plane indemnes essent laesi.

§. 22.

5. Vltima quaestio est, quomodo resarcienda damna honori vel aestimationi illata? Sane existimatio et fama sunt res inaeestimabiles, et hinc sufficere videtur, vt alter puniatur. Sed recte respondet Grotius, in omni delicto concurrere vitio sitatem actus, et damnum datum: illam poena, hoc restitutione expiari. Ergo non sufficit puniri, qui iniuriam intulit, sed et restitutionem debet. Ea consistit,

In culpa confessione, et declaratione honoris, vel testimonio innocentiae.

2. In aestimatione pecuniaria, si eam instituire velit actor. Quamuis enim existimatio non sit in commercio: sufficit tamen, quod alter adseueret, se malle carere tanta pecuniae summa, quam hanc ignominiam pati.

3. Immo si iniuria damnum illi aliud intulerit, id quoque resarciendum. E. g. si in Germania opifici iniuriam passo a collegis exercitium interdicatur opificii.

C A P. XVIII.

DE LEGATIONVM IVRE.

§. 1.

Saepe monuimus, auctorem nostrum magnam differentiam statuere inter ius naturae et ius gentium, quorum illud ex ratione, hoc positium esse statuit. Ad ius gentium etiam refert ius legationum et ius sepulturae, de quibus agitur duobus

capitibus sequentibus. Quia enim haftenus ostendit, quid iure naturae nobis debeat: docere etiam voluit, quid debeat ex iure gentium. Iam saepe monuimus, non dari ius gentium a iure naturali diuersum, et hinc etiam haec ratio ordinis et connexionis cessat: tamen sequendus est auctor, dicendumque hoc capite de iure legationum.

Quaeritur autem primo, *an ius legationum ex iure gentium sit*? Adfirmat auctor, et prouocat suo more ad veterum quorundam testimonia, qui legatorum sanctimoniam ad ius gentium referunt. Sed facile demonstratur, legatorum iura ex ipso iure naturae esse.

Iuris naturae est, vnumquemque posse negotium per alium explicare: ergo et idem ius competit rei publicae, et eius rectoribus.

Iuris naturalis est, belligerantes pacem facere, idque quum fieri non possit sine internunciis, internunciis autem futuri non sint sine inuiolabilitate. Ergo ius naturae iubet legatos esse inuiolabiles.

Nihil ergo hic positum est, praeter ritus quosdam et privilegia, in legatis recipiendis, dimittendisque obseruari solita. Sed ritus non pertinent ad ius, sed ad decorum, vnde et mutari possunt pro gentium arbitrio.

Videbimus 1. *ius mittendi recipiendique legatos*, §. 2. 3. 2. *inuiolabilitatem eorum*. §. 4. fin.

§. 2.

Quaeritur itaque; quod ad priorem partem attinet, quis habeat ius legatos mittendi? Resp. is, qui capax est summi imperii.

Fluit id enim ex ipsa definitione. Legatus est persona missa ad rem publicam vel principem exterum, vt negotia principis vel rei publicae suae expediat. Haec vero definitio non quadrat aliis, nisi vel a principe vel a re publica missis ad alium principem vel rem publicam.

Solent quidem et alias publico nomine quidam mitti, vel a principe seu re publica ad subditos, vel a subditis ad summos imperantes seu rem publicam: sed 1. hi nomine ab illis differunt, nam priores dicuntur *commissarii*, posteriores *delegati* vel *deputa-*

deputati. 2. Differunt et re ipsa. Nam illis ex iure naturae debetur inuiolabilitas: his non semper debetur. 3. Illorum controuersiae deciduntur ex iure naturae, horum ex iure ciuili, nempe ex *tit. Digestorum de legationibus*.

Pro capacibus summi imperii habentur etiam foederati inaequales. Foederati enim, licet praerogatiuam agnoscant alterius rei publicae, tamen sunt liberae societates, quamdiu non sunt subditi. Hinc e. g. Valesii et Grifones recte mittunt legatos, quamuis sint foederati Heluetiorum inaequales. Et Carthaginenses olim iure legationum gaudebant, quamuis iniquissimum foedus illis Romani extorsissent. Idem hodie dicendum de Algiriensibus, Tunetanis, Tripolitanis.

Aliud dicendum de regibus victis et exutis regno. Hi enim ad victores legatos non mittunt, nisi data fide publica. Exemplum Persei ipse Grotius adducit.

Idem obtinet in bello ciuili. Tunc enim neutra pars bellum gerens est societas libera, adeoque nec ius legationum habet, siue ciues inter se bellum gerant, siue cum principe.

Attamen id exceptionem patitur 1. ratione tertiæ, si causa sit dubia. Sic e. g. quum Belgae foederati ab Hispanis defecissent, ordines legatos mittebant ad Henricum III. regem Franciae, qui paullo ante pacem cum Hispanis inierat. Legatus Hispanicus caelum et terram mouebat Parisiis, ne rebellium, ut vocabat, internuncii iure legationis vterentur. Sed Henricus III. recte respondebat, ratione Gallorum Belgas esse societatem liberam, nec Hispanum sibi leges praescribere posse, quorum legatos admittere debeat.

2. Ex necessitate. Bellum enim ciuile debet pace demum finire. Ea coalescere nequit, nisi ope legatorum. Ergo admittendi et eorum internuncii, qui bellum ciuile gerunt, data fide publica, et saluo vtriusque iure. Sic Caesar Hungarorum sub Ragotzi rebellantium legatos, saluo iure suo, et data fide publica, admisit.

§. 3.

Quaestio altera est de admittendis legatis, *an omnes senen-* num. 1.
mur legatos exiraneorum principum vel rerum publicarum admittere? Sunt, qui generatim dicunt, admittendos esse legatos promiscue. Alii cum Grotio rectius distinguunt.

A a a 3.

Pro-

Promiscue omnes non admittendos esse, vel inde patet; quia ex decoro tantum fuit haec obligatio. Nam c. g. decorum requirit, ut amicum me salutaturum admittam: sed si tamen vel nolim, vel non possim eundem admittere, non ideo iniustus sum. Ita et de legatis ex decoro fuit regula: *legati admittendi, nec temere reiiciendi sunt.*

Sed si ob iustam causam nolim, vel non possim admittere; eo ipso peccasse non dicor contra iustitiam. Sunt autem iustae causae reiiciendi legatos vel ob personas mittentes, vel ob personas missas, vel ob causam, propter quam mittuntur.

num. 2. 1. Ob personas mittentes cessat hoc officium, si princeps vel res publica mittens legatos hostili in nos animo sit. Hosti enim nihil debemus officii, qua hosti. Hinc si hostis pacis causa mittit legatos, hi non gaudent inuiolabilitate, nisi data fuerit fides publica. Et, si nolumus eos amplius nobiscum manere, statim possumus remittere. Exemplum luculentum est in historia Belgica. Albertus Austriacus rogabat ordines, ut legati sui reciperentur, conditiones pacis oblaturi. Ordines diu negabant: denique data fide publica, Hagam proficiscebatur Spinola, et alii. Quum adpareret, legatos non pacem velle, sed corrumpere conari rei publicae ministros, iusserunt eos intra breue tempus domum redire.

2. Ob personas missas. De pace tractabatur Coloniae. Imperator promiserat, se Galli legatos suscepturum. Mittebat rex Galliae Fürstenbergium, principem rebellem et transfugam. Imperator illum captum Viennam abduci iubebat. Et sane non teneor quemcumque admittere, sed eum, qui mihi non suspectus sit.

3. Ob causam, propter quam mittuntur. E. g. si adpareat, legatos vel speculandi causa adesse, vel turbas concitare velle in re publica, vel aliquid ambire, quod praestari nequeat. Hinc a Protestantibus non admittuntur nunciu pontificis.

§. 4.

num. 1. Sequitur iam altera pars de legatorum inuiolabilitate. Ea inuiolabilitas partim ad personas legatorum, partim ad eorum bona pertinet et comites.

1. Quod ad personas attinet, de iis maxime dissentiunt doctores, quia id ius ex iure gentium explicare conantur, id est, ex

ex iure a iure naturae diuerso, cuius tamen nulla fundamenta certa sunt.

Videbimus ergo 1. ipsum dissensum doctorum, 2. quomodo Grotius illud componat, 3. quid ex veris ac genuinis iuris naturae principiis de hac quaestione sentiendum sit?

Doctores quidam 1. inuiolabilitatem legatorum restringunt ad vim iniustam, e. g. vt spoliari, vel iniuriis addici nequeant. Et sic nihil praecipuum habent legati prae aliis hominibus in re publica nostra viuentibus.

2. Alii vim etiam iustam negant inferri posse legatis, nisi vbi ius gentium violent, e. g. coniurationes et rebellionem in re publica fouendo.

3. Alii generatim contra omnem vim muniunt legatorum personas.

2. Quid ergo Grotius? Dicit, quaestionem difficilem esse, num. 2. quae in partem vtramque disputari possit. Pro prima et secunda sententia pugnare, quod delicta non debeant manere impunita. Pro tertia, quod legationum utilitas hunc fauorem mereatur, vt personae legatorum sint inuiolabiles. Ergo nihil superesse ait, quam, vt videamus, in quam inuiolabilitatem legatorum gentes consenserint, idque non ex exemplis, sed tum ex sapientum iudiciis, tum per coniecturas esse iudicandum.

Enimuero 1. si tam incertum hoc ius est, et de eo in vtramque partem potest disputari: ius gentium dici potest obscurissimum, quum tamen et barbaris gentibus liquido constare debeat, ad quid obligentur.

2. Vt exempla non probant ius gentium, ita nec sapientum iudicia. Per sapientes enim Grotius intelligit eruditos. Atqui eruditos ipsos dissentire, iam n. 1. huius paragraphi vidimus.

3. Per coniecturas probare ius, perinde est, ac dicere, ius esse incertum. Ergo nemo punietur, qui legatos violauit.

Videbimus tamen sapientum iudicia, quibus vtitur.

Alterum est *Livii Histor. lib. II. cap. 4.* vbi Tarquinii legatis, coniurationem in vrbe fouentibus, pepercisse dicuntur Romani, adeoque plus valuisse ius gentium, quam legatorum improbitas. num. 3.

2. *Sallustius de bello Iugurth. cap. 39.* refert, Bomilcarum, qui Iugurthae legatos comitatus erat, reum factum, magis

gis ex aequo bonoque, (id est, magis bono et utili exemplo); quam iure gentium.

Exinde sequitur, ut sapientes existimarint, legatos non violandos, etiamsi peccasse censeantur. Sed respondebunt alii, 1. sapientum iudicia non facere ius, 2. a Livii et Sallustii auctoritate ad consensum omnium sapientum non valere argumentum.

num. 4. Iam ad coniecturas. 1. Inviolabilitas legatorum, inquit Grotius, est privilegium. Privilegium aliquid tribuere debet praeter ius commune. At nihil tribueret, si vis tantum iniusta abesse a legatis iuberetur, (ea enim abesse debet ab omnibus hominibus. Ergo et vis iusta ab iis abesse debet.

2. Vbi duo mala sunt rei publicae, ibi eligendum est minus. Iam malum quidem est, delictum impune committi, sed multo peius violare legatorum personas, quarum causa bellum excitari facillime posset. Ergo minus malum eligendum.

3. Si concederetur vis iusta contra legatos, numquam defuturus esset praetextus legatos violandi, quum plerumque consilia rei publicae nostrae aduersa ex officio agitent.

num. 5. 4. Legatus repraesentat personam imperantis et rei publicae, a quibus mittitur. Ergo non esse in re publica nostra fingitur, quamvis in ea sit. Ergo nec ob delicta puniendus.

Ergo inde colligit Grotius, 1. vim iustam abesse debere a legatis, aequae ac iniustae, 2. delicta eorum leuia dissimulanda esse, 3. ob grauiora finibus exesse iuberi legatos, 4. ob atrocissima ad eum, qui misit, mittendos esse.

num. 6. Obseruat porro Grotius, hanc quoque legem admittere exceptionem 1. necessitatis, quae plane non habet legem. Id est, si coniuratio gliscat, et extremum inde periculum immineat rei publicae, non quidem violari possunt legati, sed tamen custodiri, interrogari, immo et litterae eorum intercepti. Exemplum legatorum Tarquinii adduxit Grotius. Addi possunt alia. Sic Cicero legatos Allobrogum in via publica intercepti, et Romam reduci iussit, quia litteras Catilinae ad Allobroges ferebant, ex quibus tota coniuratio patefcere posset. Recentissimum exemplum est Goerzii in Belgio, et legati Suecici in Britannia custoditorum.

num. 7. 2. Grotius recte addit, admittendam quoque esse 2. exceptionem hospitalitatis. Contra hostem enim omnia licita sunt. Hinc si hosti-

si hostilia molitur legatus, e. g. urbem vel portum nostrum interciperet audeat, tunc et occidi poterit, non tamquam legatus, sed tamquam hostis.

Ita ergo Grotius thesin suam probat per coniecturas. Sed clarius probari potest ex ipsis principiis iuris naturae. Nam 1. foecialitas requirit, vt inter gentes pax vel restituatur, vel conferuetur. Id fieri non potest sine internunciis. Hi munere suo fungi non possent, nisi essent inuiolabiles. Ergo sunt inuiolabiles. 2. Qui legatum recipit, is recipit personam, quae repraesentat principem, vel rem publicam exteram. Atqui principem exterum in re publica nostra peccantem non puniremus, nisi hostilia molliatur. Ergo nec legatum. 3. Quod tibi non vis fieri, alteri ne feceris. Legatis nostris nihil mali intendi volumus. Ergo nec id aliorum legatis debemus intendere. Ita sane res clara, et nec iudicii sapientum, nec coniecturis opus est.

§. 5.

Sed iam porro quaeritur, *quem legatorum inuiolabilitas obli-* num. 1.
get? Recte resp. Grotius, eum, ad quem legati mittuntur. Hi enim, dum legatos recipiunt, tacite is promississe censentur inuiolabilitatem.

Inde ergo consequitur, vt ratione tertii non sint inuiolabiles. Hinc si e. g. legatus Gallicanus per rem publicam nostram iter faciens in Britanniam, delictum comitteret, procul dubio posset puniri, quia ratione rei publicae nostrae non est legatus, nec eum tamquam legatum vmquam recepimus.

Aliud, si non deliquerint. Tunc vt alii viatores libero per territorium nostrum transitu merito fruuntur. Inde ergo illustres controuerſia inter Carolum V. et Franciscum I. regem Franciae decidi potest. Franciscus I. mittebat legatos ad Turcas, qui foedus contra Carolum V. cum iis inirent. Hi legati per ducatum Mediolanensem tendentes Venetias, iussu Caroli V. intercipiabantur. Franciscus I. ius gentium violatum querebatur. Minime vero. Nam ratione Caroli V. ad quem legati missi non fuerant, ne erant quidem legati. Carolus nec fidem dederat legatis hostis per fines suos transeuntibus. Non poterat ipsi viti verti, quod legatos pro hostibus tractaret, qui foedus aduersus se cum Turcis inire moliebantur.

Heineccii Prael. Grot.

B b b

§. 6.

§. 6.

Quaeritur porro, *an et hostis legatos ad se missos praestare debeat iniuolabiles*. Resp. distinguendum esse inter legatos sollemnes et caduceatores. Legationem hostium sollemnem admittere non tenemur. Semel tamen admissa iniuolabilis est, ob ea, quae §. 5. diximus.

Caduceatores vtrunque iniuolabiles sunt ex regula iuris naturae, quod tibi non vis fieri, alteri ne feceris. Sunt autem caduceatores internuntii nullo charactere instructi, quos dux ad ducem mittit, induciarum, vel redimendorum captiuorum causa. Cui muneri moribus gentium Europaeorum plerumque adhibentur buccinatores et tympanotribae, quibus aequae religiose praestatur iniuolabilitas, ac legatis sollemnibus.

§. 7.

Quaestio noua est, *an legatus occidi vel male tractari possit iure italensis*. Id merito negatur. Pacta sunt seruanda. Hostis noster legatum violauit, cui fidem dederat. Turpiter egit et contra ius gentium. Nos iam fidem damus hostis legato ad nos misso. Aequae turpiter et contra ius gentium facimus, si violamus. Huic enim legato fidem dedimus, nec ab ea obligatione nos liberat res cum alio acta.

Aliud dicendum, si violatione legati hostilis nostrum liberare possemus. E. g. legatus noster mancipatus est carceri. Nos hostilem legatum itidem mancipamus carceri, donec noster vinculis soluatur.

§. 8.

num. 1. Pergit auctor II. ad legatorum comites et res, et quaerit, *an et haec fruantur privilegio*? Id recte affirmatur. Nam 1. accessorium sequitur suum principale. 2. Aequae violatur legatus; si personae eius, ac si familiae et rebus eiusdem vis inferatur. 3. Dum legatus repraesentat principem suum: iuris dictio quoque illi relinquenda in familiam et res suas.

num. 2. Sed quousque se ea iuris dictio legati extendat, id ex moribus iudicandum. Hinc nata controversia inter regem Galliae et papam, qui ius asyli (*die Quartier-Freyheit*) Romae tollere cupiebat. Et sane iniuriam sibi fieri frustra querebatur legatus Gallicanus.

licanus. Nam inuiolabilitas legatorum confidere potest, etiam si ius asyli non concedatur facinorosis in aedibus legatorum.

Ita et indecorum hodie plerisque habetur gentibus, legatis concedere iuris dictionem criminalem in familiam, et meminisse rem fuisse grauiter tractatam, quum legatus Russus Hafniae in Dania pedissequum securi caedi in atrio aedium suarum iussisset.

§. 9.

Quaestio illustris est, *an bona legatorum arresto, quod vocant, confringi possint ob aes alienum?* Tale quid legato Russico in Britannia, Suecico Berolini contigisse meminimus.

Id rectius negatur, quia inuiolabilitatem se etiam ad res legatorum porrigere diximus, §. 8. immo et ad vim iustam. §. 4.

Obiicitur, ita occasionem datum iri legatis contrahendi aes alienum, et defraudandi ciues nostros. Sed resp. 1. ciues nostri cauti esse debent, ne aliter, quam Graeca fide, et praesente pecunia legatis vendant, ut priuatos exigant fideiussores, priuata pignora, cet. 2. Si aes alienum contractum, initio interpellandi legati, deinde eorum principes, si ne sic quidem satis fiat, tunc repressaliis locus est.

§. 10.

Obiiciunt, ita neminem fore, qui cum legatis contrahere *nu. 1. 1.* velit? Resp. 1. id non verendum esse, quia et regibus ipsis non desint creditores. 2. Nec interesse nostra, si enim fidem non repperit legatus, emet pecunia parata. 3. Gentes quasdam iis ius non dixisse, qui fidem alterius sequuti sint. Quod eleganti digressionem Grotius probat *n. 2. huius paragraphi* quae tota perlegi meretur.

§. 11.

Postremo quaeritur, *quam satis factionem debeant, qui legatos violant?* Resp. quam exigere res publica a re publica solet, id est, iusta haec est belli causa, quod alter ius gentium violauit. Huius rei multa exempla sunt. Praegnantissimum existat 2. *Sam. 10.* ubi David bello internecino existuisse dicitur Ammonitis, qui legatos suos violarant, quum alioquin Deus prohiberit Ammonitis fieri iniuriam.

CAPVT XVIII DE IVRE SEPVLTVRAE.

§. 1.

PRaeter ius legationum ex iure gentium etiam ius sepulturae deriuat Grotius, de quo videbimus

1. *an sit iuris gentium?* §. 1.

2. *cur sepeliendi ritus inuentus?* §. 2.

3. *quibus sepultura debeatur?* §. 3. *ad fin.*

num. 1. Primum quaeritur, *an sit iuris gentium sepultura?* Adfirmat Grotius, idque primum probat

I. Testimoniis Dionis, Chrysostomi, Senecae, Hebraeorum, Isidori Pelusiotaе, Aeliani, et aliorum, quae non sine adparatu adcumulauit Grotius.

Sed 1. testimonia et iudicia sapientum non faciunt ius, et 2. ne consentiunt quidem. Hebraei enim, Isidorus, Aelianus, Euripides, non iuri gentium, sed iuri naturae tribuunt morem sepeliendi mortuos.

num. 2. II. Ex iis veterum locis, in quibus hoc ius diis adscribitur, tamquam inuentoribus. Quo praecipue pertinet locus Sophoclis elegantissimus. Iam diis adscribere solent poetae, quae ex iure gentium sunt, e. g. ius legationum. Ergo et ius sepulturae est iuris gentium.

Mirum argumentum. Gentiles omnium fere rerum origines ad deos referebant. Agriculturam inuenit Ceres, oleam Apollo, vinum Bacchus, an et haec dicemus iuris gentium?

num. 3. III. Argumentum ex fabula ducit Grotius, quam prolixè recenset verbis Isocratis. Adrastus, quum antea non sepeliisset mortuos, cum Thebanis comittens praelium ad internecionem caesus est, viditque interemtis ordines hostium ducere. Hinc ius sepulturae suis petens, non obtinuit, donec Theseo demonstrauit, id iuris gentium et diuini esse. Ex quo patet, Thesea et Isocratem etiam hoc ius pro iure gentium habuisse.

Resp. 1. Fabula haec, ipso fatente Isocrate, a poetis est.

Pila-

Piſloribus atque poëis

Quidlibet audendi ſemper fuit aequa poteſtas.

2. Non ſtatim eſt iuris gentium, quod tale videtur Iſocrati et aliis, qui ſaepe ignorarunt, quid ſit ius gentium. 3. Et quomodo aliquid ſimul eſt iuris gentium et diuini?

III. Denique inde patet, quod vetres huic officio nomen virtutum tribuunt. E. g. Cicero vocat humanitatem et manſuetudinem, Val. Max. miſericordiam et religionem, Quinſtilianus miſericordiam et humanitatem, cet.

Reſp. 1. eſt humanitas mortuos ſepelire, ne viuus ſint abominationi et taedio. 2. Iudicia haec gentilium ſingularem habent rationem. Nam exiſtimabant, non poſſe quieſcere manes, ſed trilles oberrare, niſi corpus ſepeliatur. Qua de re multa notauit IAC. GVTHERIUS in libro *de iure manium*. Ergo inde non ſequitur, morem ſepeliendi eſſe iuris gentium.

Quid ergo dicendum? Reſp. quaefſtio duplex eſt: 1. *an e medio hominum viuentium remouendi mortui?* Idque vnufquiſque adfirmabit ob periculum ſocietati humanae imminens ex mortuorum foetore, putredine, et inde ſequutura infectione aëris. Et haſtenus id officium eſt iuris naturae, vnde omnia deriuanda, quae ſocietati humanae conducunt. 2. Altera quaefſtio eſt, *an praeciſe ſepelienda ſint cadauera?* Et hic reſpondemus: nihil hac de re nec ius naturae, nec ius gentium ſtatueret. Hinc et olim pleraeq̃ gentes etiam humaniſſimae, cremare malebant cadauera, quam ſepelire. Apud Chriſtianos tamen id receptum, vt ſepeliaantur, non ex iure naturae et gentium, ſed partim imitatione Ebraeorum, quibus hic mos placebat, partim quia ipſe Deus probaſſe videtur ſepeliendi ritum verbis notiſſimis: *terra es, et in terram reuerteris*, contra improbauit ritum cremandi mortuos in regibus Iſraëlis ad gentiliſmum prolapiſis.

§. 2.

Altera iam ſequitur quaefſtio, *cur eum ritum adinuenerint venum?* i. *terres?* Rationes variae recenſentur a Grotio.

1. Moſchion vetus poëta, hanc reddit rationem, quod cyclopes vel gigantes olim ſoliti ſint cadauera mortua deuorare. Quorum feritati hunc bolum ſubtraxerint, dum ea ſepelirint.

Sed haec ratio non admodum probabilis, 1. de gigantibus

Bbb 3 enim

enim plura mentiuntur veteres, quam comperta tradunt; 2. Gigantes, si tanto adpetitu in haec fercula ferebantur, facile ea potuissent terra eruere, et deuorare. Rectius itaque homines consuluissent cadaueribus, si ea cremassent.

Si quaeras, unde hanc originem hominum sciuerint gentiles? Respondeo, per traditionem, cuius luculenta exstant vestigia apud EYSEBIUM in *Praeparatione euangelica*, in quo libro ex instituto huius modi sententias et traditiones gentilium collegit Eusebius, quae consentanea sunt religioni Christianae.

num. 3.

3. Christiani tertiam reddunt rationem: spem resurrectionis. Quum enim eam sperent credantque Christiani, non in cineres redigunt suorum corpora, sed ea tamquam pretiosum thesaurum recondunt et deponunt, vt spem suam declarent resurrectionis. Notetur locus elegantissimus Prudentii.

num. 4. 5.

4. Accedunt et aliae rationes. Inprimis huc pertinere Grotius videtur praestantia et dignitas hominis prae reliquis animalibus. Ea enim facile mouere potuit veteres, vt nollent cadauera mortuorum obicere feris, volucris, bestiis aliis, sed sepelire. Sane hanc rationem reddunt QVINTILIANVS *Declam. VI.* et VIRGILIUS *Aenid. X. v. 557. seqq.* Quibus Grotius addit, quod Deus *Ierem. 22.* tamquam poenam impiis minetur, quod sepulturam non sint habituri, sed esca futuri auium.

Sed et haec ratio non magni momenti est. Nam 1. non deterius est comedi a volucris et feris, quam a vermibus. 2. Vtrumque facilius prohiberi posset per combustionem cadauerum. 3. Comminatio prophetica non tam ob consequens est terribilis, quam ob antecedens. Nam defectus sepulturae et cadauer obiectum feris bestiis et volucris est indicium mortis cruentae et violentae.

num. 6.

Inde ergo concludit Grotius, adeo esse officium boni viri, sepelire mortuos, vt veteres 1. id non hominibus, sed humanitati tribuant. 2. Vt nec inimicis deneganda sit sepultura. Prius non magni ponderis est. Quod enim humanitati tribuitur, id et hominibus tribuitur. Alterum verum est, sed ex alia ratione, quia cadauera mortuorum non amplius sunt obiectum irae et ultionis. Quis non rideret hominem ligneam statuam verberantem? Et quid stultius est, quam irasci mortuis? Notum est dictum regis, cui superbum hostis mausoleum ostendebat.

debatur, quique suadentibus amicis, vt illud deiceret, respondit: vtinam vero omnes hostes mei sub huius modi mausoleis quiescerent!

§. 3.

Hinc facile deciditur quaestio, *an et hostibus publicis debeatur sepultura?* Id adfirmat Grotius, idque suo more et testimoniis et exemplis probat. Sic *n. 1.* adcumulat testimonia Apiani, Taciti, Dionis, Chrysostomi, et aliorum. Sed ratio paulo ante allegata sufficit. Effet enim haec ira stolida et inuidia plus quam canina, mortuis hostibus irasci, iisque inuidere sepulturam, qua nihil minus et minore sumtu praestari potest.

Tamen et hic obseruandum, quod paullo ante diximus, pleraque haec gentilium testimonia fluxisse ex falsa et erronea eorum opinione, quod insepultorum manes quiescere non possint.

Idem Grotius illustrat exemplis Herculis, Alexandri, Hannibalis, Pompeii, et aliorum, qui hostibus etiam bello occisis hoc officium praestiterunt. *num. 2. 3.*

Et ne sola exempla ex gentilismo proferre videatur, addit, apud Hebraeos etiam pontificem maximum, qui tamen nullum funus alias curare, nec mortuum tangere poterat, *Leu. 21. 1.* sepelire debuisse cadaver, quod insepultum reperisset. Immo Christiani vel vasa ecclesiae vendi permittebantur, vt alerentur pauperes et sepelirentur mortui. AMBROS. *de offic. lib. II. cap. 28.*

Sed vt vera fateamur, *1.* haec exempla ad rem non pertinent. Quaestio enim non est de officio sepeliendi mortuos, sed de sepeliendis hostibus publicis. *2.* Exemplis facile alia exempla opponuntur. Vnde omnis argumentatio a simili et exemplo anceps est et periculosa. Refert AENEAS SYLVIVS de Barbara, vxore libidinofissima Sigismundi imperatoris, quod mortuo marito ministri ipsi suaserint viduitatem perpetuam, addiderintque, sic eam imitaturam columbellam, quae viduae mori soleat, illa autem responderit, et quidni potius imitarer pascerculos? Sic similia et exempla nihil probant, quia semper opponi possunt contraria. *num. 4.*

Obseruat hoc ipse Grotius. Fatetur, exstare exempla in contrarium, sed addit, ea communi hominum iudicio damnari. *Id.*

Id facile concedo, modo etiam concedatur, exemplis ius non probari.

§. 4.

num. 1. Haftenus de hoſtibus: iam *de facinorofis* quaeritur, an *et his ſepultura debeat*?

Haud obſcure adfirmat Grotius, idque probat ex lege diuina, *Num. 25. 4. Deut. 21. 23. 2. Sam. 21. 26.* qua Deus iuſſerit et ligno ſuſpenſos ſub veſperam ſepeliri. Id quod tam religioſe obſeruatum nouimus a Iudaeis, vt nec ſeruatori noſtro, quem ſummo odio perfequebantur, ſepulturam inuide- rint.

Idem probat ex legibus ciuilibus *l. 1. C. de cadauer. puni. l. 3. C. eod. l. 2. C. de religioſ.*

num. 2-3. Obiici poſſet praxis. Nam nemo ignorat, cadauera ſaepe et olim, et nunc in furca exponi, vel in rota et patibulo in publico conſpectu relinqui ſolita. Sed diſputari poſſe, an id laudabile ſit. Contra laudatos fuiſſe ait, qui corpora punito- rum ſepeliuerint. Obiici porro poſſet, Dauidem tamen non dubitaſſe caput Goliathi circumferre et oſtentui ſeruare. Sed reſpondet, id factum fuiſſe alienigenae, gentili, Dei contemptori et inimico.

Haec Grotius. Quid vero de tota controuerſia ſentiendum? Omnino exiſtimandum, non abſurdum eſſe, cadauera punitorum oſtentui exponere. Nam 1. cadaueri mortuo non ſit hoc ipſo iniuria, quia mortuum eſt. 2. Nec hoc ſit in poenam, quia mortuus nihil patitur, quum tamen poena debeat eſſe malum paſ- ſionis. 3. Sed hoc exigit ſinis poenarum et ſalus rei publicae. Nam ſupplicia ſumuntur a facinoroſis, vt alii deterreantur, ne ſimile quid committant. Quum vero pauciſſimi homines ſupplicium ſumi videant, nec quotidie ſumantur: quid abſurdum, ſi cadauera publice expoſita admonere iubeantur praetereuntes, in re publica non impunita manere ſcelera?

Ad argumenta Grotii facile reſpondetur. 1. Lex diuina ſingulari habet rationem, ne polluat terra. Illa autem quae de pollutionibus hominum et terrae dicuntur in lege Moſaica, caerimonialia ſunt, adeoque nos non magis obligant, quam quae de animalibus puris et impuris dicuntur.

2. Ex

2. Ex legibus civilibus nec ius naturae non gentium probatur.

3. Exemplum Davidis omnino repugnat doctrinae Grotii. Nam, si verum est, facinorosos esse sepeliendos, secundum ius gentium verissimum quoque erit, sepeliri debuisse caput Goliathi. Ius gentium enim et naturae inter fideles et alienigenas non distinguit.

Rectissime ergo dixeris humanius quidem esse, et clementius, cadauera facinororum sepeliri, nec tamen peccare legislatores, qui ea publice in furca, rota, patibulo exponi iubent, si id ad deterrendos alios a simili facinore utile videatur.

§. 5.

Regulae hic de sepeliendis mortuis iam Grotius addit ex num. 11. ceptionem, quaeritque, *an et iis, qui sibi ipsi manus intulere, sepultura debeat?*

Observat hic Grotius, 1. ipsos Hebraeos his sepulturam negasse, idque probat ex IONATHAN de bello lud. lib. II. cap. 25.

2. Hanc poenam esse rationi consentaneam, quia alias irrogari non possit iis, qui mortem pro supplicio non habuerint.

3. Similia instituta aliarum gentium existare, quae eos, qui se occiderint, sepeliri noluerint.

Sed et hic aberrare videtur Grotius, dum haec instituta ad poenam refert. An puniri possunt mortui, qui nihil sentiunt, nihil patiuntur? An non satis gravem poenam subierunt, qui se ipsos occiderunt, et praeterea aeterni supplicii periculum adierunt? Ergo potius dicendum, posse salua iustitia horum cadauera insculpta relinqui, ut aliis terrori fiat, ne simili modo in propria viscera faciant.

Ea occasione disputat Grotius, *an iure naturae liceat, se num. 2. ipsum occidere?* Id merito negatur, quamvis id auctor non in doctus singulari libro, quem *Βιοβιβαντων* inscripsit, probare voluerit, et in se ipso paullo post triste experimentum coeperit. Nam

1. Vitam non a nobis habemus, sed a Deo. Ergo non nostra est, adeoque nec potestati nostrae subiecta.

2. Recta ratio nobis inculcat conseruationem nostri. Ergo prohibet destructionem.

Heineccii Prael. Grot.

Ccc

°

3. Lex

3. Lex diuina naturalis aequae, ac positivae, iubet nos amare proximum, tamquam nos ipsos. Ergo et nos amare debemus tamquam proximum. Atqui proximum occidere nefas est. Ergo et nos ipsos.

4. Mors voluntaria semper proficitur ex impatientia, desperatione, incredulitate, adeoque effectus horum vitiorum non melior esse potest, quam causa.

5. Denique ea stultitia nulla est maior. Quenam enim stultitia est, ne moriari mori? inquit eleganter Martialis.

NUM. 3. Illustrat hoc Grotius eleganti observatione. quod Hebraei mortem vocant *ἀπώλειαν*, dimissionem. Vti et Simeon *Luc. 2. 29.* dicit: *nunc dimittis seruum tuum in pace.* Cur ita locuti sunt Hebraei? Vt ostenderent, mortem a Deo expectandam, nec ex statione discedendum prius, quam a summo imperatore, Deo, auocemur et dimittamur.

NUM. 4. Sed Hebraei tamen vnum casum excipiunt, quo defendi posset existimant *ἀπαρχνείαν*, si videat homo, vitam suam dedecori fore Deo. Hoc colore enim defendunt mortem voluntariam Simsonis et Saulis. Addit Grotius exemplum Razis *2. Maccab. 19. 37.* et Christianorum quorundam, quorum meminit Augustinus, manus sibi inferentium, ne tormentis adacti Christum abnegarent.

Sed nescio, an haec exceptio facile defendi possit. 1. Simsonis exemplum est typicum. Ita rem disposuit providentia diuina, ut Simson morte sua mortem Christi adumbraret. Ex typicis vero regulae morales desumi non possunt. An quis regulam moralem petat ex fratre Iacobi fratris benedictionem dolose interceptante?

2. Saulis et Christianorum illorum exempla admodum ambigua sunt, nec certum an laudanda. Id vero certum, hos quoque, qui manus sibi consciscunt, quia vitam suam dedecori fore existimant Deo, incredulos et desperabundos esse, nec fiduciam in Deo collocare, qui facile etiam ex ignominia nostra gloriam suam amplificare potest.

NUM. 5. Haecenus de propiciis, quibus sepultura ex institutis multarum gentium negatur. Eiusdem generis exceptio est altera. Nam nec sacrilegos sepeliri patiebantur Graeci, ceu ex *DIODOR. Sic. lib. XVI.* probat Grotius. Id quod ipse Grotius non improbat.

Inde

Inde vero contra ipsum Grotium argumentamur quod si iniustum non est, insepultos relinqui propitius et sacrilegos, nec iniustum sit, insepultos exponi facinorosos alios.

§. 6.

Vidimus itaque, quae obligationes ex Grotii sententia e iure gentium descendant, nempe iura legationum et sepulturae. Huius generis et alia quaedam esse ait, veluti vsucapionem, successiones ab intestato, contractus. Sed rectius dixisset, pleraque haec ex iure naturae esse. Iuris naturalis sunt contractus et successiones ab intestato. Iuris quoque naturalis est, ut qui longo tempore rem suam neglexit, et pro derelicta habuit, domino suo excidat.

Obiicit Grotius, tamen si haec iuris naturae sint, tamen accipere firmitatem ex lege humana.

Sed resp. id verum esse, sed non de iure gentium, verum de legibus civilibus, quae in vsucapione tempus legitimum, in contractibus formam et modum contrahendi, in successione ab intestato gradus definire solent. Vnde et haec omnia admodum varia esse solent apud gentes diuersas.

CAPVT XX.

DE POENIS.

§. 1.

Saepeius monuimus *lib. II.* huius operis agi de causis belli iustificis, quarum tres statuit Grotius, 1. defensionem, 2. exactionem eius, quod nobis debetur, et 3. poenam. Vid. *lib. II. cap. I. §. 2.* Quum ergo prolixè hætenus egerimus de defensione, nec non de eo, quod nostrum est, vel nobis debetur, eaque occasione de variis acquirendi modis, variisque titulis disseruerimus: proximum est, ut iam tertiam quoque belli causam expendamus, quam præter Grotium, vix quicquam doctorum iuris naturae admittit. Nobis iam agendum

1 de natura poenarum, §. 1-17.

Ccc 2

2. 478

2. *an omnes actiones vitiosae puniendae*, §. 18-27.

3. *quomodo poenae aestimandae*, §. 28-37.

4. *de bello in poenam indiclo*, §. 38. *ad fin.*

1. Naturam poenarum primo sistit definitio, ex qua deinde variae quaestiones soluentur. Grotius poena est *malum passionis*, quod infligitur ob *malum actionis*. Sed si haec definitio admittatur, nihil discriminis erit inter poenam et vindictam priuatam. Sane et haec est malum passionis, quod infligitur ob malum actionis. Et tamen inter hanc et illam multum interest. Nam poena est licita, vindicta priuata prohibita: qui illam non infligit, iniustus aliquando est, qui hanc repetit, semper iniustus, et poena dignus est.

Quare si definitioni Grotii addideris verba, *a superiore*; tunc illa recte se habebit omnino. Dicimus esse

1. *malum passionis*. Atqui aliquando poenae loco iniungitur actio, e. g. operae publicae, onus remos ducendi. Resp. tunc eae actiones non sunt poena, sed passio illa vel molestia, quam inde reus sentit.

2. *Malum, quod infligitur ob malum actionis*. Ergo ubi quis malum sentit sine praecurso reatu: id poenae nomen haud meretur. Huc pertinent, qui ob mutilationem a sacerdotio arcebantur.

3. *Malum infligendum a superiore*. Alias enim, ut diximus; esset vindicta priuata. Posset obici, Deum tamen unicuique Iudaeo permisisse, ut supplicium sumere posset ab idololatra: et hodie priuatis licere occidere fures nocturnos, adgressores, latrones, cet. Sed resp. 1. ius puniendi superior demandare potest priuato, e. g. apud nos carnifici: potuit ergo Deus etiam priuatis mandare exsequutionem poenae idololatriae irrogatae: inde vero non sequitur, ut par in parem habeat ius puniendi, etiam sine speciali hac superioris permissione. 2. Caedes furis, adgressoris, latronis proprie non est poena, (nam ea licita est, etiam si e. g. adgressor furiosus sit, vel in persona erret,) sed defensio.

num. 2. Ex hac ergo definitione fluit, poenam iure optimo infligi. Nam 1. malum passionis pro malo actionis inflictum nihil aliud est, quam ius talionis. Quid iustus est, ut qui malum fecit, malum ferat?

2. Infligitur a superiore, cuius est omnem injuriam cohibere a

re a subditis. Id fieri sine poena non posset. Si ergo iustum est, magistratus iniuriae arcendae causa insitui : iustissimum quoque omnino erit, eos punire noxios. Si enim finis iustus est, iusta quoque erunt media, sine quibus finis obtineri nequit.

Obiici porro definitioni posset, Deum tamen aliquando punire sine praeuia culpa. Castigat etiam pios, immo hos saepe magis vexat poena, quam impios. Ergo aut iniuste tunc Deus agit, aut falsum est, poenam esse malum passionis, cet. Sed resp. 1. falsum esse, quod vnumquam Deus puniat sine culpa. Quis enim tam pius est, ut sine peccato sit ? 2. culpam aliquando latere, sed eam non minus poena dignam, ac manifestam. 3. Differre castigationem et poenam. Nam illa et innocentibus irrogatur. ut cautius mercari discant : haec non nisi noxiis. E. g. furiosus, qui damnum dedit, reuera non peccauit. Et tamen castigari potest, ne in posterum simile damnum det, at puniri nequit. Ita et Deus pios castigat, ut emendet, non punit, ut perdat.

§. 2.

Quaeritur primo, *utrum ad iustitiam expletricem, an ad attributricem pertineat poena ?* Iustitia expletrix tribuit, quod iure perfecto debetur : attributrix, quod imperfecto, ex regulis honesti et decori. Vnde ergo poena nascitur ?

Plerique eam referunt ad iustitiam attributricem ex duplici ratione, 1. quia in poenis observetur proportio geometrica, id est, qui vnum delictum commiserunt, non eadem omnes poena adficiuntur, sed maiore alii, alii minore, pro ratione meriti. Iam vero Aristoteles iustitiam distributivam vel attributricem vocat, ubi observatur proportio geometrica. 2. Quod poena a tota parti detur. Id recte intelligendum. Thomas de Aquino et alii Aristotelici dicunt, inter iustitiam attributricem et expletricem hanc esse differentiam, quod in expletrice privatus agat cum privato : in attributrice res publica cum privato. Ergo poenas pertinere putant ad attributricem : contractus ad expletricem.

Sed resp. Grotius 1. falsum esse, proportionem hanc esse geometricam, 2. falsum, eam in sola locum habere iustitia attributrice. Quotiescumque enim ad rem, non ad personam re-

spicitur, toties haec proportio est arithmetica. Sic e. g. minus soluo mercatori pro panno viliori, plus pro subtiliore: quis dixerit, hanc esse proportionem geometricam, quum non ad personam mercatoris, sed ad rem vel mercedem respiciam? Huius modi proportio etiam a iustitia expletrice obseruatur.

NUM. 1. Ad 2. falsum esse, quod iustitia attributrix detur a toto parti, in eaque rei publicae res sit cum priuato. Idem enim etiam in expletrice contingere potest. E. g. res publica potest cum priuatis, publicanis contrahere. Hic res est toti cum parte, et tamen contractus pertinent ad iustitiam expletricem. Praeterea falsum quoque est, in poenis semper rem esse toti cum parte, rei publicae cum priuatis. Nam et priuatus a priuato iure poenam repetit, modo sit superior. Sic e. g. pater punit filium; paedagogus discipulum, dominus seruum.

NUM. 3. 4. Quid ergo ad quaestionem ipsam respondendum? Distinguendum esse inter punientem, et eum, qui poenam sustinet. Quod ad posteriorem attinet, ille obligatus est ad poenam iure perfecto, adeoque ex iustitia expletrice, 1. quia iam superiore paragrapho diximus, iustissimam esse talionem, vt malum sentiat, qui malum fecit; 2. quia ipse reus peccando in poenam tacite consensit. Scit enim reus legem actum prohibere, scit eandem hoc vel illud supplicium minari. Dum ergo nihilominus peccat, tacite consensit in hanc poenam, adeoque iustissime et iure perfecto ex consensu suo tenetur.

At puniens ad infligendam poenam obstrictus est ex iustitia attributrice. Ergo non iniustus est, si poenam remittit, sed mitior aequo. Immo possunt esse iustissimae causae poenam vel remittendi, vel minuendi, vel intendendi prout personae vel aliae circumstantiae id exigunt. Haec nisi adcurate obseruentur, facile in varios errores quis incidere posset.

§. 3.

NUM. 1. Iam quaeritur secundo, *quis habeat ius puniendi*? Resp. auctor, hoc subiectum puniens a iure naturae non determinari. Naturae quidem convenientissimum esse, vt fiat a superiore, sed tamen id non esse absolute necessarium.

Sed hic maxime errat Grotius. Nam 1. si naturae conueniens est, superiorem sumere supplicium, qui fieri potest, vt ius naturae non determinet, cuius ius puniendi sit? Ius naturae sane

ne inculcat id, quod naturae est conueniens. 2. Certissimum est, neminem punire nisi superiorem. Nam qui poenas restituere et sancire potest, ei et ius est illas infligendi. Atqui prius potest solus superior. Ergo et posterius.

Vnde facile patet, quid sentiendum de obseruatione Grotii, ^{nam. 1;} quod nocens non possit punire nocentem. Haec doctrina plane nullius momenti est. Fingamus rem publicam, cuius rector omnibus vitiis coopertus et contaminatus est: in ea sane re publica tunc nullum vitium, nullum delictum poterit puniri.

Ergo distinguendum inter iustum et honestum. Ex regula iusti ius puniendi habet superior, siue virtute, siue vitis sit conspicuus. Et hinc adulter conqueri non potest de facta sibi per poenam iniuria, si vel maxime princeps vel iudex eiusdem delicti suspectus sit.

Si autem quaeritur, an honestum sit, eum, qui punit, propria culpa redargui: omnino id adfirmandum. Non ergo peccat vitiosus magistratus, quod punit; sed peccat, dum ipse similia committit. Et ita intelligenda verba Seruatoris et Pauli apostoli a Grotio allegata.

§. 4.

Tertia quaestio est, *quis sit finis poenarum?* Haec doctrina ideo necessaria est, quia ex fine deinde fluunt officia circa poenas obseruanda. Hic primum spurii fines remouendi. Poenae ergo finis non est

1. Satisfactio iustitiae diuinae debita. Quod facile potest demonstrari. Nam 1. iustitia Dei est infinita, adeoque per poenam finitam illi satis fieri nequit.

2. Si hic esset poenarum finis, iniustum esset, vllam poenam remittere. Atqui omnes fatentur, aliquando clementiae laudem mereri, qui poenas remittunt. Immo aliquando peccarent imperantes, si mala quaedam poenis persequerentur, e. g. haeresin, vitia interna, ambitionem, auaritiam, cet.

Obiici posset, at Deum tamen poenas infligere, vt satis faciat iustitiae suae. Resp. distinguendum inter poenas temporales et aeternas. Temporales Deus non eo fine infligit improbis, vt satis faciat iustitiae suae, (sic enim poenae non possent esse temporales, sed potius aeternae esse deberent et infinitae,) sed vt emendet homines. At aeternarum poenarum omnino is finis

finis est, vt satis fiat iustitiae suae, quod prolixè probat Grotius.

At inde non sequitur, vt idem finis sit poenarum humanarum. Potius argumentamur :

Solae poenae aeternae infinitae satis faciunt iustitiae diuinæ.

Homines non infligunt poenas aeternas.

Ergo nec poenae humanae satis faciunt iustitiae diuinæ, adeoque nec is finis esse potest poenarum humanarum.

num. 3. Spurius quoque finis est II. sola vltio. Nam 1. omnia officia summi imperantis debent respicere salutem rei publicae, ad quam vero nihil facit vltio. 2. Inhumanum est, solo delinquentis dolore pascere velle animum.

Et hinc eleganter SENECA, lib. I. de ira, cap. 12. exsequar, quia oportet, non quia dolet, et lib. II. cap. 32. ad vindictam veniendum, non quasi dulce sit vindicare, sed quasi utile.

§. 5.

num. 1. In hac paragrapho vterius illustrat Grotius, et inprimis obiectionem remouet. Nimirum veteres philosophi fere consentiunt, 1. nihil esse vindicta suauius, 2. eam voluptatem oriri ex principio homini cum bestiis communi, adeoque non malam vel iniustam esse posse. Varia veterum loca eo pertinentia colligit Grotius, tum hoc n. 1. tum in notis.

Sed facile resp. 1. non omne, quod homini suauis et iucundum est, ideo quoque bonum est et iustum. 2. Nec quod ex principio homini cum bestiis communi nascitur, laudandum. Nam sic et scortatio, adulterium, aliaque huius generis delicta carnis possent excusari. 3. Potius recta ratio docet, mentem debere adfectibus dominari, inhumanumque esse, indulgere vindictae. 4. Hanc voluptatem rationi etiam ideo aduersari, quia saepe fertur in res inanimatas, bestias, homines innocentes.

num. 2. Addit Grotius 5. hanc vindictae cupiditatem non modo Christianos, sed et paganos doctores paullo cordatiores improbare: PAVLLVS: ne vlciscimini vos ipsi, carissimi, sed locum date irae Dei. CHRISTVS: diligite inimicos vestros, benedicite maledicentibus vobis, benefacite odio prosequentibus vos, precamini pro vos laedentibus. Similia ex Seneca, Maximo Tyrio, Plutarcho colligit Grotius. Ergo si quidam philosophi suauitatem vindictae laudarunt, iis facile opponi possunt contraria meliorum suffragia.

6. Cupi-

6. Cupiditas vindictae est iudicium animi exigui, et a ratione parum instructi. Nam a) eius modi homo adhuc adfectibus suis indulget b), maxime in eo praedominatur temperamentum melancholico-sanguineum, quae mixtura plerumque stultos facit homines. num. 3;

Hinc videmus, plebem vindictae cupidiores esse, quam viros politicos, immo et principes bene instructos, quorum plerumque symbolum est: *qui nescit dissimulare, nescit imperare*. Consideretur locus elegantissimus Iuvenalis.

Quis vero dixerit, ex voluptate non prudentissimorum hominum, sed stultorum iudicandum esse, quid naturam humanam deceat?

Vnde ex his rationibus recte colligit Grotius, finem spuriarum poenarum esse ultionem. num. 4;

§. 6.

Videbimus iam de fine genuino poenarum. Obseruat Grotius, Platonem in *Gorgia* et Taurum philosophum duas statuisse poenarum species, alias enim infligi videri *emendationis causa*, ut si furtum primum ictu fustium vindicatur; hac enim castigatione fur non perimitur, sed admonetur, ut in posterum cautius mercari discat, vnde et haec poena eleganter in *l. 7. D. de poen.* vocatur *fustium admonitio*: alias *exempli causa*, e. g. si fur laqueo suffocatur, tunc enim fur non emendatur, sed perimitur; aliis tamen exemplo est, ne simile delictum admittant. num. 1;

Addit Taurus tertiam speciem, nempe poenam, quae *πινελίας* vel *satisfactionis causa* infligitur, e. g. si is, qui alteri iniuriam verbalem intulit, damnatur ad palinodiam, ut omnem iniuriam recantet, et se mentitum esse publice fateatur.

Vnde colligit Grotius triplicem esse poenarum finem: *restitutionem* num. 2. vel *emendationem*, *πινελίας* vel *satisfactionem*, et *κόλασιν*, seu *exemplum*, vel, quod perinde est, in poenis respici vel ad utilitatem peccantis, aut ad utilitatem laesi, aut ad utilitatem ipsius rei publicae.

§. 7.

Primus ergo et praecipuus poenarum finis est *emendatio*. Nul- num. 1.
lum est enim medium emendandi homines improbos certius et
Heineccii Prael. Grot. D d d effica;

efficacius, quam poena. Id eleganter probat Grotius.

Omnis peccandi consuetudo frequentibus actibus peccandi contrahitur : frequentia ista actuum id operatur, ut peccatum dominetur voluntati, et mens ex peccato voluptatem percipiat. Ea voluptas vero non potest in mente extinguere, nisi contrario dolore, cuius memoria ita adficiat animum, ut quis malit voluptate carere quam denuo istum dolorem subire. Dolor iste infligitur per poenam. Ergo poena est medium emendandi.

Sed distinguendum tamen inter emendationem moralem et civilem. Illa ipsam mentem sanat, haec tantum actus praeuos externos impedit. Illa ex poenis non speranda, haec expectanda omnino.

- num. 2. Quum ergo hic finis tam bonus et praeclarus sit, quaeritur, *quis huius modi poenas possit irrogare?* Et respondet, vnumquemque id posse, modo paribus vitiis non teneatur. Sed id falsum esse, ipse paullo post agnoscit. Addit enim, castigationem quidem verbalem ab vnoquoque fieri posse, non autem verbera vel alia remedia corporis adstrictiva infligi, nisi ab iis, quibus leges concedunt hanc facultatem castigandi.

Enimvero ita denuo prodit errorem Grotius, quod puniendi ius vnicuique concedit. 1. Si id verum esset, liceret etiam vnicuique peccantem verberibus, aliisque modis coercere. 2. Si hoc iis conceditur tantum, quibus legibus id ius tribuunt, ius puniendi competit superioribus dumtaxat, ut parentibus, praecceptoribus, magistratibus. Accedit 3. quod verbalis castigatio proprie non est poena, quia non est malum passionis cum dolore coniunctum, sed dehortatio amica cum multa benevolentiae testificatione coniuncta.

- num. 3. Quaerit autem Grotius, *an poena virtutis ad emendationem comparata etiam ad mortem porrigi possit?* Id recte negat. Nam qui destruitur, et perimitur, is non emendatur; quia mortuo nulla est occasio malefacta virtutibus emendandi.

Eatenus tamen potest dici emendari damnatus ad mortem; quia satius habetur hominem inemendabilem non vivere, quam vivum novis quotidie sceleribus se pollueri. Sic Christus ipse dixit, melius quibusdam esse, si numquam fuissent nati. *Marc. 14. 21.*

- num. 4. Quamvis vero haec recte se habeant: id tamen intelligendum tantum est de hominibus inemendabilibus, de quibus lo-

ANNES

ANNES 1. *Epist. 5, 16.* dicit, *eos ad mortem peccare, et ne orandam quidem pro iis esse.* Quum vero caritas Christiana vix patiat de cuiusquam hominis emendatione desperare: hinc omnino rarissime hanc obseruationem locum habere ipse Grotius agnoscit.

§. 8.

Alter finis poenarum est *satisfactio*, vel utilitas eius, qui laesus est a peccante. Sed id recte intelligendum. Non enim ea satisfactio consistere debet in voluptate, ex peccantis dolore percepta, (hanc enim voluptatem inhumanam esse, iam supra demonstrauimus): sed in securitate, ut inde certus esse possit laesus, sibi non eadem in posterum imminere. Id fit tripliciter:

1. Si tollatur, qui deliquit, vel supplicio extremo, vel damnatus ad vincula perpetua, vel in exilium eiectus.

2. Si vires nocendi ei auferantur. E. g. si quis diuitiis fretus, alios iniuriis laceffuit, et a magistratu multa grauiore ad egestatem redigitur. Pertinet huc exemplum Lutatii Veratii apud GELL, *Noël. Attic. lib. XX. cap. 1.*

3. Si malo suo dedoceatur delinquere. E. g. minister ecclesiae crebris obiurgationibus debacchabatur in magistratum. Admonitus respondebat, id sui officii esse, nec villo periculo se deterreri ab illo exsequendo. Magistratus ipsi transmisit rescriptum, si in posterum vel mentionem faceret magistratus obiurgandi causa, se ei centum florenos de salario detracturum. Id quum semel et iterum fieret, statim coepit cautius mercari. Malo enim suo dedocebatur delinquere.

Iste poenarum finis itidem Grotio tam bonus videtur, ut ab vnoquoque privato huius modi poena infligi possit. Vnde probat,

1. *Id in statu naturali rectae rationi haud repugnare. n. 2. 3.*

2. *Idem in statu ciuili esse abrogatum. n. 4.*

3. *Vestigia tamen quaedam iuris antiqui etiamnum superesse. n. 5. 6.*

1. Primam thesin Grotius demonstrat 1. hoc argumento, quod vnicuique liceat iure naturae omnem vim et iniuriam a se propulsare, adeoque et vindictam vel ultionem eo nomine sumere ab aduersario. Id quod testimoniis Ciceronis et Mitlridatis apud Iustinum illustratur. Deinde idem probat suo more

D d d 2

2. Ex

quæ. 3. 2. Ex consensu gentium. Apud Ebraeos Simfon ultionem spirabat aduersus Philistæos, quia sibi fecerant iniuriam. Apud Græcos Plataenses et Demosthenes profitentur, ius hoc esse commune, ut liceat vlcisci hostilia parantem. Ita et Carthaginenses, ita et Germani veteres ratiocinati sunt. Adeoque non dubitandum, quin ultio vel poena satis factionis causa inflicta sit iuris gentium.

Sed multa hic animaduersionem merentur. Nam 1. ultio non est poena, sed medium vel cogendi alterum ad pacem, vel illum viribus exuendi, ne nobis nocere possit. Hinc facile fatemur, in statu naturali ob quamcumque læsionem bellum suscipi posse, idque tamdiu continuari posse, donec alter vel damnum refarciuerit, vel ad incitas reductus sit: verum quis dixerit, gentem tunc a gente puniri, nisi improprie loqui velimus? 2. Exemplum Simfonis nihil ad rem facit. Hic enim non vivebat in statu naturali, sed in statu ciuili, eiusque bella aduersus Philistæos defendi non possent, nisi speciali Dei iussu et ductu Spiritus S. illa suscepisset. Ergo fatemur quidem in statu naturali vnumquemque alterum hostilia parantem vlcisci posse, sed negamus hanc esse poenam, quæ semper conceptum superiori-tatis inuoluit.

num. 4. II. Illud vero rectius obseruat Grotius, ius hoc vlciscendi priuatis in statu ciuili fuisse ademptum. Nam 1. in statu naturali ideo ultio conceditur, quia defunt iudices, quorum auxilio homines vtantur. Atqui hi non defunt in statu ciuili. 2. Quia sic numquam tranquilla futura esset res publica, sed vere bellum omnium in omnes nasceretur, si manu rem gerere possint priuati. Et hinc videmus ultionem priuatam omnem prohiberi, adeoque multo minus parem a pari poenis addici posse in statu ciuili. Ergo et hic semper poena infligenda a superiore.

num. 5. III. Ostendit Grotius, quasdam esse exceptiones, id est, casibus nonnullis et priuatos ultionem et poenam sumere posse,

1. In locis, vbi iudicia sunt nulla, ut in mari. Hic vnusquisque potest aduersus piratas non modo se defendere, sed etiam iniurias vlcisci, eos vita et rebus spoliare. Sic Iulius Caesar adhuc priuatus piratas cruci suffixit.

2. In extremo periculo, e. g. si me hostis in via publica gladio adgrediatur, meque in extremo periculo videam constitutum.

3. Quæ-

3. Quaedam leges adhuc plus indulgent. Sic apud Moschos *num. 6.* unusquisque vltor sibi est, modo prius iudicem adierit. Apud Germanicae originis gentes plerumque conrouersiae singulari certamine suuebantur. Veteres Hebraei permittebant proximo occisi agnato, vt posset occidere homicidam vbicumque reperi- tum, modo ne in asylo quodam habitaret. Simile quid apud veteres Graecos fuisse receptum, et Grotius hic probat, et mul- to prolixius FEYTHVS in *Antiquitatibus Homericiis*.

Sed quamuis haec omnia vera sint, tamen 1. et sic proprie non poena infligitur, sed vindicta sumitur, quas differre iam antea demonstrauius. 2. Haec omnia fiunt per modum belli, non per modum iudicii, quo poenae infligi solent. Hinc quam- uis priuato nautae liceat piratas vlcisci, nescio tamen, an poe- nam effugeret, si captos latrones vellet ad mortem condemnare, et supplicio priuatim adficere, nisi id summi imperantes expresse permittant. Vide Caesaris factum non ab omnibus probatur. Debuisset enim captos offerre magistratui.

§. 9-12.

Tertius finis est *utilitas communis rei publicae, vel exemplum. num. 1.* Ideo enim saepe infliguntur suprema supplicia, 1. vt reliqui sub- diti aequae, ac peregrini, videant, non impune in re publica nostra delinqui, 2. vt alii diro isto poenarum genere deterriti, sibi a simili infortunio caueant. Semper enim plebs magis sensu quam rationibus flectitur, et magis attendit huius modi tragoe- diis admonita, quam si mille leges ferrentur. Et hinc facile red- ditur ratio, 1. cur non intra carcères, sed publice in omnium conspectu supplicium sumatur, 2. cur corpora damnatorum in patibulis, rotis, et furcis publico conspectui exponantur, quod supra probare non videbatur Grotius.

Has quoque poenas infligendi ius omnibus commune esse, *num. 2. 3-* adfirmare non dubitat auctor in statu naturali, idque probat va- riis argumentis, 1. quia ex sententia Tullii, Horatii, et Euripi- dis sapiens nemo priuatus sit, sed semper magistratum veluti gerat, 2. quia iure naturae fas sit, id quod noxium est, tollere. Sic licet occidere serpentes, leones, aliasque feras, quidni e- tiam homines improbos, a quibus nemo securior est, quam a serpentibus et leonibus.

Sed fateamur quidem posse in statu naturali homines noxios.

D d d 3

de

de medio tolli per modum belli siue offensui, siue defensiui, non autem per modum poenae, quia in statu naturali nulla est superioritas. Rationes Grotii parum ad rem faciunt. Nam 1. sententia Ciceronis, Horatii, Euripidis, Stoica est. Illi dicere solebant, solum sapientem esse regem, principem, magistratum, dominum, subditum, seruum et omnia, non actu scilicet, sed potentia, quia in his omnibus sapienter personam suam repraesentet. 2. Iure naturae fas est occidere noxia tamquam hostes, non tamquam peccantes, qui soli poenam merentur. Sic serpentes, ferae bestiae, furiosi non peccant, et tamen eos, si aliter periculum euadere non licet, recte occidimus etiamnum.

num. 4. Concedit tamen et hic auctor hoc ius hodie priuatis in statu ciuili fuisse ademptum, 1. quia poena inquisitionem requirat, ad quam non omnes vel prudentia vel aequitate sufficiente instructi sunt, 2. quia aestimatio poenae magnam prudentiam et aequitatem requirat, quam non vnusquisque praestabit. Addo 3. quia nulla est poena sine lege, nulla lex sine legislatore, nullus legislator, nisi qui superior, ergo et poena non potest exempli causa, nisi a superiore infligi.

num. 5. 6. Denique vestigia quaedam huius iuris etiamnum superesse docet. A. 1. in locis vbi iudicum auxilium non est sperandum. De quo casu iam supra dictum. 2. In quibusdam in delicto deprehensis, e. g. iure Hebraeo licebat priuato occidere idololatram Iudaeum: iure Romano maritus recte occidebat adulterum domi suae in delicto deprehensum. Resp. haec vltio permittitur a lege, adeoque reuera a superiore per priuatas personas infligitur. 3. In castigatione domestica liberorum et seruorum, quae saepe vsque ad necem apud quasdam gentes pertinebat. Resp. Ergo tunc poenae infliguntur a superioribus, et permissu superiorum. Vnde et parentibus dominisque non fit iniuria, si eorum ius restringatur ad modicam coercionem, ceu hodie vbique gentium fieri animaduertimus.

§. 10.

num. 1. Persuasit sibi haecenus Grotius, poenas posse ab vnoquoque infligi iure naturae etiam a priuato. Quam parum id probarit, ad singula eius argumenta vidimus: iam vero porro quaerit: an lex euangelica priuatis et paribus indulget ius puniendi?

Et

Et primo quidem recte adfirmat, poenas a parentibus dominisque inlicitis, modo intra aequitatem subsistant non repugnare euangelio. Sed huius rei ratio facile ex ipsa definitione nostra petitur. Parentes enim et domini ratione liberorum et seruorum sunt superiores, et tales quidem, quibus directio familiae legibus permittitur. Ergo euangelium is ius puniendi non magis adimere potuit quam magistratibus.

At ultionem inter pares Euangelio prohiberi, ipse concedit ^{num. 1. 3. 4.} Grotius. Idque demonstrat 1. a minore ad maius argumentando, quia ne quidem Lex Mosaica ultionem probet *Leuit. 19. 17. Exod. 23. 4. 5.* 2. dictis Christi, *Matth. 5. 44. sequi ubi tamen fallitur Grotius*, quod ex praecepto Christi ne iudicem quidem salua conscientia adiri posse existimat, quamuis eandem sententiam foueat TERTULLIANVS *lib. III. adu. Marcionem*, cuius verba prolixè recensentur. Nam 1. Christus non tollit positam, 2. ita consistere non posset res publica, si impune improbi possent probos vexare. Vexarent autem impune, si his non liceret adire iudicem, 3. Ipsum euangelium iudicium officium probat. *vid. Rom. 13.* At id frustraneum esset, si haud liceret is auxilium implorare.

Ceterum ex hoc testimonio Tertulliani colligit Grotius ^{num. 5.} 1. Christianis ultionem non fuisse permissam, 2. ne Hebraeis quidem semper fuisse permissam. Nam ultionem putat esse duplicem, aliam sumi ex odio erga peccantem, aliam tantum in futurum cauere.

Priorem Hebraeis fuisse prohibitam probat 1. ex *Leuit. 19. 17. Non adseruabis odium aduersus proximum.* 2. Ex testimonio Philonis, qui in legatione ad Caesarem, quum Iudaei ab Alexandrinis gravissimis essent vexati persecutionibus imperatorem ita adloquebatur: Non delectamur, o Domine, ultione de inimico, nam ex sacris legibus didicimus hominum misereri. 3. A minore ad maius, quia ipsi gentiles huius vindictae inhumanitatem agnoscebant. Elegans locus Claudiani huc pertinens extat apud Claudianum.

Immo et ultio, quae in futurum cauet, Christianis fuit ^{num. 6. 7.} prohibita, Hebraeis autem, ut supra diximus, permissa. De Christianis res clara est ex *Luc. 17. 3.* ubi iubemur aduersarios remittere delicta.

De Hebraeis contra aliud patet 1. ex lege talionis, oculus ^{pro}

pro oculo cet. quam tamen Grotius in usu fuisse dubitat. 2. Ex multa privato laeso applicanda, quae aeque apud Ebraeos ac alias gentes erat recepta. 3. Ex diuortio permisso, ob quodcumque fere delictum saltem grauius.

num. 8. At quamvis ultionem omnem tam seuerè inhibuerit euangelium: aliud tamen de poenis demum concedit Grotius, has enim, prout a magistratu infliguntur, ne Christum quidem sustulisse fatetur. Nam 1. quid clarius est verbis Apostoli: *Magistratus gladium non frustra gerit. Est enim Dei minister, vindex ad puniendum maleficos.* 2. Christus nusquam tollit leges politicas.

Sed quum haec verissima sint, recte inde colligas, magnum esse discrimen inter poenam et ultionem, quas Grotius semper confudit. Illam enim Christus concessit, hanc prohibuit, illa nihil inhumani continet, haec inhumana et crudelis est, cet.

§. 11.

num. 1. Iam obiectiones remouet Grotius. Sunt enim qui ne poenas quidem permitti in Euangelio existimant, idque inde probant.

1. Quia Dei exemplum sequendum sit etiam magistratibus. Atqui Deus multis ignoscit peccantibus. Solem suum oriri patitur super iustis et iniustis, pluit super pios et impios. *Matth. 5.*

Respondet Grotius, misericordiam Dei tantum spectare ad peccata contra primaeuam legem aut contra legem Moysis admissa ante notitiam Euangelii, non ad ea quae postea committuntur. Quae sane doctrina plane singularis est.

Nos potius ita respondemus 1. Deum tamen non semper ignoscere, E. et magistratum non semper ignoscere debere, 2. Deum ignoscere illis, quos praecuidet ad frugem redituros, id vero tam facile discernere nequeunt magistratus et iudices, quippe non omniscii.

num. 2. Obiciunt 3. Deum veniam indulgere poenitentibus. Ergo et magistratus esse id facere. Resp. 1. Deus scit, qui veram agant poenitentiam: id ignorant homines. 2. Deus quidem poenitentibus certo remittit poenam sempiternam, sed non semper temporalem, ceu exemplo Dauidis patet. Ergo et magistratus potest poenitentes punire.

§. 12.

§. 12.

Obiiciunt 3. saltem supplicia capitalia ita excusari non posse, ^{num. 1.} quia spatium poenitentiae praecidatur. Sed resp. Id non praecidi a piis magistratibus, 1. quia non festinant supplicium irrogando, sed spatium indulgent, ministros ecclesiae ad reum mittunt, cet. 2. quia saepe magis serio agunt poenitentiam, qui iam mortem sibi minere vident, quam quibus spes est vitae longioris, 3. quia si perseuerat in contumacia reus, id sibi imputare debet, nec magis eius rei culpa potest tribui magistratui, quam Deo, quum ne Dei quidem verbum omnes conuertat.

Obiici 4. posset, poenis et suppliciis opus fuisse inter gentiles, non inter Christianos, quos magis pios esse deceat. Sed resp. Decet quidem Christianos pietas, sed inde non sequitur, vt omnes sint pii. Contrarium docet experientia. Ergo aequè opus est poenis, vt tranquilla sit res publica. ^{num. 2.}

Postremo tamen Grotius commendat magistratibus Christianis exemplum Sabaeonis, regis Aegyptiorum, qui supplicia capitalia in operas publicas mutauerit. ^{num. 3.}

Et omnino quidem laudabilis est clementia: sed non numquam clementia sit crudelitas, si ita parcat gladio imperans, vt inde occasionem arripiant homines delinquendi. Sane si fures sciant, imperantem non laqueo punire, sed ad operas publicas condemnare fures, actum erit de eius subditis. Fures enim omnes spe vitae saltem seruandae in eius prouincia quaestum facient. Exemplum vidimus in Germania in Episcopo Würzburgensi, qui religionis causa omnes fures fustigatione tantum et operis publicis plectebat.

§. 13.

Quaestio quae iam sequitur facilis est: *An cessante vno ex finibus paullo ante explicatis, ipsa poena cesset?* ^{num. 1. 2.}

Affirmat TAVRVS philosophus apud Gellium: sed rectius negat Grotius. Requiritur enim, vt omnes fines cessent. Ergo si vel maxime per poenam non emendetur reus, si exemplum in eo statui nequeat, quod aliis admonitionis loco sit: sufficit tamen, si tertius finis supersit, nempe satisfactio, id est, ne simile quid in posterum possit committere.

In vita Friderici Wilhelmi Electoris apud Pufendorffium
Heineccii Prael. Gros. E e e legi-

legimus equitem quendam Prussum electori infensum ad Polonos se contulisse, et tot calumnias inter Polonos de electore tunc adhuc Polonorum vasallo sparsisse, ut et bellum conflagri inde facile potuisset. Elector dabat negotium legato suo Warsouiae viventi, ut hominem clam interceptum Regiomontum mitteret. Is illum domum sub spe reconciliationis pellexit, et plaustro tecto impositum noctu abduci iussit. Homo postea latuit, existimaruntque plures eum gladio clam percussum. Fingamus id factum. Hic nec emendationis causa sumtum supplicium, nec exempli causa, (quia nemo vidit) an ideo iniuste sumtum est? Neg. Reliquis enim erat tertius finis, nempe satisfactio, vel cautio, ne inposterum simile quid committeret.

§. 14.

Iam sequuntur aliquot consilia conscientiae suppeditata a Grotio.

Primum, non tutum esse homini Christiano privato poenam de improbo sumere, siue suae siue publicae utilitatis causa. Rationem supra dedit, quia omnis ultio prohibita a Christo in Evangelio.

Ex quo porro colligit, laudandos esse populos, qui navigantes mandato instruunt persequendi piratas, sic enim fieri, ut eos non publice sed privatim persequantur.

Nos autem iam demonstravimus, non solum minus tutum, sed et plane illicitum, et iuri naturae contrarium esse, privatim ponere quemquam, nisi quis sit superior: non enim hanc esse poenam, sed ultionem.

§. 15.

Secundum, non tutum esse homini Christiano accusare quemquam capitis, et hinc laudandos populos, qui accusatorem publicum, id est, procuratorem generalem constituunt. Ratio Grotii est, 1. ne quis aliquid faciat ad alienum sanguinem fundendum, nisi publico nomine. 2. Quia concilium Eliberinum accusationes et delationes prohibuit.

Sed in eo minus religiosus videtur Grotius. Nam 1. sanguinem humanum fundere in se non iniustum est, sed sanguinem humanum fundere iniuste. Alias nec Procurator generalis salua conscientia posset quidquam facere ad sanguinem fundendum. 2.

Non

Non sequitur, quia poenam priuatus infligere non potest, E. nec accusare potest. Poena enim requirit causae cognitionem, quae non est priuati paris, sed superioris. Accusatio autem integram causae cognitionem relinquit iudici, nec cuiquam nocet, nisi crimen verum esse probetur. 3. Aut ergo accusare in se malum et iniustum est, aut non est. Si prius, nec procurator accusare poterit. Sin posterius, et priuatus salua conscientia accusabit. Hinc 4. nec in Hebraeorum re publica diuinitus instituta accusationes priuatae exulabant, ceu iam ab aliis ostensum est. 5. Concilia non sunt norma fidei et morum, et multa continent, a sanæ rationis principiis aliena. Qua de re diximus ad Prooem. §. 51.

§. 16.

Non tutum esse, ambire munera publica, quae ad sanguinem fundendum comparata sunt. Nimirum 1. quia Grotius existimat, sanguinem humanum fundere periculosum esse, 2. quia Christus *Matth. 7. 1.* minatur eodem modo Deum iudicaturum de nobis, quo nos iudicemus de aliis.

Sed, 1. si periculosum est, sanguinem humanum fundere, non sequitur, vt nemo huius modi munus ambire debeat, sed vt cauti esse debeant iudices de causa cognoscenda. 2. Sic et comminatio Christi nobis debet incitamento esse, ne iniuste iudicemus, non autem vt abhorreamus a munere iudicis. 3. Aut in se malum est, de capite iudicare aut non est. Si prius, nec iussu rei publicae quis de capite iudicare poterit: sin posterius, etiam ambire quis poterit munus huius modi, si se illi videat idoneum.

§. 17.

Quaerit demum Grotius: *utrum leges, quae priuatis faciunt facultatem interficiendi, vere interficientem excusent, an tantum tribuant impunitatem in foro humano?* num. 1. Exempla varia sunt, e. g. occidere licet furem nocturnum, marito adulterum domi suae deprehensum, patri adulterum cum filia vel in generi vel in suis aedibus deprehensum.

Distinguit Grotius, utrum lex huius modi quid indulgeat ob solum dolorem, vel ultionis causa, an ob periculum imminens. Si prius: tunc posse omnino dici impunitatem tantum dare legem, non autem ideo excusabilem esse hominem in foro conscientiae.

n. 1. 2. 3.

Sin autem ob periculum imminens id fiat, omnino et in diuino et in humano foro esse excusabilem, qui iure sibi concessio vlus sit. Id quod etiam de bannitis dicendum. E. g. In Germania imperator status immorigeros declarat in bannum imperii, (*in die Acht ende Oper-Acht*) eius formula est: *vita, corpus et fortuna eius unicuique pateant*. Hic si quis bannitum occiderit, omnino et in foro conscientiae et inter homines excusatus est.

Et ita recte sentit Grotius: Nam 1. iam supra diximus euangelium non probare ultionem. Hinc quamuis illa indulgeat lex, non plus tamen potest illa promittere, quam impunitatem.

2. Et ius naturae et euangelium concedit, vt aduersus hostes et pericula nos defendamus, quia vtrumque iubet vt nos amemus aequae ac proximum. Ergo omnino excusatur, qui fu-rem, aggressorem, hostem, malit occidere, quam ab eo occidi.

3. Banniti sunt condemnati causa cognita. Eos salua conscientia occideret carnifex iussu imperantis, E. et idem imperans ciuibus promiscue indulgere potest ius occidendi bannitos.

§. 18.

Hactenus prima pars capituli, *de poenarum natura*. Iam sequitur altera: *an omnes et quoniam actus vitiosi puniendi sint in re publica?*

Hic recte negat Grotius, omnia delicta in statu ciuili esse poenae obnoxia. Poena enim non infligitur, vt satisfiat iustitiae diuinae. Nam ipse satisfactionem exiget Deus futuro die iudicii, sed emendationis, satisfactionis privatae et exempli causa. At non omnes actus vitiosi turbant rem publicam vel saluti publicae repugnant. Ergo nec omnes puniendi.

Inde ergo sequitur, vt poena exempti sint I. actus mere interni, si in externos non erumpant, e. g. ambitio, odium, ira, inuidia. Nam 1. interna soli Deo cognita, 2. ea nihil pertinent ad rem publicam quae salua est, modo improbitas non in actum erumpat.

Notanda tamen limitatio, quodsi semel internum vitium in actum externum erupit, tunc et motus vel actus internus in aestimationem veniat, e. g. si quis occidit dolo, magis punitur, quam si homicidium sit culposum.

§. 19.

§. 19.

II. Poena eximuntur actus inevitabiles naturae humanae, quo *num. 1.* pertinent vitia ex temperamento hominis resultantia, e. g. voluptas, ambitio, avaritia. 1. Quamvis enim haec vitia esse nemo neget, sunt tamen vitia, quibus ita patet natura humana, ut is humanum genus e medio tollere debeat, qui vellet omnino haec vitia tollere. 2. Haec vitia in se non turbant rem publicam. Simulac vero turbant, omnino possunt puniri.

Quod autem Grotius dubitat, *an huiusmodi vitia naturae humanae tam propria possint peccata dici*: id omnes merito mirantur. Dicit quidem, peccatum esse, quod libera et spontanea voluntate committitur: huius modi autem vitia non esse spontanea, nec ex libera voluntate proficisci. Sed resp. negari definitionem. Peccatum, definiente Apostolo, est *aversio*, aberratio a lege. Quis vero negaverit, haec vitia a lege aberrare? 2. libertas voluntatis eatenus salva est, quod possent homines haec vitia deponere et emendari, modo oblatis gratiae mediis uti velent. Id dum non faciunt libere et sponte, in vitiis perseverant.

§. 20.

III. Poena exempta sunt peccata, quae non nocent societati humanae vel rei publicae. Sic e. g. graue vitium est invidia: quia tamen invidus plus sibi quam societati humanae detrimenti infert, hinc omnino non punitur inter homines.

Ratio est 1. quia hic finis poenarum cessaret, 2. quia Deus et sapientissimus, et iustissimus et potentissimus est, ad haec vitia punienda.

III. Etiam actus imperfectae obligationis non poenam admittunt. e. g. misericordia erga pauperes. Nam 1. haec obligatio non producit actionem in foro, ut saepe diximus, ergo nec poenam admittit. 2. Hi actus proficiuntur ex honesto et decoro, id est, ex virtute. Ad virtutem autem ceteri nemo potest.

Vnde facile deciditur quaestio: *an deus actio ingrati*? *Disputat de ea singulari Dissertatione BOECLERVS, et ex veteribus SENECA, lib. III. de benef. cap. 7.* Sed gratitudo manifestum est officium imperfectum, quod ex honestate, non ex iusto nascitur. Ergo inde nec poena datur nec actio, per *n. 1.* huius §. *num. 1.*

Diuidi tamen potest in simplicem et praegnantem. Simplex est, quando benefactori quis non benefacit: praegnans quando

E e c 3

eidem

eidem aegre facit. Prior non producit poenam: posterior omnino poenam non quidem producit, sed augeat, quia quum nemini inferenda sit iniuria multo grauiorem poenam meretur, qui iniuriam facit benefactori suo, et beneficia maleficia remunerat.

§. 21.

Quum ergo non omnia delicta poenam mereri hactenus demonstratum sit: quaeritur porro, an et in iis delictis, quibus poena constituta, veniae locus sit, eamque aliquando indulgere possit summus imperans?

Negant Stoici, quorum paradoxum est, sapientem nemini ignoscere, nemini dare veniam, de quo prolixè LIPSIVS in *Philos. Stoica*. Nimirum ita ratiocinantur. Venia est debitae poenae remissio, sapiens, quod debet, non remittit. Sed recte obseruat Grotius poenam debere non principem, sed delinquentem: si vero debitori remittitur, quod debet, nulla ipsi sit iniuria.

Possit quis vrgere, at et sapientem principem poenam debere infligere, adeoque et ex eius parte adesse obligationem, a qua recedere non possit. Resp. non obligari principem nisi ex lege poenali: legem poenalem a principe dependere certum est. E. et eandem tollere, multoque magis contra illam aliquando veniam dare potest.

§. 22.

num. 1. Id iam porro probat Grotius, et quidem *licere principi veniam dare tam ante legem poenalem latam, quam post illam.*

1. Ante legem quidem certum est delinquentem puniri posse, si delictum nouum aduersus rem publicam admittat, quia 1. sic locus est finibus poenarum, nempe satisfactioni et exemplo. 2. quia naturaliter, qui deliquit (contra rem publicam) in eo statu est, vt puniri possit. Vnde et Romani, cum Malleus Giuacia primum admisisset parricidium, nec vlla adhuc lex poenalis de parricidio existeret, eum poena acerbior adfecerunt.

Sed quemadmodum ante legem poenalem delictum puniri potest, ita et certis concurrentibus circumstantiis poena potest remitti. e. g. 1. si delictum sit paucissimis cognitum, nec inter sit rei publicae illud palam fieri. 2. si plura exstent delinquentis merita, quam vt leue delictum ei fraudi esse debeat; 3. si iam sequuta sit satisfactio, 4. si magnum immineat societati periculum

lum ex poena. Sic Deus ipsi Caino pepercit, quum nondum lata esset lex de occidendo homicida, tantum ne Habele et Caino exstinctis amplificatio humani generis impediretur.

Accedit quod clementia non minus laude digna quam iustitia. Clementia enim ex caritate emendat, quod ex iure stricto statutum est aduersus improbos. Quod ergo in contractibus, testamentis cet. est aequitas, id in poenis est clementia. Vtraque respicit ad circumstantias, iisque aliquando permouetur, vt ignoscat.

§. 23.

Id quum ne Stoici quidem negare queant: tamen concedere non audent, sapientem ignoscere, sed eum tantum parcere dicunt. Sed quid quaeso est parcere delinquenti, quam ignoscere? Habemus itaque hic exemplum, quo probatur, quod iam dudum Stoicis vitio verterunt veteres, nempe eorum controuersias magis in vocabulis haerere, quam in rebus ipsis, adeoque non nisi *λογωμαχίας* esse.

§. 24.

Sed quid lata iam lege poenali? an et tunc veniae locus est? Resp. omnino, et quidem 1. ex illo principio: Nemo sibi ipsi potest legem dicere, quia nemo est sui ipsius superior. Ergo et princeps subditis quidem leges fert, non autem sibi, adeoque et a lege sua impune et licite recedit.

Rem paullulum mitigat Grotius. Nam dicit, principem considerari posse, vel vt partem ciuitatis, vel vt repraesentantem totum ciuitatis corpus. Priore sensu illum legibus obligari, posteriori minime. Sed non opus est ea distinctione. Princeps quia pars ciuitatis non legibus obligatur: (ciues enim ei leges praescribere nequeunt) sed pactis. Vnde tenetur quidem legibus fundamentalibus, sed ea nihil aliud sunt, quam pacta. Quia ciuitatem repraesentans est auctor legis. Lex vero non auctori praescribitur, sed subditis. Ergo et hos solos obligat.

2. Idem inde probatur, quod legislator totam legem tollere potest. Iam si totam legis obligationem tollere potest, potest et eam pro parte tollere, id est aduersus legem ignoscere. Hinc plane politice AVGVSTINVS: *imperator licet reuocare sententiam, et reum mrtis absolueret, et ipsi ignoscere, quia non*
est

est subiectus legibus, quia habet in potestate leges ferre.

Sed tamen, facile largimur Grotio, id non temere, nec sine iusta ratione fieri debere. Ratio est, 1. quia, vti legem sine iusta et idonea ratione non fert legislator, ita nec ab eadem sine iusta et idonea ratione discedere potest. 2. Quia sic vilesceret lex, et 3. multi alii spe impunitatis peccarent.

§. 25.

Sed quaenam sunt iustae causae ignoscendi? Grotius eas diuidit in *intrinsecas* et *extrinsecas*.

Intrinsecas dicuntur, quae ex ipso delicto resultant: *extrinsecas*, quae ex aliis circumstantiis extra hoc factum emergunt.

Intrinseca causa est, cum si non iniusta, tamen dura est poena ad factum comparata, adeoque haec causa non differt ab aequitate, e. g. si Manlius filium supplicio capitali adscit, quod caltris iniussu patris egressus esset.

§. 26.

Extrinsecas causae plures sunt, 1. *merita delinquentis*, et 2. *spes futurorum meritorum*. Sic Dauides veniam concessit Iobo, homicidae, quia vnus saepe eius rem restituerat, et spes in eo maxima erat, tamquam in viro fortissimo et belli perito. Addit Grotius 3. ignorantiam, sed ea potius causa intrinseca est. Hinc facilius ignoscit princeps adolescenti, quam seni. Meliore iure adhibemus 4. multitudinem peccantium, et periculum inde ad rem publicam redundaturum. Sic ignotum in Germanico bello rusticis plerisque, qui arma aduersus principes corripuerant: quis enim agros coluisset? Sic Agellius ignouit parti exercitus ad hostes deficere volenti. 5. Si delictum quidem in se sit detestabile, sed causa tamen delinquendi saltim probabilis. Ita rusticis illis rebellibus et id vtilitati fuit, quod a nobilibus et clericis fuissent immani tyrannide oppressi, et ad desperationem adacti.

§. 27.

Ferd. VASQVIVS, Ictus doctissimus statuit, *eam causam sufficere ad indulgentiam veniam, de qua legislator consilius dicat,*

dicat, sibi eum casum in mente non fuisse, quum legem ferret.
Quaeritur itaque, an recte ita sentiat?

Negat Grotius, et quidem recte. Nam Valquius manifeste confundit ius dispensandi et aequitatem, inter quae maxima est differentia. Nam 1. ius dispensandi pertinet ad legis applicationem, aequitas ad eiusdem interpretationem. 2. Dispensatio est voluntaria; est enim in arbitrio legislatoris, an dispensare velit nec ne. Aequitas est necessaria, et hinc illa denegari nemini potest. 3. Dispensare est principis vel legislatoris solius. Aequitatem et iudex observare tenetur. 4. Illa non trahitur ad omnes similes casus: haec ad omnes omnino pertinet.

§. 28.

Sequitur iam III. pars capitis, quae disquirat de aestimatione poenarum. Ea autem duplici nititur fundamento, 1. merito, ob quod poena infligitur. Nam prout illud maius minusve est, eatenus et poena intenditur vel remittitur, e. g. parricida plus poenae subit, quam homicida. Homicida acrius punitur, quam qui aliam iniuriam realem intulit. Hic maior poena dignus, quam qui verbalem iniuriam intulit, cet.

Ex quo sequitur axioma: Neminem ultra meritum plectendum, adeoque omnino peccaret imperans, qui simplici homicidae infligeret poenam parricidii, vulneranti poenam homicidii, conuicianti poenam vulnerantis.

Alterum fundamentum est 1. utilitas, cuius causa poena infligitur, prout illa maior minorve est, eatenus et poenae aciores esse solent, quamvis in se delictum non sit horrendum, e. g. Desertor laqueo punitur, quum desertio non sit tantum delictum, ac furtum, homicidium, sed quia tamen est frequentius inter milites, et rei publicae inde maximum immineret periculum, si impune possent milites a signis diffugere: hinc omnino utilitas rei publicae, postulat ut maiore supplicio adficiantur desertores. Iam de merito agemus.

§. 29.

Meritum est quantitas moralis facti, cui poena proposita est. *num. 1.*
Iam factum non est substantia physica, quae proprie admittit quantitatem: sed tamen quum factum non possit concipi finem
Heineccii Prael. Grot. F f f nec

ne circumstantiis, eae efficiunt, vt illud modo magis modoninus vitiosum videatur. Inprimis autem ad tres respici solet circumstantias :

1. ad causas, quae impulerant delinquentem. §. 29.

2. ad causas, quae eundem retrahere debuissent. §. 30.

3. ad personam ipsam, quae deliquit. §. 31.

Inter causas impellentes maxime detestanda est 1. *dolus*, siue proacresis, malitia maxima. Vnde et hic semper poenam auget aut minuit, prout ipse maior aut minor est. Hinc proxima causa sunt *affectus*, qui aliquando parum a dolo differunt et hinc poenam augent, aliquando excusant, vel saltem poenam minuunt. Vnde distincte procedendum.

Nimirum *affectus* sunt vel *laeti* vel *tristes*. Illi oriuntur ex repraesentatione boni, et consistunt in appetitu, vt *laetitia*, *spes* : hi ex repraesentatione mali, et consistunt in auersatione, vt *ira*, *metus*, *tristitia*.

Tristes affectus plerumque poenam minuunt, modo iusta causa fuerit hunc affectum concipiendi. Sic si quis mortis, carceris, doloris, vitandi causa iniuste quid fecerit, procul dubio excusabilior erit, quam is qui ex proacresis, nulla urgente causa peccauit.

num. 2.

Illustrat id quibusdam locis Demosthenis, Polybii, Aristotelis et Porphyrii. Nobis autem sufficiet Aristoteles, quia simul traditionem huius iuris tradit. Nimirum quo magis actio est voluntaria, eo magis imputatur. At magis voluntaria est actio, quae nulla urgente causa suscipitur, quam quae urgente ira, metu, dolore admittitur, quia hoc casu homo sui minus compos est, quam priore. Ergo omnino etiam prior magis imputatur, quam posterior.

num. 3.

Haec de *affectibus tristibus*. Iam sequuntur *laeti*, qui poenam semper augent, quia huius modi actio semper est voluntaria, immo eo magis voluntaria, quo maiorem voluptatem mens ex hac actione percipit.

Diximus autem *affectus laetos* oriri ex repraesentatione boni, non veri quidem, sed adparentis. Iam vero bona adparentia nobis blandiuntur vel sub specie *bonestis*, vel sub specie *utilis*, vel sub specie *incundi*. Si sub specie *bonestis*, tunc nascitur ambitio; si sub specie *utilis*, auaritia; si sub specie *incundi*, voluptas; quos tres appetitus primarios coniungi videmus 1. lo. 2. 16.

Hinc

Hinc si quis e. g. ex mera voluptate et lascivia alteri fecerit iniuriam, vel ex ambitione et lucri cupiditate, omnino poena eo maiore dignus est, quo facilius laetis his affectibus resistere potuisset.

§. 30.

Deinde II. respiciendum ad *causas*, quae retrahere debuissent; tales sunt,

I. *Iniustitia*, cuius tanta est turpitudine, et tam abhorrens a societate humana natura, ut omnino vel ipsum nomen vnumquemque a delictis absterreere deberet. Vnde axioma: *Quo maior est iniustitia, eo maiorem meretur poenam.*

Maior autem *iniustitia* aestimatur 1. ex damno inde emergente, an rei publicae vniuersae, an pluribus, an paucis vel vni, an magis minusve nocitum? 2. Ex perfectione delicti, an consummatum fuerit nec ne? 3. Ex obiecto, in quo damnum datum, veluti an vitae, an familiae, an rebus nostris nocitum.

Id quod illustrat Grotius doctrina decalogi, ubi putat, gradatim a vitiis grauioribus descendi ad leuiora. Sic incipit Deus a delictis aduersus se commissis, praeceptis quatuor primis; deinde in quinto praecepto pergit ad superiores, parentes, magistratus; in sexto, ad vitam hominis; in septimo, ad familiam, id est, matrimonium; in octauo et nono, ad res hominis; postremo praecepto sequuntur delicta inconsummata, concupiscentia.

II. Causa retrahens esse deberet *pietas*, qua hic intelligimus naturalem obligationem iis debitam, a quibus dependemus, vel qui a nobis dependent, e. g. officia erga parentes, liberos, coniugum inter se. Quo maior ergo est impietas delinquentis, eo grauiorem poenam meretur. Sic omnino grauius punitur, qui patrem, matrem, filium, quam qui alium hominem occidit.

III. Accedit tertia *causa*, *diuturna indulgentia*. Ea deberet delinquentibus incitamento esse ad poenitentiam. Vnde ipse Deus tam diu conuiuet, ut homines ad resipiscentiam impellat. Quod si ergo homines id nolint, sed contumaciter delinquendo pergant, tunc poenam duplo maiorem merentur, partim ob noua, partim ob superiora delicta. Sic e. g. veteranus latro grauius plectitur, quam qui semel latrocinando infelicitatem artem fecit.

Quaeri hic solet, an et *visa anterior emendata ad poenam imminuendam faciat*? Recte Grotius monet distinguendum, 1. an

F f f 2

solum

totum vitae genus immutatum sit, et homo non gradu, sed praecipui cursu a virtute descenderit, et ad vitia transcurrit. Tunc nihil ipsi prodelle potest vita antea: immo tanto in excusabilior est, ut ipse Deus inculcat *Ezech. 18. 24. an 2. a virtute non descenderit, sed tamen ex infirmitate et consuetudine animi deliquerit?* Tunc omnino ad poenam mitigandam haec circumstantia prodest.

§. 31.

num. 1. Postremo III. respiciendum, ad personam peccantem: quae eo magis vel minus punienda, quo magis minus apta fuit ad causas auercentes considerandas. Hinc Grotius respiciendum esse monet

1. Ad temperamentum corporis. Sic e. g. melancholicus facilius euitabit adulteria quam sanguineus. Sed ad hoc vix respicitur in praxi, quia 1. raro iudices id accurate discernere possunt, et 2. nullum temperamentum est tam prauum, quin virtute superari emendarique possit.

2. Ad aetatem: hinc adolescentes excusabiliores sunt, quam senes, quia hi facilius considerant rem, quam adolescens aestu iuuenili abreptus.

3. Ad sexum, quia femina minus censetur prudens ac masculus.

4. Ad educationem: nam ea neglecta homines facile obbrutescunt. Sed et in liis omnibus parum momenti est, si malitia aetatem suppleat, si femina ultra sexum sapiat, si delictum ita sit comparatum, ut et male educatus, modo homo sit, satis scire possit, id esse prohibitum.

Et hic 5. ad affectus tristes eiusque causas respiciendum. Nam num. 2. 1. affectus sunt admodum naturales, 2. ii coarctantur ex representatione maxime repentina mali, adeoque prius homo accenditur, quam accendi se animaduertat. 3. Semel inflammatus nescit fere, quid agat, et 4. raro tunc rationis tantum superest, ut imperare affectui possit. Hinc e. g. si iuuenis alioquin probus voluptate excesserit, facile poena minuetur.

Cessat tamen haec causa, si aetas affectus suppressisse debet. Hinc ridiculi sunt senum amores, et hinc eo magis puniendi, ridicula est iuuenum auaritia, quam facile vincere possent.

§. 32.

Quaestio iam porro oritur, *an poena semper debeat delicto num. 1. esse proportionata?* Id est, an plus puniri possit, quam damnum dedit peccans? e. g. fur simplum abstulit, iure Romano in duplum vel quadruplum condemnatur, apud nos rem aufert; et ideo amittit rem, famam, immo et vitam; an hoc iniquum? Id recte negat Grotius. Nam

1. Ipse Deus, legislator perfectissimus, furtum quadruplo et quintuplo puniuit in lege Mosaica.

2. Non punitur tantum damnum datum, sed et reatus, id est, animus et consilium peccandi.

3. Omnes gentes huius modi poenas probarunt; adeoque ex hypothesi Grotii inde colligi potest, esse iuris gentium. De Romanis et Hebraeis iam vidimus. Apud Graecos lege Attica fur ultra dupli condemnationem etiam per dies aliquot vincus habebatur.

Sic et Indi ultra talionem vulnerantem vel mutilantem *ma-num. 2.* nu truncabant. Alia exempla passim prostant. Nos iam obseruamus

1. Huic iuri etiam locum esse in delictis non consummatis, si magnus sit dolus. Exempla sunt *Deut. 19, 19. 22, 19. Exod. 22. 9.*

2. Cessare hanc obseruationem, si supplicium sit capitale. Nam ultra mortem plus poenae exigi nequit. Hinc homicidae qui vitam eripuit, vita eripitur, nihilque poenae ultra irrogatur.

3. Posse tamen et hic locum habere augmentum supplicii ratione qualitatis, si insignis dolus accesserit, vel crudelitas et malitia horrenda. Hinc inuenta supplicia dirissima, dissectio in 4. partes, vsulatio candentibus forcipibus facta, contusio, vel crurifragium, cet.

§. 33.

Sed iam contrariam sententiam refellit Auctor, qua statuunt, semper proportionem accurate seruandam inter delictum et poenam, et quidem harmonicam, vti vocat Io. BODINVS *de rep. lib. VI. cap. vlt.* Idque probant inde, 1. quia multa non eadem irrogatur diuiti et pauperi, 2. quia vbi ignominia adficiuntur vir honoratus, saepe in vili persona ad poenam corporis adductiuam peruenitur.

F f f 3

Sed

Sed resp. hic non respicitur ad proportionem inter delictum et poenam, sed ad proportionem inter poenam et vires personae puniendae. Nam poena debet esse malum passionis. Passio non omnium eadem ex eadem re. Ergo facile quidam concedimus Bodino, observandam esse proportionem inter poenam et personam puniendam, sed nos hic loquimur de proportionem inter poenam et delictum.

§. 34.

Quaeritur etiam, *an non caritas suadeat, poenam remittere delinquenti?* Sed id merito negatur. Nam 1. caritas sine iustitia iniusta est, 2. caritas maior vincere debet minorem. Atqui rei publicae et humano generi hanc caritatem debemus, ut curae nobis sit eius securitas, quae sine poenis nulla foret. 3. Saepe caritas delinquenti hoc modo exhibita ipsi potius damno quam utilitati foret. Eo pertinet historia Francisci I. regis Galliae, qui cum comiti bis poenam homicidii remisisset, et iam tertium in idem delictum prolapsus capitis damnaisset, reus dicebat, se supplicium tantum subire ob primum homicidium, ob duo reliqua supplicium iure ferre regem, qui si primum se capitis damnaisset, reliqua illa delicta committi non potuisset.

§. 35.

Quaeritur porro, *an ob facilitatem peccandi poena possit auferri?* Resp. omnino. 1. Finis enim poenarum est non modo emendatio et satisfactio, sed et exemplum, ut alii deterreantur a delicto. Atqui eo magis deterrendi sunt homines, quo facilius possent delictum committere. 2. Ipse Deus hoc observavit in lege Ebraea. *Exod. 22. 1. 9.* Hinc gravissime punitur furtum eorum, armentorum, aratri, cet.

§. 36.

nu. 1. 2. Proxima quaestio est, *an ex clementia poenae possint imminui?* Et id nemo negaverit. Quum enim ex clementia poenae plane tolli queant, ut supra demonstratum, quidni et imminui?

Immo hoc facilius licet, quum prius non nisi ob causas urgentissimas fieri posse dixerimus. Nam interest rei publicae ut delicta puniantur, et hinc non sine modo facilis esse potest princeps

ceps ad poenas plane remittendas. Sed non interest rei publicae ut poenae cum maximo dolore delinquentium, coniunctae sint. Quid enim utilitatis inde perueniet ad rem publicam, si capitis damnatus non nisi tarde et inter mille cruciatus moriatur?

Hinc omnes laudant hanc clementiam, quae in poenarum mitigatione consistit. Meditatur magnus Germaniae Ictus, Io. PETRVS a LVDEWIG, consiliarius regis intimus et cancellarius academi. Hallens. tractatum *de truculentia iuris prudentiae criminalis*: Vbi ostendit, magis iudices plerosque excessu, quam defectu, peccare.

§. 37.

Obsignat hanc tertiam partem Grotius variis observationibus, quas Hebraei et Romani inculcant: Sed addit, omnes has observationes se iam ad loca sua retulisse. Adeoque non opus est, ut his diutius immoremur.

§. 38.

Progredimur potius ad partem IIII. et ultimam, ubi agitur *de bello poenae causa suscepto*. Existimat enim Grotius, gentem aduersus gentem posse bellum suscipere, poenae causa, si quod delictum paullo grauius admisisset. Sic e. g. notum est, Gallos protestantes crudeliter vexasse, et expulisse patria. Si quaestio oboriretur, an ideo reliqui protestantes potuerint saluo iure bellum indicere Gallis, Grotius ex principiis suis respondisset, posse. Videbimus ergo rationes.

1. Quia historiae passim doceant, bella poenae causa suscepta. Sed resp. historiae docent, quod factum sit, non quod fieri debuerit.

2. Quia delicta gentium plerumque cum damno coniuncta sint vicinorum. Resp. tunc potest bellum geri ad damnum reparandum, non in poenam. Ergo tunc est fallacia non causae ut causae.

Addit tamen Grotius cautionem, *non esse bellum gerendum ob quaelibet, etiam minima delicta, sed ob grauissima tantum*.

Nos autem existimamus cum recentioribus omnibus, bella plane suscipi non posse poenae causa. Nam 1. ut supra demou-

monstrauimus; poena semper infligitur a superiore, gens autem ratione gentis non est superior. 2. Pugnatur hoc principium Grotii cum sanioris politicae. Omnis res publica est independens, (*souveraine*) ergo est *autonome*, id est, nemini tenetur factorum suorum rationes reddere, nisi quatenus alterius interfit. Atqui si possent externae res publicae poenam repetere ob quodcumque grauius delictum, tunc non esset res publica *autonome*, adeoque nec independens, id quod absurdum. Praeclare haec argumenta exposuit et firmavit clar. BVDDAEVS in *Analectis iur. nat. et gent.* Dissertatione de *expeditionibus cruciatis*, quae hic omnino conferenda.

Hinc facile patet, quid de quaestionibus reliquis omnibus sentiendum sit, quas Grotius mouet? Omnes sunt frustraneae. Eas tamen paucis expendemus.

§. 39.

num. 1. Quaerit I. *An et ob delictum inchoatum, nec adhuc consummatum possit bellum suscipi?* Nos sine ambagibus respondemus, non posse, quum ne quidem ob consummatum delictum, licitum sit bellum.

At Grotius hoc aliquando concedit 1. quod voluntas modo ad externos actus processerit, possit puniri, e. g. si homicidium quis decreuit, et sclopetum explosit, nec tamen effectus sequutus est; 2. quia leges et consilia peccandi vindicant; 3. quia Romani Perseo bellum inferre decreuerint; quia bellum pararet aduersus Romanos.

Sed haec nihili sunt. Nam 1. voluntas, si ad actus externos processerit, punitur, sed a superiore, non ab aequali, 2. leges consilia vindicant, scilicet ciuiles, quae gentes non obligant. 3. Romani bellum inferebant Perseo, non in poenam, sed defensionis causa. Quis enim primum expectaret ictum, si videat, alterum in eo esse, ut nobis ictum infligat?

num. 2, 3, 4. Concedit tamen Grotius non nisi grauiora delicta inchoata locum poenae facere, 1. quia in re publica ne omnia quidem consummata delicta puniantur, 2. quia lex Hebraea non nisi grauiora delicta consummata punit. Vnde n. 4. concludit, non punienda esse delicta inchoata, nisi sint grauiora, et iam eo processum, ut malum proxime imminet.

Sed

Sed quid opus erit cautione hac, ubi nondum demonstratum est, bellum poenae causa posse suscipi?

§. 40.

Quaerit II. an bellum geri tantum possit ob delicta adversus rem publicam vel subditos nostros commissa, an ob alia quaecumque crimina? e. g. subditos proprios iniuste ob religionem persequendo, quod fecit Ludouicus XIII. rex Galliae.

Grotius utrumque concedit, et quidem ob has rationes plane fuitiles, 1. quod imperantibus ius puniendi datum sit, non qua imperant, sed qua nemini parent. 2. Quod honestius sit aliorum, quam suas vindicare iniurias.

Sed resp. 1. arg. falsum esse. A nemine enim imperantibus data est facultas puniendi, quam a republica cui praesunt, et quae voluntatem suam in omnibus submisit imperanti. Ergo puniunt, quatenus imperant, nec aliis poenam infligere possunt, quam qui suam voluntatem voluntati eorum submiserunt.

2. Honestius est aliorum, quam suas vindicare iniurias modo legitimo. Bellum autem poenae causa susceptum modum legitimum esse, nondum demonstratum.

Ergo fatemur ob delicta adversus rem publicam vel subditos nostros admissa bella geri posse: Sed tunc non geruntur poenae, verum potius luendi iuris nostri causa. Negamus autem suscipi posse bellum ob alia delicta quaecumque.

Nec maioris momenti est arg. 3. quod ab omnibus vetustis scriptoribus laudetur Hercules, qui orbem armis victricibus peragravit, ut eum a tyrannis liberaret, Antaeo, Basilde, Diomede et similibus.

Resp. 1. factum ipsum est fabula. 2. Si verum illud ponamus, multa laudant veteres, quae laudem non merentur. Quis veterum non laudavit factum Ulyssis Troiam contra fidem datam equo ligneo occupantis? Et tamen haec inexcusabilis est perfidia. 3. Hercules non fuit rex, non imperans, sed priuatus, adeoque ne bellandi quidem ius habuit. Ergo eius bella non magis laudanda, quam latronum, etsi per accidens etiam tyrannos aliquot oppresserint.

4. Per species quasdam thesin suam illustrat Grotius, et Heinzeii Prael. Graec.

G g g ostent-

ostendit recte bellum suscipi aduersus eos, qui in parentes iniusti sunt, in anthropophagos, in piratas, etiamsi nos non oppugnent: hos enim esse bellis similes, idque illustrat testimonium Aristotelis et Isocratis.

Sed resp. 1. Impietas in parentes delictum est, sed quod exteram rem publicam non magis tangit, quam adulteria aliaque delicta in aliena re publica admissa. Non possunt nobis huiusmodi homines vitio vertere, si ab eorum communione et societate abhorreamus: Sed ideo non possumus nobis ius puniendi fumere in aliena re publica: 2. anthropophagia est inhumanum quid, sed recte distinguit Pufendorfius num. cadauera deuorent, an hospites ad se aduentantes. Si prius, nostra res publica, inde non magis laeditur, quam si deuorent serpentes. De gestibus non est disputandum. Sin hospites ad se profectos deuorant, tunc bello illos persequimur ob laesionem, dum violarunt securitatem publicam. 3. Piratae non sunt societates liberae, adeoque nec aduersus illos proprie bellum geritur, sed quaeruntur ad supplicium, tamquam delinquentes priuati, et quidem tales, qui vagi et fugitiui sunt; adeoque ab vnaquaque re publica rapi possunt ad supplicium.

Denique 5. et doctrinam Innocentii P. P. probat, qui putat bello in poenam peti posse, qui in naturam delinquant, c. quod super his X. de eos.

Sed 1. ipsi canonistae et pontificii scriptores, vt Victoria; Vasquius, Azorius, Molina huius dogmatis pontificii falsitatem agnoscunt; 2. Inde sequitur id absurdum, vt ob omnia delicta decalogo vetita possit bellum suscipi, quia omnia illa contra naturam sunt. Sic e. g. semper contra Hispanos licebit bellum gerere, quia in eo regno libidines nefandae admodum sunt frequentes, semper iustum erit bellum contra Polonos et Russos, quia in priori regno homicidia, in posteriore, furta sunt frequentissima, et fere impune committuntur.

§. 41.

Iam cautiones quasdam subnequit Grotius, circa huiusmodi bella obseruandas. I. ne mores sumantur pro iure naturae, adeoque non statim pro delictis contra naturam admissis accipiantur, quae tantum moribus plurimarum gentium repugnant. Hinc
absur-

absurdum esset, bellum indici Tartaris, quod carne cruda vescantur, Indis, quod comburant cadavera, cet. Cautio vera est, sed frustranea, quia ne ob vera quidem delicta licitum esse bellum agnoscimus, nisi nos istis delictis simus laesi.

§. 42.

II. *Ne pro delictis habeamus, quae magis sunt contra ius positivum divinum, quam contra naturae. Immo nec ea, de quibus adhuc lis est, an sint iuri naturae contraria.* Hinc absurdum esse fatetur, si quis lanuensibus bellum inferat ob foenebre malum, quod in ea re publica grassatur, Turcis ob polygamiam, cet. Sed haec quoque cautela frustranea, quia nec iustum esset bellum, si delicta haec iuri naturae contraria esse concederentur.

§. 43.

III. *In ipso iure nat. discernenda esse manifesta a non manifesta.* I. manifestis. Nam

1. Aliqua ipsa sua natura sunt difficilioris indaginis, e. g. 1. quae ex honesto fluunt et decoro, quia supponenda hic principia physica et moralia, 2. quae ad officia hypothetica pertinent, quia hic supponenda principia politica de natura domini, pretii, rei publicae.

2. Alia iuris naturae officia difficilia sunt certis personis ob ruditatem, educationis defectus, e. g. barbaris.

Cum his mitius agendum putat Grotius, ita ut non statim ob neglecta officia iuris naturae minus manifesta homines rudes et barbari bello opprimi possint. Sed denuo cautela superflua, quia Grotius non probavit, vel ob manifestissima delicta bellum iure suscipi posse.

§. 44.

Redit ad quaestiones, quarum 3. est, *an et ob delicta adversus Deum admissa, bello locus sit?* Hic Couarruias licet pontificius, negativam recte defendit. Et Grotius contra ipsis pontificiis hac in re durior est. Nam primo refutare conatur Couarruias argumenta. Deinde et suam sententiam proponere nititur.

1. Couarruias dixerat, *punitivam potestatem non esse sine iurif-*

G g 2

risdictione. Sed resp. Grotius, hanc se sententiam iam antea reiecit. Nos replicamus, reiecit Grotium hanc sententiam, sed iniuria, vti per totum caput demonstrauimus.

num. 2.

2. Dixerat Couarruias *principem tantum accepisse in subditorum actiones, non in extraneorum*. Resp. Grotius, id falsum esse. Quemadmodum enim episcopi omnes vniuersalis ecclesiae curam susceperint, ita et principibus singulis generalem pro humana societate curam incumbere. Nos replicamus. Aut concedit ergo Grotius, singulos episcopos iu vniuersalem ecclesiam habere potestatem directiuam et punitiuam, tunc habebimus plus, quam papatum: aut dicit episcopis tantum ius curandi ecclesiae vniuersalis salutem non directiuam et punitiuam potestatem competere. Et tunc simile quid etiam concedere debet de principibus, quod cura ipsis incumbat pro societate humana, sed non tamen ideo polleant potestate punitiua extra rem publicam suam.

num. 3.

3. Dixerat Couarruias, *Deum sufficere vindicandis, quae aduersus se commissae sunt*. Resp. Grotius. Sufficere Deum etiam vindicandis iniuriis aduersus homines commissis. Et tamen neminem negare, has iniurias esse puniendas. Nos replicamus. Distinguendos esse hos casus. Iniuria hominibus illata non soli vindictae diuinae relinqui potest, quia turbat societatem humanam. Ast delicta aduersus Deum commissae, non semper turbant societatem humanam, hinc non puniendi ab hominibus.

Obiicit Grotius, *religionem non solum considerari posse vi medium conciliandi sibi diuinam gratiam, verum etiam, tamquam vinculum rei publicae*. Ergo delicta aduersus Deum commissae saepe turbare rem publicam. Resp. Tunc aut turbant rem publicam exteram, et sic nostra non interest, nisi foedere illi rei publicae obstricti simus. Aut turbatur res publica nostra, tunc poenae locus est, non quia delictum aduersus Deum, sed quia aduersus rem publicam nostram admissum est. Sic e. g. abusus nominis diuini est graue delictum in Deum, sed ideo nemo punitur. Si quis autem abutatur nomine diuino ad concitandas seditiones et turbandam rem publicam, tunc punitur, non tamquam iniurius in Deum, (quamuis hoc poenam exasperare possit,) sed tamquam turbator rei publicae.

n. 4. §. 6.

Obiicit porro *religionem non solum esse vinculum rei publicae, sed et totius societatis humanae, adeoque et ob delicta aduersus Deum*

Deum commissa posse bellum geri aduersus extraneos. Sed 1. religio est sententia in intellectu consistens. Intellectus non peccat, sed errat. Error non poenam, sed commiserationem meretur, non gladio, sed argumentis expugnatur.

2. Religio est vinculum societatis humanae, verum non nostra, sed generatim religio. Itaque non potest Christianus salua conscientia religionis solius causa adgredi Turcas, paganos, quia hi licet non nostram, religionem tamen habent. Immo quamuis Sineses ex sententia omnium vere sint Spinozistae et Athaei, tamen numquam iustum dicerem bellum iis ob atheismum illatum, quum alias sint moribus probis praediti, et datae fidei tenaces.

3. Homines non semper viuunt secundum principia intellectus, sed secundum propensiones voluntatis. Hinc multi Christiani pessimis, multi uthei honestis moribus praediti sunt. In re publica autem et societate humana sufficit, si externa adhuc honestas et iustitia adsit. Ergo bellum ob errores et delicta contra religionem geri nequit.

§. 45.

Iam ergo hac occasione de *religione* generatim agit Grotius, et quidem de *naturali et omnibus hominibus communi*, quam quatuor veluti articulis theoreticis constare censet:

I. *Esse Deum, et quidem vnum.*

II. *Deum non esse rem quamdam similem creaturis, sed ens aliquod sublimius*, id est, ens infinitum et perfectissimum.

III. *A Deo curari res humanas.* Nam alias perinde est, siue quis Deum neget, siue eundem otiosum esse fingat. Vnde et Epicurus plerisque visus est Atheus, quia Deum sibi otiosum imaginatus est.

IIII. *Eundem Deum esse opificem huius vniuersi.* Nam alias nullum esset principium dependentiae, ex quo ad cultum et obsequium Deo praestandum obligaremur.

Eleganter obseruat Grotius, quatuor ista religionis naturae capita totidem decalogi praeceptis inculcari.

1. Vnitas Dei praecepto primo: *Non habebis Deos alienos praeter me.*

2. Eius natura inconspicua praecepto 2. *Ne facias tibi imaginem*, cet.

3. Eius providentia praecepto 3. *Ne sumas nomen Dei in vanum.* Id frustra esset, nisi Deus curaret humana.

G g g 3

4. Crea-

4. Creatio denique fundamentum est institutionis sabbathi. Hi sunt articuli religionis naturalis theoretici. Præctici sunt, num. 3. qui ex superioribus fluunt.

1. *Si Deus est vnus, sane ille honorandus est.* Honorare enim est obiecto tribuere prærogatiuam. Summam autem prærogatiuam meretur quod vnum est, et sibi par nihil habet.

2. *Si Deus est ens perfectissimum, erit sane amandus.* Amor enim est appetitus, qui fertur in bonum. In quem ergo magis feratur, quam in bonum summum et perfectissimum.

3. *Si curat res humanas, et timendus, et in eo collocanda fiducia.* Nam tunc et scit actiones nostras, ergo et non parcat peccatis. Scit calamitates piorum, ergo et preces eorumdem audiet. Prius timorem, posterius fiduciam excitabit.

4. *Si Deus condidit vniuersa, ab ipso dependemus.* Ergo est superior noster, ergo iure nobis præscribit leges, adeoque et eidem merito obtemperamus.

num. 4. Haec omnia ipsa recta ratio cognoscit, 1. inde, quia omnia in mundo sunt contingentia, nihil necessarium. Quod est contingens, non necessarium, illud extra se habet causam cur sit: Ergo extra mundum debet esse causa, cur sit. Illa causa, quum nulla re determinetur, non potest non esse infinita, quumque omnia ad certum finem fecerit, intelligens, adeoque perfectissima. Ens infinitum, perfectissimum, intelligens est Deus. Ergo Deus est.

2. Addit Grotius argumentum a *ἡμετέραν* seu communi omnium gentium persuasionem desumptum: *quia nulla sit gens tam barbara, quae non Deum esse fateatur.* Sed hoc argumentum non adeo firmum est. Nam et nulla fere gens olim fuit; quin crediderit plures Deos, et tamen is error fuit. Ergo hoc argumentum tantum adminiculans est.

§. 46.

num. 1.2. Iam his præmissis quaerit, *an propter religionem hanc violatam poena possit irrogari?* Distinguit Grotius inter *notiones* ipsas de Deo, et *modum* ab iis *discedendi*.

1. *Notiones* ipsae vel *clariores* sunt vel *evidentes*, vel *paulo obscuriores*. *Clariores* sunt illae de Dei existentia et providentia. Nam 1. has omnes etiam hebetiores agnoscunt, modo cogitare velint, quod existant, et cur existant? 2. quia sunt prin-

principium omnis religionis, adeo ut sine his ne concipi quidem religio possit. 3. quia consentiunt philosophi, has notiones non posse a religione secludi.

4. Quia omnes gentes has veritates agnouerunt. Et hinc ^{num. 3.} plurima loca colligit veterum, qui has veritates et inde fluentem cultum diuinum ad ius gentium retulerunt. vid. L. 2. *D. de iust. et iur.*

11. *Modus discedendi* ita differt, ut alii primi has notiones ^{num. 4.} deferant, et huiusmodi doctrinas tollant, alii eo errore abrepti postea in atheismo perseverent. Quia ergo primi has rationes clarissimas tollunt: illos puniri posse existimat.

1. Quia in culpa sint, dum ad veritatem euidentiissimam coecutiant,

2. quia societatem humanam violent, dum eius vinculum tollant.

Sed in eo manifesto errat Grotius. Omnis poena ponit delictum, omne delictum in voluntate, non in intellectu quaerendum. Atheismus non nisi error intellectus est, ergo in se poenam non meretur. Quare si quis coecus non videt, non punitur. Qui puniri possit homo tam mente occaecatus, ut Deum non videat?

Quare potius distinguendum an ille atheus eum errorem sibi foueat, an turbet rempublicam. Priore casu commiseratione dignus et rectius informandus, posteriore casu puniendus est, non ob atheismum, sed ob turbationem rei publicae.

§. 47.

Quod ad reliquas *notiones de religione* attinet: Illae non aequae ^{num. 1.} clarae sunt ac illae duae. Quod inde videmus 1. quod plures populi qui Deum existere crediderunt, tamen plures Deos statuērunt. 2. Quod et sapientissimi philosophi pagani mundum sibi finxerint aeternum. 3. quod Epicurus et alii providentiam negarint.

Hos ergo errores non statim poenam mereri inde probat, ^{num. 2.} 1. quod et sine illis quodammodo consistere possit religio. 2. Quia lex diuina non omnes gentiles et idololatrias puniri iusserit, sed tantum seductores, *Deut. 13. 16.* Apostatas, *Deut. 12. 23.* 3. anthropothyas, id est, qui sacrificia humana offerebant. *Leu. 20. 2.*

Obici possent Cananaei populi, quos ob idololatriam Deus ^{num. 3.} pun-

funditus extirpārī iusserit. Sed respondet Grotius, 1. id factum esse ob immensa scelera, quibus idololatriam cumularint. 2. non nisi post spatium poenitentiae longissimum concessum. Ego respondere malim, a facultate puniendi Deo competente non procedere argumentum ad ius puniendi hominibus incompetens, de quo hic agitur. Deus omniscius est, et mentes hominum perspicit. Tale quid non sibi arrogabunt homines.

Deinde ut existimabat Grotius puniri posse, qui primi religionis fundamenta tollunt: ita contra negat puniendos, qui ex ignorantia maiores sequantur. Quod facile concedimus. Exceptionem tamen duplicem addit, dignos poena esse

1. qui diabolos et vitia adorant,
2. qui sacrificiis humanis utuntur.

Et id concedo, nisi quod quoad cultum cacodaemonum vix credibile est ullum mortalem fore tam stupidum, ut eos adoret, si sciat esse cacodaemones. Vnde plerumque gentiles eos potius pro Diis bonis habuerunt.

Haecenus ergo cum Grotio facimus. Hi puniri possunt, sed a quo? a magistratu. Si quis vero ideo bellum indicere vellet genti, vix esset excusandus. Potius conuertendi erunt. Nec laudandus Carolus M. qui Saxonibus religionis tantum causa bellum intulit.

§. 48.

num. 1. Et hoc ipse Grotius recte agnoscit hac §. ubi quaerit, an bellum inferre fas sit iis populis, qui nolint suscipere religionem Christianam? Negat,

1. quia religio persuaderi non potest naturalibus argumentis. Possum quidem persuadere ethnico, Deum existere, Deum unum esse, et alia huius generis capita religionis naturalis: sed Christum esse filium Dei, eum mortuum pro peccatis hominum, resurrexisse, adscendisse in coelos, non est obiectum demonstrationis, verum fidei. Fides vero est opus Dei. Ergo nemini irascendum, qui exfors est divini istius doni.

num. 2. Quia naturae doctrinae Christianae repugnat coactio: Neminem Christum voluit vi et poenis ad credendum adigi. Rom. 8. 15. ubi exigit filialem, non servilem spiritum. Iob. 6. 6.

vbi

vbi Christus quaerit: *an et vos vultis a me descere. Luc. 9. 54.* vbi increpat discipulos ignem coelo deuocaturus.

3. Quia hoc et patres agnouerint, Tertullianus, Athanasius, Chrysostomus: immo et Concilium Toletanum, cuius canon n. 1. huius §. adducitur. Vbi tamen notanda Augustini fluctuatio, qui quum et ipse antea sanam doctrinam de non persequendis haereticis et infidelibus defenderet: postea, quum Donatistas hostes habere coepisset, in contraria currit.

Obiici solet a Pontificiis locus *Luc. 14. 29. cogite intrare. num. 3.* Sed 1. vox haec in Euangelio saepe notat instantiam rogantis, non coactionem violentam. 2. Ex contextu adparet, hanc solam significationem locum habere. Nam sermo est de conuiuio nuptiali, quis ad illum cogitur vi?

§. 49.

Alia est quaestio, *an bellum inferri possit gentibus Christiana- num. 1. 2.* nam religionem iniuste persequentibus? Id adfirmat,

Quia in Christiana religione nihil est, quod repugnet statui sociali et ciuili, immo haec doctrina et sancta est, et in morali- bus rationi conuenientior, quam omnes reliquae religiones. Persequi veritatem delictum est. Ergo in poenam potest bello vin- dicari.

Sed rem concedo. Rationem Grotii reicio. Tunc enim causa belli huius modi non est delictum, sed defensio.

§. 50.

Multo minus ergo adfirmanda quaestio: *an haeretici i. e. num. 1.* Christiani erroribus quibusdam dediti *persequendi sint?* Grotius illud conuellit,

1. Exemplo Iudaeorum, qui diuersas sectas sciebant, vti Phari- saeos, Saducaeos, Essenos, quum principia eorum essent diuer- sissima.

2. Quia magna est intellectus imbecillitas, magna vis inoli- num. 2. tae semel opinionis. Hinc nec obiici potest, errores nonnum- quam esse manifestos et intolerabiles. Nam quod mihi clarum et manifestum videtur, id non statim tale est aliis.

3. Modus illuminationis non est idem. Forte ego veritatem agnosco gratia diuina, sed non hunc modum gratiae accepit al- ter, cui ideo irasci esset iniquissimum.

Heineccii Prael. Grot.

H h h

4 Haere-

num. 3-4 §.

4 Haeresis non est crimen. Edidit Dn. THOMASIVS dissertationem: *an haeresis sit crimen?* et id initio non sine stupore acceptum. Et res tamen clarissima. An delicta sunt in intellectu? Hinc et Augustinus illum tantum dicit haereticum, qui temporalis tantum commodi et gloriae principatusque gratia novas opiniones excogitat. Quis vero haec interna cordis diiudicat? Plerique bona fide errant.

5. Omnes veteres orthodoxique Patres hanc haereticorum lanienam damnarunt. Loca Athanasii, Hilarii, immo et Synodorum varia n. 5. huius §. adduxit auctor.

§. 51.

Num. 1. 2.

Denique quaeritur, *an poenam mereantur, qui in Deos suos licet falsos, sunt irreuerentes?*

Adfirmat Grotius, quia quantum in ipsis est, verum Deum offendunt, qualem esse putant Deos falsos suos. Vnde aequae poena dignus, qui per falsos, quam, qui per verum Deum perierat, quemadmodum aequae regicida est, qui pro rege, quem occidere voluit, summum eius ministrum trucidavit, adeoque in persona erravit. Rem iam supra explicauimus, ubi de iureiurando et periuriis actum.

CAPVT XXI

DE COMMUNICATIONE POENARVM.

§. 1.

num. 1.

Hic primo omnium quaeritur, *quid sit poenae communicatio?* Est actus iustitiae, quo poena non solum delinquentes principales, sed et alios sequitur. Et hi iterum duorum generum sunt. *Vel enim puniuntur qui delicti sunt participes*, de quibus §. 1-8. *vel qui extra reatum sunt*, §. 9. *ad fin.* Sed quum poena sit malum passionis ob malum actionis inflictum a superiore: consequens sane est, vt poena non possit infligi nisi iis, qui delicti sunt participes. Quare rectius dixeris: In communicatione poenarum vel ipsam poenam communicari, si plures sint delicti participes, vel

vel tantum damnum ex ista poena resultans. e. g. Si quis percussorem aere conduxit, uterque reus est, et hinc proprie puniatur, si vero utrique sunt uxores et liberi, hi simul damnum ex isto maritorum et parentum supplicio sentiunt, sed proprie non puniuntur, tamquam innocentes.

I. Iam quod ad priorem partem attinet, auctor praemittit ^{num. 24} regulam: *Poenas dat non solum causa delicti physica*, e. g. percussor, *sed et causa moralis*, e. g. qui eum aere conduxit.

Causa physica est, quae actu physico et corporali delictum perpetruit.

Causa moralis, quae animo vel consensu concurrat, e. g. iussu, consensum requisitum adhibendo, adiuuando, receptum dando cet. aequae poenam ideo meretur, quia in imputatione facti tantum dispicitur, an quis sit actionis auctor. Auctor aliquis est non modo corpore sed et animo, quia quod quisque per alium fecit, illud ipse fecisse videtur.

Attamen hic probe dispiciendum, 1. an vere sine eius concursu actio non foret suscepta. Hinc non statim, qui laudauit, puniendus est.

2. An nudum et generale consilium datum, an iussus vel consilium speciale accesserit. Prius enim consilium non est obligatorium.

3. An si quis ob delictum non prohibitum puniatur, perfecta adfuerit prohibendi vel impediendi obligatio. Hinc poena furti particeps non est, qui in vicinia furtum fieri vidit, nec prohibuit, quamuis eius modi vicinus sit inhumane.

§. 2.

Haec iam Grotius applicat ad quaestionem nobilissimam, ^{num. 25} *an ob delictum primatum communitas tota, vel eiusdem rectores teneantur?*

Id negatur in thesi, 1. quia poena tenet suos auctores, non innocentes. 2. Quia vnus vel alter cuius non est tota ciuitas. 3. Quia nulla est ciuitas vel res publica, quae ex meris probis et virtute ornatis ciuibus constet, adeoque rectores ciuitatum tantam probitatem suorum ciuium praestare nequeunt.

Quare potius distinguendum, *ciuitasne deliquerit, an ciues?* Priore tantum casu poena addicitur ciuitas eiusque rector, non posteriore. Quaeritur autem, *quando ciuitas deliquisse dicenda sit?*

H h h 2 Resp.

sum. 2. 3. Resp. id fieri *patientia et receptu*. Hinc 1. requiritur *patientia*. Ea autem *intelligi* non potest.

1. Sine *scientia*. Ergo prima regula est, qui magistratus scit, cives delictum *meditari*, idque non prohibet, isle ipse delinquit, adeoque et poenam meretur. Hinc Cicero Pisonem seditionis arguit, quod quum consul esset, sciret tribunos plebis turbas dare, iisque non resisteret.

Id non modo variis veterum testimoniis probat Grotius, sed et a pari, quia et iure priuato pater ex delicto filii, dominus e delicto serui tenetur, si vterque sciuerit, hos delinquere. Nec prohibuerit. Quanto magis tenebuntur rectores ciuitatis, quibus plus auctoritatis est et potentiae ad delicta ciuium coercenda?

sum. 4. 2. Requiritur in rectoribus facultas prohibendi. Hinc non semper rectoribus ciuitatum delicta ciuium possunt imputari, si ipsis defuerit impediendi facultas. Nam alioquin nulla culpa esset in rectoribus, adeoque nec poena in eos caderet. Destitui autem hos saepe facultate prohibendi certissimum est. Casus sunt vari.

1. Si, vt Tacitus ait, *delicto impar sit res publica*. Sic e. g. Russiae imperator quamuis seuerus, quamuis potentissimus, non tamen potuit per regnum suum tollere latrocinia. Iniuriam itaque ei fecissent exteri, si ob homines suos in viis spoliatos bellum ipsi intulissent.

2. Si *res per tumultum repentinum acta*. Tunc plebs semel in furorem acta, nec rectorum ciuitatis, nec aliorum sana monita admittit, adeoque et poena non habet locum.

sum. 5. Hinc facile patet, quomodo intelligenda sint illa? *Saepe luit populus poenas vnius iniqui*. Nempe 1. si vnus aliquid egit consilio publico; 2. si reliqui sciuerunt, et, cum possent, non prohibuerunt; 3. si re peracta non puniunt.

sum. 6. Hinc etiam liquet, *an praesumatur scientia et puniendi facultas*? Id ex circumstantiis iudicandum. Scilicet considerandum, 1. an delictum fuerit diuturnum, an momentaneum; 2. vtrum per tumultum repentinum, an a paucis susceptum; 3. vtrum milites aliaeque instrumenta resistendi in promptu fuerint nec ne; 4. an rectores ciuitatis indignationem suam prodiderint resistendo, dehortando, minando, puniendo, nec ne.

§. 3.

Deinde II. et receptu dato ciuitatum rectores deli Eli sunt par- ^{num. 1.}
 ticipes. Hinc si illi piratis in portibus suis receptum dant, nec
 eos puniunt, perinde est, ac si piraticam agerent: quia sic fiunt
 causa delicti moralis.

Obiici posset, 1. vnumquemque ciuitatis rectorem posse ven-
 nam delinquentibus dare, poenamque remittere. Hinc qui iure
 suo vitur, nemini facere iniuriam. Ergo nec magistratui quid-
 quam posse imputari, qui piratis receptum dederit, dummodo
 non iusserit delictum fieri.

Sed resp. distinguendum esse inter delicta in re publica; et ^{num. 2.}
 aduersus extraneam rem publicam, vel aduersus superiorem ad-
 missa. Priore casu si rectores ciuitatis ius aggratiandi exercent,
 iure suo vituntur, adeoque et nemini faciunt iniuriam.

At posteriore casu extraneae rei publicae vel superiori ius
 quaesitum est, ius nimirum satisfactionem pro damno dato, del-
 ictoue perpetrato exigendi. Id vero ipsis inuitis auferri nequit.
 Et hinc si auferunt, omnino delicti admissi ipsi fiunt participes.

§. 4.

Hinc porro facile deciditur quaestio, ad quid rei publicae ^{num. 1.}
 extraneae obligentur rectores ciuitatis, si ciues eorum aduersus exte-
 ros deliquerint?

Resp. Exteri, qui damnum patiuntur, ipsi possunt punire ci-
 ues nostros in suo territorio peccantes, si ibi deprehenduntur,
 quia delinquendo fiunt ciues temporarii.

Si in rem publicam nostram se contulerunt; tunc non pos-
 sunt actum iurisdictionis exercere exteri in territorio nostro; nec
 id sine confusione summa fieri posset. Hinc ergo sequitur, vt
 aut ipsi debeamus supplicium sumere, aut reos dedere exteris.

Deditionem hanc esse iuris gentium, variis exemplis demon- ^{num. 2.}
 strat Grotius, veluti Israelitarum *Iud. 20.* Philistaeorum, *Iud.*
15. Laedaemoniorum, Romanorum cet. Sed nihil opus est ista
 inductione. Nam potest ex ipsis principiis iuris naturae demon-
 strari. Exterae rei publicae, in qua delictum est commissum, debemus
 satisfactionem, vel poenam ab his hominibus repetendam, qui del-
 iquerunt. Poena illis infligitur vel per nos, vel per ipsos, qui
 laesi sunt. Si per nos, debemus punire: si per laesos, debemus
 dedere.

H h h 3

Quae-

mu. 3.4.5. Quæritur autem, *quem penes sit optio?* Et recte respondet Grotius, penes rectores vel superiores delinquentium, qui si ipsi poena iusta addiciunt delinquentes, nihil ultra exigere possunt exteri. Accedit et alia ratio, quia periculum est, ne exteri irae et vindictæ in fontes plus iusto indulgeant, et hinc nimis crudeliter consulant in eos.

Nonnumquam tamen vltro res publica extera ciuitati optionem concedit, vt eo cumulatius satis fiat. Id enim fieri posse nemo dubitat, quia ex ipsis rectæ rationis principiis quisque potest iuri in fauorem sui introducto libere renunciare. Exemplum Caeritum est apud Liv. lib. 7.

n. 6.7.8. Quæritur porro, *an obstricti simus ad dedendos etiam externos, qui ad nos confugerunt?* Quæstio hæc sæpe orta, veluti quum ex Anglia quidam regis hostes ad Gallos et Hispanos confugerent, item quum ex administratoribus pecuniæ publicæ, peculatus rei in Belgium Austriacum discessissent.

Sed responsio facilis. Distinguendum an apud nos hostilia meditentur aduersus patriam: et tunc aut dedendi, aut ipsi itidem pro hostibus iure habentur: an quiete viuant: tunc non dedendi quidem sunt, quia se semel fidei nostræ commiserunt, sed tamen patriæ eorum administranda iustitia, si hos homines accusare coram foro nostro velint.

Ratio diuersitatis est: quia isti fugitiui, dum in rem publicam nostram se contulerunt, statim fiunt ciues nostri. Ergo aut ante istam fugam peccarunt, aut dum apud nos latitant. Si antea, tunc tamquam ciues nostri puniendi; sin postea apud nos hostilia moliantur, tradendi, per ea, quæ ad n. 2. huius §. monuimus.

Denique quæritur, *an a sua ciuitate dediti et non recepti ciues maneant?* Quæstio hæc mota, quum Mancius Numantinis deditus et non receptus postea in senatum veniret, et dicturus esset sententiam. Hinc nata controuersia inter Ictos, de qua L. ult. ff. de legation. P. Mucius Scaeuola eum ciuem negabat. Brutus et Cicero contrariam defendunt sententiam. Ille utebatur argumento, quod semel expulsus e ciuitate non magis ciuis sit quam exsul: hi contra, quod deditio sine acceptione nulla sit.

Grotius noster cum Cicerone et Bruto facit, sed eius tamen rationem reiicit, quia deditio non æque ac donatio sit actus bilate-

bilateralis. Hinc hoc argumento mauult vti. *Qui dedit populo alicui, potestatem concedit puniendi*. Si populus ea potestate non vtitur, tunc ipse populus dedens arbitrium habet puniendi aut non puniendi. Atqui non puniuit, si nullum ea de re exstitit decretum vel sententia condemnatoria. Ergo nec ciuitatem amisit Mancinus, quia ciuitas non ipso iure sed per decretum populi amittitur.

Nos putamus et Grotii et Ciceronis rationes satis firmas esse et solidas. Nam quod ad huius argumentum attinet, certissimum est deditionem aequae actum bilateralem esse, ac donationem, adeoque nec ipsum sine acceptatione intelligi.

§. 5.

Noua iam quaestio nascitur: *an non reos defendat ius asylinum*. 1. *et refugii?* Talia sane asyla hodiernum sunt apud Pontificios, ecclesia et monasteria: Apud Ebraeos certae vrbes, Romae quoque Romulus ius asyli constituerat ad ciuibz locupletandam rem publicam.

Recte resp. Grotius *haec asyla iniustissima esse, nisi certis circumscribantur limitibus*. Primaria ergo regula est: *Asyla non constituuntur pro fontibus, sed pro infortunatis*. Id tale probat Grotius 1. testimoniis veterum Graecorum, qui hunc finem eleganter expresserunt: Vbi praecipue legi merentur verba Gylippi apud Diodor. Sic. lib. XIII.

2. Exemplo Atheniensium, qui quidem asylum constituerant ^{num. 2.} aram misericordiae, sed non nisi miseris, victis bello, exsulibus, persecutionem et iniuriam passis, quibus ipsa humanitas iubet auxilium ferri.

3. Praxi gentium veterum, qui maleficos ab ipsis aris abstractos punire non dubitabant. Non pauca eam in rem exempla cumulat Grotius ex auctoribus Graecis: quibus addi possunt illa sacra. Salomon Adoniam et Ioabum aram amplectentes occidit. Asyla quidem quaedam constituerat Deus in gente Israelitica, sed non nisi iis, qui plane innocentes erant, et homicidium e. g. casuale commiserant, vt tuti essent a vindice sanguinis, id est a proximo agnato, cui ius erat vindicandi caedem agnati sui. ^{num. 3.}

Iam facile patet, quid factu opus sit, si delicti veri reus ad ^{num. 4. 5.} asyla

asyla nostra se receperit. Dicit Grotius, aut puniendi, aut dedendi, aut amouendi, id est, illis iniungendum est, ut quantocyus terra nostra egrediantur.

Possunt ergo puniri, quia ius asyli non fontibus, sed innocentibus prodesse debet: possunt dedi, quia haec optio semper competit populo, ad quem confugerunt delinquentes: possunt denique amoueri, quia cogere nos non potest exterus ut eum tradamus, qui quamdiu apud nos fuit, et ad fidem nostram confugit, nihil deliquit. Et eo postremo temperamento plerumque vtuntur hodie gentes. Sic Galli non dederunt equitem S. Georgii, ducem Ormondiae, comitem Bullingbrockiae, sed tantum expulerunt.

Sed et hic 1. superior valet distinctio, hostilem aduersus nos animo sint, qui ad externos transfugunt, an alius delicti in priuatum admissum rei. Haec enim debita plerumque dissimulant generosi principes. Ibi vero vel poenam vrgent, vel deditionem, vel expulsionem.

2. Cessare obligationem, si malum ita inualuit, ut non nisi proposita impunitate coerceri possit. Tunc enim data semel impunitate, nec deditio, nec poena iure flagitatur, immo nec expulsio. E. g. si piratae promissa impunitate ad nos confugerint, et piraticam deseruerint.

§. 6.

num. 1. Porro quaeritur, an plane nihil auxilii sit reis ad nos confugientibus in defensione nostra? Diximus enim saepe et hos vel puniendos, vel dedendos, vel amouendos. Ergo non melior eorum erit conditio, ac si domi se passi essent in vincula conici. Resp. omnino. Nam

1. Aequiorem sperare poterunt iudicem principem exterum, quam iudices domesticos, qui plerumque vel priuato odio in reum, vel adulatione aduersus principem ad perdendum miserum stimulantur.

2. Defenduntur interea, dum causa cognoscitur. Nam quum nemo indicta causa sit puniendus, tradendusue alterius libidini, merito prius causa cognosci debet, ne deterioris sit conditionis supplex, quam quicumque alius ex ciuibz nostris.

num. 2. Sed ea occasione noua nascitur quaestio, ex quo iure sit iudicandus

dicandus supplex, num ex iure istius ciuitatis, in qua peccauit, an ex iure nostrae ciuitatis, ad quam confugit?

Resp. Grotius, aut delictum quod admisit est contra ius naturae et gentium: tunc hoc sequendum est. Aut delictum est mere ciuilibus legibus prohibitum, tunc illud iudicandum ex iure ciuitatis eius, in qua peccauit.

Sed iam ab aliis recte obseruatum, ius naturae et gentium hic numquam habere locum.

Nam 1. hic quaestio est de infligenda poena. Poenas autem plane nullas definit ius naturae. 2. Ius naturae et gentium norma est in statu naturali. Qui autem ad nos confugiunt, non sunt in statu naturali, sed statim fiunt ciues nostri. Ergo iudicandi ex iure ciuili. Sed ex quo? *ex eo*, inquit Grotius, *contra quod peccauerunt*. Sed id falsum. Ciuis enim noster factus. Ergo secundum eas leges iudicandus erit, quae alios ciues obstringunt.

§. 7.

His praemissis ad quaestionem primariam redit Grotius, ^{num. 1:} *quaeritque, quomodo delicti rectorum participes fiant subditi?* Hactenus enim vidimus, quomodo delicti alieni participes fiant rectores ciuitatis: deinde quomodo delictum paucorum transeat ad totam communitatem?

Recte resp. Grotius *consensu*. Sed hic grauis moueri posset controuersia, an non semper consentire teneantur subditi in facta et consilia rectorum, quum semel voluntates suas voluntati imperantis submiserint? Respondendum, facta principis aut ex iure principatus nasci, aut ex tyrannide. Si prius, subditi indistincte probare et praestare debent facta principis. Et tunc verissimum est illud:

Quidquid delirant reges, plebuntur Achiui.

Sin autem actum tyrannicum exercuit imperans, tunc non consentire tenentur subditi, e. g. si princeps regis exteri uxorem rapuerit, si legatos violarit. Ergo tunc videndum an consentiant, cum iuuando, milites et pecuniam suppeditando cet. an improbant factum, eique subsidia negent: priore casu itidem *quidquid delirant reges plebuntur Achiui*. Posteriore casu minime.

Quid si pauci e ciuitate peccauerunt, an delictum ad ciuitatem ^{num. 2.}
Heineccii Prael. Grot. I ii perti-

pertinet? Resp. similis est decisio. Aut reliqui consentiunt, et factum probant, aut non. Si prius, simul. plectuntur. Sin posterius, debent delinquentes punire aut dedere. Id ni faciunt, poena itidem digni sunt.

Obiici posset 1. plurima suffragia vincere pauciora. Resp. in iis, quae ad rem publicam pertinent, non in delictis.

num. 3. 2. Poena addici non posse totas vniuersitates. Resp. Experientia contrarium docet. Possunt enim libertatibus, bonis, iuribus spoliari, possunt ciues maxime delicti auctores occidi. Vnde et mori et capite deminui dicitur ciuitas iure Romano, si aratrum indocatur. Quamuis iustissimum omnino sit, parcere innocentem plebi, sexui sequiori, infantibus.

§. 8.

num. 1. Nobilissima porro quaestio est, *an poena ob delictum ab vniuersitate semper exigi possit?* id est, licet vel maxime praesumptio sit, eos, qui deliquerunt, ciues iam pridem obiisse?

Vtrinque difficultas haud parua emergit. Nam pro affirmatiua militat, quod vniuersitas, vt supra demonstrauimus, non moriatur. Pro negatiua, quod innocentes poena addici nequeant, et verum tamen est, post 100. e. g. annos ex ciuibus, qui peccarunt, vix quemquam supresse posse. Accedit, quod ipse Deus vetat plecti liberos ob delicta parentum, parentes ob delicta liberorum.

Sed recte resp. Grotius, de vniuersitate quaedam dici solere, tamquam de vniuersitate, quaedam ob singulos ciues, quibus vniuersitas constat. Sic e. g. quando dicimus vniuersitatem habere leges, aerarium, esse pauperem, diuitem, totam tunc vniuersitatem intelligimus. Quando autem dicimus, vniuersitatem esse fortem, virtute praeditam, prudentem, tunc intelligimus ciues, ex quibus componitur vniuersitas. Hinc vniuersitas quidem non exstinguitur, et hinc e. g. aerarii debitum non exspirat. At potest ciuitas esse desinere docta, fortis, virtute praedita.

Iam nemo negat, delicta quoque ad posteriorem classem pertinere, adeoque mortuis ciuibus, poenam qui meruerunt, poenam etiam exstingui.

num. 2. 3. Hinc facile patet, quo iure olim Alexander Persas bello aggressus

gressus sit, ex ea causa, quod maiores eorum Graeciae vastitatem intulerint. Eorum enim nemo tempore Alexandri superat, qui cum Graecis bellum gesserant. Unde Arrianus hunc obtentum grauiter exagitat.

Deinde hinc facile deciditur quaestio, *quid de reliquis huius generis bellis vindictae causa susceptis sentiendum sit?* omnia enim iniusta sunt nisi duobus casibus: 1. si posteri eundem hostilem animum continuant, quod Alexandrum quodammodo defendit. 2. si lis de satisfactione adhuc durat, eumque prae fracte negant posteri. Tunc enim et facti maiorum participes sunt.

§. 9.

Pergimus ad posteriorem capitis partem, ubi agitur *de poena et cum innocentibus communicata*. Sed iam supra diximus, *proprie poenam numquam sequi alios, quam auctores delicti*: Delictum enim et poena, malum passionis et malum actionis sunt correlata, quae se mutuo ponunt et tollunt. Ergo videndum, quo sensu dicatur *poena* et cum innocentibus communicari?

§. 10.

Omnis *poena* est malum passionis. Hoc in dolore vel damno consistit. Dolor vel damnum aliquando directe insiguntur, quando alicui ius proprium, vel quod ex officio perfectio ipsi debebatur, aufertur, e. g. vita, opes, fama: vel indirecte, seu per consequentiam, quando aliquis amittit, quod iure improprio seu ex officio imperfecto debebatur, vel quando aliquis tam non habet, quod habiturus fuisset, si hoc vel illud non obstaret.

Circa prius notatur regula. *Dammum omne, quod praeter meritum datur, iniuria datur*, e. g. si rector ciuitatis famam, vitam, bona aufert, ad quae illis conferuanda iure perfecto tenebatur.

De posteriore casu notanda regula; *Qui iure suo utitur; nemini facit iniuriam, quamuis alter ideo damnum per indirectum sentiat*. Elegans exemplum est in puteo, quem in meo fodio; hic nullam alteri facio iniuriam, quamuis venae alterius putei incidantur.

Hinc facile deciditur quaestio, *an excusari possit, poenam et mun. 1.*

cum liberis, posteris per indirectum communicari? e. g. bonis patris confiscatis. Resp. 1. Liberi quamdiu bona ipsi nondum possident, habent tantum ius imperfectum. 2. Damnum in his datum non directe, sed indirecte datur, per §. 10. n. 1. 3. At qui circa haec damna valet regula: *qui iure suo vititur, nemini facit iniuriam*. Ergo et magistratus nemini facit iniuriam, puniens delinquentem, quamvis effectus poenae et ad innocentes perveniat.

Interim humanius omnino est, posteritati delinquentium parcere, et ei saltim tantum relinquere, ne ad mendicitatem sine merito adigantur. Verum quod humanius est, id non statim, si omittatur, pro iniusto habendum.

§. 11.

Deinde et altera distinctio aequae utilis est. *Aliud patitur homo ex causa peccati, aliud occasione eiusdem*. Simile quid in contractibus animadvertimus. Alius solvit ex causa contractus, quia debet, uti debitor, emtor, conductor; alius occasione eiusdem, veluti fideiussor, qui tamen nihil accepit, ex quo oritur obligatio. Sed sufficit, eum pro alio promisisse.

Eodem modo se res habet in delicto. Alius ex causa delicti tenetur ad malum passionis ferendum, veluti delinquens. Alius occasione delicti, ob sponsonem pro delinquente, si quis e. g. pro delinquente de iudicio sisti vel iudicatum solvi satis dedit. Sufficit enim, eum satisfecisse.

Alia quaestio est, *an haec obligatio ad mortem usque extendi possit?* Veteres hic admiscere vades; et notum est, exemplum Damonis et Phidiae, quorum alter pro altero supplicium capitale subire et volebat, et cogeatur, nisi alter rediisset in tempore.

Eodem pertinet ius obsidum, de quo singularis exstat SCHILTERI *Dissertatio*. Nam saepe promissa denegante principali obsides licet innocentes ad supplicium raptos novimus. Exemplum habet ipse GROTIUS *lib. III. cap. 4. §. 14.*

Id ergo iure fieri recte negat Grotius. Alia enim sunt; in quae homines potestatem habent, uti commoratio in patria, fortunae, cet. in alia Deus iis nullam dedit facultatem, nullum arbitrium, ut in vitam, membra.

Ergo

Ergo obligare se quidem potest homo ad soluendam multam, subeundum exilium ad carcerem ferendum pro alio. Quamvis enim nihil deliquerit, sufficit tamen, eum promississe.

At non potest, se obligare ad supplicium capitale, ad mutilationem membrorum, cet. Quum ergo alteri in insontem ius nullum sit, nisi ex promissione vel sponsione eius, sequitur, ut et illi nullum ius sit supplicium huius modi infligendi.

§. 12.

Ergo verissimum manet axioma, *neminem innocentem ob delicta aliorum puniri posse, ne parentes quidem ob delicta liberorum, vel liberos ob delicta parentum.*

Nam 1. *delictum* et *poena*, ut dixi, sunt correlata, adeoque se mutuo ponunt et tollunt. 2. *Poenae* infliguntur ob *meritum*. *Meritum* est personale, et hinc personam non egreditur. 3. Sic nec finis poenarum obtineri posset. Quod enim exemplum esset, plecti innocentem. Sic sane non emendantur homines, sed potius eo adducuntur, ut credant, perinde esse, nocens aliquis sit, an innocens.

§. 13.

Id pluribus veterum testimoniis confirmat Grotius, veluti Hieronymi, Augustini, Dionis, Chrysostomi, Philonis, Senecae. Sed quid opus testimoniis ubi rationes sufficiunt, paullo ante a nobis suppeditatae. Quare potius ad dubia quaedam tollenda progredimur.

§. 14.

Sed opponunt alii huic doctrinae de non plectendis liberis *num. 1.* delinquentium exemplum ipsius Dei, poenam non solum prauis, sed et eorum posteris in tertiam quartamque usque generationem comminantis. *Ex. 20.* quin et poenam hanc reuera infligentis posteris Saulis, Ieroboami, Achasi. 2. *Sam. 21. 1. Reg. 14. 2. Reg. 8. 9.*

Sed resp. 1. Falsum est Deum punire posteros innocentes. Nec enim iustitia patitur, malum passionis, sine malo actionis vlli mortalium inferre.

2. Si verum esset, Deum punire liberos ob delicta parentum, deberet eos damnare, quae propria poena peccati est fecun-

cundum infinitam Dei iustitiam. Id vero se facturum numquam minatus est.

3. Dicit ergo Deus, se visitaturum peccata parentum in liberis, id est, se liberis calamitates temporales immisurum. Id vero potest Deus etiam piis, innocentibus; filiis suis, salva iustitia, vi istius domini eminentissimi, quo potest pro lubitu bona et mala temporalia inter homines dispensare.

4. Addit Grotius, quod exempla doceant, Deum hoc iure tantum uti in delictis gravissimis, e. g. idololatria, sacrilegiis, perituro, quae in ipsius Dei contumeliam vergant.

Sed hoc argumentum parum ad rem facit. Poena enim proprie sic dicta nec ob graviora nec ob leuiora delicta in vllum innocentem cadit.

num. 3. 5. Paulo maioris momenti est obseruatio sequens, quod in nouo testamento nulla huius generis comminatio de poena posterorum exstet. Iam notum est, V. T. potissimum virgere promissiones felicitatis temporalis in terra Canaan perfruendae: nouum autem testamentum primario tendere ad promissiones spirituales vitae aeternae.

Inle ergo sequitur comminationem hanc legalem tantum pertinuisse ad felicitatem illam in Cananitica terra perfruendam. In hac vero poterat Deus salua iustitia, tamquam supremus Rex et Dominus liberis ob pietatem parentum pinguio-rem, ob scelera minorem portionem adsignare. Nec tamen dixeris, hanc proprie esse poenam, quamuis vulgus forte ita loquatur.

num. 4. 6. Sed praecipuum argumentum est in dictis illis Ezechielis, ubi negat Deus, liberos ferre debere delicta parentum, vel parentes liberorum, sed vnumquemque ob proprium peccatum moriturum esse denunciat. Inde sane luculenter patet, Deum proprie non punire innocentes posteros, nisi 1. vel continuent delicta paterna et auita, uti plerumque fit, vel 2. nisi poenam vocare velis castigationem, quae non ob malum praeteritum, sed ob bonum futurum, nempe emendationis causa infligitur.

§. 15.

Inde ergo colligit Grotius rectissime, *dirissimas esse leges humanas; quae liberos rebellium supplicio extremo addicunt, uti exem-*

exemplum habemus apud Persas *Dan. 7. 22.* qui et ipsos cognatos, et vniuersam familiam deuocabant, vt eo tristiores perirent rebelles. Quis enim iustum esse dicat supplicium innocentum?

§. 16.

Sed posset quis obiicere, ergo etiam iniustam esse legem. Iam dirisimam si *vnquam C. ad L. Iul. Maies.* quia liberos perduellium hereditatibus et honoribus excludit.

Resp. negari non posse, legem satis seueram esse: sed ideo dici non potest iniusta. Nam iam supra distinximus inter damnum directe et indirecte datum. Illud vocauimus, quod aufert id, quod iure perfecto competit: hoc quod aufert ius iure imperfecto competens, qualia iura procul dubio sunt hereditates et honores. Ergo si illis liberi perduellium excluduntur, non poena ipsis infligitur, sed damnum indirecte patiuntur, adeoque valet regula: Qui iure suo vitur, is nemini facit iniuriam.

§. 17.

Idem ergo de *subditis* dicendum, si *delirantibus regibus ple-* num. 1.
untur Achii. Poenam directe non patiuntur. Nam 1. poena inter gentes aequales non habet locum, 2. nullum hic est malum actionis, cuius correlatum poena esse possit, nisi, vt supra diximus, consensus subditorum in actus rectorum tyrannicos accesserit. Sed damnum ferunt indirecte. Ergo dum iure suo vitur princeps bellum gerendo, nemini facit iniuriam.

Obiici posset exemplum diuinum. Deus enim, ceu notum, num. 2.
ob delictum Dauidis triduanam pestem immisit subditis, quos ipse Dauid innocentes fatetur, dum dicit: *Ego peccavi, quid istae oves fecere?*

Sed resp. non hic puniuntur subditi, sed Dauides. Nam subditi moriuntur, et quidem iussu Dei, quem penes vitae necisque arbitrium est. Quemadmodum ergo non dicimus proprie: Deum puniuisse infantem, qui mortuus ex utero matris prodit, nisi quatenus generatim mors est peccati stipendium, ita nec subditi Dauidis dici possunt poena adiecti, quia mortui, siquidem et piis et infantibus moriendum. At punitus est Dauid, dum subditis priuatus est.

§. 18.

§. 18.

Idem dicendum Grotius monet de ciuibus et subditis, qui in delictum vniuersitatis non consenserunt. Sed quum de his iam supra actum sit, nihil est, quod hic addamus.

§. 19.

Id vero quaeri meretur, *cur heres, qui ob debita antecessoris teneatur, non item teneatur ob delicta eiusdem?*

Sane vtraque est obligatio, illa ex facto licito, id est, ex conuentione, haec ex illicito, id est, ex delicto. Ergo videtur vtriusque par ratio esse.

Sed respondetur magnam subesse differentiam. Contrahimus de rebus in patrimonio existentibus. Ergo obligatio ex contractu aequè ab herede ac ipso contrahente potest adimpleri, ex bonis nimirum contrahentis, quae ad ipsum peruenerunt. Obligatio autem ex delicto non afficit bona, sed personam delinquentem. Quae vero mere sunt personalia, ea cum persona expirant. Quod adeo verum est, vt nec conuentiones, quae circa personam ineuntur, ad posteros transeant, e. g. sponsalia, societas, mandatum, cet.

§. 20.

Sed obiici posset, *nonnumquam tamen et heredes ad poenam teneri*, e. g. si defunctus in multam iam condemnatus moritur, tunc enim multam illam et heres tenetur exsoluere.

Sed respondetur. Heres non tenetur, nisi poena mutata sit in aliam obligationem. Sane defunctus tenebatur ad poenam pecuniariam. Eius respectu illa multa vera poena fuisset. Quum vero illam non soluerit, illa multa transit in aliud genus obligationis, nempe in aes alienum. Illud vero et heres exsoluere tenetur. Soluit ergo hanc pecuniam heres, in quam defunctus condemnatus fuerat, non tamen soluit tamquam poenam, quia ipse nihil deliquit, sed tamquam aes alienum.

CAPVT

CAPVT XXII

DE CAUSSIS INIVSTIS.

§. 1.

Causae belli vel iustae sunt, vel iniustae, vel dubiae. *num. 1.*
stae sunt vel *iustificae*, ob quas bellum iustum geritur,
 quales ex mente Grotii sunt tres, defensio, exactio eius, quod
 nobis iure nostro debetur, et poena, quamvis tertiam cum re-
 centioribus merito reiiciamus; vel *suasoriae*, quae in animo la-
 tent bellum gerentis, quamvis alia causa iustifica proferatur.
 Vnde et praetextus vocari solent, quia causae iniustae plerum-
 que iusta causa praetextitur, et obtenditur, ne in oculos in-
 currat.

Rem exemplis illustrat Grotius. Alexander bellum gerebat
 cum Persis, nulla hic ex 3. causis a Grotio proditis habebat *num. 2.*
 locum. Nec enim Darius Graecos vexabat, vt defensione opus
 esset, nec Graecis quidquam debebat, quod bello repetendum
 esset, nec delictum admiserat, quod armis videretur vindican-
 dum. Ergo omnes veteres consentiunt, veram belli causam
 ex parte Alexandri fuisse cupiditatem gloriae imperii, diuitia-
 rum, Persicae militiae statum miserrimum. Quia tamen hae
 causae aperte iniustae erant, hinc praetexebat aliam in spe-
 ciem iustiores, nempe ultionem iniuriarum a Xerxe Graecis il-
 latarum.

Sic Caesari bellum civile inchoanti, vere finem fuisse pro-
 positum, vt opprimeret libertatem patriae, euentus docuit. Sed
 ne haec causa iniustissima innotesceret, praetexebat defensio-
 nem contra Pompeii potentiam.

Omnes ergo huius modi causae, quae huiusmodi praetex-
 tu velantur, vere iniustae sunt. Et de his agitur *cap. 22.* quem-
 admodum de dubiis *cap. 23.*

§. 2.

Eae causae iniustae iterum duorum generum sunt. Aut enim
Heineccii Praet. Grot. K k k bellum

bellum geritur ex nulla causa, aut ex causis minus sufficientibus.

Ex nulla plane causa geri solet bellum ab illis, qui periculorum ob ipsa pericula auidi sunt. Quemadmodum Tacitus de veteribus Germanis refert, eos fere perpetua inter se bella gessisse, nec tamen ea re opes vel imperii latitudinem quaesivisse: sed tantum quia periculis delectarentur. Tale quid et de Alanis narrat Ammianus.

Huiusmodi sane bella recte *ferina* vocat Grotius. Nam 1. quid crudelius, quam in crudelitate voluptatem quaerere? 2. Huiusmodi homines ipsis latronibus sunt deteriores, quia ne hi quidem occidunt, nisi saltem spes praedae affulgeat. 3. Bellum est contentio vel concertatio societatum liberarum. Contendere autem et concertare, quum nulla sit controuersia, absonum et sanae rationi aduersum est.

§. 3.

num. 1. Alii causas quidem belli habent, sed *insufficientes*, suasorias tantum, non *iustificas*, quamvis aliquando et has prae se ferant. Idem hic contingit, quod in hereditatibus priuatorum. Si alius quam verus heres possidet hereditatem, tunc ille qui possidet, aut pro herede possidet, id est, dicit se heredem esse, aut pro possessore, id est, quaesitus, cur possideat, nihil aliud respondere potest, quam *possideo, quia possideo*. Iste quasi causam possessionis iustificam allegat, hic illam non curat. Eodem modo bellum gerentes modo dicunt, se id defensionis sua causa gerere, vel iuris sui repetendi: modo solo praetextu contenti causam iustificam non curant.

num. 2. Huiusmodi exempla complura exstant. Inprimis ita bella sua defendunt barbari. Sic Brennus expeditione e Gallia in Graeciam et Asiam ipsam suscepta, causam quaesitus, cur aliena invaderet, respondit omnia esse validorum. Ita et Hannibal increpatus, quod contra foedus iniustum bellum gerat, respondit: pro foedere proque iusticia est ensis.

§. 4.

Iam ergo expediendae sunt insufficientes illae bellorum causae. Vbi primo generatim observat Grotius 1. *summos imperan-*

res plerumque duobus nominibus pacis et belli tamquam nummis uti, non ad id, quod iustum est, sed ad id, quod expedit. Ex quo consequitur, ut non sufficiat audire praetextum belli, sed genuina causa expendenda sit. 2. Observat Grotius, bellorum causas iniustas facile intelligi, quum de causis iustis constat. Quomodum enim data linea recta, omnes, quae quocumque modo ab illa directione discedunt, curvae esse intelliguntur: ita, ubi scimus, quae causae iustificae bellorum sint, nempe defensio et repetitio iuris sui, per se consequitur, ut omnes reliquae, quae proferuntur bellorum *causae, iniustae* habeantur. Eas iam videbimus.

§. 5.

Talis *iniusta causa* est ex vicini potentia. Nam 1. ita nullum est ius controuersum, ob quod bellum geratur: et aequum est bello petere potentem, quia potens est, quam litibus in re publica vexare vicinum, quia me ditior est. 2. Potentia sola mihi non periculosa est, nisi de animo laedendi constet. Sic Heluetii habent potentissimos vicinos, imperatorem et regem Galliae: sed quum certissimi esse possint, neutrum de opprimenda Heluetia inire consilia, omnino non essent excusandi, si ideo bellum alterutri intentarent. 3. Si potentior est vicinus, mihi ius est, mihi praesidia circumponere, vrbes munire, militem alere, foedera cum aliis potentibus pangere, sed ideo non sequitur, ut statim mihi liceat ad bellum ruere.

Ex quo consequitur, ut ob munitionem nouam exstruendam, alter alteri bellum non inferat. Qui enim iure suo utitur, nemini facit iniuriam. Exceptio tamen est, 1. si ex huiusmodi castellis nobis immineat periculum, vel maximum incommodum. Sic semper Basileenses conqueruntur de munimento Hunningensi, Basileae tam propinquo, ut inde tormentis peti possint. 2. Si foedus obstat vel pactum. Ita aliquoties cum duce Lotharingiae pactus est rex Galliae, ne nouum exstrueret munimentum. Hinc non tam indignabatur imperator, quod postremos dux Mantuae urbem suam nouis operibus munitet, quam quod istum propugnaculum daret Gallis custodiendum. Vnde

et in electorem Coloniae indignatio Caesaris exarsit; quum Bonnae praesidium Gallicanum induceret.

§. 6.

Iniusta quoque et insufficiens belli causa est II. sola utilitas. Quum Russi bellum inferrent Suecis, inter alios praetextus et hic erat, quod opus Russis sit portu, quem nec precibus nec pretio impetrare potuerint a Suecis. Haec sane vix excusanda. Nam 1. sic ad sententiam Epicuri delabimur, cui sola utilitas iusti prope mater et aequi videbatur, quam pestilentissimam doctrinam in prooemio profligauimus. 2. Quod mihi prodest; et alteri non nocet, ad id obligatus est vnusquisque, id est, ad officia innoxiae utilitatis, e. g. vt patiar lumen de lumine meo accendi cet. non autem ad id, quod sibi vel alteri nocet; et mihi prodest. 3. Eodem modo et furta, rapinae, latrocinia poterunt defendi, quae omnino profunt furibus, raptoribus, latronibus.

§. 7.

Tertia causa iniusta est III. denegatio matrimoniorum, si alioquin est vxorum copia. Nam 1. nuptiae fiunt consensu. Consensus autem debet esse vltroneus, non coactus. 2. Multae possunt esse iustissimae causae denegandi alteri filiam, veluti religionis et morum diuersitas, lites de futura hereditate cet. Si iustae sunt hae causae, sane qui iure suo vitur, nemini facit iniuriam.

§. 8.

Eiusdem porro commatis est IIII. *amor mutandae sedis.* Sic Cimbri ideo bellum inferebant Romanis, quod hi illis nouas sedes in aliqua Romani imperii prouincia negabant. Quin pleraque bella inter Romanos et Germanos ex hac ipsa causata nata sunt. Haec quoque causa iniustissima. Nam 1. quae nulla sunt, cedunt occupanti, non quae iam ab aliis occupata. 2. Officium perfectissimum ex dominio resultans est, vt teneamur alterum in dominio suo defendere, eumque in possessione rerum suarum non turbare. 3. Generalissimo iuris naturalis
prin-

principio id quam maxime repugnat, quod dicit: *Quod tibi non vis fieri, alteri ne feceris.*

§. 9.

Nec magis defendi potest bellum V. *inventionis* titulo susceptum, quem titulum imprimis urgebant Hispani, occupantes Americam. 1. Inventionis enim iure acquirimus res vel nullius, vel pro derelictis habitas: non quae iam dominum habent. 2. Eodem modo Americani inuenire potuissent Europam. Si illam occupassent, de illata nobis iniuria merito essemus conquesti. Iam quae tibi non vis fieri, alteri ne feceris.

§. 10.

Iniustissima quoque est belli *caussa* VI. *diuersitas religionis, et morum*, e. g. quod gens quaedam idololatriae dedita, quod in ea sint anthropophagi, polygami. Quam causam iidem Hispani urgebant. num. 1.

Nam 1. vt recte obseruat Grotius, *ad dominium non requiritur virtus moralis aut religio, sed sufficit aliquem esse hominem.* Hinc impio res suas non magis furto surripere possum, quam pio. 2. Dominium in res creatas Deus dedit hominibus, non Christianis in specie, non piis. Hinc Grotius addit obseruationem, si daretur populus plane amens et ratione destitutus, ei omnia praeter alimenta posse auferri. Sed haec obseruatio partim absona est, quia populus ratione destitutus, tamquam contradictio in adiecto ne concipi quidem potest, partim falsa: nam et furiosum manere rerum suarum dominum, ipse supra Grotius fassus est, quidni etiam populus amens?

Hinc iniustae fuere irae Graecorum in barbaros, quos tamquam naturaliter sibi hostes auersabantur. Nam 1. id somnium notebatur praeiudicio, quod praeter Graecos nulli mortales intellectu humano instructi sint, 2. hostis sine hostili animo concipi non potest. 3. Saepe quo minor est intellectus cultura, eo maior probitas. Scythae sane sanctitate morum Graecos virtute longe superabant. num. 2.

§. 11.

Iniusta porro causa est VII. Libertatis desiderium. Nam 1. libertas quidem est res inaeestimabilis, sed non naturae humanae necessaria. 2. Libertas naturaliter omnibus data est, sed ei renunciari potest ab vnoquoque. Id si factum, non datur regressus ad libertatem naturalem. 3. Nemini ius quaesitum auferendum, ergo nec principi ius in subditos iuste quaesitum. 4. Ipse Apostolus intempestiuum hoc libertatis desiderium improbat in seruitute priuata. 1. Cor. 7. 21. quanto magis in ciuili, quae illa multo est tolerabilior.

§. 12.

Iniusta causa VIII. est voluntas regendi alios tamquam natura seruos. Aristoteles primus existimauit dari seruos natura. Omnes enim, qui se ipsos regere nequeunt, ob insignem stupiditatem, a natura ad seruitutem destinatos aiebat. Hoc scitum placet et principibus quibusdam, qui saepe satis iustam bellandi causam sibi esse putant, si gens, cui arma minantur, sint natura stupidi et se ipsos regere nesciant. Sed 1. falsum est illud Aristotelis principium. Quamdiu enim quis ratione utitur, se ipsum regere posse praesumitur, nec si furiosus sit; ideo seruus sit, quamuis ab alio regatur. 2. Beneficium nemini obtruditur. 3. Nec nobis vlla obligatio incumbit regendi stultos, qui regi nolunt.

§. 13.

NUM. I. Sunt ex glossatoribus veteribus quidam, vti Bartolus, qui imp. Romanorum ius tribuunt in vniuersum mundum, quia 1. in legibus vocetur mundi dominus, *L. a quoque D. ad L. Rhod. de iact.* 2. quia in sacra scriptura Romanum imp. vocetur orbis vniuersus, (*et in xpo*), *Luc. 2. 1.* 3. quia ita loquantur auctores classici, vti PETRONIVS: *orbem iam totum victor Romanus habebat.*

Quaerit itaque Grotius, si imp. hodiernus ex ea principio velit gentibus aliis bellum indicere, an non et haec VIII. iniusta belli causa esset?

Equidem frustra mouetur haec quaestio, quum imperator non sit tam simplex, ac olim Bartolus. Sed si tamen forte impera-

peratorum quisquam ita ratiocinaretur, omnino iniustissimus esset. Nam 1. ex titulo ad rem nulla consequentia. 2. Romanum se mundi vel orbis dominos appellarunt, intellexere orbem Romanum, i. e. provincias Rom. imperii. 3. imperatori non plus in alienas provincias licet, quam aliis regibus et imperatoribus.

Dantes Aligerius, Italus Gibellinus, Bartoli sententiam stabilire conatur eo argumento, quod id expediat humano generi, si orbis vniversus vni subesset, tunc enim cessare oportere bella inter principes. num. 1.

Sed resp. 1. tunc bella gesturi essent subditi, quia vnus non sufficeret orbi vniverso regendo, ob hominum numerum et locorum distantiam, 2. Si vel maxime vtile esset huiusmodi imperium, tamen non esset vlli inuito obtrudendum. 3. Nec sequeretur, vt praecise imp. Romano, ac non alii competeret.

Si quis dicat, huic pinguius ius vel ideo esse, quod antecessores eius magnam partem terrae tenuerint: resp. illas partes dudum amissas esse et ab aliis iusto titulo possideri. Fuimus Troes, fuit Ilium et ingens gloria Teucrorum.

§. 14.

Pontificii ius in vniversum orbem non quidem imp. sed ecclesiae Romanae tribuunt. Et hinc Hispani prae se tulerunt, omnibus aliis titulis deficientibus sibi sufficere donationem Americae a pontifice Rom. factam, quia ecclesiae competat imperium in vniversum orbem. num. 1.

Speciosa eam in rem adferunt argumenta, veluti, quod ecclesia ex intentione Christi sit catholica, et sic diffusa per vniversum orbem, quod omnes pater filio gentes donauerit, quod Christi imperium extendi debeat a mari ad mare.

Sed id imperium plane fictitium. Nam 1. ad ecclesiam non pertinent gentes infideles, sed Christiani. *Quid ad nos illi, qui extra sunt.* 1. Cor. 5. 12. 2. Alia est ecclesia, aliud imperium. Illa est in imperio, sed non imperium.

3. Christus negauit regnum suum esse de hoc mundo. Io. 18. 36. Ergo nec imperium saeculare in gentes sibi arrogauit, nec id dedit Apostolis et ecclesiae. 4. Idem nec media illa propagandi ecclesiam commendauit, quibus vti solent homines ad propaganda imperia, vt bellum, arma, foedera, sed num. 2.
pre-

preces, praedicationem verbi, cet. 5. Ecclesia non destruit politias. Vide elegantem Augustini locum.

num: 3.4. 6. Episcopus non sit percussor. 1. Tim. 3. 2. *Potentes imperant, vos autem non sic.* Ergo sane episc. Rom. non potest vel bellum gerere, vel reges ad bellum concitare, ad propagandam ecclesiam. Quod enim quis per alium facit, id ipse fecisse videtur.

Vt paucis dicamus, res tam ridicula est, vt Americanus quidam rex, quamvis non adeo sagax, dixerit, tamen stolidum esse oportere pontificem, qui regna donet, quae non sua sint.

§. 15.

Iniusta belli causa est X. *spes implendi vaticinium diuinum*, quod hic vel ille pro sensu suo fanatico explicat. Sic ante centum et quod excurrit annos, Poniatovius Drabitus et Kotterus varias spargebant visiones et prophetias, quibus praedicebant, domui Austriae imminere exitium, ecclesiam per orbem propagandam, Antichristum Rom. destruendum, quae vaticinia tunc coniunctim edebat Theologus reformatus magni nominis, AMOS COMENVS, sub titulo: *Lux in tenebris.*

Sane si quis tunc his deliriis induci se passus esset ad arma corripienda, procul dubio bellum gessisset iniustissimum.

Nam 1. difficile est discernere prophetas et pseudopphetas. 2. Difficilius, sine spiritu prophético vaticinia interpretari, 3. praedictio, sine mandato non potest tranquillam reddere conscientiam. Sic Iudaeis praedicta erat certa liberatio ex Aegyptiaca servitute, et ex captiuitate Babylonica, nec prius tamen libertatem adfectare iure poterant, quam Deus iuberet.

§. 16.

Iniusta belli causa est XI. *exactio officiorum iure imperfecto ex sola virtute, bonestate, decoro debitorum.* Quemadmodum enim haec officia in foro actione, ita in statu naturali bello extorqueri non possunt. Hinc non erat iustum bellum Rom. in regem Cypri, tamquam ingratum. Gratitude enim est officium imperfectum, nisi sit praegnans, cum iniuria aduersus benefactorem coniuncta.

§. 17.

§. 17.

Denique claudit hoc caput Grotius addita obseruatione, *num. 1.2.* *causam belli aliquando esse iustam, et tamen ipsum bellum iniustum.* Nam virtus non solum in actione externa consistit, sed in animo. Vnde bellum iniustum geritur

1. Si in animo imperantis latet causa arcana, quae ipsum magis mouet, quam iusta causa, e. g. ambitio, studium propagandi imperium.

2. Si bellum non geritur iusto modo, e. g. violando pacta cum hoste inita, inuadendo simul socios, crudelitati militum indulgendo.

Sed sub finem recte obseruat Grotius, distinguendum inter *num. 3:* iustitiam internam et externam. Iustitia interna respicit ad forum conscientiae, externa ad homines. Ergo coram hominibus iustum est bellum, modo iusta causa adsit: coram Deo autem haec non sufficit, nisi et animus ab omni prauo affectu purgatus sit, et bellum ipsum iuste et secundum rationem geratur, quia actiones vere bonae non materialiter tantum, sed et formaliter debent conuenire cum lege diuina.

CAPVT XXIII.

DE CAUSSIS DVBIIS.

§. 1.

Caput hoc constat duabus partibus. Priore agitur de *dubitatione generatim, et quid in dubio agendum sit. §. 1-5.* Posteriori de *caussis belli dubiis, an eae ad bellum gerendum sufficiant. §. 6-fin.*

I. De *dubitatione* 1. generatim obseruat Grotius, eam in *rebus moralibus frequentissimam esse.* Quod verum est. Sed ratio, qua vitur, non est maximi momenti. Nam dicit hanc dubitationem inde esse: quod moralia non aequae certa sint, nec tam sub demonstrationem cadant, quam physica et mathematica. Sed hoc artis principium dudum explodere H. Conringius et P. Heineccii *Prael. Grot.* L11 fen:

fendorffius. Vbi enim sunt certa principia, ibidem sunt certae et demonstrativae conclusiones. In moralibus sunt certa principia. Ergo sic aequè certum est, neminem laedendum esse, ac bis duo esse quatuor.

Sed vera ratio est adplicationis practicae difficultas. Actiones enim hominum tam variis coloribus dilutae sunt, ut non statim pateat, quodnam morale principium hic sit applicandum. E. g. contra legem diuinam nihil esse agendum, certissimum est, sed an e. g. saltare contra legem diuinam sit, potest dubitari, quia saltatio est actio, quae aliis indifferens, apud alium cum multis voluptatibus coniuncta esse potest.

§. 2.

num. 1. 2. Iam porro quaeritur, *quid in huius modi dubio faciendum.* Recte Grotius defendit regulam: *Contra conscientiam dubiam nihil est agendum.* Ergo suspendenda tamdiu actio, licet forte in se bona et iusta, donec dubium istud animo euulsum sit. Alias qui agit peccat, licet forte actio in se plane bona vel saltem indifferens sit.

Falso autem hanc regulam probat ex *Rom. 14. 23.* Quum ibi per fidem non intelligatur certum animi iudicium, sed fides saluifica. Ex ea quidquid non sit, coram Deo peccatum est.

num. 2. Vera ergo ratio est, quia contra conscientiam dubiam agere idem est, ac Deum ipsum contemnere et ludibrio habere. Id enim agit, qui ita ratiocinatur: Nescio, an Deus velit, an nolit hoc fieri; tamen siue velit, siue nolit, faciam.

Addit sub finem Grotius exceptionem. *Si scilicet res alterius necessario agenda sit, et utraque tamen iniqua videatur.* Tunc enim ex 2. malis putat eligendum minus, ex 2. iniquis minus iniquum.

Id vero perspicue falsum. Nam 1. si vera est necessitas, id quod ex necessitate sit, non est minus iniquum, sed aequum, e. g. si quis moderamine inculpatae tutelae utitur. 2. Regula illa, ex duobus malis eligendum est minus, non pertinet ad mala moralia, sed ad physica.

§. 3.

Iam si contra conscientiam dubiam nihil agendum, existima-

re:

re quis posset, ita fore, vt nulla actio tunc explicetur. Sed id recte negat Grotius, quia dubium plerumque post tempus aliquod dissipari solet, et mens in alterutram partem esse procliuor, et quidem

1. vel argumentorum pondere, quod antea non statim intellexerat tantum esse, vel

2. auctoritate. Si enim huius vel illius viri sapientis, in quo magnam collocamus fiduciam, auctoritas accedat, facile euellitur dubitatio, quae antea animum in diuersa trahebat.

§. 4.

Sed quaeritur, an auctoritas illa tranquillam reddat conscientiam? Iesuitalae id affirmant: et inde eorum probabilissimus, de quo alio loco egimus. Putant enim si quis quid agat, in se iniustum et malum, eum tamen in conscientia excusari, modo aliquot doctorum suffragia pro se militare videat.

Grotius noster paullo cautior est, sed tamen existimat, simpliciores audire debere sapientum consilia. Si id verum, sane non peccant, si secundum illa consilia agant. Et inde sequitur, vt excusandi sint, licet male agant.

Sed respondemus 1. falsum esse, quod dicunt Arles, Iesuitalae et Grotius, probabile esse quod tale videtur omnibus, vel pluribus vel sapientioribus. Id enim in rebus facti potest esse verum, at in doctrinis probabilitas non nascitur ex auctoritate, sed ex rerum attributis et effectibus, vti recte docuit in Logica sua Clericus. 2. Nemo rationes in conscientia reddit ex aliorum iudicio, sed ex suo, adeoque illud non excusabit. 3. Tenemur quidem aliorum sapientiorum consilia audire, sed non statim sequi; adeoque excusatur quidem qui audit, sed non semper qui sequitur.

§. 5.

Quid vero si occurrant dubia, quae vtrunque sunt eodem argumentorum pondere instructa? Tunc distinguit Grotius inter res minoris et maioris momenti. In illis eligi posse putat sine vitio, quidquid libeat: in his eligendum ait, quod tutius.

Sic e. g. si reus homicidii pro se habeat duos testes, qui dicant non illum, sed Maeuium occidisse: duo autem testes aequè idonei affirmant illum omnino occidisse, neque vlllo alio

modo res ad liquidum perducı possit, (e. g. quia tortura in assı qua re publica non conceditur,) tunc eligendum est tutius, id est, reus potius absolvendus quam supplicio afficiendus, quia vita humana est res maximi momenti.

Sed fingamus pauperem cum diuite litigare de centum flo renis, res est minoris momenti: sed tamen non ideo iudici perinde esse debet, condemnare an absoluat.

Adeoque vera potius regula: *In dubio semper proniores esse debemus ad absolvendum, quam ad condemnandum, siue res sit minoris siue maioris momenti, quia tutius est absolvere debentem vel nocentem, quam non debentem et innocentem condemnare.*

§. 6.

II. Sequitur pars capituli altera de belli causis dubiis. Vbi 1. statim ex iis, quae antea diximus, sequitur axioma: *Quamdiu causa belli est dubia, tandiu illud non est suscipiendum.*

Hoc fluit 1. ex regula generali §. 2. *Contra conscientiam dubiam nihil est agendum.* 2. ex ipsa natura belli, quod est contentio de iure controverfo, et vel defensionis vel iuris nostri vindicandi causa geritur, vt supra dictum. Atqui quamdiu an alter nobis iniuriam faciat, dubium est, defensionı; quamdiu incertum, an nobis hoc vel illud debeatur, vindicationı locus non est. Ergo nec bello locus est. 3. Accedit, quod bellum sit medium iure suo potiundi admodum periculofum, anceps, et cum mille rerum publicarum et hominum cladibus coniunctum. Rem tam difficilem sine causa liquida suscipere plus quam ferinum est.

§. 7.

2. Quaeritur, quibus vero modis causae gentium dubiae ad liquidum perducantur, quum nullum habeant communem iudicem, sicuti privati? Resp. Grotius, id fieri posse.

1. Colloquiis. §. 7.

2. Arbitrio. §. 8.

3. Sorte. §. 9.

4. An ei bello repraesentatio? §. 10.

5. Regulis quibuldam. §. 11. 12.

in p. 1.

1. Medium est colloquium inter gentium legatos, imperatores, immo ipsos reges. Ita enim 1. laepe fit, vt facile lites terminen-

minentur. Non enim hic affectus dominantur, sed periculum imminens aequiora suadet. Vnde et ratio reddi potest, cur de maximis rei publicae negotiis facilius transigant rectores ciuitatum, quam theologi de controuerſiis circa religionem etiam leuissimis?

2. Medium hoc etiam est rationi maxime consentaneum: quia non possum de iure meo certo statuere, nisi et alteram partem audierim.

Accedit 3. ratio, quod si aequa per colloquium obtulimus, ^{num. 2.} etque altera pars non admittit, bellum insequens tanto iustius sit. Tentanda enim remedia mitiora, quibus non sufficientibus tunc ad grauiora deueniendum.

§. 8.

II. Medium est *compromissum* vel *arbitrium*. Nam quamuis ^{num. 1. &} gentes et summi imperantes nulli iudici subſint, potest tamen vnusquisque suo iuri renunciare, adeoque se subiicere aliorum arbitrio. Variis exemplis per numerum vtrumque demonstrat Grotius, et vſos esse veteres hoc medio, et cum fructu vſos esse.

Sed quamuis id verum sit, non tamen hoc medium difficultate caret. Nam 1. non facile reperitur inter gentes arbiter, qui vtrique parti placeat, et a quo metuendum non sit, ne alterutri plus iusto faueat. 2. Si arbiter decidit causam, nulla in promptu est exſequutio, si alter parere nolit. Et sic nihilominus res ad bellum deuenit. 3. Plerumque huiusmodi arbitria tantum inferuiunt alteri parti, cuius interest, tempus trahi, vt eo commodius possit se bello imminenti prae-parare.

Quod vero Grotius existimat, hoc officium tanto magis ^{num. 3.} incumbere Christianis ciuitatum rectoribus, id omnino verum est, non quidem ob rationem quam ex loco Paulli ducit Grotius, qui huc plane non facit, sed quia religio suadere debet principibus Christianis, vt a bello, quantum pote, abhorreant, nec nisi mitioribus tentatis mediis ad illa ruant.

Consilium porro suppeditat Grotius, vt conuentus quidam ^{num. 4.} sint Christianorum principum et potestatum, in quibus gentium controuerſiae decidentur, ne statim ad bellum ruerent.

Sed hoc consilium 1. ad ius gentium non pertinet, quia

non quid vtile, sed quid iustum sit, considerat. 2. Nec magnae utilitatis futurus hic conuentus, quia non gauderet iure superioritatis, adeoque nec facultate exsequendi. 3. Nec fieri posset, quin hic ipse conuentus multas bello occasiones daturus esset. Plura suffragia vincere nequeunt, quia sic potentiores res publicas semper superarent impotentiores. Ergo maxima lis oritura esset de modo suffragandi, de iure dirigendi, de ordine inter delegatos seruando. Accedit 4. quod ob diuersitatem religionis semper in hoc ipso conuentu futurae essent factiones. Ergo certum omnino est, huiusmodi conuentum nec insitui posse, nec admodum vtilem fore.

§. 9.

Tertius modus vel III. medium est *sors*. In dubio enim 1. res optime Deo committitur. In eius vero manu est *sors*, et cadit illa, prout Deo visum. *Prou.* 18. 18. 2. Ita difficultates illae evitantur, quas §. superiore in arbitrio deprehendimus. Sors enim affectibus in transversum non rapitur, non magis fauet parti alterutri.

Si quis dicat, fortis euentum dubium esse, adeoque aequum qui iniustam causam habet vincere posse, ac qui iustam. Resp. aequum incertum esse belli euentum, nec semper iustos sequi victoriam. Quemadmodum ergo hoc casu in providentia diuina acquiescendum: ita etiam, si sors nobis non faueat. Sufficit causam nostram esse dubiam et illiquidam.

§. 10.

NUM. 1. Commendant aliqui IIII. medium, nempe *bellum repraesentatiuum*. Vnde ante omnia videndum, quid sit huius modi bellum. Iustum bellum est, si gentium exercitus concurrunt, et contendunt inter se. Ergo bellum repraesentatiuum est, si aliquot homines vtrunque committuntur, qui exercitum vtrumque repraesentent, et inter se certamen singulare committant, addita conditione vtra pars victoriam reportatura sit, ut ea pro domino alterius habeatur. Exemplum reperimus apud *Liv. lib. I.* ubi Romani et Albani exercitus iam in procinctu stantes tres vtrunque fratres tergeminos, illi Horatios, hi Curiatios hoc modo commiserunt.

Eam

Eam antiquam fuisse Graecorum consuetudinem, variis exemplis docet Grotius. Qualia sunt etiam illa, vbi ipsi belli duces hoc modo congressi sunt, vt apud VIRGILI *Aeneid. Lib. XI.* Aeneas et Turnus.

Simile quid apud veteres Germanos, inprimis apud Francos *num. 2;* obtinuisse monuimus, et ex loco Agathiae praeclare docet Grotius numero hoc 2.

Et inde etiam noua exempla haud pauca exstant, quod summi imperantes se prouocarunt ad duellum. Inprimis nota exemplum Caroli V. a Francisco I. rege Galliae et Caroli Guistaudi regis Sueciae a Christiano Daniae rege prouocati.

Quaeritur itaque, *an huiusmodi bellum repraesentatiuum licitum sit?* Nemo negabit. Nam 1. si iustus et numerosos exercitus committere possunt imperantes, quidni et paucos homines? 2. Ita pauca clade res transigitur, et ita multum sanguinis humani lucrificatur.

Sed alia quaestio est, *an utile et suadendum sit huiusmodi bellum?* Id nemo dixerit, 1. quia in iusto bello semel victus; foederibus vel noua felicitate rem suam potest restituere. Hic nulla spes melioris conditionis superest. 2. Quia si vel maxime quis victor exsistat, tamen certus esse non potest, an victus viribus adhuc integris compromissum sit impleturus. Adeoque hoc casu ex repraesentatiuo verum bellum nascetur.

§. 11.

Quinta ratio consistit in regulis quibusdam, quarum veritatem gentes omnes agnoscunt. Earum 1. est: *In dubio melior est conditio possidentis.* Pro possessore enim militat praesumptio, modo constet illam non violentam esse.

Ex quo sequitur 1. vt, qui petit, magis teneatur bellum euitare, et mitiora remedia tentare, quam, qui possidet. 2. Vt nemo possit alterum de possessione eicere, vel bellum ei inferre, nisi ius suum sit liquidum.

§. 12.

2. *In dubio is censetur in mala causa esse, qui in rei a neutro possessae diuisionem non consentit.* Si alteruter possideret, in dubio melior esset possidentis conditio, et sic ad diuisionem perueniri:

ueniri non posset. Si causa esset liquida, alterutri res tota deberetur, adeoque nec sic locus esset diuisioni. At ubi neuter possidet, ubi ius vtriusque dubium est, ibi aut sorte res dirimenda, aut diuisione. Illa vtriusque reiecta, hanc qui adspernatur pro iniquo habendus erit.

§. 13.

- num. 1. Finem huic capiti Grotius imponit elegantem tractans quaestionem: *an fieri possit, vt vtraque pars belligerans ex iusta causa bellum gerat?*

Grotius vocabulum *iustum* varie sumi docet. Modo iustum quid dicitur *ex causa*, si causa iusta sit, e. g. si bellum quis gerit ob defensionem aduersus adgressorem iniquum. Modo *effectus*, si effectus sit iustus et legibus conformis, e. g. si quis in bello seruat pacta, inducias, si non facit in captiuos, innocentes, cet.

Ratione causae iterum aut *specialiter* iustum accipitur, aut *generaliter*. Generaliter iustum est, quidquid rectum, e. g. occupare bello vrbes, occidere homines. Specialiter, quod ex omni parte rectum, et quidem tum ratione *operis*, vt actio in se legibus conformis sit; tum ratione *operantis*, vt is et eo animo agat; quo lex rem vult agi. Sic eleemosynas dare, iustum est ratione operis; at si quis eleemosynas dat ambitionis causa, iniuste agitur ratione operantis.

- num. 2. Iam facile rem explicabimus. In speciali acceptione ratione operis dici nequit, bellum vtrunque iustum geri. Nam 1. ex omnibus contradictoriis propositionibus altera semper vera, altera falsa. Adeoque 2. et inter litigantes semper debet aliquis iustam, alter iniustam causam habere.

Sed dici tamen potest, ratione operantis bellum vtrunque iustum aliquando geri, si res tam sit dubia et ambigua, vt vterque se iustam causam habere firmiter persuasus sit. Possumus hoc illustrire similitudine litis forensis, ubi vtraque pars litigans non potest iustam causam habere, quamuis contingere possit, vt vterque iuste litiget, et persuasissimus sit, se iustam causam habere.

- num. 3. 4. In sensu generali bellum vtrunque potest dici iustum, si vtraque pars culpa vacat. Sic e. g. saepe bellum exardescit ob iniuriam

riam ab antecessore datam, et iam irreparabilem. Hic qui vindicat iniuriam, iniustus dici nequit, quia iure suo vitur, nec tamen iniustus est, qui impugnatur, quia ipse non laesit, nec per eum stat, quo minus iniuria reparetur.

Denique si iustum ratione effectus consideretur, tunc omnino vterque bellum iustum gerere potest, 1. si illud legitimum iudicat, 2. si illud ita gerat, uti mores gentium exigunt, id est, si obseruat mores gentium humaniorum, (*la raison de guerre*) 3. si pacta seruet etiam cum hoste inita. Haec iustitia laudi cedit belligeranti, sed ipsum bellum non excusat.

CAPVT XXIIII.

MONITA DE NON TEMERE ETIAM EX IVS-
TIS CAVSSIS SVSCIPIENDO BELLO.

C Aput hoc ad ius gentium non pertinet, sed mere politicum et oratorium est. Multis enim argumentis suadet Grotius, ne supremae potestates temere ad bellum ruant, etiamsi iustam et liquidam causam habeant, nisi ea sit simul grauis et maximi momenti.

Nimirum hic idem dicendum, quod de lite priuatorum. Possunt hi iure litigare, si vel aliquot flueros alter debeat: sed nemo tamen prudens ob rem tam leuem litigabit, quamuis causa admodum sit liquida, quia remedium ipso morbo grauius est. Ita et nec iniustum esset bellum gerere ob iniuriam etiam leuissimam, sed prudentiae tamen regulis repugnat bellum gerere ob iniuriam leuiorem.

Hoc toto capite multis argumentis ex politica et theologia petitis probat Grotius, et sub finem *clades et mala bellorum* viuis coloribus depingit, ut absterreantur imperantes a pruritu bellandi, et arma non nisi urgente extrema necessitate corripiant. Nihil ergo causae est, cur hoc caput vberius explicemus, quum ab vnoquoque priuatim perlegi et intelligi facillime possit, et ad ipsum ius gentium, quod tractamus, nihil faciat. Potius ergo ad penultimum progredimur.

Heineccii Prael. Grot.

M m m

C A P.

CAP. XXV.

DE CAUSSIS BELLI PRO ALIIS
SUSCIPIENDI.

§. 1.

num. 1. **V** Idimus hactenus, quando vnusquisque populus pro se bellum in statu naturali suscipere possit, quaeque causae ad id suscipiendum sufficiant.

Atqui notum est, saepe imperantes bella gerere non tam pro se, quam pro aliis, et quidem vel a) pro subditis §. 1-3. vel b) pro foederatis §. 4. vel γ) pro amicis §. 5. vel δ) hominibus quibusvis §. 6-*fin.* De his ergo bellis pro aliis susceptis iam agitur, et primo omnium quaeritur, *quo iure bellum pro aliis geri possit?* Grotius hoc fundamentum ponit, *quod vnusquisque et alieni iuris executor sit.* Id vero falsissimum esse, vnusquisque videt. Niti-
tur enim falso isto principio, *quod in statu naturali par parem-
pellentem poenis coercere possit.* Quod supra cap. 20. satis prolixe destruximus.

Ergo verum fundamentum indagare facile possumus, modo respiciamus ad statum ciuilem. In statu ciuili absurdum iudicatur, alienas causas sine mandato in iudicio agere. Semper enim his auctoribus obstat exceptio: tua non interest. Ita et in statu naturali absurdum esset, si quis e. g. Hispanis ob iniurias Americanis illatas bellum inferret. Quemadmodum vero in statu ciuili conceditur et tertio interueniendi ius, si potest demonstrare, sua interesse. Ita et in statu naturali nulli genti denegari potest ius contra alterum bello interueniendi, modo liquidum sit, eius interesse.

Interest autem vel ratione subiectionis, vel confoederationis, vel amicitiae, vel communis vinculi humanae naturae.

num. 2.

I. Nostra interesse potest ob subiectionem: adeoque iuste bellum suscipitur pro subditis, si illi a gente externa iniuste tractentur. Quam enim imperantes subditis debeant defensionem non modo aduersus vim internam conciuium, sed et externam aliarum

aliarum gentium : non potest sane principii vel reipublicae vitio verti , si ad vindicandas subditorum iniurias arma corripit.

Exemplum historia Rom. suppeditat in bello Mithridatico. Mithridates , rex Ponti , edictum proposuerat , vt omnes Romani per Asiam negotiantes vna nocte interimantur. Eo facto Romani illi bellum internecinum intulerant. Vid. Cic. *Orat. pro lege Manilia.*

§. 2.

Quamvis vero bellum huiusmodi iustissimum sit : prudentia tamen suadet , ne ob quasvis leuissimas iniurias suscipiatur , e. g. si duo gentis nostrae mercatores ab extero rege rebus suis spoliati sint. Nam

1. Illud dum paucorum damnum vindicatur , id fit cum damno reliquorum ciuium multo maiore.

2. Toto superiore capite Grotius demonstrat , non suscipiendum esse bellum etiam ob causas iustas et liquidas , nisi eadem sint maximi momenti.

3. Quamdiu aliud superest remedium , non ad hoc violentum deueniri potest. Atqui hoc casu aliud superest remedium , nempe vt decernantur repressaliae , de quibus infra.

§. 3.

Quaestionem hic mouent doctores , *an ciuis innocens dedi possit , si num. 1. res aliter componi non possit , vel bellum immineat , cui non sinus pares ?* E. g. Simfonem petebant Philistaei ab Israelitis , quum plane esset innocens. Quaeritur an saluo iure dedi potuerit ?

Qui hanc quaestionem tractant , plerumque confundunt , res maxime diuersas. Alia enim quaestio est , *an ciuis huius modi deferi possit , alia an dedi in hostium potestatem.*

Deferi posse , recte contra Valsquium defendunt Soto et Grotius. Nam 1. ita ipsius securitati prospicitur. Quum enim hosti dedendus non sit , nos autem illi praesidio esse non possumus : quid ipsi suaderi potest salubrius , quam vt re publica nostra excedat , et alio loco tutiore delitescat. 2. Ciuis salutem ciuitatis suae antepone tenetur , quia bonum communionis semper praeferendum bono indiuiduali. Ergo nec potest vitio vertere rei publicae , propter eius personam periclitanti , si haec eum excedere ciuitate iubeat , ne bello implicetur.

M m m 2

Gra-

num. 2.

Gravior autem quaestio est, *an tradi possit*? Hic diuersae sunt admodum sententiae. Soto quidem id negat, sed putat tamen ciuem ipsum obligatum esse, vt malit se hosti tradere, quam patriam propter se periclitari. Vasquius et id negat, adeoque nec ciuem ad spontaneam deditionem obligatum, nec inuitum ab imperantibus dedi posse, contendit. Grotius ciuem non absolute teneri putat, vt sponte se dedat: sed inuitum tamen aliquando dedi posse existimat. Has sententias expendemus.

num. 3.

Soto dum putat ciuem obstrictum esse ad deditionem spontaneam, manifesto confundit obligationem perfectam, quae ex regula iusti, et imperfectam, quae ex honesto, vel decoro, vel vt paucis dicamus, ex caritate et virtute oritur.

Iure perfecto nemo innocens tenetur se poenis vel earum periculis offerre, quum potius regula iusti vetat, quemquam innocentem puniri.

At laudanda nonnumquam hominis virtus et caritas erga patriam, qui se ipsum periculo exponere mauult, quam rem publicam. Interim iniustus non est, si id facere nolit. E. g. Laudatur Codrus, qui pro re publica occidi se passus est. Sed tamen nō voluisset, non fuisset iniustus. Est enim ea natura omnium officiorum imperfectorum, vt coactionem respuant.

num. 4.

Vasquium autem Grotius refutat, et putat non quidem teneri ciuem innocentem se sponte tradere, sed tradi tamen posse inuitum, si imminens periculum euitari aliter nequeat. Quae sane contradictionem sapiunt. Quae enim non teneor facere, quomodo possum ad id cogi? Videbimus ergo rationem Grotii. Dicit, 1. officia quidem imperfecta non admitti coactionem, sed exceptionem esse in necessitate, e. g. si aqua desit omnibus, vnus, cui superest, potest cogi ad illam cum reliquis communicandam. Sed resp. Id verum esse, si fiat sine alterius incommodo. Hinc si domino abriperetur aqua, vt aliis vsui sit, id esset iniustissimum. Ita iniustum quoque tradere ciuem innocentem, vt reliqui seruentur.

2. Imperantem in extrema belli necessitate ciues posse hosti opponere, et iubere vt moriantur potius, quam stationem deserant. Quidni igitur et innocentem tradere possit, licet ipsi exitium immineat? Resp. priore casu ciuis exponitur periculo, sed hoc posteriore exitio. Illo casu se defendere potest, hoc ipsi

ius defendendi intercipitur. Illic ciues bello cadunt; hic in pace proditur a patria innocens.

Ergo tutissimum est, Vasquii sententiam sequi.

§. 4.

II. *Bellum iure geritur pro foederatis.* 1. Foedus enim est pactum liberarum societatum. Ex pacto nascitur obligatio. Qui vero agit, ad quod obligatus est, nemini facit iniuriam. Ergo nec qui foederato tert opem promissam in foedere. 2. Foedera sunt, ut impotentiores pares sint potentioribus. Atqui nostra maxime interest, ne foederatus noster impotentior opprimatur. Ergo et licite pro eo bellum gerimus.

Cessat tamen haec obligatio, 1. si foederati bellum sit iniustum. Ad id enim gerendum obligasse nos haud videmur. 2. Si certo immineat exitus infelix. Quisque enim sibi proximus. 3. Si alter, quocum foederatus noster bellum gerit, nobis antiquiore foedere iunctus sit. Tunc enim pactum prius tollit posterius, quia inter diuersos initum.

§. 5.

III. *Bellum geri potest pro amicis, siue amicitia ex cognatione, siue ex affinitate, siue ex alia iusta et honesta causa nascatur.* Amicorum enim est idem velle ac idem nolle. Inter eos veluti tacitum foedus est, adeoque pro illis idem licet, quod pro foederatis. Exempla plura sunt in promptu. Sic Abrahamus pro Lotho arma sumit, Carthaginenses pro Tyriis cognatis.

§. 6.

III. *Causa ob quam bellum pro aliis suscipi potest, est commune vinculum humanae naturae.* Sed quamvis homo ad opem homini ferendam obstrictus sit: in vita tamen ciuili ea naturalis cognatio non sufficit, quia alias semper bellum pro aliis iuste geritur. Ergo praeterea requiritur 1. vinculum ali-quod commune specialius, e. g. religio, commercia et ius hospitii cum ea gente, 2. ut nostra quoquo modo inter sit, 3. ut tam iusta sit oppressi causa, ut omnium prouocare misericordiam merito debeat.

§. 7.

num. 1. 2. Sequuntur aliquot quaestiones, quas Grotius sub finem capitis expendit. 1. *An haec obligatio, quae ex communi vinculo humanitatis nascitur, sit absoluta et perfecta?*

Id merito negatur. 1. Nam saepe id ne quidem fieri potest. Ad impossibilia nemo obligatur. 2. Hoc officium est ex honesti regula. Virtutis est, non iustitiae, alios defendere. Ergo respuit coactionem. 3. Est officium erga proximum. Ergo semper postponitur officiis erga se ipsam. Quare si sine incommodo et periculo nostro aliis opem ferre non possimus, satis excusati sumus.

§. 8.

num. 1. 2. 2. Quaeritur, *an bellum recte geratur pro subditis alienis, si scilicet ab imperante suo opprimantur et iniuste vexentur.*

Grotius recte distinguit, an princeps tantum duriores agat principem: an vere tyrannum. Priore casu ne subditis quidem licet arma corripere, qui semel se eius voluntati submiserunt, nedum aliis quorum non interest. Posteriore casu, si hostilem nimirum animum gerit aduersus rem publicam, non est imperans, sed hostis, in quem subditis omnia licent. Ergo nec aliis vitio verti potest, si auxilium ferant.

num. 3. 4. Sunt, qui ne aduersus tyrannum quidem bellum a subditis geri posse putant. Sed Grotius contra hos eleganter disputat ex hypothesi. Etsi enim concederemus id verum esse, tamen id impedimentum tantum esset personale: id est, causa belli non iniusta esset, sed tantum personae belli incapaces. Iam ubi impedimentum personale tantum est, ibi pro persona alii gerere possunt. e. g. Pupillus ipse agere contra tutorem suspectum nequit, sed alii iure agunt. Ergo quamvis et ipsi subditi bellum gerere cum principe suo non possent, possent tamen alii, qui non sunt subditi, bellum pro iis suscipere. Ergo haec quaestio procul dubio adfirmanda.

§. 9.

num. 1. 3. *An militiam mercenariam sequi sine discrimine liceat?* Olim gentes fere omnes utebantur militia selecta, non mercenaria. Iam autem monarchico aequae ac aristocratico statui convenientior censetur militia mercenaria quam selecta. Et sane parum interest,

interest, siue quis mercede conductus, siue gratis militet pro patria. At iam quaestio est, *an sine causae discrimine, promiscue omnibus hanc operam praesta e liceat?* e. g. hostibus, rebellibus, bellum iniustum gerentibus, cct. Idque negat Grotius.

1. Quia in se indecorum est, pro sola mercede vendere vitam, nisi nos iustitia causae impellat. Turpes olim habiti gladiatores, qui leui auctoramento, puta pecunia, sanguinem vendebant. Quid vero interest inter huiusmodi gladiatorem et militem mercenarium?

2. Quia hi ipsis carnificibus sunt deteriores. Hi enim iusta ^{num. 1. 3.} sententia damnatos occidunt mercede conducti: illi innocentes.

3. Non potest bellum geri nisi necessitas urgeat, adeoque est medium extraordinarium. Hi autem mercenarii ordinarii inde viuendi medium sibi fingunt.

§. 10.

4. Quia quamuis stipendium in se licitum sit, non tamen is debet esse finis et sola causa impulsiva. Sic e. g. nec iniustum est ministro ecclesiae, stipendium capere. Si tamen is solos illi et vnicus finis propositus sit, non excusandus est. Eodem modo sese res habet in milite. Hunc praecipue iustitia causae impellere debet; stipendium tantum accessorium habetur. Moralia ex fine aestimantur eatenus, vt quidem res in se mala, propter finem bonum bona non fiat; bona autem in se propter malum finem fiat mala.

C A P V T . XXVI.

DE CAVSSIS IVSTIS, VT BELLVM GERATVR
AB HIS QVI SVB ALIENO IMPERIO SVNT.

§. 1.

H Omnes sunt vel sui iuris, vel alieno iuri subiecti; ea-
que subiectio vel ex iure gentium est, veluti seruorum et
filiorumfam. vel ex instituto hominum, qualis est societas ciui-
lis, vbi imperantes et subditi. De his iam agitur, et quaeritur,

an:

an subditi inſu ſummi imperantis poſſint ſalua conſcientia bellum gerere, maxime ſi putent, cauſſam belli eſſe iniuſtam? Grotius hic duos caſus diſtinguit. Nam aut ſubditis libera datur optio militandi vel quieſcendi, de quo caſu §. 2. vel neceſſitas ipſis imponitur militandi a ſummo imperante. §. 3. ſin.

§. 2.

Si optio da:ur, veluti ſi ſtatus eſt democraticus, et ſinguli ciues ad deliberationem addibentur, tunc eaſdem regulas addibere debent, quas addibent, qui ſui iuris ſunt, id eſt imperantes.

Ita Grotius. Sed quaenam illae regulae? Vt videant 1. an cauſſa belli ſit iuſta et liquida, 2. an magni momenti. 3. An is rei publicae ſtatus, vt euentus felix ſperari queat. Haec enim in deliberationibus praecipue debent attendi.

§. 3.

нот. 1. 2. Sed quid ſi neceſſitas militandi imponatur? tunc aut ita dubitant, vt in partem negatiuam ſint procliuiores: aut ita vt plane fluctuent.

Si prius: tunc non poſſunt ſalua conſcientia militare. 1. Quia contra conſcientiam dubiam nihil agendum. 2. Quia magis obediendum Deo, quam hominibus, adeoque horum imperium ſemper intelligendum cum exceptione legis diuinæ. Si enim plures ſunt ſuperiores, ſupremi voluntas vincit voluntatem inferioris. Sic e. g. pater nihil imperare poteſt contra leges ciuiles, lex ciuilis nihil contra diuinam. Non ergo imperans poteſt dicere: milita, ſi Deus id prohibeat.

нот. 3. 3. Quia neceſſitas quidem excuſat, ſed non in iis, quae lex prohibet, et quae iniunguntur nobis ab hominibus, eo ſine, vt ad peccandum inducamur. E. g. poſſum quidem neceſſitate excuſari, ſi fugiens iniuſtum aggreſſorem hominem obuium proſternam, quia hic malum phyſicum imminet a malitia hominis, et impedimentum a Dei prouidentia eſt: ſed ſi me tyrannus occidere vellet, niſi ſatiſfacerem, vel niſi homicidium committerem, id ſalua conſcientia fieri nequit, quia hic tyrannus intendit, me pellicere ad peccandum.

нот. 4. 5. Id variis exemplis illuſtrat Grotius, veluti militum Iudaeorum Alexandro militantium, legionis Thebaeae, militum Iuliani,

ni, immo et spiculatorum, qui mori maluerunt, quam Christia-
nos occidere. Rem ipse textus satis exponit.

§. 4.

Quid vero si fluctuet animus, nec adeo liquidum sit, iustum an iniustum sit bellum? Tunc diuersae sunt sententiae.

1. Plurimi enim censent hic parendum esse subdito. Nam 1. aliud esse iudicium contemplatiuum, aliud actiuum. An bellum hoc sit iustum, hoc iudicium potest esse dubium, sed an imperanti parendum sit, de eo dubitari nequit.

2. Quia et ipsa iura ciuilia concedunt impunitatem iis, quibus obsequii gloria relicta fuerat.

3. Aliud esse iniustum agere, aliud iniuste. Iniustum agit, qui contra leges agit, iniuste qui scienter et voluntarie leges transgreditur. Iam qui imperio alterius, cui subiectus est agit, potest quidem iniustum et contra leges agere, sed non iniuste, nisi id faciat scienter et voluntarie.

4. Quia leges non reddunt rationem, ergo nec imperantes. Et hinc elegans illud Philonis:

Serui tua est fortuna, ratio ad te nihil.

5. Accedit testimonium AVGVSTINI lib. 1. de ciuit. Dei cap. 24. cuius ipsa verba habentur in textu.

II. Nihilominus tamen ADRIANVS papa in quaestionibus quodlibeticis, et Grotius, putant, hic subditum salua conscientia parere non posse.

Nam et hic sufficit, militare iustum dubitare. In dubio autem semper eligendum, quod tutius. Tutius autem est abstinere militia, quam repugnante conscientia militare.

Laudantur ideo a Grotio Esseni et Pythagoraei, quorum hi bellum omnino reiecerint, illi iurarint, se ne iussos quidem militaturos. Sed nescio, an magis laudandi sint Pythagoraei, quam Anabaptistae, idem olim sentientes. Et quam absurdum est eiurare militiam omnem etiam iussu superiorum suscipiendam, quum iusiurandum contra leges non, valeat? L. 5. C. de legibus.

Obiiciunt, qui aliud sentiunt: 1. ita periculum esse inobedientiae erga imperantes. Resp. Grotius, at maius euitari periculum homicidii committendi. Ex 2. malis eligendum esse minus. Enimvero id nihili est. Ex 2. malis phylicis eligendum est minus, Heinzeii Praef. Grot. N n n non

non ex moralibus. Ergo potius respondendum, non esse hanc inobedientiam, si quis neget imperanti, quod putat a Deo prohibitum. Qui Deo magis obsequitur, quam hominibus, ei nulla imputari potest inobedientia.

2. *Ita rem publicam in extremum adduci posse periculum*; sed resp. Ergo imperantem exponere subditis debere causas belli iustificas, quae si iustae sint, facile bonis civibus persuadebunt, ut imperanti pareant.

num. 6.

3. *Imperantem non teneri legum suarum rationes reddere.* Resp. Grotius (a) id verum esse de legibus vere et proprie dictis, et ideo refellit Tertullianum, qui ne leges quidem sine ratione valere existimat, non de actibus specialibus, qui pertinent ad conscientiam. Actus enim, de quibus leges civiles scribuntur, sunt indifferentes: at bellum non est indifferens, sed vel iustum, vel iniustum.

num. 7.

β) Quamvis imperans rationes reddere non teneatur legum suarum: tamen saepe id agit, si bonus sit, ut subditi ei pareant libentius. Sic e. g. ipse Deus potuisset *Exod. 20.* in eo adquirere: *Non habebis Deos alienos coram me*, sed addit rationem: *Ego sum Iehova, Deus tuus, qui te ex Aegypto eduxi.* γ) Et eo etiam comparatae sunt clarigationes et manifesta, quibus belli denunciationes fieri solent publice, ut subditi omnes statim videant, bellum esse iustum, quin ut et exteri et universus orbis videat, nos bellum ex iustissima causa suscepisse.

num. 8.

Vidimus haftenus utramque sententiam, vidimus quae pro utraque militant, rationes. Quae ergo praeferenda? Nos omnino arbitramur, temperandam esse posteriorem sententiam, nec tam crude admittendam. Nam 1. subditi saepe rem non ita intelligunt, ut possint de iustitia belli rite iudicare. 2. Pro imperantibus in dubio militare debet praesumptio, quod non sine iusta et urgente causa velint bellum gerere. 3. Omnino summum periculum rei publicae immineret, si imperans singulis rationes reddere teneretur, maxime quum rationes non semper vincant homines pertinaces. Ergo distinguimus, an iniustitia belli admodum probabilis sit, e. g. si solius religionis odio moveatur, an tantum dubia. Priore casu nihil agendum contra conscientiam, posteriore parendum magistratui, quia de re, quae ultra captum est, nec dubitare nec decidere possum.

num. 9.

Et ita etiam facile deciditur quaestio de carnifice, an possit salva

salua conscientia hominem supplicio adficere, si dubitet? Nos enim eodem modo distinguimus, vtrum satis probabile sit, hominem iniuste damnatum, e. g. si quis religionis causa occidendus sit, tunc id salua conscientia non potest fieri a carnifice, an talis probabilitas non obstat, tunc enim praesumere debet, iudicem nihil iniuste decreuisse. Iura enim carnifices intelligere non solent.

§. 5.

Interim facile largimur Grotio; bonum et pium principem non facile coacturum subditos militare, si causa iis sit dubia. 1. Quia illis tributa possunt imponi, quibus facile conduci possunt milites, qui non dubitant. 2. Quia et politice periculosum esset inuitos milites aduersus hostem educere.

3. Quia durum sit, Christianos ad militiam adigere, quum maioris sanctitatis sit, non militare.

Sed postrema ratio, quamvis testimonio Origenis confirmetur, non caret errore. In se enim nullus status altero sanctior est, adeoque nec militum status Deo ingrator quam paganorum, modo quis in statu illo leges diuinas obseruet. Et aequae sanctus fuit Iosua, bella Domini gerens, quam sacerdos sacrificans. Socinianismum et monachismum sapit haec Grotii opinio.

§. 6.

Postremo quaerit Grotius, *an arma subditorum, etiam in bello iniusto, iusta esse possint?* Adfirmat Grotius, si vitam et bona defendant, quae sibi eripi vt patiantur, iure perfecto obstricti non sunt subditi. Hinc fingamus imperantem nostrum bellum iniustum, etiam nobis inuitis suscepisse. Fingamus exercitum nostrum caesum, et hostem iam impressionem facere in terras nostras, an ideo tenebimur iugulum illi praebere, et nos ipsi exhibere mactandos? Minime. Adgreditur nos tamquam hostis, et victoria abusus caedem nobis intentat, quum scopo potiri posset etiam sine caede. Ergo nobis licet defensione iusta illam crudelitatem hostilem a nobis amoliri. Et de ea quidem re nemo dubitat, ipsaque praxis hanc sententiam satis confirmat.

LIB. III.

CAPVT I

QVANTVM IN BELLO LICEAT, REGVLAE
EX IVRE NATVRAE GENERALES, VBI ET
DE DOLIS ET MENDACIO.

§. 1.

MOnuimus sub initium Libri I. tres esse huius operis partes, quas complexi sumus hoc versiculo:

Quid bellum, belli caussae, quae iuraque belli.

Quae iura belli sint, Grotius ait definiiri posse aut nude, sine praevio pacto, et tunc id definitur

Vel ex iure naturae cap. 1.

Vel ex iure gentium cap. 2-18.

Aut ex promisso antecedente cap. 19. *ad fin.* Saepe enim diximus aut agi cum hoste tamquam cum hoste, aut tamquam cum pacifcente. Priore casu hosti in hostem omnia licent, at posteriore non item, sed pacta sunt seruanda.

§. 2.

num. 1. Dum ergo primum quaeritur hoc capite, *quid iure naturae liceat in bello*? Grotius primum regulas quasdam praemittit, §. 2-4. ac deinde ex iis varias definit quaestiones, §. 5. *ad fin.*

Reg. I. *Omnia licent in bello, quae ad finem consequendum sunt necessaria.* Quae regula inde probatur 1. quia officia moralia semper ex fine aestimantur. Dum enim Deus vult finem, procul dubio etiam media probat, sine quibus finis obtineri nequit. 2. quia et in statu civili media etiam violenta permissa diximus, si aliter defendere nos non possimus. Quanto magis ergo in statu naturali tantum licebit, quantum defensio et finis noster, ob quem bella gerimus, exigit.

Illustrat

Illustrat id exemplis quibusdam Grotius. Nemini possum in statu ciuili aequae ac naturali suum detinere. Et tamen si mihi alter debet aliquid, et periculum imminet, vt soluendo sit, tunc gaudeo iure retentionis. Cur? quia finis hoc casu id exigit, qui est, vt meum consequar.

Sic et rem meam nemini eripere possum vi, sed auxilium iudicis teneor implorare. Et tamen si fur mihi aliquid subtrahit, vel is qui rem meam bona fide possidet, fugam minatur, nemo dubitat, quin ei eripere possim, quod meum est, quia finis id exigit, qui est, vt rem meam consequar.

Ita et quia iustum est, delinquentes puniri, iustum quoque erit omne, quod ad hunc finem consequendum necessarium est. Hinc si fingamus rebellem ciuem se arci inclusisse, et militari vi se tueri: nemo dubitabit, licere arcem oppugnare, milites occidere, in quibus reus habitat, quia finis id exigit.

Ergo sequitur, vt liceat etiam in bello homines occidere, incendis arces delere, res hostiles perdere, si id exigit finis noster, qui est vel defensio, vel iuris nostri repetitio.

§. 3.

Reg. II. *Ius nostrum non ex belli principio, sed ex belli causa spectandum et metiendum est.* Hinc sequitur,

1. Vt non defensio sit iisdem circumscripta limitibus, quibus laesio alterius. E. g. si hostis nobis intercepti urbem vnā, nihil impedit, quo minus ipsi totam prouinciam eripere possimus. Sufficit enim hostilem aduersus nos animum fouere alterum.

2. Vt qui socii accedunt hostibus nostris, pari passu ambulent cum ipsis hostibus, adeoque et eodem modo tractari possint, quamuis antea nos haud laeserint. Nec interest, bellum ex parte hostis nostri aperte iniustum sit, an probabiliter tantum.

§. 4.

Regula III. est: *quaedam in bello ex consequente iusta sunt, quae si ex proposito fierent, iniusta haberentur.* Nam in his quae per consequens alteri damnum dant, valet regula: *Qui iure suo utitur, nemini facit iniuriam.*

N n n 3

Hu-

Huius regulae insignis usus est in statu ciuili ac naturali. Nam inde sequitur, 1. vt si me aduersus latrones defensurus socium innocentem occidam, id culpa vacet. 2. Vt si repressalijs vtamur, plus sumere possimus, quam debetur, modo superfluum restituere parati simus. 3. Vt nauem piraticam possimus tormentis petere, incendere, mergere, quamuis probabiliter et innocentes in naue sint.

Attamen temperamentum hic recte suadet adhibendum Grotius, ne scilicet iure illo stricto vtamur, si caritas aliud iubeat. Iubet autem caritas aliud, 1. si ille actus minus sit necessarius, e. g. si nauem piraticam integram capere possimus. 2. Si ex actu maius malum quam bonum expectandum, e. g. si mille homines propter vnum perdamus. 3. Si manifesto videamus nos non hostibus, sed nobis ipsis damnum inferre: e. g. Hannibal per viam angustam iter facturus, vbi vtriusque Romani montes obsederant, ab vtroque latere Romanos captiuos proficisci iussit. Maluerunt Romani viam dare Hannibali, quam suos perdere.

Obiici posset, Deum nonnumquam punire integras gentes; num. 3. quum non sit probabile, in tota gente nullum esse innocentem. Sed resp. 1. Deum tunc innocentes non punire, sed castigare tamquam pios. 2. Eum si innocentes mori iubeat, iure suo supremo si, quali non gaudent homines. 3. Immo ne solere quidem Deum, qua est clementia, ad excidium gentium festinare, si vel pauci vere innocentes sint. Legi eam in rem meretur colloquium Dei cum Abrahamo de Sodomis excindendis.

§. 5.

num. 1.2. Iam sequuntur quaestiones, quarum 1. est, *quid liceat aduersus eos, qui hostes non sunt, hostibus tamen per indirellum opem ferunt, commeatum, arma et similia subministrando.*

Hic eleganter Grotius distinguit, 1. inter res ipsas, an sint ad belli usum comparatae, e. g. arma, puluis pyrius; 2. an ad voluptatem tantum, vt vinum, chartae lusoriae, cet. 3. an et in, an extra bellum usum habeant, iisque commode carere nequeamus, e. g. frumentum, pecunia, naues.

De primi generis rebus notanda regula: *Qui hostibus arma et res bello necessarias subministrat, hostis est.* Et hinc solent haec

haec intercepti sub nomine *contrebände*. Quo de iure singularis exstat *Dissertatio nostra de navibus ob merces illicitas commissis*.

2. De secundi generis rebus: *Frustra prohibentur, quae hostes non fortiores reddunt, sed molliores, quales sunt res omnes ad voluptatem pertinentes.*

Exceptio tamen addenda, quod prohiberi possunt res, quae ad necessariam militum voluptatem pertinent, sine quibus illi commode vivere nequeunt sub aere frigido et humido, e. g. vinum adustum, herba Nicotiana, cet.

3. Circa tertium genus Grotius distinguit belli statum. Nam *num.* 3. regulas format sequentes:

1. *Si tueri me aliter non possum, nisi ut submissa interceptiam, necessitas ius dabit, sed cum onere restituendi.*

2. *Si iuris executionem huius modi subiectio impedit, submit- tens tenebitur de damno dato.*

3. *Si subuehens hoc casu damnum nondum dedit, sed dare voluit, ius erit rerum retentione eum cogere, us satisdet de futuro.*

4. *Si quis hostibus iniustissimis, e. g. rebellibus, subuehat com- meatum, criminaliter tenetur.*

Sed hae regulae iure fundamentum destituuntur, nec in praxi seruantur. N.m

1. Negari nequit, hostem his rebus submissis fieri fortiorem.

2. Quom in hostem hosti omnia liceant, licebit etiam intercepti, quae ipsi a tertio submittuntur, sine discrimine, an necessitas id exigat, nec ne.

Obiici posset, tertium tamen iure suo, id est libertate commerciorum uti, adeoque nemini facere iniuriam. Sed responderi potest ex argumentis ipsius n. 4.

Nimirum solent tempore belli publicare edicta (*placas*) *qui-* *num.* 4. bus denunciatur, bellum nobis esse cum hac vel illa gente, adeoque nos decreuisse, merces illicitas (*contrebände*) quae ipsi a quocumque submittantur intercepti et confiscare. Unde additur admonitio, 1. ut nautae non nisi idoneis instructi testi- moniis (*passports, connoissemens.* cet.) navigent, 2. ut merces certas, quae recenseri solent, hosti non aduehant, 3. ut dam- num sibi imminens vitent.

Qui itaque contra hanc admonitionem faciunt, non vtun- tur iure suo. Possunt enim commercia cum hostibus exercere, qui

qui neutrarum partium sunt, sed non eum instruere rebus ad bellum necessariis. Nam hoc si faciunt, hostes nostri sunt.

Ex quo patet, hanc prohibitionem vltra ea, quae in bello vsum habent extendi non posse, adeoque iniuriam factam Belgis a Suecis, qui naues quascumque cum Danis et Russis negotiantes, interceptabant, immo et in portus ab hostibus occupatos, e. g. Rigam, Stetinum, Wisnariam destinatas, quamvis non adueherent merces illicitas.

num. 5.

Sub finem huius §. rationem reddit Grotius, cur hanc quaestionem ad ius naturae referat. Nimirum, quia in historia nihil exstet, ex quo adpareat, quid gentes ea de re sanxerint. Sed 1. non opus est hac ratione. Quae enim ex ipsa recta ratione decidi possunt, ad ius naturae pertinent, 2. Ea ratio etiam non satis liquida est. Nam omnino iam ab octingentis et pluribus annis iste mos inter gentes viguit, vt res hostibus aduehendas interciperent. Exstat perrarus, sed magni momenti liber *Consulatus maris* italice scriptus, in quo imperatorum Constantinopolitanorum, Hispanorum, Gallorum et reliquarum gentium edicta huc pertinentia collecta sunt. Vnde hic liber illis, qui in collegiis archithalassiciis (*Admiralitatibus*) adsident, in magno pretio esse solet.

§. 6.

num. 1.

Quaestio 2. est de dolo: an eo vii in bello, et hosti damnum inferre liceat? Vbi 1. auctor diuersas sententias recenset §. 6. 2. Eam distinctionibus soluere conatur §. 7. 8. -20.

Quod ad prius attinet: omnino fuere 1. qui huiusmodi dolum non improbarunt. Idque Grotius probat *) testimoniis Homeri, Virgilii, Solonis, Fabii maximi, qui omnes concedunt, dolum contra hostes adhibitum potius laudandum, quam reprehendendum esse. Hinc toti libri exstant de stratagematibus, vt Polynaei, Frontini, cet.

num. 2.

β) Idem probat exemplis maximorum imperatorum et belli ducum, quorum ideo sapientia consentiente omnium suffragio laudatur, quod hostem deceperint, e. g. Vlyssis, Xenophontis, Brasidae, Agesilai, cet. Immo ipsi Lacedaemonii, quibus nulla gens bella sanctius gerebat, haec furta belli, vt vocantur, vel stratagemata probabant.

γ) Ex

γ) Ex principiis ICTorum. ICTi ceu notum semper dolo addunt epitheton, *dolus malus*, quia norunt dari etiam dolum bonum. Si quaeras, quis sit dolus bonus? respondent, 1. quo alterius non damnum sed utilitas promouetur, 2. quo contra hostes utimur. L. 1. §. 3. *D. de dolo.* num. 3.

δ) Ex testimoniis ipsorum Theologorum, nempe AVGVSTINI *Quaest. 10. super Iob.* et CHRYSOST. *lib. I. de sacerdot.* Potuisset Grotius

*) Aliud multo firmitus argumentum addere, nempe quod ipse Deus stratagematibus uti iusserit Iosuum, in expugnanda urbe Ai. *Iob. 7. 2.* Quod autem Deus non modo probat, sed iubet, id illicitum esse nequit.

2. Sunt tamen etiam, qui negant huiusmodi dolos excusandos esse, quorum generale hoc argumentum est, quod non sit faciendum malum, ut eueniat bonum. Nam 1. ita etiam probari posset, in bello non licitam esse hostium caedem, 2. est haec petitio principii. Nam id ipsum quaeritur, an omnis dolus, et hic, quo aduersus hostes utimur, in se malus sit? num. 4.

§. 7.

Quare Grotius distincte procedit, quia *dolus* non est vnus generis. Alius 1. est *negatiuus*, alius *positiuus*. *Dolus negatiuus* consistit in dissimulatione, ubi supprimo quod verum est, e. g. si exercitus sine tympanorum strepitu, nocte intempesta, inscio hoste iter facit.

Dolus positiuus est actus, vel sermo, quo alterum circumuenimus, adeoque non in nuda dissimulatione, sed in simulatione consistit: e. g. si exercitus fugit, ut hostes in insidias pelliciat.

Dolum negatiuum, i. e. dissimulationem, non semper malum esse facile probatur:

1. Quia non semper teneor illi veritatem dicere, qui illam nec perfecto, nec imperfecto iure a me exigere potest. Si non teneor veritatem dicere, dum dissimulo, iure meo utor. Dum iure meo utor, nemini facio iniuriam.

2. Saepe dissimulatio est necessaria et inuitabilis, quia aliter me defendere non possum. Qui nescit dissimulare, nescit imperare. Et sane bellum qui gerunt, plus quam stolidi essent, si hosti semper denunciarent, quid acturi sint.

Heineccii *Prael. Grot.*

O o o

§. 8.

§. 8.

MATH. I.

Dolus positivus vel in factis consistit, vel in verbis. Vnde supra illum definiuimus, quod sit actus vel sermo.

Si in factis consistit, *simulatio* dicitur: si in verbis, *mendacium*.

Quod ad mendacium, illud probe distinguendum a falsiloquio. Recte enim Grotius negat, omnem simulationem in verbis deprehensam esse mendacium. Verba enim sunt signa idearum. Quemadmodum ergo non semper ideas meas cum aliis communicare teneor, ita nec mentior semper, si aliud dico quam sentio; e. g. si me latro roget, an res pretiosas mecum feram? si infans interroget medicum, an potuuncula sit amara? Ergo 1. mendacium est, ubi falsum dico, quum alter iure a me exigere veritatem posset: falsiloquium, ubi alteri nullum huiusmodi ius est. 2. Mendacium est, si falsum dicendo alteri damnum iniuria infero: falsiloquium, quoties tantum meam utilitatem promoueo, vel ipsius, cui falsum quid persuadere conor.

MATH. 2.

Ergo porro distinguendum, an facta et verba libere significant, an ex conuentione, e. g. quid *ius mundi* significet, nondum est communi consensu expeditum: HENR. BODINVS in *Dissertatione singulari de iure mundi* ita vocauit ius naturae.

Contra alia verba iam valent ex consensu tacito, ex vsu; qui veluti iis definitionem imposuit, e. g. *ius naturae*, et hinc absurde quis diceret, se per *ius naturae* intelligere *ius ciuile* et *canonicum*.

De prioribus duplicem regulam suppeditat Grotius. I. *Vbi nullum inde sequitur nocumentum. ibi verbis huiusmodi vel factis uti possum, quamuis alter inde aliam ideam concipiat.*

II. *Vbi ipsum nocumentum iustum est, ubi iidem huiusmodi verbis vel factis iure utor.*

M. 3. 4. 5.

Vtramque regulam exemplis illustrat Grotius. Et priorem quidem exemplis Christi, *Luc. 24. 28. Marc. 6. 43. Pauli Act. 16. 3.* Posteriores exemplo ex *Iob. 8. 2.*

§. 9.

Iam quaeritur de verbis, quae non libere significant, sed ex conuentione hominum tacita. Nam qui his abutitur ad alterum

cir-

circumueniendum, is proprie mentiri dicitur. His aduersus hostem quoque vti non licere multi existimant, ob varia argumenta.

1. Ob dicta S. S. quae omne mendacium damnant. *Prou.*

13. 5. *Prou.* 30. 8. *Pf.* 5. 7. *Ch.* 3. 9.

2. Ob testimonia ipsorum poetarum, qui tamen alioquin moralem philosophiam non adeo rigidam sectantur.

3. Quia quod per se turpe et vituperabile est, eo ne aduersus hostes quidem vti licet. Ergo non magis licita esse mendacia, quam adulteria, stupra, quibus in hostes grassantur.

Sunt tamen, qui aliud sentiunt, qui nec ipsi suis rationibus desistant. Nam

1. Prouocant ad exempla in sacris, vbi et emendatissimi homines sine reprehensionis nota hostes circumuenerunt. 2. *Reg.* 16. 29.

2. Ad veterum Christianorum consensum. Exempla quaedam iam vidimus supra §. 6. n. 3.

3. Ad consensum philosophorum, Socratis, Platonis, Xenophontis, Ciceronis, Stoicorum, qui t. et sapientem mentiri fatentur, e. g. si vtilitatem alterius promouere possit, vt medicum decipientem aegrotum.

2. Non facta turpia dicunt, sed causam adeoque nec mentiri vel falsa loqui, sed ad decipiendum alterum vel illudendum mentiri. Contra vitio carere existimant mendacium vel propriae salutis vel alienae vtilitatis causa dictum.

§. 10.

Rem expediturus Grotius distinguit 1. inter *mendacium*; num. 1. 2. *quod imprudens excidit, et quod sciens profert.*

Prius est, si quis falsum profert, quod verum putabat. e. g. Si dicat quis Maeuium diuitem esse, quem omnes pro tali habent.

Posterior, si quis tamquam verum profert, quod falsum scit esse, e. g. si quis dicat, Maeuium mortuum, quem viuere sciat.

Prius vitio caret, nisi culpa nimiae credulitatis accedat. Nam sic nullus accedit dolus, nulla proaeresis, immo nec culpa. At non vacat culpa, qui omnem famam sine auctore spar-

iam statim ad alios propagat, tamquam veritatem indubiam:

quum, 2. Ex quo consequitur, vt nec ambiguae locutionis vsus semper pro mendacio habendus sit;

1. Si ille non cum proposito decipiendi sit coniunctus.

2. Si quis saluti suae in iusta causa consulat, veluti Athanasius in veste nautica fugiens, a persequentibus interrogantibus, an nosset Athanasium? Iam, inquit, noui, quam me ipsum. Quaesitus porro an procul absit, non, inquit, procul, facile eum assequeremini, si festinaretis.

3. Si ambiguitas illa simul improborum euitet quaestiones, et probis ad instructionem faciat. Sic saepe loquutus Christus, e. g. *Lazarus amicus noster dormit. Diruite templum, et intra triduum restaurabo.*

Vnde etiam ratio redditur, cur tot parabolis vsus sit Christus, cur fabulis vsi sapientes. Bene PHAEDRVS:

Seruitus obnoxia,

Quum, quae volebat, non audebat dicere,

Affectus proprios in fabellas transfudit,

Calumniamque fidei elusit iocis.

Contra ex iisdem principiis patet, contingere posse, vt huiusmodi loquendi genus improbum habeatur:

num. 1.

1. Si Dei honos violetur, e. g. si quis Christianus se dicat Mahumedanum vel paganum;

2. Si amor proximi laedatur, e. g. si in contractibus mercator mercem corruptam et prauam laudat tamquam optimam.

3. Si reuerentia superioribus debita susque deque habeatur, e. g. si testis coram magistratu vel falsa dicat, vel ambigue ad quaestiones respondeat.

§. II.

num. 1.

His ergo praemissis, iam porro quaerit Grotius, in quo forma consistat mendacii, quum saepe falso loqui vitio carere dixerimus?

Respondet Grotius, in repugnantia cum iure existente aut manente eius ad quem sermo dirigitur. Omne enim delictum requirit subiectum delinquens, et subiectum, aduersus quod delinquitur. Illud delinquit, quia ius alteri debitum vel violat
vel

vel intercipit, aduersus hoc delinquitur, quia ius eius intercipitur, et violatur. E. g. Fur violat alterius ius, nempe domum. Contra si latroni spolia eripiuntur, is conqueri nequit, aduersus se commissum esse delictum, quia nullum ius in spoliis istis habuit, quod potuerit violari.

Iam applicabimus ad mendacium. Mendax delinquit, dum alteri falsa persuadet, quum obstrictus ei sit ad veritatem aperiendam. Et alteri per mendacium fit iniuria, quia ius eius exigendi veritatem violatur. Vnde fuit regula:

Vbicumque alteri nec perfectum nec imperfectum ius est, veritatem exigendi, ibi falsiloquium non est mendacium, adeoque nec delictum.

Regulam hanc ita porro explicat Grotius, quod non suffi- num. 2.
ciat, alteri ius fuisse aliquando veritatem exigendi, sed requi-
ratur, vt ius hoc mineat et saluum sit. Nam ius sublatum non
est ius. Quemadmodum enim cuius debitum exigendi adfuisse
potest, sed illud postea sublatum pacto de non petendo, ac-
ceptilatione, cet. ita et ius exigendi veritatem sublatum esse
potest, quo facto et mendacium non admittitur.

Sed quando et quomodo illud ius tollitur? 1. Consensu al- num. 3.
terius, vel expresso, si id permittit, vt falsum dicatur, qui
casus forte rarissimus, nisi quis ab altero petat, vt sibi fabu-
lam referat. 2. Vel tacito seu potius praesumpto. si praeuidea-
mus alterum id falsiloquium non aegre laturum, quo utilitas
eius promouetur, e. g. si medicus infanti persuadeat potionem
esse dulcem.

§. 12.

Ex his principiis iam varias conclusiones elicit Grotius, quarum prima est, *quod liceat falsiloquio vii aduersus infantes, amens.* Rationem iam diximus, quod eorum promouetur utilitas.

Vnde sequitur, vt solius illusionis causa falsa proferre non liceat, adeoque vere peccant, qui infantibus falsa narrant de angelis, de spectris, de religione.

§. 13

Secunda conclusio est, *quod si sermo ad eum dirigitur; qui* num. 1. 2.
non decipiatur, tertius autem inde falsam hauriat persuasionem, id

O o o 3 non

non sit mendacium. Interrogans enim ius habet a me veritatem exigendi, non tertius, qui non interrogat, e. g. si viator Harlingam tendens quaerat, quae recta via sit, et ego respondeam, eundum esse occidentem versus; tertius autem Leouardiam tendens id audiat, et occidentem versus ambulet, frustra sane hic conqueretur, se a me deceptum, quum me numquam interrogauerit.

Sic Flaccus narrabat suis, hostium urbem expugnatam, quia sciebat, exploratores adesse. Hi in castra reuersi id narrabant. Hostes perterriti hoc nuncio fugam capessiebant. Hic nihil sane est, quod de Flacco potuerunt conqueri hostes, partim quod ad eos sermonem non direxerat, partim quod veritatem hostis ab hoste exigere non potest, nisi pactum antecesserit.

§. 14.

num. 1. 2. Tertia conclusio est, *quoties praesumptio est, alterum falsiloquium nostrum grato animo accepturum, toties illud non est mendacium.* Praesumptio enim haec saepe tam firma est, vt pro demonstratione sit. Quemadmodum ergo furtum non committit, qui contrahat rem amici, quem commodaturum certo praesumit, ita nec mendacium est, si falsa proferam, si praesumptio certa sit, amicum mihi gratiam habiturum. E. g. apud PLIN. lib. III. ep. 16. Arria marito Paeto aegrotanti persuadet filium conualuisse, quum esset mortuus. Duces bellici saepe promittunt auxilium, quum nullum speretur, tantum vt animum addant.

§. 15.

num. 1. Quarta conclusio est, *quod imperantes saepe falsiloquiis non iniuste vrantur.* Sed ratio Grotii non placet. Nam et hoc ius arcessit a dominio eminente, quasi dominium eminens et ad facultatem mentiendi porrigendum sit. Potius vera ratio denuo est praesumptio, quod subditi id grato animo accepturi sint, eo quod hoc modo vtilitati rei publicae consulatur. Eodem ergo se modo res habet, ac in falsiloquio vteute aduersus aegrotum.

Quod autem istud ius imperantium non sit ex dominio eminente, vel inde clarissime patet, quod Deo non conveniat falsiloquium, quamuis eminentissimum sit eius in res creatas domi-

dominium. Vtilitatem autem nostram Deus et sine falsiloquio promouere potest, quum sit sapientissimus, et mille media ipsi nota sint, quae homines ignorant.

Illustrat hoc exemplis. Iosephus tamquam prorex Aegypti simulauit, se fratres pro exploratoribus et filiabus habere, vt eo modo veritatem eliceret, vt Beniaminum fratrem, quin totam Iacobi familiam in Aegyptum pelliceret.

Sic Salomon simulauit, se viuum infantem, de quo binae meretrices litigabant, gladio diuisurum, vt veritatem eliceret, utra mater sit.

Saepe etiam imperantes legibus suis in se salubribus rei publicae, sed ciuitati parum gratis falsam rationem praetextunt, vt eo facilius reperiant obsequium.

§. 16.

Quinta conclusio est, quod quoties vita innocentis aut par aliquid aliter fruari non potest, licitum sit vii falsiloquio. Hic enim improbus ille, qui innocentiae struit insidias, nec perfecto nec imperfecto iure veritatem exigere potest. Sic recte Michol filia Saulis celauit et occultauit Dauidem maritum, nec ideo rea fuit mendacii.

§. 17.

Iam ad *hostes* redit auctor, quum nunc facile decidi possit *num. 1. a* tota quaestio, an *hostes dolis et mendaciis circumueniri possint*? adfirmare id multos iam repetit Grotius, nempe Platonem, Xenophontem, Philonem, Chrysostomum, et inprimis Eustrathium Metropolitam, cuius luculentissima exstant scholia in Homerum. Locus a Grotio exscriptus meretur legi.

At scholastici, et hodie ex Iesuitis quidam hoc negant, *num. 3.* mendacio locum esse aduersus hostem, contra concedunt, vti nos posse sermone ambiguo, et reservationibus mentalibus. Religiosi scilicet homines, qui hereticis negant seruandam esse fidem, et tamen nefas putant decipere hostes: qui falsiloquia reiciunt, et probant ambiguitates et reservationes mentales, id est mendacia, qui hostibus denique parcent, et inter ciues ipsos omnem bonam fidem tollunt, et veluti in exilium eiciunt.

Vere

Vere enim reservationibus istis mentalibus omnem fidem eici in exilium inde patet:

num. 4. 1. Quia omnes voces admittunt duplicem significationem formalem, et materialem, e. g. *ire*, *currere*, *volare*, *equitare*: vocabula haec omnia unam habent notionem formalem, (nam significant motum ad locum.) Sed singula habent significationem suam specialem et materialem. *Ire* significat motum ordinarium, qui fit pedibus; *currere*, motum extraordinarium et festinatum, itidem pedibus factum; *volare*, motum, qui fit alis; *equitare*, motum, qui fit equo. Si ergo omnia vocabula habent significationem duplicem, omnia etiam admittunt ambiguitatem.

2. Quia ita nec promissis, nec pactis, nec iuriurando alterius fidem habere possum, quum semper sit periculum, ne mihi reservationibus suis mentalibus illudat.

3. Quia sic absurdum hoc inde defenditur, quod, quo quis est ingeniosior, eo facilius possit esse improbus.

§. 18.

Quid ergo in tanta sententiarum diversitate sentiendum?

Resp. nec verum est, omnia falsoqu岸ia aduersus hostem illicita esse, nec concedendum, omnia esse licita. Nimirum distinguendum, an nobis res sit cum hoste tamquam cum hoste, et tunc illum iure decipimus, quia hostis in statu naturali nec iure perfecto nec imperfecto a me quidquam iuris exigere potest. Si illum occidere, rebusque spoliare possum, quidam et dolis circumuenire.

An vero agamus cum hoste tamquam cum pacifice, tunc omnino fidem ipsi debemus seruare, quia eo ipso, dum cum illo pacti sumus, ei ius perfectum dedimus, veritatem a nobis exigendi. Vnde recte colligit Grotius, nec in promissis, nec in induciis, nec in colloquiis decipiendum hostem, quia ipsi ius nouum dedimus.

§. 19.

Ex quo consequitur, vt et *hosti iniurandum seruandum sit*, e. g. si captiuus iuravit, se aduersus hostes per certum tempus non arma gesturum. Nam

1. Ius-

1. Iusiurandum hoc praestitit ex pacto. Pacta et hostibus sunt feruanda.

2. Iusiurandum praestatur Deo, iniustum autem Deum inuocari testem ab iis, qui iurant, vt fallant.

3. Si obiciatur iusiurandum huiusmodi esse vi extortum; respondetur, id negandum. Nam non omnis vis irritum reddit iusiurandum, sed vis iniusta. Sic e. g. non ideo falsa proferre potest testis, quia iudex eum inuitum cogit ad testimonium perhibendum. Quis autem dixerit, iniustam esse vim, qua hostis aduersus hostem vitur?

§. 20.

Quamuis vero haftenus Grotius probarit, *in se iniustum non num. 1, esse, decipere hostem*; tamen existimat, *tutius et Christianae simplicitati magis consentaneum esse, ab huiusmodi fraudibus et falsiloquiis abstinere.*

1. Quia ipsi gentiles hoc agnouerint. Ii enim statuerant viro bono conuenire veritatem, maxime regibus et rerum publicarum rectoribus.

2. Quia Christianis inprimis a Christo commendata est *simplicitas columbina. num. 2, Matth. 10. 16. et omnis vanitas interdicta, Matth. 12. 36.*

3. Quia imitari debent Christum, cuius in ore non est inuentus dolus.

4. Quia laudati veteribus reges et principes, fraudes huiusmodi adspersati, et virtute non furtis extorquentes victoriam. Tale quid de Alexandro, et inprimis de Romanis praedicatur, de quibus AELIANVS: *Romanis propriam esse virtutem non per astus et dolos, quaesitam victoriam.*

§. 21.

Tertia quaestio est, *an liceat hosti, hostem adigere ad aliquid faciendum, quod ipsi non licitum est?* e. g. captiuo iniungere, vt regem suum occidat, vt patriam prodant. Negat Grotius. Nam

1. Hosti in hostem omnia licent, id est in eius corpus et bona, non in animum et conscientiam, vt illi imperari possint scelera.

2. Qui caussam alteri dat peccandi, is et ipse peccat.

Heineccii Prael. Grot.

Ppp

3. Quod

3. Quod tibi non vis fieri, alteri ne feceris. Iam nemo dixerit hostem velle, ut ab hoste sicarii aduersus se emanant ex ipsis subditis. Ergo nec id faciendum aliis.

§. 22.

Sed quid si alter sponte se offerat ad huiusmodi operam notis praestandam, e. g. ad tradendam urbem, occidendum regem, cet. Tunc Grotius dicit, uti nos posse ea occasione. Sed quamuis facile concedamus, id licere iure naturae, de quo h'c quaeritur, aliud tamen obtinet moribus gentium humaniorum, quae regum etiam hostium personas sacro sanctas habent, nec eos putant per sicarios occidendos. Laudem meretur Fabricius, qui medicum Pyrrhi sibi offerentem, quod veneno tollere velit regem, ad dominum transmisit, rogauitque, ut sibi de veneno caueret. Multa iure stricto licita sunt, quae non probat mos gentium humaniorum, (*la raison de guerre*) de quo agitur iam capitibus sequentibus.

CAPVT II.

QVOMODO IURE GENTIVM BONA SVBDITORVM PRO DEBITO IMPERANTIVM OBLIGENTVR, VBI DE REPRESSALIIS.

§. 1.

num. 1. **H**Aftenus quid ex iure naturae in bello liceat: iam de iure gentium. Iam saepe monuimus, ius gentium a iure naturae diuersum haud dari, sed esse ipsum ius naturae negotiis gentium adplicatum. Sed si per ius gentium intelligas mores a variis gentibus humanioribus introductos: tunc haec capita, quae sequuntur, vsum habent.

Et hoc quidem capite acturus Grotius de *repressaliis*, primo quaerit, *an ex facto alieno quis possit obligari?* Per *repressalias* enim ob debita imperantium res subditorum intercipiuntur.

Recte resp. iure naturae ex facto alieno neminem teneri. Siue enim

enim obligatio proficiscatur ex contractu, siue ex delicto, utrobique fundamentum obligationis est factum, i. e. promissum vel malefictum. Tertius autem non promittit nec deliquit. Ergo nec obligatur.

Nec aliter res se habet in vniuersitatibus. Ea constat ex singulis, collectivae sumtis, sed non singuli constituunt vniuersalitatem separatim. Ergo, quod vniuersitas debet, non potest iure naturae a singulis civibus exigi in solidum: sed id primo solvendum ex bonis vniuersitatis: si haec non sufficiant, singuli tantum pro rata tenentur, quia pars sunt vniuersitatis.

Haec omnia ex ipso iure civili illustrat Grotius, veluti ex *L. vn. C. vt nullus ex vicar. ex titulis, ne filius pro patre, ne pater pro filio, ne maritus pro uxore, cet.* Colligit etiam eas leges, ex quibus adparet, singulos ex debito vniuersitatis conveniri non posse. Quae quidem recte se habent, si inde colligas ius civile ea in re servare principia iuris naturae. Alioquin ex iure civili ius naturae probari nequit.

§. 2.

Quum ergo ius naturae neminem pro alio obliget: quaeritur 2. an non ius gentium huius modi obligationem introduxerit? Affirmat. Nam experientia docet, solere ob debita vel imperantium vel rei publicae bona privatorum arresto obstringi, et tamdiu detineri, donec satis factum fuerit. Id quum ex iure naturae non esse demonstratum sit §. 1. ex iure gentium voluntario esse putat Grotius, quod usu exigente et humanis necessitatibus introductum est.

Sed si recte ponas calculum, falsum est, hoc ex iure naturae non posse defendi. Ipse enim Grotius n. 2. fatetur, huc naturae non repugnare. Id paullo adcuratius probabimus. Nam 1. certum est, rem publicam ratione alterius rei publicae considerari tamquam unam personam moralem. Ergo quod imperans debet, omnes, id est, tota natio, quae in rem publicam coaluit, debere censentur. 2. Ergo si imperans solvere vel non vult, vel non potest, nihil superest, quam ut natio creditrix ipsa sibi ius dicat, et res alterius nationis intercipiat. 3. Subditis tunc non fit iniuria, quia dum voluntates suas voluntati imperantium submitserunt, etiam quasi fideiusserunt pro factis summi imperantis. 4. A maiore ad minus argumentari possumus, si licet in bello

P p 2 propter

propter facta imperantis vita et bonis spoliare subditos; quidni bonis ob imperantis debita? Accedit 5. quod is cuius bona intercepta sunt, regressum habet aduersus imperantem vel conciuēs, vt indemnis praestetur. Denique 6. proprie ciuibus bona non interceptiuntur, sed pignoris instar capiuntur, detinenturque tam diu, donec satisfactum sit. Si ergo imperans vel res publica ciues non vult rebus spoliari, soluat quod debet.

Quae quum ita sint, nihil causae est, quare hoc ius ex iure quodam gentium a iure naturali diuerso repetamus.

§. 3.

8.1.1.3.4. Ceterum iam rem exemplis illustrat Grotius docetque, *ex moribus gentium aliquando homines, aliquando res fuisse adprehensas ob debitum imperantium.*

Homines aliquando fuisse interceptos demonstratur 1. ex lege Attica, quae si caedes a gente vicina facta, nec vindicata esset, propinquis concessit tres homines comprehendere ex ea natione, donec supplicium ab homicida fuerit sumtum. Hi ergo homines adprehensi non erant serui, sed obsides, quibus imminere triste seruitutis fatum, nisi ciuitas supplicium sumeret.

An hoc iniustum? Minime, vt enim iusto bello capimus priuatos ob facta summorum imperantium, vt eos ad pacem cogamus: ita licebit et capere homines, non vt ab iis supplicium sumamus, sed vt hoc modo cogantur imperantes, supplicium a fontibus sumere.

Specialem legem Aristocratis hic adfert Grotius, et an iuste reprehensa sit a Demosthene quaerit. Aristocrates legem rogauerat, vt si quis exteris Charidemum occidisset, is vudique abripi posset; si quis ei obfisteret, is hostis loco esset.

Reprehendit id Demosthenes 1. quod non distinxerit, an iure an iniuria caesus sit Charidemus; 2. quod non exegerit, vt prius postuletur iudicium; 3. quod non eos apud quos facta sit caedes, sed a quibus receptus sit homicida teneri voluerit; 4. quod inde bellum nascatur.

Sed respondet Grotius recte, Demosthenem non vbique rem acu attigisse. Verum est, 1. distinguendam fuisse causam caedis iustam et iniustam. Quid enim si quis Charidemum ex modamine inculpatae tutelae vel in adulterio deprehensum occidisset? Iusta quoque est criminatio. 2. Nam non prius nobis tempore
paci

pacis ius est repressaliis vel aliis violentis remediis vti, quam altera res publica a nobis requisita ius vel satis factionem denegauerit. At tertia et quarta causa nihili sunt. Nam qui receptum dat aequae particeps fit delicti, ac ipse delinquens. Nec statim res publica quae homines illos detinet, dici potest bellum mouere, quum parata sit, eos reddere, simul ac satisfactum sit.

Demonstrat Grotius eandem thesin 2. iis exemplis, vbi homines eorum capti, qui nostros homines iniuria captos detinent. Sic e. g. quum Carthaginenses capere vellent Aristonem Tyrium, oblitere ciues, caussati, sibi tunc idem fatum imminere in variis emporiis. Sciuerunt ergo, morem iam iis temporibus viguisse, vt pro captiuo alii caperentur.

§. 4.

Sed frequentius manus iniiciuntur *rebus*, et id ius vocatur proprie *repressaliae*. Graecis *ἐπὶ τῶν πραγμάτων*, Saxonibus et Anglis *Witterhamium*, a Germanico *Widerneemen*, recipere, Gallis *litteras marcae*, a Celtico *mark*, quod significat limitem, vnde *Markgraf*, comes limitaneus, quia in finibus imperii custodes constituuntur, qui res exterorum intercipient.

Et hoc ius locum habet semper, etiam in pace, modo nobis nostrisue ius denegetur.

§. 5.

Sed quaeritur 3. *quando ius denegari dicatur?* resp. 1. si in fontes ius plane obtineri nequeat; 2. si in re minime dubia contra ius aperte iudicetur; 3. si exsequutio denegetur.

Possit obijci, rem iudicatam pro veritate haberi, adeoque sententiam iniustam dici non posse, si vires rei iudicatae acceperit. Sed resp. Grotius, id quidem inter ciues locum habere, quibus aut appellandum, aut sententiae parendum, non inter diuersas gentes.

Ratio differentiae est, quia totum ius de effectu rei iudicatae est ex iure ciuili, non ex iure naturae. Iam ius ciuile ciues quidem eiusdem rei publicae non diuersarum rerum publicarum subditos tenet.

Hoc ius antiquissimum esse pluribus exemplis potest demonstrari. Elegans est exemplum Nestoris apud Homerum. Antiquum etiam exemplum Aristodemi apud Liv. lib. II. et Dionys.

HALIC. lib. VII.

Quamuis vero exempla non faciant ius: vel inde tamen patet, mature admodum gentes id pro remedio iusto et aequo habuisse.

§. 6.

Queritur 4. *an et in vitam subditorum ex his causis aliquid liceat?* Id negat auctor, et recte quidem. Nam

1. Ex debitis ciuilibus vita non obligatur, sed bona.

2. Si crimen admissum, siue a singulis, siue ab vniuersitate non alius pro alio, nec vnus pro tota re publica tenetur, sed delicta tenent suos auctores, nisi id per conspirationem omnium factum, tunc in singulos poena cadit.

3. Si obiciatur, atqui voluntates ciuium subiici voluntati summi imperantis: resp. at ciues non gaudere facultate illa naturali in vitam suam, vt eam obligare possint pro aliis.

Aliud itaque dicendum, si caedes ciuis innocentis fiat per accidens, e. g. si imperans iussit nauem exteram intercepti, et nautica turba id vi impedire conata est.

§. 7.

num. 1. Sub finem monet, non confundenda in hac materia esse, quae sunt iuris ciuilis, et quae proprie iuris gentium. Aliqui enim superaddere solent leges ciuiles vnus vel alterius gentis, quae non apud omnes gentes receptae sunt.

Immo et pactis inter gentes initis quaedam introducuntur, quae non vbique obtinent.

num. 2. Id iam exemplis declarat auctor. Nam

1. Ex iure gentium non tenentur his oppignorationibus, nisi bona ciuium et subditorum, siue indigenae, siue aduenae sint, modo sint subditi permanentes. Nam ciues temporarii, vel transeuntes pignorationibus premi adfurdum esset, e. g. si Anglicanus mercator ex Gallia veniens ob debitum Gallicanum arrepto constringeretur.

2. Nec eo iure tenentur legati, quorum res aeque ac personae ab omni vi immunes esse debent.

Ex aliis personis nemo excipitur.

num. 3. At ius ciuile priuilegiis munit et alias personas, e. g. mulieres, infantes, studiosos, de quibus imprimis consulenda famosa illa

illa *autb. habita C. ne fil. pro patr. mercatores*, qui ad mercatus publicos veniunt.

Ita et ius gentium certum modum procedendi non praescribit. Ius civile praeteribit, nempe, ut captis rebus citeantur ii quorum interest, iisque ex rebus diuenditis tantum addicatur, quantum sibi deberi probauerint.

Ceterum utroque iure naturali et civili, expeditum est, cum *num. 4.* qui occasionem de repressaliis dedit denegata solutione, alteri qui damnum passus, teneri ad indemnitate. Fundamentum enim generale huc quadrat: *Nemo debet cum alterius damno locupletior fieri.* Sed saepe hic accidit, ut damnum passo non ius delicti, sed exsecutio, si cum imperante vel re publica illi res sit.

CAPVT III.

DE BELLO IVSTO, SIVE SOLLEMNI, IVRE GENTIVM, VBI DE INDICTIONE.

§. 1.

Bellum dicitur *iustum* trifariam: vel *ratione causae*, quia *num. 1.* ob iustam causam indicitur; vel *ratione effectus*, quia pie et secundum iustitiae regulas geritur; vel *ratione formae*, quia ab iis geritur, qui gerere possunt, et sollemni ritu indicitur. De prima significatione actum *Lib. II. De secunda* videbimus *cap. 4. sequ.* Hic de tertia agitur.

Quid ergo hic *bellum iustum*? Est bellum a rebus publicis vel earum imperantibus decretum. Priuati enim quum non gaudeant iure bella gerendi in statu civili, sed bellum sit concertatio societatum liberarum: consequens est, ut si priuati bellum gerant, id non sit bellum, sed latrocinium, eoque pertinent *L. 118. D. de V. S. et L. 24. D. de capt. et poss.* Ex eodem sequitur, ut bella civilia inter membra eiusdem rei publicae gesta non sint bella iusta. Vnde et Romani negabant, captiuos in bello civili fieri seruos. *L. 21. §. 1. D. de capt. et poss.*

Secundo additur sollemniter indictum. Et hoc non tam ex iure naturae quam ex moribus gentium est. Gens enim gentem:

tem ea in re imitata est, ita tamen ut ritus indicendi bellum sint diuersissimi, uti infra videbimus §. 5. §q.

§. 2.

num. 1. 2.

Quum ergo dixerimus *bellum iustum* dici, quod a rebus publicis decretum est: quaeritur, *an si res publica bellum ob causas iniustas suscipit, nihilominus ea iustum bellum gerere videatur? an non potius sic ciuitas degeneret in coetum latronum?*

Resp. ratione primae acceptionis vocis *iustum bellum*, huiusmodi ciuitas a latronum coetu non differt: et catenus, recte Scythae Alexandrum M. vocarunt latronem gentium. Vtrunque enim vis sine iusta causa infertur.

At ratione tertiae significationis, de qua agimus, magna est inter huiusmodi rem publicam, quae bellum sine iusta causa gerit, et inter coetum latronum differentia. Nam

1. Maxime differunt fine. Ciuitas confociatur iuris fruendi vel securitatis suae causa: latrones sociantur criminis patrandi causa.

2. Ciuitas ius exteris administrat: latrones communes omnium hostes se profitentur.

num. 3.

3. A latronibus capti non sunt capientium, quia iustus titulus manifesto deest: capti a gentibus, licet iniustum bellum gerentibus, tamen in dominium capientium rediguntur.

4. De latronibus non triumphabant Romani: de gentibus iniusta bella gerentibus triumphabant. Quamuis hoc ad ius Rom. publicum pertineat, quum aliae gentes triumphum non admitterint.

Ratio discriminis est, quia latrones sunt plane personae inhabiles ad bellum gerendum: gentes autem in se sunt habiles, quamuis aliquando in explicatione iuris sui, et in ponderanda causa belli fallantur.

§. 3.

Quemadmodum vere recte dixerit Grotius, *societatem latronum esse iniustam et illegitimam*: potest tamen fieri, ut legitimus fiat exercitus, vel plane legitima ciuitas.

1. Si rei publicae operas addicant, ut Iephta. Elegans exemplum est apud D I T M A R V M in *Hist. Lib. VII.* de Henrico auctore

aucupé Germanorum rege. Quum ex vna parte Hungari, ex altera Sclavi et Venedi Germaniam deuastarent : veniam publice promulgari iussit omnibus furibus et latronibus, si aduersus Venedos praedatum exire, et a ciuium rebus abstinere vellent. Statim aliquot millia horum hominum se obtulerunt, qui in suburbiis ciuitatum collocati insigni clade affecerunt Germaniae hostes.

2. Si in ciuitatem coalescant. Exemplo Romulus eiusque coetus.

§. 4.

Quum autem societas libera vel res publica tantum bellum iustum gerat : quaeritur porro, *quaenam pro tali habenda sit?*

Resp. quae est independens, vel quae habet summum imperium. Hinc municipia, quamuis quodammodo sint res publicae ab alijs separatae, non tamen sunt societates liberae, quia alterius subiecta imperio. Aliquando contingit, vt ciuitas pro parte sit independens, pro parte ab alio dependens, tunc pro illa etiam parte bellum iustum gerit. Sic nemo dubitat, quin rex Prussiae, ratione eius regni possit bellum gerere cum vnoquoque, etiam cum ipso imperatore. Sed ratione reliquarum prouinciarum recte quidem bellum gerit cum exteris, sed non cum imperatore et imperio, nec cum constitutis, quia ratione priorum subiectione quadam impeditur, ratione posteriorum est cuius imp. adeoque in iudiciis imp. actionem instituire et suscipere tenetur.

§. 5.

Pergimus ad alteram capitis partem, nempe ad *indictionem* vel *denunciationem belli*. Ita enim inter gentes humaniores receptum, vt non alias incautas et nihil mali metuentes opprimant, sed prius indicant, et denuncient. Ea denuntiatio fiebat varijs modis.

1. Apud Romanos per faeciales hastam sanguineam proicientes in fines hostiles cum sollempni precatione, quae exstat apud Liv. lib. I. cap. 32.

2. Apud Turcas fit, proposita cauda equina, ex qua vnusquisque videre possit, bellum esse decretum.

3. Apud reliquas gentes id fit per clarigationem et *Manifesta*,
Heineccii Prael. Gros. Q q q

fla, uti vocant. Id est publico scripto explicantur causae belli iustificae, addita denunciatione. Id vero scriptum deinde quibusdam locis a praecone sub tubarum et tympanorum clangore recitari solet. Ritus itaque diuersissimi sunt.

§. 6.

Iam quaerit 1. *ex quo iure haec sit denunciatio?* Resp. distinguenda esse ea quae sint iuris naturalis ab iis, quae iuris gentium, vel plane iuris civilis, de iure naturae et gentium agitur hac §. de iure civili §. 8.

Naturali iuri denunciationem requiri, probari nequit. Quum enim 1. hosti in hostem in infinitum omnia liceant: licebit etiam eundem incautum opprimere. 2. Vbi alter manifesto laedit, et satisfactionem denegat, causae iustitia ipsa illi bellum indicit. Elegans huc pertinet iudicium Aeliani, ab auctore exscriptum.

Idem ius naturae tamen requirit, 1. ut si causa sit dubia prius colloquiis vel disceptatione tentemus pacem conferuare, de quibus supra.

2. Ut si causa etiam sit liquida, interpellatio tamen fiat; ut sciamus paratusne sit hostis ad satisfaciendum, nec ne. Nam si satisfacit, bellum merito cessat.

Haec solum rationem habent ex iure naturae idoneam.

Addit Grotius, etiam ubi ex regulis iusti non requiritur indictio vel denunciatio, tamen eam esse laudabilem ex regulis honesti vel virtutis.

1. Quia ita datur hosti spatium poenitendi, immo et impellitur eo magis ad poenitentiam, si videt, iam rem ad telus iactum venire.

2. Quia ita demonstratur studium pacis, quod semper bono imperanti debet bello esse potius.

3. Quia Deus ipse hoc iussit *Deut. II, 11*.

Quid vero ius gentium addidit? 1. necessitatem, ut omne bellum iustum indicatur; 2. sollemnitatem, ut certis ritibus, quos tamen non determinat, indicatur; 3. effectum, ut bellum sollemne certos effectus produceret, qui in minus sollemnibus non reperiuntur.

§. 7.

Quaeritur 2. *quotuplex sit haec indictio?* Resp. vel *conditio-num.* 1; *nata*, vel *pura*.

Conditonata, quando coniungitur cum rerum repetitione. Nisi nobis intra 60. dies satisfiat, bellum indicimus. Adde exemplum ex Livio a Grotio adductum.

Pura, vbi nulla amplius repetitio adiicitur. Quod fit 1. in bello defensivo, 2. si satisfactio iam denegata, 3. si factum in seculum fieri nequit.

An autem si semel sub conditione bellum indictum, et non *num.* 2.3: sequuta satisfactio, tunc eo pure fieri et sic repeti debet. Non est necessarium. Quae enim sub conditione sunt, existente conditione purificantur.

Sed aliquando tamen huius modi denunciationem eo casu repetitam novimus. Exemplum habet ipse Grotius.

Sed multa sunt, quae superuacua, quia superuacua non nocent. Quo et id retuleris, quod plerumque bellum ab utraque parte indicitur, et indictio adeo fit reciproca, quum tamen sufficiat, eam ab una parte factam.

§. 8.

Iam quaerit, *quid ex iure singularum gentium ciuili accesserit?* Resp. sollemnitatum determinatio. Tales erant apud Graecos caduceus, id est, baculus implicatis serpentibus ornatus, qualem Mercurio attribuunt. Apud Romanos sagmina, id est, herbae ex pomeriis petitae, quibus instructi sacro sancti et inuiolabiles habebantur. Vid. l. 8. §. 1. *D. de rer. diuis.* hasta sanguinolenta, quam faeciales in fines hostium mittebant, de qua Liv. lib. I. cap. 81. et huius generis alia, de quibus supra. Haec omnia ad ritus pertinent. Ritus sunt arbitrarii, adeoque ex singularum gentium legibus moribusque originem ducunt.

§. 9.

Iam de effectibus huius *indictionis*. Quorum primus est, quod bellum indictum imperanti vel rei publicae etiam subditis censetur indictum, immo et sociis, vel qui iam sunt in foedere, vel qui se postea illis adiungunt.

Q q q 2

Ratio

Ratio facilis. Nam 1. subditi cum imperante vnam constituent personam moralem, ob submissam ei voluntatem, adeoque et imperante declarato hoste, ipsi quoque hostes censentur. 2. Ratione sociorum, ne dubitandi quidem est ratio, quum qui hostem meum iuuat, procul dubio hostis sit. Ergo et iure meritoque eodem loco habetur.

§. 10.

Inde ergo sequitur, vt aduersus socios nulla noua opus sit *inditione*, quia dum se hosti nostro iniungunt, sibi ipsi videntur bellum inferre. Hinc Antiocho hoste declarato, Aetolis bellum separatim non indicebatur a Romanis.

Sed exceptio tamen est, si bellum cum hoste finitum sit, et iam socius vindictae causa bello petatur; tunc enim omnino id bellum denunciandum et indicendum. Nam priore casu bellum aduersus socium decretum considerabatur, tamquam accessorium. Hoc posteriore est principale, adeoque et nouam requirit inditionem. Hinc negabat Cato iustum bellum cum Ariouisto gessisse Caesarem. Venerat Ariouistus auxilio Gallis aduersus Aeduos. Ergo si tunc Caesar cum Gallis istis bellum gessisset, aduersus Ariouistum nulla opus fuisset noua denunciatione. At finito bello, et subiugatis Aeduis, tunc demum Caesar inconsulto populo et priuata auctoritate bellum ei inferebat. Vnde Cato, homo antiquae disciplinae, Caesarem per foeciales Germanis dedendum esse censebat.

§. 11.

Quaeritur autem, *cur inditione opus fuerit ad effectus quosdam belli, veluti, vt captiui fierent serui, vt res captae in dominium capientis transirent, cet.*

Multi eam reddunt rationem, ne tam dolo quam vi aperta hostes adgredi videretur res publica. Sed ea ratione vti possumus, si quaestio esset, cur honesta sit ea belli indictio? Nunc autem quaeritur, *cur in bello indicto captiui fiant serui, non item in bellis haud indictis?*

Hic meliorem rationem commentatus est Grotius, nempe quia alias vix constaret, iussu rei publicae bellum gerant duces, an priuato ausu. Priuati enim bellum iustum non gerunt.

Priua-

Prius autem bellum non gerere, sed rem publicam, ex indictione sollemni adparet.

§. 12.

Obiici posset, saepe tamen etiam in bellis minus indictis effectus hos fuisse observatos. Sic aliquando et captivi bellis civilibus in servitutem redacti sunt. Pompeius et de piratis, Caesar et de Pompeio triumphavit. Romani et provincias gallicas retinuerunt, quas a Caesare bello minus sollemni occupatas novant.

Sed resp. distinguendum esse, quod sit de facto, ab eo, quod sit de iure. In bello is, qui altero potentior est, multa agit, quae non probanda sunt, sed tamen ideo non tamquam iusta habenda. Exempla docent, quid fiat, non quid fieri debeat.

§. 13.

Quaeritur porro, *an bellum indictum statim geri possit?* Id aliqui negant, ex ea ratione, quod spatium indulgendum sit hosti, intra quod satisfactionem hactenus denegatam praestare possit.

Sed hi iudice Grotio falluntur. Quod perspicue potest demonstrari. Nam 1. bellum indici non solet nec debet, nisi tentata concordia et rebus repetitis. Id si semel factum, quid opus nova mora? 2. Supra docuimus, indictionem esse vel *puram* vel *conditionatam*. In *pura* nullum spatium indulgetur hosti. Ergo et non opus est mora. In *conditionata* mora indulgetur, non ex necessitate, sed ex arbitrio nostro, quia semel ei certum spatium praefiximus.

§. 14.

Postrema quaestio est, *an legatis violatis indictione belli opus sit?* Ea hodie non magni momenti, quia bellum per legatos indici non solet, uti ante 100. annos, quum legati vel *heroldi*, uti vocabantur, mitterentur hastati, qui litteras deferrent. Sed tamen si vel maxime is mos etiamnum vigeret, tamen sola violatio legatorum non esset sufficiens causa omittendi indictionem, quae et per litteras fieri potest.

CAPVT III.

DE IVRE INTERFICIENDI HOSTES IN BELLO SOLLEMNI, ET ALIA VI IN CORPVS.

§. 1.

Diximus belli sollemnis plures esse effectus, qui non deprehendantur in bello non indicto: tales effectus sunt

1. *Ius occidendi hostes*, de quo cap. 4.
2. *Ius res hostium vastandi et eripiendi*, cap. 5.
3. *Ius captiuos sibi vindicandi*, cap. 6.
4. *Ius imperandi victis*, de quo cap. 7.

Hic quaeritur de iure occidendi hostes, vbi denuo dispiciendum:

1. *An hostes interficere liceat?* §. 1-5.
2. *Quos interficere liceat?* §. 6-14.
3. *Quomodo occidere vel corporibus eorum vim inferre liceat?*

§. 15-19.

Quod ad primam quaestionem attinet, Grotius adducit verba Virgilii,

Tum, (si scilicet bellum indictum,) certare odiis, tum res rapuisse licebit.

Ad quae verba obseruat ex Seruio Scholiasta, 1. quod colludat poeta ad vetus ius faeciale Romanorum, ex quo bello indicto in hostem omnia licere censebatur. 2. Quod rapere hic non in sensu maligno accipiendum sit de raptu illicito, sed idem significet, ac vim inferre. Ea omnia facilia. Sed id disputatur praecipue, quo sensu haec *licere* dicantur?

§. 2.

NUM. 1.

Obseruat Grotius, *licere* aliquid non dici vno sensu. Nam 1. dicitur *licere* id, quod sua natura iustum et rectum est, etiam si forte aliud fieri possit rectius. E. g. *Licet* vnicuique exigere a debitore, quod debet, quamuis laudabilius sit, ei debitum remittere. *Licet* vnicuique iniuriarum actionem instituere, quamuis forte rectius acturus esset, si iniuriam dissimularet. Et eo

per-

pertinet illud Apostoli 1. Cor. 6. 17. *Omnia licent mihi, sed non omnia expediunt.*

2. *Licere* etiam dicuntur ea, quae in se non quidem pia et honesta sunt, sed tamen apud homines non subiacent poenae. Sic scortatio apud Romanos extra poenam erat, apud Germanos veteres latrocinari, apud Lacedaemonios et Aegyptios furari. Licebat ergo his gentibus scortari, latrocinari, furari, sed tamen ideo haec vitia non erant honesta. Illa philosophi perfecti, haec imperfecte licita adpellant. Et hinc tot distinctiones eorum, 1. inter id, quod *licet*, et quod *decer*; 2. inter id, quod *licet*, et quod *oportet*. Vide loca ab ipso auctore allegata.

§. 3. 4.

Iam quaeritur, quo sensu *licere* dicatur hostem occidere. Grotius hic singularem fouet sententiam, putatque, posteriore tantum sensu *licere*, non quod id iustum et bonum sit, sed quod impune id fiat. Hinc sub finem addit, ideo licitum dici hoc homicidium in hostibus admissum, quia ubicumque deprehensus miles non possit tamquam homicida puniri.

Sed hic manifesto hypothesibus suis, quas in religione peculiare admodum fouebat, seruit. Nam si imperfecte tantum licet occidere hostes, semper in foro conscientiae miles erit homicidii reus, quamuis poenis humanis exemptus, adeoque nec ullus miles spem habebit vitae aeternae, quum tamen S. S. doceat, et Dauidem, et Centurionem Capernaimiticum, et centurionem Caesariensem in statu gratiae fuisse. 2. Grotius ipse supra lib. I. cap. 2. docuit, bellum et iure diuino naturali et positivo iustum et perfecte licitum esse. Iam si bellum probat Deus, probat et media, sine quibus bellum geri non potest. Quis autem sibi concipiet bellum sine caede hominum gerendum? Ergo rectius statuitur perfecte *licere* hosti in hostem et caedibus vii, si aliter res componi et pax obtineri nequeat, idque ex eo fundamento, quia et contra priuatum licet vii moderamine inculpatae tutelae.

§. 5.

Ceterum *impunitatem a gentibus tributam esse illis, qui hostem occidissent*, suo more ex variis testimoniis veterum probat Grotius, et quidem

1. Ex

1. Ex prouerbio : *Purus profecto est, quisquis hostem occiderit*. Atqui prouerbia sunt testimonia antiquae sapientiae, et quae communis de re quadam fuerit veterum sententia, optime docent.

2. Ex ritu Graecorum, quibus nefas visum cibum sumere, vel lauare cum eo, qui hominem occiderit, praeterquam in bello.

3. Addit testimonia LIVII, *lib. XXVI. cap. 27. 21*. Caesaris, Iosephi, Papinii, vbi saepissime fatentur veteres hi auctores, occidere licere hostes iure gentium?

Sed quid opus est tot ambagibus demonstrationum. Si enim quaestio est de iure naturae, an id liceat? facilius id probari potuisset ex principio socialitatis, quia societas humana consistere nequit, nisi hostes, nobis intentantes perniciem liceret occidere, ceu exemplo Iudaeorum patet, qui nefas putabant contra Pompeium arma ferre sabbatho.

Si de iure gentium quaeritur voluntario, id est, de eo iure, quod gentes ex mente Grotii sibi ipsae constituerunt: sufficeret ad probationem dixisse, quod nulla vmquam gens, ab orbe conditio ad nostra tempora bellum siccum sine caede et sanguine gesserit, vel militibus suis persuaserit, nefas esse hostem occidere.

num. 1. Sed denuo Grotius monet, quando veteres hanc caedem hostium ius belli vocant, intelligendam tantum esse impunitatem, non ius aliquod perfectum: nam ipsos fateri veteres, 1. in bello innocentes cadere, 2. laudari ab illis, qui iusto iure se abstinere. *LIV. lib. I. c. 1. 3.* Quod Cypriano, Senecae Lactantio et Lucano bellum vocatur peccatum publice licitum, item ius sceleri datum.

Haec quamvis speciosa, non tamen fauent Grotio. Nam 1. quod et innocentes cadunt in bellis, id non per se et absolute fit, sed vt philosophi loquuntur per accidens: idque boni principes et belli duces pro virili cauent. Non autem innocentes sunt, qui arma contra nos ferunt. 2. Laudantur illi, qui isto iure abstinere: sed saepe honestum est, et rebus perfecte licitis se abstinere, e. g. debita exigere a paupere, iniuriarum agere, et. 3. Cyprianus, Seneca, Lactantius, Lucanus recte intelligendi: loquuntur hypothetice. Si homo non peccasset, vel vt Stoici, si mens humana non immerfa esset tot mate-

materiae fluctibus, nemo bellum gere ret. At iam, inquam, malitia hominum effecit, vt et scelcri, nempe homicidio, ius addendum fuerit in bello.

§. 6.

Quum ergo hoc liceat in bello: quaeritur, *quos in bello occidi fas sit?* Quum enim ciues sint vel perpetui, vel temporarii, itemque vel originarii, vel aduentitii: quaeritur, *an omnes ius iam rigidum seriat?* Resp. Grotius, omnes, qui intra fines sunt hostium, vel vti ius faeciale Romanorum habet, qui intra praedidia hostium sunt. Nam 1. dum apud hostes manent, et solum non vertunt, hostilem ostendunt animum. 2. Dum hostili rei publicae, in qua degunt, vectigalia tributaue soluunt, ei commeatum aduehunt, stipendiaue faciunt, nos adficiunt damno, adeoque satis causae est, eos tamquam hostes persequendi.

Quum autem ciues temporarii et aduentitii sint duorum, generum, liquidem alii seruente iam bello se ad hostes conferunt, alii ante bellum sedes sibi iis locis bona fide delegerunt: quaeritur, *an ad omnes promiscue ius illud rigidum pertineat?* Respondet Grotius, de prioribus nullam esse dubitandi causam. Qui enim seruente iam bello, hostibus nostris se adiungit, is procul dubio hostis est. At de posterioribus videamus.

§. 7.

Hi quoque pro hostibus habentur, sed non pure, sed sub conditione, si intra modicum temporis spatium non discedant, et in patriam reuertantur. Ita Grotius.

Sed distinguendum tamen esse recta ratio docet, 1. an ciuis noster apud hostes sit, an alius. Si prius, tunc locum habet Grotii decisio. Et hinc origo auocatoriorum, quae vocant, quibus publice propositis iubentur ciues nostri hostium praedidia, castra, vrbes intra certum temporis spatium deserere, addita comminatione, eos alioquin non pro hostibus, sed desertoribus et transfugis habitum iri. Posteriore casu mitius habenda sunt ciues exteri, siquidem pro hostibus quidem habentur, sed non poena aliqua adficiuntur.

2. Distinguendum an possint discedere, nec ne. Posteriore

Heineccii Prael. Grot.

R r r

enim

enim casu ignoscendum est illis, quos necessitas apud hostes retinet.

§. 8.

num. 1. Redit ad *hostes* ipso auctor, quaeritque quos occidere liceat? Resp. omnes. 1. Quia bellum regi vel rei publicae indictum ciuibus quoque indictum intelligitur, ceu supra demonstrauimus. 2. Quia, vt saepe monuimus, in re publica est vna voluntas, siquidem omnes voluntatem suam vel vni, vel paucis, vel plurimis submitserunt. Ergo tota res publica vult, quod imperans vult, adeoque quum omnes subditi habeant pro hostibus, quos rex vel imperans habet, sequitur, vt et omnes tamquam hostes occidi possint.

num. 2. Quum ergo hoc ius occidendi sit ex ipsa hostium persona; consequens est, vt illos occidere liceat, sine loci discrimine. Hinc occidi hostes possunt in solo nostro deprehensi, maxime quum sic vim vi repellamus, et irruentes reiciamus, in solo hostili, quia hosti in hostem omnia licent, in solo nullius; quale est mare, quia et ibi hostes reperimus. Non tamen in solo amici, non ob personam hostium, sed ob priuilegium territorii amici, quod violare nefas esset.

Distigue tamen, aut pauci ibi hostes, vel hostiles naues deprehenduntur, quae nos insigni adfecerunt iniuria, et tunc iudicis implorandum auxilium, aut totus exercitus in solum hostile confugit, et quidem vel consentiente amico nostro vel inuito. Si consentiente, nobis idem ius erit, adeoque hostem ibi deprehensum occidere fas esse, nemo negauerit. Sin inuito, tunc aut in fuga est, aut nobis exitium hac via minatur. Priore casu territorii rationem merito habemus, posteriore casu perinde est, vbi hostem nostrum deprehendamus.

§. 9.

num. 1. 2. Quaeritur, an et infantes et feminas occidere liceat? Respondent aliqui, perfecte licere, idque demonstrant exemplis Deut. 2, 34. 20, 16. vbi ipse Deus vetat veniam dari pueris et feminis Cananitorum. 2. Ex loco Ps. 136. v. ult. vbi beatus is praedicatur, qui allisurus sit infantes Babyloniorum lapidibus, iure scilicet belli, quod huic crudelitati perfecte indulgeat. Sed 1. quum a iure Dei in homines ad ius hominum

ip

in homines non statim valeat argumentatio, et 2. locus ille *Psalmi* supponat mandatum et voluntatem Dei, Babelem eradicandi: inde sane thesis illa satis demonstrari nequit.

Grotius noster negat iure perfecto licitam esse hanc infantum caedem, imperfecto tamen licitam concedit, idque probat exemplo Thracum, Macedonum, Romanorum.

Plerique recentiores neutro modo licitam esse in bello aiunt caedem infantum et feminarum. Fundamentum enim 1. cur hostes subditi occidi possint, est consensus vel unio voluntatum. Huiusmodi consensus in infantes non cadit. Fundamentum 2. est, quia praeuere licet eos, qui nobis minantur interitum. At ordinarie id nec feminae possunt, nec infantes.

Hinc potius poenas irrogatas militibus scimus, si sine necessitate in feminas et infantes fauissent: adeoque potius distinguendum, vtrum consilio ita fauerint milites, an casu huiusmodi caedes contigerit, e. g. igne vrbi et aedibus iniecto. Priore casu caedes illa vix excusanda, posteriore saltim impunis habetur.

§. 10.

Quaestio praeterea est, *an et captiuos occidere fas sit?*

NUM. I. 21

Concedit id Grotius, probatque variis veterum testimoniis. Quin addit, id ius occidendi ne quidem tempore villo excludi.

Sed accuratiores omnino recte distinguunt inter deditos et captos. De captis sine deditione, an iis semel ignouerimus nec ne, itemque de deditis, an sub promissione vitae receperimus, (quod vocatur *Quartier - given*) an sine huiusmodi promissione (quod vocant *op gnaede en ongnaede.*) Si spes facta vel venia semel data, expirat ius eos occidendi, ex pacto ibi expresso, hic tacito, cui contrauenire non possumus.

§. 11.

Quid vero si parati sunt hostes ad deditionem, et tamen a nobis non recipiuntur, an tunc impune occidi possunt?

Id recte affirmat Grotius 1. quia potest iusta causa esse hostes non recipiendi in deditionem, e. g. quia nimis pertinaces fuere, quia nostros non receperunt, quia transfugae sunt,

R r r 2 cet.

cet. 2. Si recepti non sunt, tunc nec pactum, vllum intercedit, nec tacitum nec expresse, quod nos possit a iure nostro prohibere. 3. Deditio enim est actus bilateralis, nec intelligi potest sine acceptione. Vid. Cic. *Topic. cap. 8.*

§. 12.

Quid si dediti recepti, sed sine vlla conditione vel promissione vitae? Resp. tunc quoque occidi posse, idque exemplis ex historia Romana haud paucis, et inprimis ex ritu, quo triumphantes occidere solebant deditos hostes, probat Grotius.

Sed vti exempla nihil probant iustum vel iniustum esse: ita rectius dicitur veram rationem esse, quia vbi nihil promissum, nec expresse nec tacite, ibi nihil hosti debeatur: atqui deditis et receptis sine conditione, vel, vt hodie vocant, *op' guæde ende onguæde*, nihil vel expresse vel tacite promissum. Ergo, cet.

Fatendum tamen humanius et his parci, quum ipse actus receptionis iis semel aliquam spem fecerit salutis, neque probabile sit hostes et ad extrema adactos eo fine se dedere velle, vt ad supplicium ducantur.

§. 13.

Quaestio porro est, an ob talionem vel pertinacem defensionem occidere liceat captiuos? Vtrumque negat Grotius, et quidem

1. Quod ad prius ideo negat, quod talio iuste exerceri non potest, nisi in eandem personam quae deliquit, atqui si praesidium huius vrbis ob delictum alterius praesidii occiditur, tunc talio exercetur in personas diuersas.

2. Quod ad posterius, non minus id negat. 1. Defensio enim est iuris naturae, adeoque nemini vitio verti potest. 2. Potius laudem merentur, qui tam fortiter se patriamque defendunt, si verum est, virtutem etiam in hoste laudandam. 3. Nec duces bellici sine iussu principis vel rei publicae, nec milites sine iussu ducum, possunt a defensione desistere, adeoque vtriusque est iusta defensionis et exculationis causa.

Ita Grotius. Et recte haec se haberent, si quaestio esset de homi-

hominibus his supplicio adficiendis. Hic autem quaeritur, an bello occidi possint? non per carnifices, sed per milites nostros, non tamquam delinquentes, sed tamquam hostes? Iam quum et sine his causis occidi possint, quidni si hae causae accedant? Accedit, quod rationes in contrarium allatae facile refellantur. Nam 1. vere hic talio exercetur in eandem personam, quia totius hostilis rei publicae eadem est voluntas, eadem persona moralis, 2. defensio quidem laudabilis, modo non sit bruta, et sine ratione ex sola pertinacia res ad extrema adducatur.

§. 14.

Paulo difficilior est quaestio, *an et obsides occidere liceat?* Obsides sunt homines vel personae magni momenti, quae ab hoste nobis pignori dantur, ut retineri possint, donec promisso satisfecerint. Olim et pacis causa dabantur. Hodie usus eorum paullo rarior, nisi in oppugnationibus urbium, ubi obsides dant inuicem victor et victi, interea dum de deditione paciscantur.

Iam si hostis promisso non satisfecerit, *an tunc obses occidi potest?* Grotius et id putat ius gentium permittere, ob varia quae adducit exempla. Sed id quidem falsum. 1. Exempla enim nihil iustum esse probant. 2. Nemo potest vitam alterutrius oppignorare, immo ne suam quidem. Sic saepe etiam in doli non capaces fauaret victor, siquidem haud raro obsides dantur impuberes.

Obiicitur, si nulli vsui fore obsides, si hostes sciant, ob perfidiam suam illos occidi non posse. Sed resp. quasi sola mors obsidum hostes mouere possit, et non etiam periculum carceris perpetui. Illustretur id exemplo regis, filium qui obsidem dedit.

§. 15.

Pergimus ad vltimam capitis partem. Vidimus 1. *quod hostes occidere liceat*, vidimus 2. *quos occidere liceat*. Reliquum est, ut 3. *quomodo eos occidere liceat*, dispiciamus.

Recte Grotius distinguit inter ius naturae et gentium, quamuis nos per ius gentium non verum aliquod ius, sed mores tantum inter gentes receptos intelligamus.

Secundum ius naturae licet occidere hostem: gladio id fiat,

R r r 3 an

an puluere pyrio, an veneno, perinde est, quia hosti in hostem in infinium omnia licent.

At mores gentium humaniorum, (*la raison de guerre*) hanc regulam iuris naturalis mitigat, et hinc non omnes modos occidendi permittit.

num. 2. Hinc nemini licet aduersus hostes veneno uti, non quod iniustum sit, sed quod inhumanum, et moribus gentium humaniorum aduersum. 1. Armis bella gerenda, 2. sic excluditur omnis defensio. 3. Quod tibi non vis fieri, alteri ne feceris. Laudandus ergo Fabricius Cos. qui insidias in Pyrrhum regem promissas reiecit.

§. 16.

num. 1.2. Veneno vero uti solebant hostes dupliciter, 1. ut insidias fruerent ducibus bellicis totius exercitus, e. g. fontes insiciendo. 2. Ut illinerent venenis fortioribus gladios et sagittas, ut iis vulnerati nullam spem haberent salutis, id quod Turcae etiamnum faciunt. Vtrumque damnant mores cultioris Europae. De priore iam vidimus. Posterius quoque inhumanum, 1. quia sic neminem tuetur fortitudo, et manu fortissimus a velite leniter fauciatus perit. 2. Quia durum est vulneratis inuidere reconvalescentiam et dolores eorum augere.

§. 17.

Quid vero si aquae non veneno insiciantur, sed ita corrumpantur tamen, ut bibi nequeant, e. g. funum et sordes iniiciendo?

Id numquam mores cultiorum gentium improbarunt. Nam 1. id non sit ad hostem perdendum, (quamvis et id non sit nefas) sed ad cogendum, ut deditionem faciat. 2. A maiore licebit argumentari ad minus: si licet flumen in hostis odium vel intercludere catarrhactis vel auertere: licebit etiam eundem plaue corrumpere.

§. 18.

num. 1. Grauißima quaestio est, an et percussoribus uti liceat? Denuo quaestio est de gentium cultiorum moribus, quos Grotius ius gentium adpellat. Hic varie distinguitur:

1. an

1. an percussores sint hosti fide obstricti, vt subditi, vassalli, milites, an vere hostes et nullo iuris vinculo obnoxii. Illis vt percussoribus ne iure quidem naturae licet, nedum moribus gentium. Posteriore casu id consilium nec improbarunt gentes etiam humanissimae, e. g. Romani. Vid. exemplum Mucii Scaeuolae apud Liv.

Rationes sunt 1. hostis hostem potest occidere, quidni et ^{num. 2.} clam? 2. hostem occidere licet per multos, per iustum exercitum, quidni et per paucos. 3. Semper laudem mereri visum qui huiusmodi quid fecerunt.

Obiici solet, atqui percussores deprehensos affici supplicio ^{num. 3.} solere, adeoque pro crimine haberi eorum audaciam. Resp. Grotius, id sit non quod vere peccarint, sed quod hostes in hostes dura quacuis statuere fas sibi existimant. Sufficit enim, quod hi homines magnum hostibus intulerint detrimentum.

Illustrari id potest exemplo exploratorum. His vt non est nefas, quin ipse Deus id consilium probat, dum Mosen exploratores mittere iubet, et tamen deprehensi occiduntur et afficiuntur supplicio.

Aliud ergo, vt diximus, si percussores hosti fide obstricti ^{num. 4.} sint. Nam 1. et ipsi peccant dum fidem violant, et 2. qui eos conducunt, dum alios ad peccandum pelliciunt.

Rationem aliam comminiscitur Grotius, quam et occasionem huiusmodi prohibitioni dedisse putat, ne scilicet reges, quorum semper sacrosanctae personae vitae sunt, periclitarentur.

Deinde 2. distinguendum, sitne bellum sollemne, an minus ^{num. 6.} sollemne, id est, sitne cum iusto hoste facta prius indictione, an cum latronibus, rebellibus, piratis, sine indictione bellum gerendum. Priore casu merito abstinemus a percussorum opera. Posteriore iisdem iure vrimur. Nam 1. tale quid in piratas, rebelles cet. statuimus, non tamquam in hostes, sed tamquam in delinquentes. 2. Magistratui licet praemium polliceri, ei qui delinquentem fugituum viuum vel mortuum obtulerit. Ergo etiam licet praemium offerre percussori.

§. 19.

Ultima quaestio est *de stupris in hostium feminas: an et illa*
excus-

excusanda? Affirmarunt alii ob eam rationem; quia sit iniuria corpori illata: atqui hostile corpus iniuriae cuiuscumque expositum est. At rectius illi, qui negant. Nam 1. non est solum iniuria, sed simul actus illicitus, et cum efferata libidine coniunctus. 2. Non est hoc humanum inceptum, ex hostili corpore voluptatem capere, et actum amoris ex odio exercere.

num. 1.

3. Repugnat id legi diuinæ, *Deut.* 21. 10. 4. maximam laudem semper decerni videmus Scipioni, Marcello, Alexandro M. quod et hostilis pudicitiae curam gesserunt. Addi potest 5. quod et vtilitati rei publicae aduersatur eiusmodi facinora permitti militibus, quibus a virtute ad molliem et voluptates ruant.

CAP. V.

DE REBUS VASTANDIS ERIPENDISQVE.

§. 1.

*Q*uid hosti in hostium corpora liceat, superiore capite expositum. A maiore ad minus concludentes facile animaduertimus, *multo plus licere in eorundem res, tum immobiles, tum mobiles.* Videbimus ergo 1. quid liceat? §. 1. 2. In quas res aliquid liceat? §. 2. 3. Quomodo eas inuadere liceat? §. 4.

I. Quid liceat, duabus propositionibus commode exprimitur. 1. Licet res hostium rapere, eosque omnibus facultatibus spoliare, 2. licet eorundem res corrumpere, exurere, vastare, si commode occupari vel retineri nequeant.

Rationes sunt, 1. quia hosti in hostem in infinitum omnia licent. 2. Quia si occidere personas licet, multo plus licere debet in earum res.

Praxis bellica haec omnia satis confirmat. Sed dubitatur tamen, an idem liceat in deditos. Grotius hoc adfirmat, probatque exemplo ex *TACITI Annal. lib. 13.* Sed omnino et hic observanda distinctio superior, an dediti conditiones certas sibi stipulati sint, tunc eae seruandae: an sine conditione facta sit deditio, tunc sufficit, saluam deditis manere vitam.

§. 2.

§. 2.

II. In quas res huiusmodi quid liceat, paullo difficilior quaestio est. *Res* sunt vel *communes*, vel *publicae*, vel *uniuersuatis*, vel *singularum*, vel *nullius*.

Communes ne possunt quidem eripi, ut aer: publicae sunt rei publicae quacum bellum gerimus. Ergo eripi posse illas extra dubium. Idem dicendum de rebus uniuersitatis et singularum. Enimuero res nullius quum sint vel sacrae, vel sanctae, vel religiosae, de his potissimum quaeritur, num ab hostium manibus exemptae sint.

Si solum ius naturae et gentium proprie sic dictum spectemus: nihil ibi occurrit, quod res sacras defendat a potestate hostium:

1. Quia res sacrae vere non sunt nullius, uti ethnici sibi persuaserunt, et hodiernum sibi persuadent pontificii, sed sunt ecclesiae; ecclesia autem est pars rei publicae, vel uniuersitatis, adeoque res illae non magis exemptae sunt, quam res uniuersitatis et publicae.

2. Quia ex formula vetere se dedentes etiam diuina cum humanis dedere cgebantur.

3. Quia omnes gentes, etiam profanae, sacra victoris arbitrio permiscere. Id apparet ex a) *leg. 36. D. de religiof. ß)* ex testimonio luculento Pausaniae, qui hunc communem gentibus omnibus morem fuisse ait, ut res sacrae in arbitrio victorum essent; γ) exemplis, quae in hoc ipso numero habentur. num. 21

4. Quia ex principiis iuris naturae et gentium, certum est, res sacras in arbitrio rei publicae esse, adeo ut res publica de illis disponere, et ex sacris profanas facere possit. *L. 83. §. 5. D. de V. O. L. 137. §. 6. eod.* Immo exempla docent saepe res publicas rebus sacris pro tuenda re publica vsas. num. 3.

Iam quum id liceat rei publicae, quidni et hosti, qui iure victoriae sit successor priorum imperantium uniuersalis, eademque iura sibi recte vindicat, quae victis antea competeabant.

Addit tamen Grotius, 1. eos victores, qui numen aliquod inesse simulacris credunt, non sine scelere manifesto illa violare et corrumpere: quia agunt contra fidem suam et conscientiam, aequae ac si gentilis per Iouem periurium committat. num. 4.

2. Contra gentibus, quae contrariam persuasionem fouent, *Heineccii Prael. Grot.* S s s vitio

vitio verti non debere, si huius modi idola violent, destruant; comburant. *Deut.* 7. 5. Et ita fecit Carolus M. Saxonia potius. Ita et Persae omnia templa per Graeciam destruxere, quia credebant, nefas esse, Deos templorum parietibus includere et cohibere velle.

Hinc maxime hic distinguendum ius belli strictum, ab eo; num. 5. quod decorum est. Iure stricto et rebus sacris non parentes pro iniustis haud habendi, quia iure suo vti nemini faciunt iniuriam. Et hinc Titus destruens templum Hierosolymitanum, non fuit iniustus. Sed decorum tamen saepe suadet, ne victor hoc iure suo utatur, ne scandalo victis dato eos ad seditionem conseruet, ne atheismi suspensionem incurrat. Et hinc recte quoque Pompeius, qui occupatis Hierosolymis templo nihilominus percit.

§. 3.

Haftenus de *rebus sacris*: quid de *religijs* dicendum? idem; quod de *sacris*. Nam 1. falsum, *sepulcra* esse res nullius. 2. Falsum ea esse *religiosa*. Vana enim persuasio de Diis: Manibus ad sepulcra vagantibus tam absurda est, ut nihil supra. 3. Ipsi gentiles, qui sepulcra pro rebus religiosis habuerunt, religionem tamen cessare dicunt, si capiantur ab hostibus. *L.* 4. *D. de sepulcr. viol.* Quanto minus victori vitio vertenda ista violatio, si plane sepulcra pro religiosis non habet.

At distinguendum tamen quo fine violentur sepulcra, an id fiat ex solo odio defunctorum et petulantia victoris, (id et absurdum et detestandum est, nec umquam excusanda Gallorum saevitia, qui capta et deleta Spira sepulcra veterum imperatorum violarunt, et ossa eiecerunt) an id fiat ex necessitate, e. g. ut lapidibus utantur ad reficienda munimenta, ut aurum, argentum, ibi repertum, vrbis rei publicae adplicent. Et id nemo improbauerit ob rationes iam allegatas.

§. 4.

III. Denique si de *modo* quaeritur, perinde est, *sive res aperta vi rapiantur et corrumpantur, sive dolo*: utrumque et ius naturae et mores gentium probant. Nam dolis et stratagematibus in bello locum esse, iam supra demonstraui. Inde sequitur, ut

1. iniusti

1. iniusti non sint, qui res hostium ex insidijs intercipiunt;
 2. excusandi, qui aliorum opera utuntur, ad incendenda horrea hostium; (*de magazinen in brand to brengen.*)

Nec ferenda Grotii comparatio, qua sub finem id conniuentiae accenset, qua et meretrices tolerantur. Nam non solum impunes esse dolos in bello, sed et perfecte licitos, supra satis superque probauimus.

CAPUT VI.

DE IVRE ADQVIRENDI BELLO CAPTA.

§. I.

QUum fas sit res hostiles rapere, ut *cap. 5.* demonstratum; *num. 11* fas quoque erit easdem *adquirere*, de eo iure iam agitur. Et quaeritur

1. *Quo iure hostis res captas adquirat?* §. 1. 2.

2. *Quas res adquirat?* §. 3-7.

3. *Quis adquirat?* §. 8-13.

4. *Quid iuris victori sit in rebus acquisitis?* §. 14-fin.

I. *Quo iure adquirantur res bello captae*, primum quaeritur. Grotius primum dispicit de iure naturae et diuino positiuo, ac deinde de iure gentium, quia haec iura diuersa putat; quum tamen per ius gentium nihil aliud hic intelligat, quam *mores gentium*.

1. Iure naturae omnino capta ab hostibus sunt capientis, idque probatur a fine belli. Bellum geritur, quia iudicis auxilio destituimur, et quidem vel ad vindicandas iniurias, vel ad suum recuperandum. Quemadmodum itaque quod nobis a iudice pro satisfactione vel recuperatione rerum nostrarum adiudicatur; statim nostrum sit: ita et quod bello hunc in finem gesto adquirimus.

Nec dubitari potest de iure diuino positiuo. Nam 1. Abrahamus *Gen. 15.* deuictis quinque regibus spolia sibi vindicauit, Deoque decimam attribuit. Id quod probatur et fidei adscribitur. *Hebr. 8, 4.*

S s s 2

2. Iaco:

2. Iacobus *Gen.* 48. 22. ex spiritu prophetico Iosepho filio attribuit partem rerum Amorrhæorum, quas arcu et manu capturi essent. Id quod fieri non potuisset, nisi ius esset hostes rebus suis spoliare.

num. 3.

3. Idem patet ex *Deut.* 20, 14. vbi Deus praedam concessit Israelitis, ab hostibus captam. Add. *Num.* 31, 27.

Ex praxi populi Dei, Rubenitarum, *Ios.* 22, 8. Asae, *1. Chron.* 5, 20. sq. *2. Chron.* 14, 13. Davidis, cet.

f. 2.

num. 1.

Quid vero de iure gentium, id est, *de moribus gentium*?

Hi quoque probant hunc acquæstum, sed, ut recte additur, eatenus, ut a gentibus omnibus in possessione earum rerum tuendus sit victor, vel qui ab eo causam habet. Nam ratione ipsius victi victor dominium non acquirit, nisi pace facta ius suum victori cesserit: siquidem ipsi victo adhuc ius saluum est, rem amissam recuperandi. Si vero dominus factus fuisset victor, non recuperaret rem suam, sed alienam eriperet.

Iam thesin suam, quod iure gentium victor res hostiles captas adquirit, variis argumentis probat Grotius, quorum primum est,

1. quod omnes veteres inter acquirendi modos, qui ex iure gentium sunt, etiam occupationem bellicam retulerant. Ita Xenophon, Plato, Socrates, ita et institutiones nostrae tit. *de rer. diuis.*

num. 1.

2. Quod veteres auctores diserte hoc ius referunt ad ius quoddam gentium voluntarium. Aristoteles vocat legem, velut pactum quoddam commune.

num. 3.

3. Quod iidem auctores victores ea, quae possident, iure possidere dixerunt. Ita Plutarchus, Xenophon, Philippus rex Mac. et Aeschines loquuntur. Ita et Romana praxis id confirmat. Nam non solum hostilem agrum in provinciam redegerunt, praedamque et spolia in aerarium intulerunt, sed et semper titulum hunc et causam possessionis pra se vnice tulerunt, quod ea iure belli habeant. Loca huius generis varia ab ipso auctore allegantur.

num. 4.

Obiici posset, atqui Theophilum, Ictum Graecum, in paraphrasi Institutionum hunc modum acquirendi vocare naturalem, ergo illum non esse ex iure gentium. Sed resp. 1.) et id verum,

verum, quia §. 1. demonstrauimus, hoc principium et ius naturae probare. 2.) Theoph. naturale alio sensu accipit, quam vulgo. Naturale aliquid dici potest vel ratione originis, vel ratione modi. Priore sensu naturale dicitur, quod ex iure naturae descendit: posteriore quod sine pactis, traditione, aliisque modis et sollempnitatibus ciuilibus peragitur. Et hoc posteriore sensu acquisitionem rerum hostilium vocat naturalem.

Quaeritur an hoc modo a victore tantum adquirantur res publicae et principis, an et res priuatorum? Resp. vtraque, quia princeps cum subditis vnā constituunt personam moralem, et ob vniōem submissionemque voluntatum praestare teneatur facta rectorum ciuitatis.

Sed addenda tamen exceptio: nisi pacta deditiōis interuenerint, vel promissio veniae. Saepe enim hostes salua sibi bona per deditiōem stipulantur: saepe ipsis victor illorum securitatem iis promissit vltro. Tunc iuri suo renunciauit. Et sane etiam ex rationibus politicis absurdum esset priuatis victis semper bona omnia eripere, quum sic nullus sit, qui tributa in posterum victori pendat.

§. 3.

II. Sequitur altera pars capituli: *quas res adquiramus bello?* num. 1.

Iam vidimus, nihil interesse, *sacrae* sint, an *profanae*, *mobiles* an *immobiles*. Sed tamen ratione modi occupandi inter *mobiles* et *immobiles* quaedam differentia est.

Mobiles is demum adquisiuisse videtur, qui eas intra praesidia vel castra pertulit, et persecutionem hostis effugit. 1. Quamdiu enim alteri ius saluum est rem recuperandi, tamdiu res non est nostra. At hostis hostem persequens ius habet amissum recuperandi, quamdiu persequitur. 2. Eodem modo res mobilis bello amittitur, quo postliminio redit. At postliminio redit, si intra fines nostros esse coepit. Ergo et amittitur si ad fines hostium peruenit.

Sed ea intelligenda, nisi aliter mores se habeant. Sic 1. num. 1. apud Romanos occupata ab hoste statim fiebant capientium, vt loquuntur institutiones nostrae §. *item ea, sit. de rer. diu.* Et 2. moribus hodiernis naues et alia spolia victoris esse intelliguntur, si per horas 24. in potestate victoris fuerint. Qui mos recte a Grotio in notis ex iure Germanorum vetere deriuatur, quibus omnia

capta veluti ferae bestiae, mancipia cet. 24. horis possessa adquiri dicebantur.

§. 4.

Quid vero de rebus immobilibus? Distinguendum est inter hostes ipsos et externos. Si quaeritur, *an ratione exterorum victor sit dominus agri occupati*? nemo negabit. Titulus enim est bellum, modus acquirendi occupatio. Ergo ratione exterorum iustissime possidet, tamquam successor prioris domini vniuersalis.

Sin quaeritur, *an victor etiam statim sit dominus ratione victi*? id negandum. Nam, ut diximus, si dominus esset, nullum victo ius remaneret, agrum amissum recuperandi. At remanet hoc ius. Ergo manet dominus. Elegante exemplo id illustrat Grotius. Hannibal a longinquo obsidebat Romam. Ille ipse autem ager quem castris suis occupauerat Hannibal, eo die Romae venibat. An Romae poterat venire ager, quem Hannibal hostis insidebat? Omnino. Erat dominus Hannibal ratione aliorum exterorum, e. g. Macedonum, Syrorum, non ratione Romanorum.

§. 5.

Quaeritur porro, *an et res alienas apud hostes inuentas adquirat victor*? Distingue vtrum res illae pertineant ad hostium socios et foederatos, an ad eos, qui neutrarum sunt partium. Si prius, tunc perinde est, ac si ipsorum hostium essent: sin posterius, abripi nequeunt.

1. Nam hosti in hostem in infinitum omnia licent, non in amicos, adeoque caussa cessat.

2. Diximus bellum in statu naturali esse loco iudiciorum, quae sunt in statu civili. Quemadmodum ergo per adiudicationem adquirere nihil possum, quod possidet is, quocum mihi lis nulla est: ita et per bellum adquirere non possumus, quod is habet, quocum non bellum gerimus.

§. 6.

Obiicitur, *at res in hostium navibus repertas abripi, siue amicorum sint, siue inimicorum*? Sed resp. id falsum esse. Nam omnes gentes moratiores, (exceptis forte Gallis) dicunt, tantum

tum praesumptionem esse, res in hostium nauibus repertas esse hostiles. Quemadmodum vero praesumptio cessat, si probari potest contrarium, ita et amicorum in hostium nauibus repertae statim redduntur dominis, simulac liquido constat, eas amicorum esse. Et hoc eleganti praeiudicio rei publicae Belgicae firmat Grotius.

Aliud tamen seruare Gallos diximus, quibus placet parocimia iuris: *La robbe de l'ennemi confisque celle de l'ami*. Sed omnes gentes reliquae hanc Gallicam praxin iniquissimam merito arguunt.

§. 7.

Quaeritur, an et acquirat victor ea, quae amica victus bello adquisierat? E. g. Amorrhaei partem territorii eripuerant Amonitis, victis Amorrhaeis is ager ad Hebraeos peruenerat. Jam quom Hebraei possiderent, eum vindicabant priores domini Amonitae. Et ea origo belli cum Iephtha gestu. *Iud. 11. 23. seq.* Quaeritur, quem penes fuerit iustitia belli?

Resp. penes Iephtham et Hebraeos. Nam 1. vbiicumque ius contra priorem possessorem expirauit, ibi illud non reuiuiscit contra posteriorem. At hic illud expirauerat, postquam Ammonitae finito bello agrum amissum Amorrhaeis victoribus reliquerant. Ergo illud reuiuiscere non poterat aduersus Hebraeos.

2. Ea sententia etiam semper placuit gentibus, idque Grotius operose probat 1. ex DIONYSII HALICARN. lib. 6. 7. vbi riserunt Romani Volscos, quae olim a se possessa ad Romanos victores peruenerant repetentes. 2. Ex eorundem praxi. Vnicum videbimus exemplum. Tigranes Rex Armeniae Antiocho regi Syriam eripuerat. Paulo post Romani Tigrani inferebant bellum, et eum omnibus exuebant prouinciis. Jam Antiochus repetebat Syriam. Negabant Romani se reddituros, quod contra hostes tueri nequiuert. Et sane si Tygranes factus est dominus finito cum Antiocho bello, domini etiam fuere Romani; victores.

Enimvero aliud tamen statuendum, si focii et spederati prouinciam recuperemus, et propter hanc prouinciam bellum commune geritur: tunc restituenda omnino socio. Sic Ferdinandus II. imp. occupauerat ducatum Meclenb. Pomeraniam, Marchiam, Gustauus Adolfus rex Sueciae cito cum principibus Euangelicis foedere

foedere expulit Caesareos. An poterat sibi prouincias occupatas retinere? minime. Eas recte restituebat prioribus dominis.

§. 8.

III. Sequitur tertia pars capituli, ubi quaestio est, *quis rerum bello occupatarum dominium adquirat?*

Error is inuasit Ictos, ac si iure Romano res captae fuerint adquisitae singulis capientibus. Occasionem errori dedit, 1. quod legerunt in iure capta fieri capientium, 2. quod *c. sicut X. de iureiur.* idem fere cantat, 3. quod omnes fere doctores ita sentiunt.

§. 9.

num. 1. Sed hanc sententiam e male intellectis iuris nostri locis natam luculenter iam refellit Grotius, et quidem argumento hoc uno. Nam

Gentes res hostium considerantur tamquam res nullius, quia cum hoste nulla esse videbatur iuris communio. Atqui res nullius cedunt occupanti. Ergo et res hostium. Occupatio illa siue per me ipsum fiat, siue per alium, iuris naturae et gentium perinde est: ergo et perinde erit, ipse ne princeps spolia opima hosti detraxerit, an id fecerit per milites suos. Res illustrari potest exemplo venantium. Qui ius venandi habet, is adquiret feram, siue ipse ceperit, siue eius iussu seruus, venator, rusticus.

num. 2. Obiiciunt, distinguendum esse inter personas, liberos et seruos. Quidquid seruus adquiret, id procul dubio adquiret domino. At de personis liberis regula est: nemo alteri vel stipulari, vel acquirere potest. §. 4. *I. de iur. stip.*

§. 10.

Sed resp. Grotius, et recte quidem, id non ex iure naturae et gentium esse, quippe quod et liberorum hominum volentium opera ad acquirendum vti neminem prohibet, sed ex iure ciuili Romanorum, quod multa singularia habet. Id Grotius probat 1. ex testimonio *MODESTINI L. 53. D. de adqu. rer. dom.* ubi ipse distinguit inter modos acquirendi *naturales*, et *ciuiles*, et illos vicariam operam fatetur admittere, hos non admittere probat 2. ex confessione ipsorum Romanorum. *Maffia*

nissa rex Numidiae Syhacem, regem Mauritaniae deuicerat : victi provincias, tamquam suas, Masinissae donabant. Cur ? quia ipsi bellum gesserant per Masinissam, adeoque et per eum adquisuerant.

Iantum ergo abest, vt capta ab hostibus iure Romano priuatis adquisita fuerint, vt et ipsi Romani praedam vindicarent. *L. 20. §. 1. D. de capt. et post. l. pen. D. ad l. lit. pecul.* Quaedam ex liberalitate relinquebantur militibus praedam agentibus, quod et hodie aliquando fieri solet. *L. 36. §. 1. C. de donat.*

§. 11.

Iam ergo de singulis rebus videbimus, quibusnam bello ad-^{num. 1. 2.}quirantur ? Res sunt vel *mobiles*, vt pecudes, lerui, pecuniae, arma; vel *immobiles*, vt agri, oppida, castella.

De *immobiles* clarum est, eas soli imperanti adquiri, vel, quod perinde est, rei publicae. Nam 1. vnus vel alterius militis opera capi non possunt, sed vi totius exercitus, qui est principis vel rei publicae.

2. His rebus inhaereat ius imperii, iurisdictionis aliaque regalia, quorum capaces non sunt milites priuati. 3. Eam regulam omnes gentes bellicosae probarunt. Romani hos agros captos bello vocabant publicos. Cur ? quia dominium eorum populo adquirebatur. Vid. *BVRMANN. de vectigal. pop. Rom.* Idem obseruabant Hebraei, Lacedaemonii, immo gentes omnes.

Obiter hic notetur origo agrorum vectigalium et emphyteuticorum, de quibus titulus singularis in *Dig.* exstat. Romani enim dominium agrorum hostilium nacti, eos si culti essent, reddebant possessoribus, ea lege vt vectigal quotannis soluerent, certos modios frumenti, et tunc agri dicebantur *vectigales*. Sin inculti, eos quibusdam dabant in dominium vtile, ea lege, vt colerent, et inde tenuem aliquem canonem annuum soluerent, et tunc dicebantur agri *emphyteuticae*. Vid. *BVRM. l. c.*

§. 12.

Quid vero de *mobiles* ? Eae vel in ministerio publico ^{ca-num. 12}capiantur, vel extra illud. Si prius, dominium acquiritur ipsi imperanti, vel rei publicae, e. g. si in castris occupatis reperiantur insignes thesauri. Sin extra ministerium : singulorum capientium sunt. Tale quid contingit.

Heineccii Prael. Gror.

T t t

1. si

1. si res hostiles apud nos deprehendantur orto bello. Eae enim non publicae, sed occupantium, sunt. *L. 51. §. 1. D. de acqu. rer. dom.* Quod tamen intelligendum cum exceptione; nisi imperantes eas fisco addixerint, quod plerumque fieri adsolet. *Vid. §. sequ.*

num. 2.

2. Si quidam milites consensu ducum vel ipsorum summorum imperantium extra ordinem vel praedas agunt, et in ditiones hostiles, longius excurrunt, vel naues armatas emittunt, (*Capers, Commiss - Fabrics.*) Nam quidquid hi capiunt, id sibi adquirunt, quia veluti suo periculo bellum gerunt.

Aliquando et extra ordinem et militibus, qui in ministerio sunt, res captae mobiles relinquuntur, si forte imminet insultus periculosior, si urbs vel castra expugnanda. Tunc enim acuerdae fortitudinis causa militi victori promittitur facultas praedam agendi.

§ 13.

Sed quamvis haec omnia videantur iuris naturae et gentium, mutari tamen posse per leges civiles, recte agnoscit Grotius. Et sane plerisque locis mutata. Hinc 1. hodie nusquam fere priuatis cedunt res hostiles, orto bello apud nos deprehensae, sed eas, ut dixi, fisco occupat.

2. Militibus praedam agentibus permittuntur quidem pecuniae priuatorum, vestes, aliaeque huius generis, non autem pecuniae publicae, commeatus, pulvis pyrius, tormenta bellica, si quid huiusmodi interceperint.

3. Ii qui naues suo periculo in hostes emittunt, quae capiunt, sibi adquirunt: sed non nisi ex parte. Nam et collegium archithalassicum, vel res publica, partem suam accipit.

§. 14.

num. 1.

III. Haftenus de rebus mobilibus extra ministerium publicum capitis. Iam de iis, quae capiuntur actu publico, adeoque in ministerio rei publicae. Ea rei publicae adquiri iam praemonuimus. Et ita omnes gentes sentiunt. Nam 1. milites tunc non agunt suo nomine, sed eius, cui militant. 2. Qui sumtus et onera fert belli, penes illum et commoda esse debent. 3. Ita omnes gentes sentierunt, idque latius probat Grotius.

1. Graec.

1. Graecos praedam rei publicae vindicasse demonstrat ex ipso Homero, qui quum sit scriptor Graecorum antiquissimus, etiam conuincere nos potest, hunc morem non heri aut nudius tertius natum, sed vetustissimum esse. Sane Achilles praedam captam non sibi retinebat, sed Agamemnoni tradebat, a quo deinde inter reliquos reges Troiam obsidentes dividebatur.

2. Idem placuit Troianis, de quibus Virgilius, quod soliti sint *praedae ducere sortem*. Vnde argum. Quae per sortem diuiduntur, sunt communia: quae praeda capta apud Troianos communia fiebant. Quae communia sunt, non sunt singulorum. Ergo praeda capta non sunt singulorum capientium.

3. Idem Persis placuit. Xenophon enim in Cyropaedia auctor est milites praedam captam ad regem detulisse. Quamvis vero Xenophontis illud scriptum non sit vera historia, sed ut hodie vocant fabula Romanae, (een Roman) probabile tamen est, Xenophontem in ea scribenda se ad mores Persarum accommodasse.

4. Sic et Carthagenensium duces praedam semper donum misisse, exemplo apud DION. SIC. lib. XIII. et ap. LIV. XXIII. patet.

5. Sic et GREG. TVRON. *Hist. lib. II. cap. 17.* docet, Francos praedam sorte diuisisse. Vnde et hic idem argumentum obtinet, quod supra de Troianis protulimus.

6. Nec aliter Romani, quamvis vulgo cum Bartolo putent, apud Romanos praedam adquisitam esse singulis capientibus. Falsum hoc esse multis demonstrat Grotius, et quidem ex loco elegante Dionysii Halicarnassei, scriptoris vere politici, qui omnia capta ab hostibus quaestoribus tradita, et aerario illata fuisse docet.

§. 15.

¶ Quamvis ergo certissimum sit, Romanos praedam omnem populo vel rei publicae addixisse: negari tamen nequit, eodem multa arbitrio ducum bellicorum reliquisse. Idque et aequissimum. Nam 1. saepe extra ordinem in periculo extremo virtus militum inflammanda spe praedae: 2. saepe etiam opus est exploratoribus, qui non nisi promissis et largitionibus possunt incitari. Sed ea potestate raro vsi sunt duces sanctiores.

T t t 2

§. 16.

§. 16.

noti. 1. Nam ritus ipse talis erat: 1. praeda omnis colligebatur a duce, et in indicem referebatur vel inventarium. 2. Ea deinde adducebatur Romam, et in publico triumpho ostentabatur. 3. Peracto triumpho quaestoribus tradebatur praeda cum inventario, et ab iis pecunia parata inferebatur aerario, captivi et reliquae res publice sub corona vendebantur, et redacta inde pecunia ibidem inferebatur aerario.

noti. 2. Aliquando tamen ipsi duces vendebant praedam, et pecuniam in aerarium inferebant. Sed id raro factum, nec invidia caruit. Hinc ipse Scipio, patriae servator, quamvis tot rebus gestus immortaliter de ciuibz meritis, criminis tamen peculatus reus factus, quod haud pauca ex praeda Africana intercepisse argueretur.

§. 17.

noti. 1. Aliquando duces partem inter milites, virtute eminentiores distribuebant. Sed 1. primum Grotius observat, id rarius factum, et visum esse ambitiosius. Cur quaeso? Quia ita facile duces de alieno liberales sibi ita devincire potuissent milites, ut se aduersus ipsam patriam duci paterentur. Ita sane Caesar militum praeda Gallicana delinuisse credebatur.

2. Observat, divisionem factam vel per veram distributionem, vel per directionem. Divisio vel ita fiebat a duce per tribunos, ut singuli aequales partes acciperent secundum proportionem tamen non arithmeticam sed geometricam, vel ut praeda in medio posita ita daretur in commune, ut quantum quisque capere posset, tantum haberet. De *directione* §. sequ. dicemus.

noti. 2. 3. Observat, saepe praedam prius venditam, et pecuniam inter milites distributam esse, quia sic aequalitas facilius potuerit servari.

4. Habitam rationem ordinis, ut miles caperet simplum, centurio duplum, eques triplum.

5. Nec minus rationem habitam meritorum. Nam qui insigne aliquod virtutis specimen in expugnanda vrbe, classe, ostendissent, ii merito partem praedae paullo pinguiorem ferebant. Quae omnia exemplis ex historia demonstrat Grotius, Lipsius, GARR. NAVDAEVS, qui de re militari veterum egregia ediderunt *syntagmata*.

6. Ducem

6. Ducem in ea diuisione habuisse praecipuum, quidquid aut ^{num. 3. 4.} ratione aut elegantia se commendabat. Apud Graecos Pausanias dux praecipua habebat mulieres, equos, camelos.

7. Idem aliquando et alius virtutis causa esse concessum, quod vocabant extra sortem ferre. Apud HOMER. *Iliad* λ. Nestor feminam possidebat munere Graium exceptam sorti et *ibid. Odyss.* ξ. Ulysses accepit Menecoea feminam praecipuam, postea plurima sorte tulit. Quin in Israele Caleb ob nauatam populo in exploranda terra Canaane operam praecipuam, accepit Hebr.

8. Duces sanctissimos hoc quoque iure suo abstinuisse, veluti Fabricium, Furium Camillum, L. Paullum, M. Catonem. Vid. PLVTARCH. in *corum vitis*.

9. Aliquando et rationem habitam fuisse absentium. Sic Fabius capta Auxure partem praedae et absentibus seposuit. LIV. *lib. XIII.*

10. Aliquando etiam praesentium nullam habitam rationem, si vel detractassent imperium alioque modo male se gessissent, vel ob statum, capere non possent. Prioris casus exemplum est apud LIV. *lib. III.* vbi Minucianus exercitus obsidebatur ab hoste, a dictatore Cincinnato liberabatur, sed deinde victo hoste poenam ferebat imprudentis militiae, nempe ut nihil praedae caperet. Posterioris exemplum dat tribus Leui, cui nihil datum ex terra Canaan, praeter suburbia quaedam, vbi habitarent.

11. Idem ius habuisse tempore imperatorum sequioris aevi ^{num. 6.} magistrum militum, ceu patet ex *L. 36. §. 1. C. de donat.* vbi imperator ea a rationum reddendarum onere eximit, quae militibus a magistris militum sunt donata.

12. Denique et id obseruat, huius modi donationes semper ^{num. 7.} inuidiae patuisse. Nam 1. videbantur duces sibi conciliare velle militum animos, 2. speciem hoc prae se ferebat affectatae gloriae, immo et 3. auaritiae. Nam ideo arguebantur praedam diuisisse militibus, ut immunes essent a reddendis rationibus, siquidem maximam partem impune retinerent.

§. 18.

Alter modus praedam concedendi militibus erat *direptio*, ^{num. 1.} (§. 17. n. 1.) quae in eo consistit, quod oppido vel castris expugnatis militibus sit potestas discurrendi, et sibi, quod in acibus priuatorum repererit, occupandi. Exempla plura ex veteri

historia dedit Grotius. Addi possunt plura ex noua; maxime ex historia belli Germanici tricennalis, quam luculenter descripsit Pufendorfius: vbi tamen eas cautiones obseruant belli duces, vt direptio concedatur tantum, 1. si militibus plura stipendia debeantur, nec in praesenti copia sit, ea exsoluendi. 2. Si constet iam hostes penitus prostratos. Alias enim, incerta adhuc victoria, facile disperfos et diripientes adgreditur hostis, et cedit ad internecionem. Vnde inter stratagemata a Polyaeo et Frontino descripta, et illud est, quod hostes simularint fugam, et varias res pretiosas per campos patentes sparserint, quae dum dispersi colligunt hostes, facilem fugientibus et iam ex inopinato reuersis dedere victoriam.

augm. 2. Sed hunc morem haud pauci improbant, 1. quia sic nulla habetur virtutis ratio. Nam ignauissimus quisque in praelio strenuum se praebere potest praedatorem, aliisque virtutis praemium praeripere. 2. Plerumque caedes inter ipsos diripientes oriri, si plures in eandem praedam inuolent. 3. Occasionem dari licentiae non ferendae, stupris, caedibus innoxiorum hominum, infantum, mulierum. 4. Quin et saepe milites ex inuidia res, quas auferre nequeunt perdere, ne commilitonibus cedant.

augm. 3. Ex quo consequitur, vt vix excusanda sit direptio, nisi vbi necessitas eam defendit. Saepe enim inter milites res ad tumultum venit, et ii despecto ducum imperio in praedam inuolant. Exempla sunt apud *LIVIVM lib. 6. et lib. 38.*

Sed id non potest melius caueri, quam 1. vt stipendia iusto tempore soluantur, 2. vt prostrato hoste intra castra aliquamdiu contineantur, vrbe vel castris captis custodia firma munitis.

§. 19.

Extra ordinem aliquando praeda aliis quam militibus data, veluti 1. iis qui rei publicae crediderant pecuniam, vel tributa extra ordinem maiora, quam debebant, contulerant. 2. Diis, si nimirum iis ludos vouerant imperatores. Id imitantur aliquando Pontificii, qui Petro Romam, vel Mariae Lauretum spoliorum partem mittunt.

Magis laudanda illustrissimorum ordinum pietas, qui in bello illo ferali Hispanico haud minimam praedae ex hostilitus
nauibz

navibus captae partem pauperibus concesserunt. Rem latius narrant Meteranus et Aizema.

§. 20.

Obseruat porro Grotius, *numquam certam inter gentes observatam fuisse regulam, quin saepe in vno eodemque bello, aliter atque aliter de praeda dispositum fuisse.*

1. Furius Camillus victis Veientibus, decimam praedae Delphos Apollini misit : at idem tamen victis Faliscis praedam omnem intulit in aerarium.

2. Q. Fabius homines, armenta et greges militibus concessit, pecuniam et aurum intulit in aerarium. Idem in bello cum Volscis et Aequis captivos militi donavit, reliqua diripienda dedit.

Alia huius generis, diuersaeque consilia in distribuenda praeda obseruata prolixè refert Grotius. Ex quibus rectè colligitur, nihil certi ea de re statuisse gentes, nec ullam dedisse legem, a qua discedere non possent.

§. 21.

Quaeritur, *si quis ex praeda quid surripuerit, quo crimine tenetur?* Resp. crimine peculatus, quod omnibus gentibus visum est poena dignissimum, siue ab imperatore, siue a milite esset commissum.

1. Quia enim praeda est rei publicae, est in dominio, adeoque res publicae furto abripiuntur.

2. Delictum hoc eo grauius, quia hic non pauci floreni, vt a furibus, sed immensi thesauri rei publicae interuertuntur. Elegans notetur Catonis querela, *fures priuatorum furtorum in neruo atque compedibus aetatem agere, publicos in auro atque purpura.*

3. Hinc Achan supplicio capitali adfectus a Iosua, quod partem praedae interceptisset. Et a Romanis deportatione digni videbantur, qui peculatum commiserant, L. 3. D. de pecul.

§. 22.

Quaeritur porro, *annon lege ciuili vel moribus aliud quid, quam quod hactenus diximus obseruatum a veteribus, introduci possit?*

Et

Et id recte adfirmatur. Nam 1. ipsos veteres nihil certi observasse, demonstratum est §. 20. 2. si observassent, id esset ex moribus et consuetudinibus gentium. Mores autem et consuetudines, contrariis legibus et consuetudinibus possunt mutari.

Exemplis id illustrat. Sic nemo dixerit, contra ius gentium peccare, qui praedam addicunt pauperibus, viduis, orphanis, vel iis, qui hoc bello insignem cladem passi sunt.

§. 23.

Quaeritur, *quid sociis debeatur, qui nobis sine stipendio militant?* Resp. Iis plerarumque gentium moribus praedam, quam capiunt concedi. Nam 1. opera gratis praestari non praesumitur. 2. Damnum et sociis refarciendum. 3. Eum suum habuisse videtur socii, dum operam suam nobis stipendio addixerunt.

Exemplum nobis suppeditat ultima oppugnatione Viennae Austriacae a Turcis tentata. Quum enim Poloni, duce rege suo Ioanne Sobieski, subsidio venirent obsessis, et opulentissima Turcarum castra bis expugnarentur: immensam sibi praedam retinebant Poloni, eamque domum asportabant, non invito imperatore, cui sine stipendiis, tamquam socii militauerant Poloni tempore quam maxime periculoso.

§. 24.

num. 1. Quaeritur, *an et subditi eodem iure praedam exigere possint, si rei publicae sine stipendiis militent?* ut Helvetii, Poloni.

Duae rationes hic veluti consurgunt. 1. Contra subditos militat, quod operam suam debeant rei publicae. Qui vero facit quod debet, non potest captare praemium, sed dicere debet, servus inutilis sum.

2. Pro illis vero militat, quod non omnes militent, sed multi e civibus domi maneant, agros colant, mercaturam faciant, lucrum capiant. Ergo illis videtur retributio deberi, ne plus aliis oneris ferre teneantur.

num. 2.3. 3. Eadem ratio, quae pro sociis militat, ne gratis operam praestent, militat etiam pro subditis, qui bello interfunt ad defendendos concives.

4. Nec desunt exempla, ubi subditis militantibus sine stipendio

dio aequae diuina praeda, ac sociis. Exempla bina attulit Grotius n. 3. Vnum Ebraeorum, Num. 22. 27. 47. 1. Sam. 30. 22. alterum militum Alexandri, quibus rex singulis praedam, quam fecissent, reliquit.

Sed posterius tamen exemplum huc non pertinet, partim quia Alexandri milites sine stipendio non militabant, partim, quia non omnes erant subditi, sed plerique mercenarii, ex variis Graeciae ciuitatibus conscripti. Vid. CVRTIVS lib. I. cap. 1.

Enimuero ad quaestionem ipsam responderi potest variis ob- num. 4.
seruatis distinctionibus.

I. Distinguitur inter ea, quae publica vel regis devicti fuerunt, et quae priuatorum militum. Illa merito regi victori integra relinquuntur, qui in eius locum et iura succedit. Sic regium tabernaculum semper mansit Alexandrum, quamuis praedam concederet militibus. Sic corona victi regis victori imponebatur etiam apud Hebraeos. 2. Sam. 12. 30.

Deinde distinguendum inter bella iusta et ciuilia. In illis num. 5. 6.
rarius aliquid conceditur subditis militantibus, quia rei publicae operas ex obligatione perfecta debent. In his autem frequentius, quia interest ducum, ut milites habeant sibi deditos. Hinc historiae docent Sullam, Marium, Caesarem, Augustum victores proscriptionis edictum proposuisse, et redactam e proscriptorum ciuium bonis pecuniam liberaliter eiargitos esse inter milites.

Porro distinguitur inter res magni momenti et exiguas, quae num. 7. 8.
dignae non sunt publicari. Haec saepe et per leges relinquuntur militibus. Sic e. g. ap. GELLIUM lib. XVI. cap. 4. legimus, iurasse milites Romanorum, se nihil praedae in rem suam conuersuros, praeter hastam, hastile, ligna, pabulum, faculam, vitem, follem et minores numulos argenteos.

Et multis legibus nauticis, maxime Gallicanis, receptum, ut nautae in publicum conferre non teneantur praedam infra 10. scutatos. Apud Hispanos vel tertia vel quinta vel dimidia regi, septima vel decima nauarchae, reliqua militi nauali dantur.

Apud Italos in tres partes diuiditur praeda nautica, vnaque tertia datur domino naui victricis, altera iis, quorum merces in naue fuerunt, tertia capientibus.

Apud Hollandos decima datur nauarchae, quinta pars rei publicae, reliqua inter dominum naui vel pugnantes pro dignitate et loci proportionem distribuuntur.

Heineccii Prael. Groe.

V u u

§. 25.

§. 25.

Quid ergo si de praeda oriatur controuersia? Resp. tunc primo omnium respicitur ad mores et leges nauticas istius populi, in quo controuersia oritur: sin eius modi mores probari nequeant, vel leges patriae deficient, tunc sequendum est ius gentium, adeoque praeda debetur rei publicae, cuius auspiciis bellum gestum, nisi plane priuatum, e. g. aduersus piratas, pugnatum; tunc enim aequissimum esse, vt praeda capientium sit, facile patet.

§. 26.

num. 1. Quaeritur porro, *an res alienae apud hostes repertae praedae annumerandae?* Distinguendum vtrum hostis in rebus istis alienis ius aliquod habuerit, e. g. pignoris, retentionis, seruitutis; tunc non quidem res ipsae, sed tamen ius in iis radicatum ad victorem transit: an vero nihil hosti iuris fuerit, e. g. in deposito, tunc res reddenda domino, cui non debet prauiudicio esse bellum inter alios gestum.

num. 2. Ita et facile deciditur quaestio, *an extra territorium hostis capta capientium fiant?* Resp. distinguendum inter ius naturae et mores gentium.

Iure naturae locus discrimen non facit. Quemadmodum enim vbicumque hostem nostrum deprehendimus, ibi eum iure occidimus: ita eundem quoque iure spoliamus, vbicumque terrarum reperiatur.

At mores id non ferunt, vt hostem in alieno territorio adgrediamur, nisi volente et consentiente domino territorii, quo consentiente ipsi etiam pars praedae procul dubio debetur, quia ei tamquam socii militamus.

Eleganter id Grotius illustrat ex l. 3. §. 1. *D. de acqu. rer. dom.* Venari iure gentium vbique licet, quia fera est res nullius. Si tamen vult dominus, potest me prohibere, quo minus fundum suum, vbi fera reperitur, ingrediar. Ita et in hoste persequendo se res habet procul omni dubio.

§. 27.

Finem huic capiti imponit Grotius, addita obseruatione, *quod quaecumque dicta haecenus de iure occupandi res hostium, intelligenda sint non de bello minus sollemni, sed sollemni.* Quum enim

enim bellum minus sollemne gerant ii, quibus ius nullum est bellandi, e. g. ciues inter se ipsos, cessare etiam oportet effectus belli legitimos, nempe adquisitionem rerum hostilium.

Multa quidem sibi tunc permittunt victores, qui et omnia capta ab hostibus sibi arrogant, sed quod de facto fit, non statim iure fieri, facile patet.

CAPVT VII.

DE IVRE IN CAPTIVOS.

§. I.

IN bello capiuntur non solum res, sed et personae. De illis vidimus: iam de his quaeritur.

1. *An serui fiant?* §. 1. 2.

2. *Quis eius seruitutis sit effectus?* §. 3-7.

3. *An et hodie in vsu sit?* §. 8. 9.

I. Quaeritur, *an homines bello capti serui fiant?* Affirmat ^{num. 1.} Grotius, si quaestio de iure gentium. Id probat 1. testimonio Ictorum L. 4. §. 1. *D. de statu hom.* qui seruitutem dicunt constitutionem iuris gentium, qua quis dominio alieno contra naturam subiicitur. Ergo fatentur Icti seruitutem esse iuris gentium, et dum addunt eam esse contra naturam, negant, eam esse iuris naturae.

2. Exemplis gentium, etiam humanissimarum, quae omnes ^{num. 2. 3. 4.} captiuos in seruitutem redegerunt, nullo habito discrimine aetatis, sexus, dignitatis. Non enim hoc ius ex delicto est, sed ex bello. Adducit eam in rem Grotius suo more varia auctorum loca, in quibus praecipue notandus locus POLYBII, ubi ait: *At haec belli lege et illis ferenda sunt, qui nihil impii commiserunt.*

Ita quidem vulgo: sed si rem paullo adcuratius considerare-mus, fatendum est, seruitutem non esse nisi ex iure naturae permisso, et ex moribus gentium. Id enim ita probo. Quodcumque ius est ex iure naturae vel gentium vero et praeceptiuo, id commune est omnium gentium et perpetuum. Atqui

ius captiuos in seruitutem detrudendi, nec commune est, nec perpetuum, quia hodie pleraeque gentes cultiores ab eo abstinent. Ergo non est ex iure naturae et gentium proprio et praeceptiuo.

§. 2.

Postquam autem semel principium hoc placuit gentibus; captiuos fieri seruos: colligere inde proclive fuit, etiam posteros eorum similiter seruos esse. Serui enim veteribus erant res, pars patrimonii, quin praecipuum diuitiarum genus. Iam in rerum acquisitione valet axioma: *Cuius est principale, eius est accessorium. Cuius est venter, eius et foetus est. Ergo et cuius serua, eius quoque et vernae inde nati videbantur.*

§. 3.

num. 1. II. Iam de effectibus huius seruitutis, qui se exserunt 1. in personas captiuorum. §. 3. 2. in eorum res, §. 4. 5. 3. in eorum statum, §. 6. 7.

1. Quod ad personas captiuas attinet: in eas omnia licere capientibus videbatur. Hinc gaudebant domini iure vitae et necis, poterant seruos venumdare, legare, donare, tamquam pecudes; impune in corpora seruilia saeuiebant, antequam imperatores hanc dominorum crudelitatem legibus coercerent.

Rationes varias allegabant. 1. Serui sunt res. Ergo domino summum in res suas debet esse arbitrium. 2. Serui bello capti vitam saluam habent precario, quamdiu dominis placuerit. Ergo si non amplius placuerit, iure suo vtuntur, adeoque occidunt impune.

2. Quod ad res: istae quoque adquiruntur domino vna cum seruo. Nam 1. seruus nihil habere poterat proprium, quemadmodum nec bos, vel equus. 2. Cuius est principale, eius quoque accessorium.

§. 4.

De rebus tantum incorporalibus, i. e. de iuribus serui disputant, an et illa domino adquirantur. Sed id nec affirmari nec negari potest, sine periculo. Ergo dislinguendum.

Iura aut mere personalia sunt, quae ossibus inhaerent, aut admittunt vicariam operam. Priora non transeunt in dominium: posteriora transeunt: e. g. matrimonii ius non transit in dominum,

minum, vt captiui vxore ad libidinem abuti possit: at patria potestas exstinguitur, et omne ius illud in dominum transit. Ita et dominus acquirit ius pignoris, seruitutis cet. quod captiuo seruo competeat.

§. 5.

Cur vero id gentes probarunt, quum tamen vix a truculentia excusari possit? Resp. Grotius. Sequitas gentes esse principum: ex duobus malis eligendum esse minus. Iam supra docuimus, licere hosti hostem occidere, etiamsi se dedere vellet: ne itaque promiscue hoc iure vterentur milites, maluere introducere seruitutem, vt isto lucro pellecti victis parcere, quam eos occidere mallent.

Et hinc videamus, *seruos dictos, quasi seruatos.*

Veram hanc fuisse rationem, exemplo bellorum ciuiliu patuit. Quum enim ibi ciuis ciuem in captiuitatem redigere non posset, tam promiscue in victos saeuitum est, vt vnum bellum inter Caesarem et Pompeium plus hominum absumserit, quam centum alia.

§. 6.

3. Quod ad *statum* attinet *captiuorum*, ex eo duplex resultat effectus, quorum prior est:

Quod fugere non possit seruus. Sed hic distinguendum inter ius internum, quod vocant *forum conscientiae*, et externum, quod *forum ciuile* appellant.

Quod ad prius, illud non vetat seruum captiuum fugere. Quid enim vetaret hominem innoxium, quem fortuna in hanc miseriam depressit, libertatem quocumque modo recuperare? Vnde etiam absurda distinctio Lessii, videndum esse, ad suos, an ad alios fugiat.

Sed ius exterius hoc non fert. Hinc seruus huius modi fugitiuus potest e fuga retrahi, vindicari, puniri, quamuis salua conscientia fuerit.

Equidem, sunt, qui negant huius modi distinctionem esse admittendam. Sed eos Grotius exemplis refellit, 1. testamenti, quod ex defectu sollempnitatum nullum dicitur, iure externo, quum tamen, qui sine sollempnitate testatus est, non peccat in conscientiam. 2. Praescriptionis, qua quis securus sit, possidens

rem alienam, in foro exteriori, quum quoad conscientiam ratio vix reddi possit, cur salua conscientia possidere possit rem alienam.

num. 3. Sed probat Grotius, *hanc serui obligationem, ne fugiat, tantum ad ius externum pertinere.*

1. Ex causa, cur hoc ius introduxerint veteres, quod ideo factum, ne occiderentur captiui, sed seruarentur. Atqui ad hunc finem adsequendum nos opus erat iure interno, quod conscientiam obstringeret, sed externo.

num. 4. 2. Ex fonte huius iuris. Illud non est ex aequitate naturali, sed ex moribus gentium. Hos qui non obseruat, is quidem poenam civilem incurrit, sed non ideo peccatum sit actus in se indifferens et licitus. Quis vero licitum negauerit fugere, si quis sine delicto et culpa sua in tristem seruitutem fuerit abreptus?

num. 5. Obiiciunt, canonicum ius etiam prohibere, ne quis seruo fugam suadeat. Atqui ius canonicum in primis consulere conscientiae, adeoque et fugam serui illo iure haberi pro peccato contra conscientiam. Sed resp. 1. iuris canonici doctrinas non esse mera oracula. 2. Illud nonnumquam turbare magis, quam tranquillitas reddere conscientias. 3. Magnam esse differentiam inter seruos, qui ob delictum vel ob voluntariam additionem, vel ob ipsam natalium conditionem in seruitute viuunt, et eos, qui bello capti in hanc fortunam incidunt. De illis verum est, eos salua conscientia fugere non posse, de his minime. Vnde Paullus *ep. ad Philem.* Onesimo seruo Philemonis iniunxit, *ut ad dominum rediret*, sed non iniunxisset fortassis, si fuisset bello captus.

§. 7.

Porro ex eorum *statu* fluit, *quod domino resistere nequeant.* Et hoc quidem non modo iuris externi est, sed et interni, quod et conscientiam stringit. Rationes sunt, 1. quia dum seruantur a victore, pactum inter eos et dominum victorem intercedit, quod velint ei seruire, quamdiu serui sint. Atqui frustraneum esset hoc pactum, si liceret seruo resistere domino. 2. Si liceret seruo saltim salua conscientia resistere domino, liceret etiam resistere magistratui, dominum tuenti. Atqui id non licet salua conscientia, quia vnusquisque in territorio viuens magistratui subesse et parere tenetur. Ergo etiam non licet domino resistere.

§. 8.

§. 8.

III. Iam quaeritur, *an hos ius*, quod ex iure gentium vendit Grotius, *semper et ubique receptum fuerit, et receptum sit etiamnum?* Et id negat, adeoque tacite statetur, non esse ex iure gentium. Et 1. quidem demonstrat, nec olim apud omnes gentes fuisse receptum. Nam Hebraei captivos quidem obducebant, sed simul ipsis permittebant, ut confugere possent ad asyla. Quo facto liberi dimittebantur. Apud Francos quicumque terram Francorum attigerat, fiebat liber. Apud Indos plane nullam servitutem fuisse, testatur STRABO lib. XV. p. 710.

§. 9.

2. Idem dicendum de temporibus nostris. Notum enim est, ^{num. 1.} hodie inter Christianos fere omnes, (exceptis Russis, qui vetus ius apud se restaurant,) ab usu recessisse morem captivos in servitutem abripiendi. Et quidem id suadebat 1. caritas Christiana, quae ne minorem quidem saevitiam probat. 2. Mutatio oeconomiae. Hodie enim nec tanto usui nobis sunt servi, ac olim, quum maximae diuitiae in multitudine servorum consistarent. 3. Si et gentiles inter ipsos concives eiusdem rei publicae, bellum civile gerentes, servitutem cessare voluerunt, quanto iniquius esset, si ea non cessaret inter Christianos, fratres spirituales, membra unius corporis mystici, socios futurae hereditatis.

Accedit quod 4. ipsi Mahumedistae, apud quos servitus ad- ^{num. 2.} huc viget, tamen Mahumedistas non rapiunt in servitutem. Quanto minus id decet Christianos?

Quo iure ergo victores veniunt in victos apud Christianos, si eos captivos abduxerint? Resp. Captivi detinentur, salvo statu libertatis, et tractantur tamquam captivi, (*prisonniers de guerre*). donec lytro soluto vinculis vel carcere exeant.

CAPVT VIII

DE IMPERIO IN VICTOS.

§. 1.

num. 1. **V**idimus hætenus, quid liceat in victorum vitam, corpora, res, libertatem. Iam quaeritur, quid victori populo iuris adquiratur in vniuersum populum victum? Respondetur, ius hoc vocatur imperium. Ergo quemadmodum ex moribus gentium singuli priuati capti in seruitutem rediguntur: ita et vniuersus populus deuictus in imperium victoris concedit.

Grotius id probat suo more variis veterum testimoniis, veluti Senecæ, Tertulliani, Liuii, Caesaris, qui omnes fatentur bello adquiri imperium in victos. Et ista testimonia saltim euincunt, gentes ea persuasione fuisse imbutas.

num. 2. Sed fuere tamen reuera gentes, quæ non pro imperio, sed pro gloria bellum gererent. Id de omnibus gentibus antiquissimis tradit IUSTINVS lib. I. c. 2. qui et obseruat, primum Ninum uicinos subiugare coepisse. Similia fere de Germanis narrat Tacitus, quod bello non fines protulerint imperii, sed plerumque regiones circa se in solitudinem redegerint, ut exstaret victoriæ et gloriæ monumentum.

num. 3. *Quomodo autem adquiritur imperium in victos?* Duplici ratione. Aut enim tantum rex in regis victi locum succedit, tunc eodem iure utitur victor, quo olim utebatur victus; e. g. Wilhelmus, victo Iacobo rege Angliæ, non alia iura sibi vindicare poterat, quam quæ habuerant antecessores. Cum rege enim bellum gerebat, non cum populo. Aut ipse populus plene victus est: tunc victori ita adquiritur imperium, tamquam patrimonium, ut illud et alienare, et alio modo de eo disponere possit. Hinc priore casu regnum manet usufructuarium: posteriore fit patrimoniale.

§. 2.

num. 1. 1. Et posteriore hoc casu aliquando ciuitas plane exstinguitur; ut victi non amplius sint ciues, sed serui, et imperium non sit ciuile,

civile, sed *herile*, quale hodie in Turcia, Russia, Persia, India videmus obtinere. Id quod fit dupliciter,

1. Quando ciuitas victa sit provincia, adeoque accessoria fiat alterius provinciae, e. g. Macedonia a Romanis victa non manebat regnum, nec res publica suis parens magistratibus, sed provincia accessoria rei publicae Romanae.

2. Quando manet quidem regnum, sed *herile*, vti Constantinopolis a Turcis capta. Quod vero regnum *herile* vocatur? vbi finis non est utilitas subditorum, sed principis. Ergo ibi omnia sunt imperantium, et hi de bonis subditorum non minus libere disponunt, ac de rebus suis.

§. 3.

Quaeritur, an detur etiam imperium ex civili et herili mixtum? Resp. omnino. In vero *herili* omnes subditi sunt serui, solus princeps dominus, vti in Turcia. In *mixto* subditi gaudent libertate personali, vt sibi adquirant, sed non *civili*. Hinc pro lubitu possunt exauriri tributis, in militiam adduci, omnibus iuribus spoliari, quale fere est Russorum imperium. Tantum enim abest, vt ibi omnes subditi serui iudicentur, vt potius quidam sint duces, principes, comites, nobiles. At ratione civilis libertatis omnium est idem status, tantum imperatori Russorum licet in ducem, quantum in rusticum et seruum.

§. 4.

Denique quaeritur, an et victor succedat in iura principis vel *num. 1.* populi deuicti? Idque merito adfirmatur. Aut enim per deditio- nem subiiciuntur, aut per victoriam. Priore casu per pactum, posteriore per vim omnia sunt victoris. Si omnia victoris fiunt, sane victi nihil retinent, adeoque nec iura, tamquam res incorporales.

Rem variis exemplis illustrat Grotius. Alba prima olim in- *num. 2. §1* ter populos Latinos. Ea victa hunc primatum iure sibi vindica- bant Romani. Elegans quaestio circa Thebanos nata. Iis The- sali 100. talenta debebant. Expugnatis Thebis, Alexander iure victoriae vsus Thessalis hanc summam remittebat. Aliquando post Thebani libertati suae redditi id aes alienum exigebant a Thessalis. Quaerebatur an iure? Negatur merito, quia Alexan- der tamquam victor omnia rei publicae victae iura adquisue- rat.

Heineccii Prael. Grot.

X x x

rat.

rat. Ergo et de iis libere disponere, adeoque et debitum Theſ. falis remittere et acceptum ferre poterat.

CAPVT VIIII

DE POSTLIMINIO.

§. 1.

num. 1. **E**X captiuitate nascitur *ius postliminii*. Vnde et de eo iam agitur paullo adcuratius.

1. *Quando locus sit iuri postliminii?* §. 2-5.

2. *Quae eius effecta sint.* §. 6. ad fin.

num. 2. Praemittit autem Grotius quaedam de ipso vocabulo. Sunt autem duae de eius origine in iure nostro sententiae. 1. Seruius a *post* illud deducit, syllabas vero *liminium* nihil significare putat, quemadmodum in vocabulis *testamentum*, *documentum*, *monumentum* vltimae syllabae nihil notant. 2. Scaeuola a *post* et *limine*, quia captiui post captiuitatem ad limina, id est ad limites rei publicae reuertuntur. Sed vtramque derivationem reiicit SALMASIVS ad *ius Alt. cap. 26. pag. 568.* quia limen numquam notet limites vel fines rei publicae. Et sane verissimam originem nobis tradit PLVTARCHVS in *Quaest. Rom. cap. 5.* vbi docet, reuerſos domum captiuos non per fores aedes ingreſſos, sed post limites vel per tegulas et impluuium se intromiſiſſe, boni ominis cauſſa, et inde nomen sortitum eſſe *ius postliminii*. Conf. AEGID. MENAGIVS *Amoenit. iur. ciuil. cap. 39.*

§. 2.

num. 1. Quid vero est *ius postliminii*? Est recuperatio omnium iurium captiuitate amiſſorum per reditum ad fines imperii noſtri. Dicimus:

Est *recuperatio*, non exprimentes, quis recuperaret. Nam *ius postliminii* et ad res pertinet, et ad personas. Ad res. Sic e. g. nauis ab hoſte capta, et poſtea vel vi tempeſtatum, vel alio caſu in portum noſtrum reuerſa ad priorem dominum redit; homo captiuus fugiens libertatem iuraque ſua recuperat, ſimul-

simulac ad fines imperii nostri redit.

Recuperatio omnium iurium, quae sc. captiuitate extincta fuerant. Hinc fingebant Romani, eum, qui captus rediisset, captiuium non fuisse. Hinc reuersus est ciuis, maritus, patria potestate gaudet, ac si numquam fuisset captus.

Captiuitate amissorum. Captiuitas enim iure Romano et veterum quorundam gentium erat capitis deminutio maxima. Unde patet, hodie personas hoc respectu opus non habere iure postliminii.

Per reditum ad fines imperii nostri. Non ergo opus est, ^{num. 2.} vt redeant in urbem ex qua nati, sed eo momento quo ingrediuntur praefidia nostra, omnia iura sua recuperant. Immo etiam si non nostros, sed amicorum et sociorum fines attigerint, perinde est. Et ita obtinuisse apud Romanos quoque Polybius docet.

Inde vero consequitur, vt ad neutrarum partium gentem fugiens ius postliminii non habeat, sed redimendus sit. Nec enim ad nos, nec ad socios peruenit. Et hinc decidit Cunaeus quaestionem bellissimam, an nauis Ianuensium iure postliminii posset vti, quae capta a Turcis vi tempestatum in portum Venetorum, qui tunc neutrarum partium erant, fuisset depulsa? idque merito negatur.

§. 3.

Explicauimus haec definitione, *quid sit postliminii ius*: iam porro docet Grotius, quid intersit inter has loquutiones: *postliminio reueri*, et *postliminio recipi*.

Reueri dicebantur personae liberae in captiuitatem redactae ab hoste. Ii enim se poterant ab hostili vi liberare et domum redire.

Contra recipi dicebantur res ab hoste captae, si redirent ad priorem dominum, siue virtute militum nostrorum, siue casu id fieret.

Quamuis vero hoc discrimen ex ipsa natura vocabulorum fluat, id tamen non semper seruari animaduertimus apud Festum, ubi et de personis dicitur, quod recipiantur. In *L. 14. D. de capt. et postl. et L. 12. eod.* haec, vt par est, accurate distinguuntur.

X x x 2

§. 4.

§. 4.

num. 1. *Postliminium* porro aut in pace est, aut in bello, L. 12. *pr. hoc tit.* Videbimus de pace diuersos casus. Nam 1. aliqui bello capti facta pace ideo redeunt, quia in conditionibus pacis iis promissa libertas. Et hi habent *ius postliminii*.

2. Aliqui bello non capti, sed tempore pacis apud hostes peregrinantes bello subito coorto capti et retenti sunt. Hi si durante bello aufugiant, eodem iure gaudent.

3. Sed fuere quidam bello capti. In pacis conditionibus haec non fuit, vt liberarentur. Nihilominus aufugiant. Hi tantum abest vt gaudeant iure *postliminii*, vt vindicari possint ab iis, qui dominium in istos fugitiuos habent iure belli.

num. 2. Cur vero Romani captiuos nec redemerunt, nec de iis reddendis in pacis conditionibus quidquam sibi stipulari consueuerunt? Notum sane est, quod cum bello Punico 1. Carth. Attilium Regulum consulem captiuum remitterent Romam, vt redemptionem captiuorum suaderet, hic ipse illam dissuasit.

Rationes sunt, 1. vt spes ciuibus in virtute bellica magis esset, quam in pace. Ita TRIPRONIVS in L. 12. D. b. l. Et hinc plerique Romani ad extremum halitum pugnabant, et spe decollante, se ipsos interimebant.

2. Quia plerumque se victores sperabant, adeoque in lucro ponebant captiuos quam plurimos retinere.

3. Quia quisque qui bellum gerit, putat sibi iustam causam esse, adeoque captiuos meruisse exillimat captiuitatem.

num. 3. 4. Inde ergo patet, 1. cur in pace semper sibi stipulati sint veteres redditionem et liberationem eorum, qui bello subito ingruente apud hostes fuerant deprehensi. Hi enim arma non gesserant, adeoque non ex fortitudinis defectu in hostium peruenierant potestatem. Neque captiuitatem meruisse videbantur homines bona fide apud hostem peregrinati.

2. Cur res, et serui non reddantur facta pace, nisi expresse pactis ita conuenerit? Quia hostis summo iure res hostis acquirit, sibi que retinet. Serui autem veteribus erant res.

3. Cur durante bello serui et res habuerint *ius postliminii*, quia erant in dominio. Ius autem omne per reditum ad fines nostros recuperari, paullo ante diximus.

§. 5.

§. 5.

Liber homo quando *postliminio* redit? 1. Si ad fines nostros rediit, 2. si eo animo redierit, ut maneat. Hinc si veniat pacis causa, vel missus ab hoste, vel hosti fidem dederit, se rediturum, non liberatur. Attilius Regulus Carthaginem rediit, quamvis sciret, se ad supplicium rediturum. Nec interest 3. vi hostium ergastula effregerit, an clam et dolo se liberauit.

§. 6.

Iam ad *effectus*. Horum 1. est quod liber homo se ipsum ad-^{num. 1:}quirat. Quum enim antea esset servus et alieno iuri subiectus, iam in ius suum redit. 2. Omnes res suas, tum corporales, e. g. servos, praedia, pecunias; tum incorporales, e. g. ius ciuitatis, matrimonii, patriae potestatis.

Ratio erat, quia haec omnia non amisit ex defectu rerum, quia res ipsi erant ereptae, sed ex defectu personae, quia persona erat subtrahita rebus suis. Ea ergo redeunte, cessabat illa emissio.

Sed quaeritur, si res occupavit victor, isque ea alienarit,^{num. 2:} an *postliminio* reuersus habeat ius *postliminii*? Distinguit Grotius, an res habeant ius *postliminii*, nec ne. Priore casu redeunt ad dominum *postliminio* reuersum, posteriore non redeunt. Ratio differentiae est, quia priore casu venditae censentur cum conditione, posteriore absolute. Fingi potest exemplum tempore belli Gallorum Senonum, qui Romam praeter Capitolium occupauerant.

§. 7.

Diximus iura recuperari *postliminio*. Ea vel actiua sunt vel passiva. Actiua, quo alii ipsi obligantur, e. g. ius patriae potestatis; alia, quibus ipse aliis obligatur, e. g. si creditores habet. De prioribus vidimus. An et posteriora recuperantur. Affirm.

1. Quia aequum est, ut si commoda recurrat, et incommoda ad eum reuertantur.

2. Quia fingitur numquam in captiuitate fuisse. Atqui si numquam in captiuitate fuisset, mansisset obligatus.

3. Quia ita et leges decidunt. L. 12. §. 6. *de capt. et postl.*

§. 8.

Vidimus hactenus regulam: iam exceptiones expendemus.
Iure ergo postliminii non gaudent

I. Personae, quae per deditionem in hostium potestatem peruenerant. Id probatur

1. Ex *L. 17. D. h. t.*

2. Ex ratione pactorum, quibus paciscentes contrauenire nequeunt.

II. Nec gaudent *postliminio* ii, qui tempore induciarum auferuntur. Ratio est, quia induciae sunt pactum, quo conuenit, ut tempore certo omnia in priore statu maneant.

Aliud si deditio tacite facta, id est, si captiui causa desperata arma abiecerunt.

§. 9.

num. 1. III. Nec ciuitas gaudet *iure postliminii*, si capta non se ipsam liberauit, nec per pacem liberatur. Ratio est, quia ciuitas est persona moralis, adeoque eodem iure utitur ac persona physica.

Hinc elegans illa controuersia inter Frisios et Ultraiectinos, an Ultraiectum a Gallis captum locum suum in re publica receperit. Momenta huius quaestionis vid. apud HUBERVM in *prael. ad Dig. h. t.*

num. 2. IIII. Excepta erant matrimonia, quippe quae iure Romano erant dissolubilia.

Atqui supra non semel diximus, et *matrimonii ius recuperari*. Recte. Recuperatur, si vxor nondum misit repudium. Si nolit ad virum redire, non recuperatur. Cur? Maritus recuperat iura sua. Atqui, si in ciuitate mansisset, potuisset vxor ab eo suo iure diuertere. Ergo etiam poterit, postquam rediit.

§. 10.

num. 1. Vidimus hactenus, quid sit *ius postliminii*, quibus in rebus et personis locum, quaeque effecta habeat: iam quaeritur, *sine iuris gentium, an iuris ciuilibus?*

Distinguit Grotius inter *ius postliminii* ipsum, et eius limitationem.

Ius ipsum postliminii est iuris gentium, id est, ut nos interpretamur, moribus omnium gentium moratorum receptum.

Omni-

Omnibus enim visa sunt corpora libera in seruitutem per captiuitatem detenta recuperare pristinam libertatem, si ad fines patriae redissent.

Sed ius ciuile aliquid et detrahit et addit huic communi omnium gentium principio.

1. Detrahit aliquid, dum hoc iure excludit.

a) Transfugas, in poenam. Nec enim digni erant beneficio rei publicae qui rem publicam deseruerant. *L. 19. §. 4. D. de capt. et postl.* Nec intererat, transfuga esset sui iuris an filius familias; nam nec hic reuersus in patriam potestatem redibat, quia hostis erat rei publicae, et disciplina castrorum antiquior esse debebat parentibus Romanis quam liberorum caritas. *L. 19. §. 7. eod.*

b) Redemptos ab hostibus, qui non prius iure ciuili pristinam libertatem recuperant, quam ~~ad rem~~ ei, qui se redemit, restituerint, sed illi interea seruire tenentur. Sed id 1. introductum, ut eo faciliores essent ad redimendos captiuos, si scirent, se pecuniam non amittere. 2. Seruitus haec fuit moderatior, quam aliorum seruorum, quia erant statu liberi. 3. Ex *L. ult. C. de postl. reu. redem.* durat quinquennium. 4. Amittitur, si forte diutius habeat redimens redemptum. Quae leges tamen non sunt Iustiniani, sed Honorii et Theodosii.

2. Augent etiam Leges ciuiles *ius postliminii*, prout iure gentium receptum est, eique aliquid addunt,

a) Dum illud, quod apud gentes de personis statutum, prout adducunt ad res postliminio receptas.

b) Dum fingunt, numquam illum in captiuitate fuisse. Fisiones enim non sunt iuris gentium, sed ciuilis. Vid. *ANT. DADIV. ALTESERRA de fisionibus iuris.*

c) Dum ex hac fisione colligunt, recuperari non solum iura quae iam illo tempore, quo reuertantur, supersint, sed et quae antea habuerint, cum caperentur, e. g. bona vfucapta.

d) Dum lege Cornelia nouam fisionem inuexit, fingens; eos, qui in captiuitate decesserint, in ciuitate mortuos esse. Inde enim collegerunt, bona et iura eius deuolui in successores, siue testamentum exstet ante captiuitatem conditum, siue ab intestato succedere velint.

Haec omnia ex iure ciuili esse, nemo non videt.

§. 11.

num. 1. Iam ad res singulas progreditur auctor, et quaerit, in quibus locum habeat ius postliminii, et quatenus illi locus sit?

1. Quaerit de *seruis et ancillis*. Serui iure Romano erant res. Res ad nos reuersae in dominium redeunt. Ergo et serui. Nec obstat

a) Eos ab hoste fuisse alienatos. Emtores enim aliud ius habere nequeunt, quam quod venditores in eos transferunt. Atqui si in potestate hostium mansissent, locus fuisset *iuri postliminii*. Ergo etiam ei locus est, si sunt alienati.

b) Eos esse manumissos. Illa enim manumissio effectum habet ratione manumittentium hostium, non ratione prioris domini, qui merito nullum iudicat, quidquid hostis fecit in re sua.

num. 2. c) Seruos ad hostes transfugisse. L. 19. §. 8. D. de capt. et postl. Quamuis enim 1. aliud obtineat in filiosam. ratio tamen differentiae in promptu est. Nam filiosam. est membrum rei publicae, adeoque transfugiens hostilem animum declarat, adeoque indignus fit beneficio. Seruus contra est res. 2. Filiosam. si iure postliminii utitur, beneficio fruitur; seruus autem reuersus nullum capit beneficium, (fit enim seruus) sed domini est hoc beneficium.

d) Seruos ab alio esse redemptos quam a domino. Nam et hic redimens tamdiu seruum possidet, donec ei pretium a domino fuerit restitutum.

§. 12.

2. Quaeritur de *populis in seruitutem retractis*, an ii iura recuperent priora iure postliminii?

Distingu. an prior princeps eos receperit, uti Hungaros imperator tamquam rex Hungariae sensim e Turcarum potestate liberavit: et tunc in recuperantis principis potestatem redeunt, et merito iura sua recuperant, nisi sua culpa in hostium potestatem peruenerint.

An vero tertius eos receperit, veluti imperator Siciliam a Duce Sabaudiae amissam. Tunc socius illam recipiens debet dispicere, quid leges societatis vel foederis exigant. Si enim ita cautum est, ut prouinciae receptae priori domino restituantur, iis parendum est. Sin minus, eas retinet socius victor, donec

donec sibi de sumtibus satisfactum sit. Hinc facile redditur ratio, cur Angli et Belgae Brabantiam, Flandriam, Hannouiam restituerint imperatori; imperator autem Siciliam non restituerit Sabauda, sed sibi eam retinuerit.

§. 13.

Quaeritur 3. *de agris, qui iure postliminii omnino a priore num. 1. domino recipiuntur, simul ac hostes expulsi.*

Hic ergo ager rediisse fingitur ad fines nostros, si expulsis hostibus fines ultra agros occupatos protulimus. Nobile est exemplum Iustiniani imperatoris qui, pulsus ex Italia Gothis agros a Gothis possessos prioribus dominis addixit, quamuis per plures quam centum annos eos possederent hostes.

Ex eo autem sequitur, ut et iura rebus istis vel agris in haerentia simul redeant ad priorem dominum. Hinc reuiviscunt seruitutes, ususfructus, pignoris ius.

Ratio est, 1. quia accessorium sequitur suum principale. 2. Quia iure postliminii res in priorem statum redit. 3. Quia fingitur rem numquam in hostium potestate fuisse.

§. 14. 15.

Quaeritur *de rebus mobilibus, an et in iis locus sit iuri postliminii?* Hic Grotius tempora distinguit.

Iure veteri distinguebatur inter res, quae ad bellum pertinent, et aliam supellectilem, quam in castris vel in urbibus occupatis hostis abstulit.

De posterioribus negabatur, quod postliminii ius habeant. Hinc capta hosti tamquam praeda acquirebantur, ab hostibus vendita emtoribus acquirebantur. A militibus nostris recuperata non praecise priori domino restituuntur, sed tamquam praeda vel imperantibus ceduntur, vel diuiduntur inter milites.

Circa res bello destinatas distinguebatur inter res maioris et minoris momenti. Maioris momenti sunt naues bellicae, tormenta, equi; minoris arma et vestes. Illae redibant ad priorem dominum. Hae minime. Ratio differentiae erat, quod favore indigni videbantur, qui arma vel abiecerant, vel ea hosti reliquerant.

At quod ad ius nouum attinet, illud vix distinguit eo modo. Immo multis legibus plane aliud cautum, ut omnes res
Heineccii Prael. Gros. Y y mobi-

mobiles iure postliminii destituantur etiam naues. Constitutiones Genuensium et aliorum populorum maritimorum reperiuntur in libro quantumvis pretii, qui vocatus Consulatus maris.

§. 16.

Iam sequuntur quaedam exceptiones. Nimirum, 1. *res hosti; antequam in praesidium eius peruenerint; ereptae, redeunt quidem ad priorem dominum, sed non iure postliminii.*

Ratio haec est. Quaecumque nondum ab hoste in praesidia sua adducta sunt, illa ne capta quidem intelliguntur. Quae capta non sunt, ea nec e dominio prioris possessoris exciderunt. Quae non exciderunt ex dominio prioris possessoris, ea nec postliminio indigent.

2. *Res a latronibus et piratis ereptae et recuperatae ad priorem dominum redeunt sine iure postliminii.*

Ratio est, quia piratae et latrones non gaudent iure belli; ergo nec bello adquirunt. Ergo, quibus a latronibus vel piratis aliquid receptum, non magis indigent iure postliminii, quam ii, qui res furtiuas sibi tamquam suas vindicant.

§. 17.

Attamen et hic ius ciuile potest aliud statuere. Exemplum attulit Grotius ex legibus Hispanicis, quae naues piratis ereptas non addicunt priori domino, sed capienti.

Similem Venetorum legem in annotatione subiecta recenset ipse Grotius.

Atqui videri hoc posset iniquum. Cur ergo id inuexere leges nauticae? Resp. vt eo magis omnes incitentur ad persequendos piratas, si videant, sibi praedam adiudicatam iri. Sane is cui naus erepta est, plerumque non potest piratam persequi. Alii id nollent, si praedam domino restituere teneantur, et sic in tuto futura esset piratarum fortuna.

§. 18.

NOTA. Y: Sub finem duplicem adhuc obseruationem subnectit Grotius, nempe I. *quod olim postliminii ius inter Romanos et externos populos, quamuis non hostes, locum habuerit, e. g. Romanus naufragium faciebat in litore gentis exterae, non hostis. Homines nihilominus in potestatem gentis istius peruenisse videbantur, aequè*

aeque ac res naufragorum. Si se in libertatem vindicassent, et ad fines redirent, iure postliminii gaudebant.

Quaenam ratio? Grotius eam deducit a pristina conditione Nomadum, populorum vagorum et incertae sedis, qui sibi in omnes peregrinos aliquid licere existimabant. Ergo hostes et peregrini olim parum differebant, quamvis nullum serueret bellum. Et iam a Cicerone aliisque observatum est, hostem olim dictum, qui nunc peregrinus, veluti in 12. tabulis. *Aduersus hostem aeterna auctoritas esto.*

11. Quod postliminii ius etiam esset inter foederatos, si ex iis nu. 1. 1. aliquis apud nos seruisset, et domum redisset. Sic sane censet AELIUS L. 7. *D. de capt. et postlim.* sed dissentit CICERO de orat. l. 1.

Grotius distinguit foedera, an tantum veluti inducias contineant, qualia saepe superiore saeculo intercedebant inter imperatorem et Turcas, an perfectam pacem intendant, ita ut gens cum gente tuto negotiari possit, quale foedus iam est inter imperatorem et Turcas.

Priore casu locum habet *ius postliminii*, quia qui sine fide publica (*passport*) ad gentem illam proficiscitur, in captiuitatem redigi solet. Posteriore cessat, quia ipsum cessat ius capiendi. Et iam intelligimus L. 5. §. 2. *D. de capt. et postlim.*

§. 19.

Sed quaeritur, an haec iura postrema §. recensita etiamnum recepta sint? Resp. distinguendum esse, quali cum gente hominis res sit.

Inter gentes humaniores tempore pacis cessat captiuitas: quod et Mahomedani hodie observare solent. Ergo nec opus est iure postliminii.

At barbarae nationes aduersus peregrinos, etiam non hostes, omnia sibi indulgent. Ergo et saepe in pace ius hospitalitatis violant, et peregrinos detrudunt in seruitutem. Quare his casibus merito seruatur *ius postliminii*. Vtilis haec doctrina Belgis, qui saepe et pacis tempore ab Algeriensibus, Tunetanis, Tripolitanis, Indis et aliis Barbaris patiuntur iniuriam.

CAPVT X

MONITA DE HIS, QVAE FIUNT IN
BELLO INIVSTO.

§. 1.

num. 1. **Q**uid *hosti in hostem liceat* haecenus per partes offendimus. Sed quum Grotius eam imbiberit sententiam, quod haec omnia permilla sint iure tantum externo, non interno: haec paullo adcuratius iam explicare, et exceptiones ac temperamenta quaedam commendare conatur iuris tam rigidi. Ergo hoc capite

1. Exponit, quid pudor vetes vel permittat in bello? §. 1. 2.

2. Quid in bello iniusto fieri possit vel non possit? §. 3. fin.

3. De reliquis iuribus temperamenta quaedam commendat capitibus sequentibus.

num. 2. 3. Aliud *leges*, aliud *pudor* prohibet. *Leges* quod prohibent, illud dicitur *iniustum*: pudor quod prohibet, *inhonestum* vel *indecorum* adpellatur. Si quis contra sanctionem legis facit, is punitur; qui contra pudorem, non punitur, sed improbus habetur. *Leges* enim improbos, pudor tantum viros bonos coercet. Potest id illustrari exemplo pactorum, fideicommissorum, quae ius civile permittebat violari, at non pudor et honestas.

Et hinc est quod Seneca *lib. I. de ira c. 7.* distinguat inter viros ad legem bonos, et vere bonos, inter ius ad officium, inter ea quae virtus exigit, et quae publicae exigunt tabulae. Priora ad iustitiam, posteriora ad pudorem et honestatem pertinent.

§. 2.

num. 5. Iam haec applicat bello, et demonstrat, hanc distinctionem etiam in bello obtinere. Nimirum ius strictum et *leges* permittunt omnia in infinitum aduersus hostes: non autem idem permittit pudor et honestas. Id variis testimoniis demonstrat Grotius veluti Senatus Romani in causa Marcelli. Hic Syracusae destruxerat. Syracusani de crudelitate eius conquirebantur. Sepatus

natus rem putabat cognitione dignam. Marcellus se iure belli defendebat. Non autem eam exceptionem admittebat senatus; nec putabat tantum inquirendum, quid iure belli liceret, sed quid victi pati meriti. Alia addit testimonia Aristotelis, et Thucididis, quae eodem fere redeunt.

Sed et ad ICTos prouocat, qui ideo captiuitatem bellicam modo ius vocant, modo iniuriam, *L. 19. pr. D. de capt. et possl.* Eodem modo loquuntur Lilius, Dio Chrysostomus, Lactantius. Quaeritur ergo, quid de hac doctrina sentiendum? Resp. negamus nos, ius belli tantum esse externum, non internum. Et iam supra ostendimus, haec si vera essent, tunc neminem salua iustitia bello interfuturum. Immo ne salua quidem conscientia quemquam tunc bella gesturum, quum tamen et ius naturae bella confirmet, et ipse Deus tamquam summus Iudaeorum imperans bella gesserit.

Sed tamen vera est altera Grotii distinctio. *Nec negari potest, aliud prohibere leges, aliud pudorem, etiam in bello.* Sic, e. g. *leges* permittunt, vt victos spoliemus, vt eos vita iuribusque priuemus: sed *pudor* tamen vetat saeuire in eos, qui arma nec gesserunt aduersus nos, nec gerent vmquam, e. g. feminas, infantes. *Pudor* vetat sine necessitate obtruncare ciues victos, incendere vrbes et aedificia, vastare terras, victos omnes in seruitutem abripere. Et hinc veteres gentes, quae sibi haec omnia in victos permiserunt, non quidem iniusti fuerunt, sed tamen aduersus pudorem et honestatem peccarunt.

§. 3.

Iam ad *bellum iniustum*, vbi quaeritur, quae *hosti in hostem liceant in bello iniusto*?

Respondemus cum Grotio nihil. Sed ante omnia hic videndum, quid sit *bellum iniustum*? Bellum dicitur *iniustum* vel ratione caussae, quia nulla adest caussa ad bellum sufficiens, sed bellum tantum geritur ex ambitione, libidine: vel ratione personarum, quia qui gerunt, non gaudent iure gerendi bellum, e. g. subditi, vel ratione modi, quia ita geritur, vt non satis humanitatis rationem habeant victores, vel ratione sollempnitatum, quia non est indictum. Nos hic *bellum iniustum* accipimus in duabus prioribus significationibus. Nam quod ad tertiam attinet, vi-

Y y y 3

ctor,

etor, qui paullo durius consulit in victos, non contra iustitiam, sed contra honestatem peccat. Et postrema iniustitia plane tantum ex decoro est, non ex iusto.

At qui bellum gerunt sine causa, vel quum sint personae, quae iure belli non gaudeant, de iis observanda regula: iis nihil in hostes licere. Vbi enim cessat causa, ibi et effectus cessat. Atqui hic cessat causa, bellum, (id nomen enim non metretur huius modi concertatio,) ergo et belli effectus cessant.

§. 4.

Iam videbimus consecutaria ex hoc principio fluentia, quorum 1. est, quod ad restitutionem omnium obligentur tam iniusti bellatores. Ratio in promptu est. Vbicumque quis extra bellum alterum laedit et damno adficit, ibi committitur delictum. Hic vero vbi iussu bellum non geritur, aliquis extra bellum alterum laedit, et damno afficit, ergo delinquit. At ex delicto omni obligatio et ad poenam et restitutionem nascitur, ergo et ex hoc.

Quomodo tenentur autem? Ratione personarum omnes duces aequae ac milites, illi, quatenus iusserunt: hi ex ipso damno dato, et quidem, si actus sit diuiduus singuli pro rata, si indiuiduus in solidum, quod ex natura damni dati fluit.

§. 5.

num. 1. *Restitutio vero damni, quum vel aestimatione praestita fieri possit, vel ipsa re reddita in specie, quaeritur an praecise posterior requiratur, si res bello iniusto captae vel corruptae?* Adfirmat Grotius, modo culpa adsit. Casum enim nemo praestat, de dolo nemo dubitat. Id fluit 1. ex natura damni iniuria dati, vnde et culpam leuissimam vindicat lex Aquillia. 2. Quia id gentes inter se seruant, inter quas plerumque restitutio exigitur eorum, quae bello iniusto abrepta. Idque exemplo Samnitium probat Grotius.

num. 2. 3. Id illustratur exemplo contractus, vbi inaequalitas est; quae si enormis sit, datur remedium ex l. 2. C. de resc. vendit. et contractus rescinditur. Si id in contractu obtinet ex aequitate: quanto magis in bello iniusto, id est in delicto, vt alter alteri refarciat damnum, culpa sua tam iniuste datum?

Obiicitur, gentem, dum cum altera bellum iniustum suscipit et

ei

ei illatum propulsat, videri donasse res bello captas. Sed absurda sane obiectio. Sic donatio enim haec vel expressa est, vel tacita, vel praesumta. Non expressa, quia numquam hostis hosti declarat, se ipsi, quae capturus sit, donare; nec tacita, quia signa nulla adsunt, ex quibus colligatur huius modi donatio. Nam hostis potius hosti praedam agenti resistit, eamque recuperare studet. Non denique praesumta: quia donatio numquam praesumitur. Nemo praesumitur suum iactare, inquit lex etiam civilis.

§. 6.

Sed difficilior est quaestio, *an et is teneatur, qui praedam num. 1. non ipse hosti surripuit, sed detinet tamen?* Resp. aut quaeritur an teneatur ad restitutionem ex delicto, an ex alio fundamento? Non tenetur ex delicto, quia ipse nec bellum gessit, nec damnum dedit, sed rem ab alio iusto forte titulo adquisiuit. Sed ex alio tamen fundamento tenetur. Et ex quo vero? Quia possidet rem alienam. Qui praedam hosti bello iniusto extorsit, non factus est dominus, per §. 2. Ergo et dominium in alium nullo titulo transferre potuit. Si dominium non translatum est, possidens vero domino vindicanti tenetur ad restitutionem.

Ex quo consequitur, ut eodem iure utatur hic possessor re- *num. 2.* stituens, quo utitur is a quo res euincitur. 1. Quemadmodum enim hic vindicanti tenetur rem restituere cum fructibus exstantibus, sed non cum perceptis, ita et hic qui praedam possidet, modo in bona fide sit. 2. Quemadmodum possessor, a quo res euincitur, iure suo impensas in rem euictam factas exigit, ita et possessor praedae. 3. Quemadmodum qui rem alienam bona fide possedit, plane non tenetur, si ea vel casu apud se perierit, vel si sine dolo malo alienata sit, in tantum dumtaxat, in quantum factus est locupletior. Ita idem obtinebit in eo, qui praedam iusto titulo adquisiuit, et bona fide.

CAPVT XL.

TEMPERAMENTVM CIRCA IVS INTERFI-
CIENDI IN BELLO IVSTO.

§. 1.

nom. l. 1. **H**Actenus de bello iniusto: iam de iusto, de quo docet

1. Non omnia licere secundum iustitiam internam. §. 1.
2. Quinam occidi possint? §. 2.
3. Quibus honestas parcere iubeat? §. 3. fin.

1. Non omnia etiam in bello iusto licere victoribus, variis veterum testimoniis probat auctor. Nos argumenta quaerimus: 1. Quia res publica tota consideratur quidem tamquam vna persona, sed illa consideratio est fictio. Non autem possumus occidere, quos nobis fingimus hostes, quum non sint, vt infantes, feminas, cet. 2. Quia quod iudicia sunt in ciuitate, id bellum est in statu naturali. Quemadmodum ergo in illa iudex modum puniendo excedens peccat: ita et in hac victor, si modum excedet fauendo. 3. Quia non semper vincit, cui caussa est iustissima. Ergo vinci est infortunium, ob infortunium poenas dare nemo debet.

§. 2.

II. Quis occidi potest salua conscientia? Resp. Grotius, is, qui deliquit. Sed id nihili. Nititur enim falsa hypothese, quam superiore libro destruximus, quod bellum in poenam geri possit.

Nos potius ita ratiocinamur. Bellum geritur vel defensionis vel iuris sui repetendi caussa. Quicumque ergo nobis periculum intentat, vel vi prohibet nos, quo minus nostra repetere possimus, is occidi potest iure defensionis. Inde sequitur, vt occidi possint,

1. Milites et duces hostium, quamdiu aduersus nos pugnant, non si deditionem fecerunt.

2. Qui hostium exercitus, classes, castra sequuntur, quauis non sint milites, vt ministri ecclesiae, medici, chirurgi, tympanotribae, tubicines, calones. Hos enim distinguere a militibus

litibus inter praeliandum vix possumus. Si tamen agnoscuntur, feruandi sunt.

§. 3.

III. Vidimus *qui occidi possunt*, iam *qui non possunt*? Grotius eximit I. *eos, qui coacti sequuntur*. 1. Quia hi nihil peccent, adeoque ob idolum infortunium puniri nequeant. Tales sunt ab hostibus nostris oppressi. Sic Romani oblidebant Athenas, quum Athenienses essent Romanis amicissimi. Tenebantur autem a Mithridate, hoste Romanorum. An non iniuriam fecissent Atheniensibus, si eos occidissent?

2. Quia sub aliena potestate sunt, non agunt suo arbitrio, num. 2. sed iussu et coactione domini, saepe inuiti. Qui vero non suo arbitrio aliquid agit, non est auctor actionis, ergo nec potest poena affici. Id quod *hoc n. 2.* multis exemplis et testimoniis probat Grotius.

Sed in eo cum Grotio facimus quidem, quod his hominibus, qui inuiti hostem sequuntur, parcendum sit, si id fieri possit commode. Sed Grotii rationes non sufficiunt, quia semper bellum sibi tamquam poenam concipit.

Nos dicimus. Qui nos occidere vult, eum antevertere possumus, siue delictum in eo sit, siue non, e. g. si aggressor meus sit furiosus. Ergo hostes occidere possum, siue inuito siue sponte me occidere tentent, et exercitum hostilem sequantur. Si autem constet eos inuitos id agere, parcere possum, si iam victoriam reportavi, non in ipso praelio.

§. 4.

Hinc facile patet nullius hic momenti esse tractatum huius prolixissimae §. de variis delinquendi modis. *Alia*, inquit, num. 1; *committuntur ab inuitis, tunc non delictum est, sed infortunium; alia a volentibus et scientibus, et tunc dicitur iniuria vel delictum, maleficium, cet.* In aliis voluntas est mixta et auctor actionis, nec sciens et volens, nec plane ignorans dici potest. Et id Aristoteles vocat *ἀμύτμημα*, peccatum. Id prolixo loco ex Aristotele illustrat Grotius. Nos tantum exempla quaedam ex eo et interpretibus eiusdem adiciemus. Si quis fame urgetur, ut aliquid surripiat esculentum, tunc id fit ab inuito, sine proposito peccandi, quamvis sciat, se surripere rem alienam. Ergo est actio mixta. Si quis ostium aperit, et patrem pene ad- n. 2. 3. 4.
5.
Heineccii Prael. Grot. Z z z stan-

stantem laedit, actio est inuita, quia nec sciuit, nec voluit, adeoque infortunium. Si quis furtum deliberato animo facit, est verum delictum.

num. 6. Hanc differentiam etiam agnoscunt leges nostrae, *L. de poen. Delinquitur aut proposito* (en delictum, vt latrones qui factionem habent,) *aut impetu*, (per actionem mixtam, e. g. per ebrietatem:) *aut casu*, per infortunium, e. g. si telum venandi causa emissum feriat hominem.

Quae casu fiunt non sunt delicta; quae impetu leuiora, quae proposito grauissima.

num. 7. Diximus, quae impetu *leuiora* esse. Rationes sunt 1. quia hic non est consilium, sed culpa. 2. Quia ea delicta quodammodo excusat necessitas, cui natura humana non semper resistere potest. Id quod variis testimoniis illustrat Grotius.

num. 8. Haec omnia recte, sed quid ad rem? Inde ergo iam concludit Grotius, *occidere licere eos, qui sponte arma corripunt, non eos qui inuiti*. Hinc laudat Themistium, qui ducem expendere iubet, quid distent *iniuria, culpa et infortunium*. Hinc laudat Titum imperatorem, qui victis Iudaeis in criminis duces animaduertit re ipsa, in multitudinem verbis tantam. Hinc denique laudat Val. Flacci testimonium, vbi victor idem obseruasse discrimen fingitur.

Haec omnia probanda, excepta vna hypothese, quod victor poenas sumat a victis.

§. 5.

Parcendum II. multitudini, 1. quia saepe inuita bellum sequitur. 2. Quia illa raro diiudicare potest! belli iustitiam vel iniustitiam, sed ea in re imperantis iudicium sequitur.

Ita Grotius denuo ex hypothese. Nos distinguimus, an multitudo illa aduersus nos pugnet, an non. Si prius, occidi possunt, non quia peccant, sed quia nobis ius est defensionis. Si non pugnant, sed victoriam iam reportauimus, tunc parcendum iis dicimus, 1. quia infortunium miseratione dignum, 2. quia iam nobis nullum ius defendendi, vbi nemo oppugnat; 3. quia et victor contra vtilitatem propriam ageret, si multitudinem victam occideret. Quis erit tunc, cui victor imperet?

§. 6.

§. 6.

Parcendum III. iis quibus probabilis fuit arma arripiendi causa. Nam 1. difficile est diiudicare, vter hostium iusta causa vtatur? 2. Numquam principi deest color, quo causam suam incrustet. 3. Errantes non merentur poenam. Hic denuo vberima seges testimoniorum veterum, sed quae nil probant; sed illustant.

Nos rem ipsam probamus, quia errare humanum est, sed rationes, quibus Grotius vtitur, non omnes admittimus, quia ius occidendi hostem non ex delicto eius est, sed ex iure defendendi.

§. 7.

Parcendum saepe IIII. ipsis nocentibus ex humanitate, modestia, magnitudine animi. 1. Virtutes enim hae in victore maxime laudantur. 2. Pulcrum est se ipsum vincere. 3. Quia semper cogitandum, quam lubrico folio insistas fortuna, et quam facile eadem nobis contingere possint. Nota sunt hanc in rem exempla Adonibeseke, Craeli, et aliorum.

Ea occasione merito inuehitur in Romanos, qui captivos reges bellicae duces occidere solebant, postquam eos duxerant in triumpho. Iste mos nec moraliter nec politice bonus. Non moraliter, quia repugnat clementiae, humanitati, non politicae, quia interest omnium ciuitatum, imperantes etiam hostes sacrosanctos haberi, et tam contumeliose non tractari, vt taceamus, eius modi morem hostes absterre; a deditione. Quis enim rex tam ignauus esset, vt non ad extremum halitum mallet pugnare, quam a carnifice mactari?

Inde ergo recte colligit Grotius, *laudandam etiam in vinum. 4* *glorie clementiam.* Pertinet huc insignis Ciceronis oratio pro M. Marcello, vbi eleganter docet, Caesarem hostibus parcendo maiorem consequutum gloriam, quam tot victoriis; et Xenophonis Cyropoedia, vbi docet, Cyrum tot Asiae provincias non tam victoriis, quam clementia occupasse.

§. 8.

Danda V. opera, ne innoxii homines occidantur casu. Hinc 1. inculcandum militibus, vt inermibus parcant. Caesaris vox nota: *Miles parce ciuibus.* 1. Non temere et praeter necessitatem

Z z z 2

iis

iis vtendum medijs, e quibus innoxiiis et nocentibus eadem imminet perniciēs, e. g. veneno inficiendo fontes, cet. 2. Disciplina militaris stricte obseruanda, ne impune milites caedes; latrocinia, furta committere possint.

§. 9.

num. 1. Iam vt ad specialia perueniamus, *parcendum erit VI. pueris et infantibus*, 1. quia isti infra iram sunt, quia Deus ipse in bellis iis parcere iussit, *Deut. 20, 14.*

2. Obici huic rationi posset *Num. 31.* vbi ne infantibus quidem parci vult Deus. Sed resp. Deus supremus arbiter vitae nostrae est, adeoque non est quaestio, quid ipse possit, sed quid hominibus promiserit. Gentes illas idololatricas interuicini destinauerat.

num. 2. 3. Quia ipse Deus misertus infantum. *Ionae 4, 2.*

4. Quod ius in hostes, vt diximus, descendit ex iure defensionis, defensio ex offensione imminente. Iam vero pueri et infantes nec volunt nec possunt nos offendere. Elegans dictum Camilli apud *Liv.* quum ludi magister pueros Faliscorum in castra eduxisset: *Non aduersus eam aetatem*, cet.

num. 3. 4. VII. *Parcendum etiam feminis*, ob easdem rationes, 1. quia minus generosum, cum imbelli sexu bellum gerere, 2. quia ipse Deus *Deut. 20, 14.* iis parcere iussit, 3. quia ordinario non arma aduersus nos gerunt.

Et hinc omnino cessat haec regula, si ipsae virilia officia vsurpent, et armis se tueantur, veluti Amazones, et vt saepe feminae faciunt in urbibus obsessis. Tamen et hoc casu, quia de salute sua sollicitae id agunt, parcendum iis est, parva victoria, quamuis aegre ferre non debeant si inter praeliandum occidantur.

§. 10.

num. 1. *Parcendum VIII. et iis, quorum genus vitae ab armis abhorret.* Quum enim defensio cesset, vbi offensio non metuitur; quis ferret saeuitiam in eos, qui de armis capiendis numquam cogitarunt. Tales sunt,

1. Qui sacra obeunt a quorum sanguine et feroces gentes abstinere consueverunt, veluti Philistaei. 1. *Sam. 10, 5.* Cretenses, *PLVTARCH. in quaest. graec.*

2. Viri litterati,

3. Mo-

3. Monachi, et poenitentes. Hi omnes enim abhorrent ^{num. 2.} ab armis, nec ea hostibus obuere solent ordinario.

Dico *ordinario*. Nam si et ea in re leges et consuetudines ordinis sui violent, inter praeliandum iure occiduntur. Non ignota sunt exempla episcoporum et cardinalium, qui ordines duxerunt in bello, de quibus singularis exstat, et perelegans tractatus CASP. ZIEGLERI, sub titulo *Clericus Miles*, item *Clericus Percussor*.

§. 11.

Parcendum porro VIII. agricolis. 1. Quia hi ob genus vitae innoxium et simplicitatem raro distinguere possunt iniustitiam vel iniustitiam belli. 2. Quia interest rei publicae ne agri inculti maneant et siluescant, id quod contingere oporteret, si occiderentur a victoribus.

Et hinc plerumque honestiores gentes in bellis proponere solent edicta, quibus rusticos fugientes domum reuocant promissa securitate, additisque minis de incendendis eorum pagis, nisi reuertantur.

Sed et hic tamen eadem locum inuenit exceptio, si armati aduersus nos procedant, tunc enim in praelio salua conscientia occidi possunt. Post victoriam iis parcendum.

§. 12.

Idem dicendum X. de mercatoribus. Ii duplices sunt, vel enim castra sequuntur, qui vocantur *marquetamers*. Isti si inter praelium occiduntur, id sibi imputare debent, maxime quum plerumque sint milites, vel saltem ab iis tam accurate discerni nequeant, vel vitam stabilem in urbibus et emporiis agant. His parcendum, 1. quia ab armis alieni, 2. quia aliis magis expostiti forent militum iniuriis ob diuitias, quas possidere solent; 3. quia interest rei publicae ut commercia non pessumdentur, quo semel facto non facile ad pristinum florem redeunt.

§. 13.

Haecenus actum de illis, qui non nocuerunt: iam vero per- ^{na. 1. 2. 3.} gimus ad eos, qui arma gesserunt, inter quos praecipui sunt captiui. Quaeritur itaque, an eos occidere possimus salua honestate? Dicimus *salua honestate*. Nam quid ius strictum permittat, supra vidimus.

Z z z 3

Et

Et primo quidem obseruat Grotius, *omnes gentes honestiores abstinuiffe ab occidentis captiuis*. Inter Graecos eminent exempla Pyrrhi et Alexandri M. qui se negabant bellum cum captiuis gerere; Ageſilai, qui captiuos, non tamquam fontes puniendos, sed tamquam homines custodiendos dicebat.

De Romanis exstant exempla innumera. Et laudat Tacitus duces Vespasiani, qui vltra aciem non saeuiebant.

De Ebraeis notabilis est quaestio Elifaei prophetae, 2. Reg. 2. *an tu, quos captiuos gladio tuo et arcu tuo abduceres, interimeres?* Talis est poene omnium gentium humaniorum persuasio.

§. 14.

Inde ergo sequitur, 1. *ut recipi debeant, qui se dedere cupiunt*, 1. quia sic finem suum sine sanguine adsequitur victor, 2. quia poenitentia et in hoste veniam meretur, 3. quia sic cessat offensio, ergo et defensio, quia hanc regulam gentes moratiores omnes probarunt.

Quaeritur, an idem in expugnatione urbium obseruandum? Pleraque gentes olim distinguebant, an deditio statim fiat, priusquam aries muros pulsaret, an postea. Priore casu deditis parcebant, non item posteriore.

Sed hodie distingui solet, an vrbs insultu capiatur, an nondum factus insultus. Nam hoc casu deditio admittitur, sed quo diutius se opposuerunt, eo duriores accipiunt conditiones, salua tamen deditis vita et libertate. Sin insultus iam factus et expugnata vrbs, tunc non amplius de deditione cogitandum, sed victoris est, leges dicere victis.

Enimvero et hic humanitas et honestas iubet abstinere manus a victis, quibus ipsa fortuna sat poenarum irrogat.

§. 15.

Quaeritur, an occidi possint, qui se sine conditione dediderunt? Iure stricto eos occidi posse, supra dixerat Grotius, quia vita illis non promissa.

Sed aequius est, id negari. Nam qui deditos recipiunt, tacite iis vitam promittunt, adeoque si occidantur, id non solum honestati repugnat, ceu fatetur Grotius, quia vita illis non promissa, sed et iuri. Quis enim eo sine se dederet, ut penes victorem velit esse arbitrium, velint se mactare, an viuum seruare?

servare? Quis non potius pugnans moreretur? Si vero is finis non est de deditum, sed ut conferuentur, sane victor dum deditos recipit, in hunc finem videtur tacite consensisse.

§. 16.

Solent hic nonnulli, qui de iure belli scripserunt, exceptionum. 1. & 2. nes quasdam addere, quarum

1. Est, si ius talionis vel ultionis id exigat: e. g. *hostes deditos nostros occiderunt, ergo et nos possumus*. Resp. 1. non hic quaeri quid fiat, nec quid iure strictissimo fieri possit, sed quid honestas permittat. 2. Ius talionis locum tantum habere inter easdem personas. 3. Idem pertinere tantum ad delicta, de quibus in bello non est quaestio.

2. Excipiunt casum, si ex hac severitate ingens utilitas speretur, veluti si *hostes terrore afficiuntur, ut eo facilius a nostris manus abstineant*. num. 3.

Sed resp. 1. non omne, quod utile, honestum est. Utilitas ius non tribuit occidendi, alias et latro excusari posset. 2. Iste terror hanc utilitatem certe non promittit, sed hostes saepe eo obstinatiores facit.

3. Excipiunt, qui *obstinatius in partes suas ferebantur*. Sed id num. 4. quoque falsum. 1. quia causae belli plerumque sunt dubiae, 2. quia ignoscendum naturali amor in patriam et principem vel rem publicam, 3. quia fides laudem potius meretur, quam supplicium.

4. Si *clades magna antecefferit; tunc enim dolorem excusare ultionem*. Resp. qui iure suo utitur, nemini facit iniuriam. An irascimur hosti, quod nobis cladem intulerit? An ideo saeviemus in captivos, quia nos paullo ante succubimus? Siccine illi poenas dabunt ignaviae nostrae, vel saltim infortunii.

§. 17.

Illustrat Grotius exemplo *delictorum*. Si multitudo delinquentium est nimia, parci illi solet. Et hinc si e. g. totae legiones peccarint, e. g. seditionem moliendo, decimus et vicesimus quisque sorte duci solet ad supplicium.

Si id in delictis fit, quanto magis in bello, ubi captivi nullius delicti rei sunt? An non ipsa multitudo ius esset praesidio,

§. 18.

§. 18.

num. 1. Grauior est quaestio de *obsidibus*, an ii occidi possint? Obsides sunt, qui veluti pignori dati sunt in securitatem pactorum. Iam veteres, si hostis pacta violasset, obsides occidebant. Id vero fieri iure posse recte negat Grotius.

1. Quia nemini est ius in vitam suam, adeoque et nemo se ea lege potest pignori dare, vt occidendi facultatem det hosti.

2. Quia nemo potest supplicio addici, nisi ob delictum proprium, quale hic nullum est.

nu. 2. 3. Quia obsides plerumque inuiti dantur.

Obiciunt cum Menochio, valere tamen huius modi conventionem, si moribus confirmetur. Resp. Mores rem in se iniustam iustam facere nequeunt, sed tantum impunitatem tribuere, de qua iam non agitur.

§. 19.

Denique concludit Grotius, Christianos decere ab omni inutili sanguinis humani effusione abhorrrere. Et recte quidem, quia 1. ipi Deo sanguis humanus tam pretiosus est, 2. quia vita semel erepta restitui nequit, 3. quia caritas Christianorum veluti propria esse debet. Caritas autem non saeuit, non irascitur, non occidit, maxime sine ratione.

CAPVT XII.

TEMPERAMENTVM CIRCA VASTATIONEM ET SIMILIA.

§. 1.

num. 1. Vastatio veluti proprium belli effectum est.

Vasuntur vrbes, agri, provinciae. Quaeritur an iuste? Grotius ostendit, non nisi tres esse causas, ob quas excusari possit rerum alienarum corruptio.

1. Necessitas, ipso iure naturae concessa; e. g. si gladium aggressoris quis frangat, vel in amnem proiciat.

2. Debi-

2. Debitum aliquod antecedens, in quod posset res perditā imputari, e. g. in repressaliis.

3. Delictum ob quod poena infligitur. Sed hic tamen proportionem aliquam inter delictum et poenam obseruandam putat Grotius, quemadmodum in casu restitutionem deberi existimat. Neutrum recte, quia ubi delictum non est, restitutio cessat, et proportio inter poenam et delictum locum tantum habet inter personas diuersas.

Hae sunt causae iustificae, ob quas res aliorum corrumpi possunt: sequitur causa impulsiva. Vbi regula: *Non debet quis ad id extremum protrahere, nisi utilitas quaedam suadeat.* Talis est

1. Si videamus ea ratione bellum citius finitum iri.

2. Si res hosti subtrahamus, quibus nos impugnare posset.

3. Si res seruari melioribus visibus non possit, siue periculo quod hostis eas occupaturus sit.

Ergo non ferenda vastatio ex solo odio, crudelitate, et sine omni ratione suscepta.

§. 2.

Ex eo ergo deciditur quaestio, quando abstinendum sit a vastatione, de qua §. 2-7. Respondet Grotius, excipiendos quosdam casus et quasdam res. Videbimus prius de casibus.

Primus est, si res nobis fructuosa sit, nec in hostis potestate. Hinc abstinere Deus iubet ab 1. arboribus frugiferis, agris frugiferis. Nam 1. iis hostis non fit fortior, 2. ita impugnamus posteritatem, immo et 3. nos ipsos, si hostili terra potituri sumus.

Eadem est ratio 2. animalium quorum in bello nullus usus, num. 2: 3. aedificiorum, 4. esculentorum et potulentorum. Cui bono enim cum his bellum geramus?

Sed tamen haec omnia tam crude non accipienda. Aut bellum gerimus, aut reportauimus victoriam. Si prius, tunc si videamus hostem arboribus, agris, animalibus frui, et inde victum et comestum habere, vel aedificiis eum vti ad munitiones, quis neget ea excindi posse? Sane ne quidem tempore pacis obligor ad id, quod mihi nocet et alteri prodest, quanto minus in bello?

Heineccii Prael. Grot.

A a a a

At

nam. 3. 4. At si de victoria sit quaestio, tunc facile largior, iniustissimam esse rerum hostilium deuastationem, 1. quia tunc nulla cogit necessitas, 2. nulla utilitas suadet, 3. immo in nos ipsos tunc saeuimus, qui fructum iam ex rebus illis capere possemus post victoriam.

Obiiciunt hic denuo bella cum Cananaeis gesta, Ios. 6, 2; Reg. 3, 19. vbi Deus ipsas res corrumpi iussit. Sed quod ex supremo Dei in res omnes dominio fuit, id ad homines non posse adplicari, iam antecedente capite diximus.

§. 3.

nam. 1. Abstinendum, 2. si spes sit celeris victoriae. Tunc enim vt dixi res non alienas, sed suas futuras perderet victor. Addantur elegantia dicta Alexandri et Croesi.

Sed hoc monito non admodum opus est, cum propria utilitas facile vnumquemque permoueat, vt res hostium superatorum non corrumpat, sed abripiat.

§. 4.

Tertia Grotii exceptio est, 3. si res aliunde habeat, quo se sustentet, e. g. si mare vel fines alii pateant. Nam

1. Tunc frustranea esset vastatio, qua hostis ad famem non adigitur.

2. Maiorem fructum capere possumus, si agros tutos praeslemus, iisque imponamus certum tributum. Quod in vltimis bellis fere vbique obseruatum est.

nam. 2. 3. 4. 3. Ita moribus aliarum gentium receptum, vt apud Indos, Persas, Graecos, et hodie Europaeos humaniores tantum non omnes. Ex quo consensu Gentium Grotius quidem suo more ius gentium arguit: sed nihil ille consensus probat, nisi morem hunc pluribus gentibus placuisse.

Melius n. 4. a minore ad maius concludit, si gentes profanae religioni deditae tam humanae fuerunt, multo magis id decere Christianos.

§. 5.

Abstinendum a vastatione, 4. si res ad bellum fouendum nullius sit vsus, tales statuae, imagines, horri, aedificia elegantiora. Ita enim nec debiliorem hostem reddimus, nec nos fortiores.

Meretur hic conferri Rhodiorum oratio, et quantam inuidiam

diam id superiore bello conflavit Gallis, quod Sabaudiae Ducis hortos et palatia voluptatis causa aedificata sine ratione corruperint.

§. 6.

Hactenus de *casibus*: iam de *rebus*, quas *vastationi exemptas esse decet*; quales sunt, *sacris usibus destinatae*.

Sunt qui id negant. Aiunt enim saltum et superstitiosum esse, quod quae iura asserunt, res has esse nullius, diuini iuris, sacras: reuera enim esse vel publicas vel vniuersitatis, a quibus nulla ratio nos iubeat abstinere.

Sed hic pro rebus istis militat, 1. quod sint innoxiae, 2. quod earum deuastatio cum scandalo coniuncta, 3. quod videtur ea contumelia in cultum ipsum redundare.

Accedit consensus gentium, tam gentili superstitioni additarum, Græcorum, Romanorum, Gallorum, quam Christianorum, inprimis Francorum: ex quibus saltim id fluit, humanitatem hanc semper placuisse gentibus honestioribus. num. 2. 3.

Enimuero distinguendum tamen, 1. an res vere sacris usibus destinatae nec ne. Sic enim innumeri thesauri quos conuasant Pontifici non sunt res sacrae. 2. An pertineant res ad ecclesiam, an, quod sit, priuati eas ibi deposuerint? 3. Sitne hostis eorumdem sacrorum ac nos, nec ne? Hinc Franci Saxonum profana delubra, statuas, simulacra violarunt. Et notum est Christiani Ducis Brunsvicensis scomma, qui in bello tricennali capta Paderborna, quum duodecim statuas argenteas apostolorum reperisset, eas consilari et pecuniam inde fieri iussit, addita ratione, apostolis non delitescendum esse Paderbornae, sed eundem in mundum vniuersum.

§. 7.

Eiusdem generis sunt *res religiosae*, id est, *sepulchra*. Nam num. 1. 2. quamuis profana sit persuasio, ea esse loca religiosa, quum nos nullos Deos Manes statuamus, 1. vastatio tamen sepulcrorum nullam habet iustam rationem. 2. Redundat ea contumelia in ipsos mortuos, quorum honori destinata sunt, et quibuscumq; bella gerere, plus quam stolidum est.

Hinc iure reprehensa Gallorum infania, qui capta Spira sepulchra imperatorum veterum violarunt, ipsaque ossa eiecerunt, et cineres. Humaniores sane ipsi gentiles, quorum testimonia et exempla gregatim suo more adducit Grotius. Nos addimus te-

A a a 2

flimo-

stimonium Caroli V. qui quum Wittebergam cepisset, et ministri suaderent, vt Lutheri corpus paullo ante sepultum effodi curaret et comburi, respondit, Lutheri cadaueri se non irasci, animam vero iam coram tribunali Dei rationes actuum suorum reddituram.

§. 8.

NUM. 1. Quemadmodum autem et saluterrimae admonitiones parum ponderis habere solent, nisi inguis inde utilitas effulgeat, hinc Grotius iam vsum insignem huius modi moderationis addit sub finem huius capitis.

1. Ita eripitur hosti magnum telum, *desperatio*. Ea magis armat hostes, quam copiae et gladii. Exemplum Numantinorum notum est.

NUM. 2. 3. 2. Ita magnam prae nobis ferimus fiduciam de victoria. Id quod et fortiores reddit milites nostros, et hostes tardiores.

3. Faciliores hostes erunt ad deditionem, si moderationem victoris videant. Ita Cyrus, ita Caesar pleraque occupauit.

NUM. 4. 4. Maximus autem fructus est tranquillitas conscientiae, cuius praecipue rationem habere decet Christianos principes et res publicas. Ipsos gentiles nonnumquam morsus conscientiae sensisse legimus, si in vastandis vrbibus et terris modum excessissent, veluti Alexandrum captis Thebis: quanto minus Christiani conscientia feret eam crudelitatem, maxime in alios Christianos exercitam?

CAPVT XIII.

TEMPERAMENTVM CIRCA RES CAPTAS.

§. 1.

NUM. 1. **I**N bello et res hostium capi solent: vnde quaeritur, *an permittenda sit illa rerum hostilium occupatio?* Si de iusto quaeritur, ipse Grotius iam supra id concessit: aliud esse existimat de honesto respondendum. Hinc duas tantum causas esse existimat, ob quas in bello abripi possint res hostiles:

1. Si

1. Si nobis hostis aliquid debeat, quia hoc et in pace licet.
2. Si securitas nostra id exigat, e. g. si arma, puluerem pyrium cet. intercipiamus.

Debitum iterum duplex, vel ex pacto, vel ex delicto. Ex *num. 1.* utroque res intercipi posse hostiles, sed obseruato tamen discrimine, quia ex pacto debitum et subditorum tamquam fideiussorum bona obliget: ex delicto autem id non procedere.

§. 2.

Nam quod ex delicto debetur, siue ad restitutionem siue ad poenam tendat, a solo delinquente repeti debet.

1. Quia poena est obligatio odiosa, nec adeo per interpretationem extensiuam ab alio, quam delinquente exigere potest.

2. Obligatio ex pacto in bonis est. Ergo et vicariam admittit praestationem, obligatio ex delicto in bonis non est.

3. Quia poena est malum passionis, quod intelligitur ob malum actionis a superiore. Ergo tertius puniri nequit, qui non commisit malum actionis.

§. 3.

Quod ex debito debetur, ad illius satisfactionem et res hostium; tum imperantis, tum subduorum occupari posse iam concessit Grotius. Sed quum debitum vel ante bellum natum sit, vel durante bello: de illo nemo dubitat, quin ob id res hostiles occupari queant; de hoc autem quaeritur, an et ob id liceat?

Et id recte affirmatur. Nam tunc aliquid solum intelligitur, quando mihi satisfecit de eo, quod debetur, ut nihil debeatur amplius.

Iam vero si e. g. Galli nobis debeant missena milia, expendimus, in eoque bello occupauimus res hostiles millenorum milium, tunc sane nobis non est satisfactum, quia tantum impendimus, quantum cepimus.

Ex quo consequitur, 1. ut capta in bello non compensentur cum debito principali, sed cum impensis et sumptibus bellicis.

2. Ut si nihil ceperimus, bello finito non solum debitum principale soluendum, reddendumque sit, verum etiam ea pars, quae iniustum bellum gessit sumtus belli restituere teneatur.

3. Ut etiam in bello iusto non solum tantum hosti iuste eripi possit, quantum nobis debetur, sed et quanti sumtus belli sunt.

§. 4.

Haecenus *quid et iure stricto et ex honestate liceat*, vidimus: iam *quid caritas permittat*, videndum. Ea de iure suo aliquid remittit, et non considerat, quid hostis mereatur, sed quid Christiano dignum sit. Idque probat

1. A minore ad maius, exemplo fideiussoris priuati. Si creditor iure stricto vsus fideiussorem pauperem ad extremum vsque numum excutit, iure quidem stricto vtitur, sed id miserum est, dum nihil in rem fideiussoris versum sit. Quanto miserius, rem publicam excutere subditos alienos ob debitum principis?

num. 2. 2. Illi, quos excutimus, subditi alieni difficilior carebunt re sua, quam nos debito. Caritas vero iubet, ne magno alterius detrimento locupletiores fiamus. Vnde laudatur a Xenophonte Cyrus, quod praedam agentes milites represserit, eosque humanitatis rationem habere iusserit.

num. 3-4. 3. A natura fideiussionis. Fideiussor tenetur in subsidium, si spes non sit, nos res nostras a debito principali recuperaturos. Atqui, quamdiu bellum gerimus, spes est, nos res nostras ab ipsa re publica debitrice, vel principe debitore recuperaturos. Ergo ad haec extrema non prouolandum, vt subditos tamquam fideiussores pro debito imperantium excutiamus.

4. Addit Grotius varia huius humanitatis exempla: veluti Romuli, et Alexandri M. qui quum profanae religioni fuerint addicti, merito in ruborem dant principes et res publicas Christianas, quibus multo sanctior praescripta est lex caritatis.

CAPVT XIII.

TEMPERAMENTVM CIRCA CAPTOS.

§. 1.

num. 1. *Circa captiuos* supra vidimus duplex ius introductum esse, moribus gentium. Aliae gentes *captiuos* seruos faciunt, aliae *captiuos* salua libertate detinent quidem, sed restituunt soluto pro his lytro, vt gentes Christianae fere omnes. Iam in vtroque iure temperamenta quaedam obseruanda monet, et quidem.

1. *Circa*

1. *Circa captiuorum seruitutem. §. 1-8.*

2. *Circa captiuos non seruos. §. 9.*

Seruos quod attinet, distinguit Grotius inter id, quod li-^{num. 1.}
cet *iustitia externa*, id est, vt impune sit; quidque *iustitia in-*
terna, vt salua iustitia fieri possit.

Iustitia externa permittit, vt indistincte omnes captiui in
seruitutem redigantur, si semel huius modi mos inuectus sit.

At *interna* iubet personas distinguere, sintne vere hostes,
nec ne. Hinc salua conscientia vix capi et in seruitutem de-
trudi patitur 1. feminas, quae se armis non defendunt, 2. in-
fantes et pueros, 3. agricolas et turbam imbellem, 4. eos, qui
coacti castra sequuntur. Quale discrimen et a Philippo Mace-
done obseruatum, laudat Demosthenes, cuius locus apud Gro-
tium.

§. 2.

Eadem *iustitia interna* obseruanda circa statum captiuorum.^{num. 1.}
Nam 1. non ex delicto in seruitutem incidunt, sed ex infor-
tunio. 2. Pares sunt huius modi captiui iis, qui se pro debito
ad perpetuas operas creditori addicunt. Ex quo sequitur,

1. Vt misericordia potius, quam odio digni sint.

2. Vt benignior eorum debeat esse seruitus, quam eorum,
qui ex delicto in seruitutem inciderunt.

3. Vt nihil domino capienti debeant, quam operas perpe-^{num. 2. §.}
tuas pro alimentis, adcoque eiusdem conditionis esse debent,
ac mercenarii nostri serui et ancillae. Quod et Deus inculcat.
Deut. 15, 18. 40. 53. et Paululus *Coloss. 4, 1.*

§. 3.

Ex hoc principio patet, non omnia quae in huius modi seruos
licent, etiam honesta esse. Sane iure stricto externo conceditur
ius vitae et necis in seruos, ceu ex *tir. Inst. de his qui sui vel*
al. iur. sunt, patet. An vero id et honestas permittit in seruo
ab hostibus capto? Neg.

1. Quia vt §. 2. demonstratum, est mercenarii instar. Mer-
cenarios occidere nefas est.

2. Quia ius vitae et necis est veluti domestica iurisdictio.
Iurisdictio autem, etiam publica, non est promiscue occidendi
licentia, sed animaduersio in facinorosos.

3. Quia

3. Quia aequum est delicta priuata non capitali supplicio; sed castigatione moderata expiari.

§. 4.

In ista quoque castigatione multum differt iustitia externa et interna.

Iustitia externa Romanis et aliis gentibus omne truculentiae genus permittebat, ut possent totos virgarum falcēs in tergo serui frangere, eum per integras noctes e manibus suspendere, pedes ponderibus immensis onerare. Qua de re *MÆVRVS* in *Auclario elegantis libelli de Gloria* permulta erudite disserit.

At *iustitia interna* exigit castigationem moderatam, 1. ut ratio habeatur delicti, 2. virium serui, 3. ut eius sanitati parcat, 4. ne voluptas capiatur ex eius dolore, siquidem haec omnia inhumana sunt.

§. 5.

num. 1. Porro seruus debet operas, et quidem iure stricto qualescumque. At iustitia interna, et conscientia et hic iubet rationem humanitatis habere.

1. Ne perpetuis et continuis laboribus opprimatur, e. g. nec die solis ipsi ad quietem et cultum diuinum concesso.

num. 3. 2. Ne domini obliuiscantur, se esse patresfamilias, seruos esse pueros.

3. Ut rationem habeant virium, pristini status, artis ac aetatis serui capti. Hinc iniquum esset captum belli ducem detrudere ad harenam, vel culinam, iisque operis eum fatigare, quibus nunquam adfuevit.

§. 6.

num. 3. Eadem iustitia interna iubet, ut alimenta sufficientia concedantur seruo. Est enim instar mercenarii. Immo ipsa aequitas iubet, ut quo plus operarum a seruis exigimus, eo liberalius alimenta iis adsignemus.

Hinc Romani adsignabant seruis suis in mensem quatuor modios frumenti, et apud Orientales certae librae panis et carnis in diem. Vnde et eleganter quidam interpretantur quartam precatorem orationis dominicae : *Panem nostrum quotidianum da nobis hodie.*

Humani-

Humanitas porro exigit, *ut huiusmodi seruo peculium relin-* num. 2. §.
quatur. Tale erit

1. Si quid fecit, quod seruilis officii modum excedit, et inde praemium tulit.

2. Si quid ex demenso suo, genium defraudans comparit.

Sed tamen eatenus manet peculium, quod 1. seruus in eo nihil potest contra domini voluntatem, 2. quod in casu necessitatis dominus eo ipse iure uti potest.

Humanitas iubet, *ut summi imperantes huiusmodi seruorum* num. 4.
curam suscipiant, neque eos a dominis intolerabili iniuria affici
patiantur. Hinc apud Graecos licita erat proclamatio ad venditionem. Apud Romanos serui inhumanius tractati apud Praefectum urbi poterant conqueri: *L. 1. D. de off. praef. urb.* poterant ad statuam principis confugere. Et tunc cogebantur domini inhumaniores seruos bonis conditionibus vendere. *§. 2. Inst. de his qui sui vel al. iur.*

Denique aequitas iubet, *ut huiusmodi serui, si frangi fuerint,* num. 5.
santo citius manumittantur. Seruus enim aliud praemium nulum ferre potest, non honores, qui in seruum non cadunt, non diuitias, quia sibi nihil acquirit. Quum vero omnis virtus praemium mereatur, nihil sane aequius est, quam ut seruus, qui liberaliter seruiuit, a domino manumittatur.

§. 7.

Quaestio incidit, *an et fugere huiusmodi seruo liceat?* Negat id Grotius: et quidem ex ea ratione, quia ex conventionne debet operas. Perinde enim est, ac si cum victore pactus esset, *serua mihi vitam, et ego tibi operas praestabo.* Si vero fugeret, iam ageret contra pactum, adeoque contra ius naturae.

Sed potest tamen obijci, vix posse fugam hanc quasi delictum reprehendi aut damnari. Nam 1. praeter delictum qui infortunium incidit, is potest quocumque modo se inde expedire. 2. Pactum illud per ipsam naturam non potest aliter explicari, quam, quod se seruiturum promittat captivus, quamdiu seruus futurus, nec libertatem recepturus sit. Et hoc ipse supra fassus est Grotius *lib. III. c. 7. §. 6.* ubi hanc quaestionem plane aliter soluit.

Heineccii Prael. Grot.

B b b b

§. 8.

§. 8.

num. 1.3.

Porro et id^o iubet humanitas, *ut posteris huiusmodi seruorum parcat, neque illi in eandem detrudantur seruitutem*. Id probat ex fundamento huius iuris, quod posteriores eorum qui ex delicto ad mortem condemnati fuissent, non futuri fuissent in rerum natura. Sed id negat in bello captos quadrare, qui capiuntur tamquam obligati ex debito ciuitatis, ceu iam diximus. At nondum nati ciuitate obligari non potuerunt. Ergo nec possunt in seruitutem detrudi.

Sed hic quidem non adeo accurate ratiocinatur Grotius. Nam 1. si pater huiusmodi vernae fuisset in bello occisus, nec a victore seruatus, ipse quoque non fuisset in rerum natura futurus : adeoque idem fundamentum adest.

2. Nec adeo crude dici potest nondum natos obligari non posse. Quid enim frequentius inter res publicas et priuatos, quam ut obligationes concipiuntur pro se et posteris ? Ergo si semel admissum est principium, quod serui liberi et ipsi serui sunt : non video, quomodo liberi dici possint captiuorum liberi.

§. 9.

num. 1.

Altera capitis parte quaeritur de iis, qui capti non detruduntur in seruitutem, sed detinentur donec dato lytro redimantur. Hic humanitas suadet,

1. *Ut captiui eiusdem conditionis permutantur.*

2. *Ut deficiente permutationis occasione redimantur.*

3. *Ut pretium non ita intendatur, ut captiuus deinde egera cogatur.* Ex hinc fit, ut inter gentes humaniores iniri soleat pactum, quod vocatur *um Cartel*, quo exprimitur, quantum unusquisque secundum ordinem et conditionem suam soluere pro lytro debeat. Gregarius plerumque soluit stipendium mensurum.

4. *Ut interea tolerabilem habeat conditionem, et hospitaliter habeatur.*

num. 2.

5. *Omnium generosissimae indolis esse, captiuos saluos dimittere.* Quod quidem verum; et merito laudantur, qui id fecerunt: sed ideo non potest aliis regula praescribi: qui suo iure vitare nemini facis iniuriam.

CAPVT.

CAPVT XV.

DE TEMPERAMENTO CIRCA
ADQVSIONEM IMPERII.

§. 1.

Bello et imperia adquiruntur. Quin plerumque ea vel praecipua bellandi causa est. Quaeritur *an id liceat*?

Supra *iustitiam* in *externam* et *internam* distinximus. De *externa iustitia* nemo dubitat. Hosti enim in infinitum omnia licent.

Quod ad *internam*. Grotius negat plus posse ex rebus hostilibus occupari, quam vel delictum vel debitum exigat. Sed id nemo temere probauerit. Nam

1. Bella non geruntur ex delicto vel in poenam, quia gens ratione gentis non est superior.

2. Belli praecipuus finis est securitas rei publicae nostrae. Quamdiu vero hostis mei vires non infringo, tamdiu securus esse non possum. Atqui si tantum ab eo occupem, quantum debitum vel delictum exigat, eius vires non infringerem. Ergo securus esse non possem. Cur aliter se res habeat in statu civili potest ostendi, quia ibi iudicis auxilium in promptu est.

§. 2.

Et hinc *laudandum* iam porro dicit Grotius, *si quis hoc iure num. 1. abstineat*. Hinc ipsi maxime placent effata Sallustii, Aristotelis, Ciceronis, qui huiusmodi quid inculcant. Eaque n. 2. accumulatis dictis theologorum et patrum primitivae ecclesiae, qui idem suadent. Sed resp.

1. Pleraque illa dicta quae a Romanis proficiuntur factis Romanorum contraria sunt, quippe qui vniuersum fere orbem occupant.

2. Nec prudentia patitur a conquestione imperii hostilis abstinere, si sit occasio. Nam aut nos habebimus, aut prior imperans, aut quisquis id occupauerit. Si prior imperans vel alius occupans illud eadem conditione tenet, tunc non magis fe-

B b b b 2 curi

curi sumus quam antea, adeoque bellum frustra gessimus. Ergo nos potius illud iure occupabimus.

§. 3.

Sed alia temperamenta omnino commendanda sunt. Tale est, I. *ut victi, si fieri possit, victoribus misceantur*. Sic Romulus, quum videret urbem suam non admodum populosam esse, victos plerumque vel in urbem transfudit, vel ciuitatis iure donauit.

Ita et posteri saepe cum integris prouinciis ius ciuitatis communicarunt.

Denique Antoninus cum vniuerso orbe Romano L. 27. D. *de stat. hom.* quod maxime laudat Grotius.

Sed quamvis humanitas victoris laudanda semper videatur: in eo tamen errat, quod Antonini factum laudat, qui orbem ciuitate donauit, non ex benignitate, sed ex auaritia, ut eo plures vicestimam hereditatis penderent. E. Z. SPANHEM. in orbe Rom. exercitat. II.

§. 4. 5.

ad. 1. 2. Laudanda quoque moderatio, II. *si imperium priori domino relinquatur*. Quod multis exemplis heroum et victorum illustrat Grotius. Sed hic plures cautiones obseruandae.

1. Ne haec liberalitas rei publicae nostrae damnoſa sit, e. g. si sic nulla nobis securitas sit.

2. Ut nouum imperantem nouis conditionibus obstringamus, ut nobis fere sit stipendiarius. Ita Romani Iudaeam Herodi, Galatiam Amyntae, Cappadociam Archelao regibus reliquerunt.

3. Ut non semper id pro liberalitate habeatur, sed pro prudentia. Archelaus ab Augusto Cappadociam accepit, quia Augustus euitabat bellum cum Parthis. Melius ergo putabat fines a rege defendi, quam a Romanis.

§. 6.

Inter temperamenta est, III. *ut tributum potius iniungatur victis, quam ut iis omne adimatur imperium*. Ita Romani cum Carthaginensibus et aliis egerunt. Nam

1. Sic satis consulitur securitati.

2. Ita

2. Ita locupletatur aerarium.

3. Ita fines tertii sumtibus defenduntur, vt iam exemplo Archelai Cappadocis docuimus.

§. 7.

Vtilitatem huius consilii non vnam promittit Grotius, veluti

1. *Quod pax cum eius modi viclis eo firmior futura.* 2. *Quod ita non opus est praefidiis et sumtibus ad subditos coercendos.* 3. *Quia ista moderatio gloriam victoris augeat, eique plures conciliet.*

4. *Quia saepe magis interest rei publicae fines regere imperii, num. 1. quam illud nimium proferri.* Hadrianus omnes prouincias trans Euphratem deseruit. Idem et alii fecerunt. Nam a) vbi imperium nimium, ibi seditiones eo plures. b) Ibi magis timendi prouinciarum praefides. c) Ibi eo pluribus bellis immisce-mur, et eo pluribus locis inuadimur. Ego sane Hispaniae regem hodiernum amissis Neapoli, Sicilia, Mediolano et Belgio opulentiores arbitror, quam eius decessorem.

§. 8.

Ea quoque moderatio notanda, *quod mutatur quidem a vi-elore rei publicae forma, sed non ipsum imperium viclis eripitur.* Eo consilio vti Athenienses et Laecedaemonii. Quoties illi ciuitatem expugnabant, formam introducebant democraticam, quam ipsi elegerant. Si hi victores essent, optimatibus concedebant imperium, et sic et moderationis exemplum dari, et periculum seditionis euitari, siquidem plebs semper optimates, et optimates plebem odio habeant.

§. 9.

Porro si imperium in victos suscipiendum sit, suadet Grotius, *vt subditis vel pars imperii relinquatur, quod sit 1. regem illis imponendo socium et amicum, vel, vt vere dicamus, stipendiarium, quales sub Romanis in Iudaea Herodes, in Cappadocia Archelaus, in Galatia Amyntas, in Numidia Masinissa.* 2. *Vt regnum quidem viclis relinquatur, sed nobis ius sit legiones et praefidia in terra vicla habendi.*

B b b b 3

§. 10.

§. 10.

Immo si et omne imperium sibi victor condicat, moderationis tamen laudem feret, si ipsis relinquat *armpia*, id est, vt circa res priuatas et publicas minores victi suis legibus patriis vti possint. Sic Romani Bythyniae ciuitatibus omnibus concesserant ius suas constituendi res publicas suos eligendi decuriones, decreta et leges faciendi. Et tamen hoc delusi simulacro libertatis, omnes parebant praefidi prouinciarum.

Explicandum hic ex politica, quid sit *simulacrum libertatis*.

§. 11.

- num. 1. Inprimis laudanda victoris moderatio, qua victis auitam religionem saluam ac illibatam relinquit. 1. Nihil enim est religione cuique carius. 2. Nihil ad seditionem excitandam proclius.

Tantum religio potuit suasisse malorum.

3. In se religio non potest coactioni subesse, quia in intellectu consistit. 4. Exempla principum humaniorum euincunt, id fieri posse. Augustus fere omnibus victis suum cultum reliquit. Vid. BYNKERSHOEK *de religione peregrina*.

- num. 2. At obicitur saepe religionem falsam et obscuram esse. Resp. 1. ita omnibus fere alienam religionem absurdam videri: in ea re errari facillime. 2. Dare potest operam victor, vt ne verae religioni noceat. 3. Potest de eorum conuersione sollicitus esse, sed non de violenta, verum de vera, quae sit per praedicationem verbi.

Interim si religio in quibusdam iuri naturae repugnet, potest id mutare legibus. Sic ipsi Romani non passi sunt Altos et alios barbaros homines sacrificare.

§. 12.

- num. 1. Vltima denique moderatio est, vt si, vel maxime omni imperio potiantur victores, eo tamen non in modum herilem et tyrannice vtantur, sed prout decet aequos imperantes. Hoc modo Romani consequuti sunt, vt rarissime prouinciae rebellarent. Vbi cumque enim vicerant, ibi bonis legibus temperabant rem publicam, vrbes et frequentiores et opulentiores reddebant, subditos ad cultum vitae elegantiore traducebant, adeo vt plerique

quae gauderent prouinciales, se sub tam clementibus esse dominis.

Et id vel politica suadet ratio. Nemo amat dominum si seruus num. 1. sit, sed amat imperantem, sub quo felicior sit et opulentior. Et hinc firmissimum prouincias seruandi praesidium est beneuolentia. Hinc elegans illud legati Priuernatis dictum, qui victa ciuitate sua, quaesitus, *qualem pacem expectet?* respondit: si bonam dederitis, firmam et perpetuam; sin malam, haud diuturnam.

CAPVT XVI.

TEMPERAMENTVM CIRCA EA QVAE IURE
GENTIVM IURE POSTLIMINII CARENT.

§. 1.

SVpra vbi de iure postliminii actum, diximus multas et per- num. 1. sonas et res esse, quae illo iure non gaudeant. Sic non gaudent eo iure captiui pace facta, si eorum inter conditiones nulla sit facta mentio; nec eo gaudent res mobiles, praeter naues, quippe quae semel captae manent capientium, cet. Ergo iam et hic temperamentum commendat Grotius.

1. Primum est, *ut omnia bello iniusto capta, et in quemcumque translata possessorem, restituantur priori domino.* Nam 1. quod ad ipsos capientes, cessante causa, nempe bello iusto, cessat etiam effectus ius res occupandi vel capiendi personas. 2. Quod ad alios possessores, illi causam habent a victore, qui iure non habuit dominium, adeoque nec transferre ille potuit.

Illustrat id Grotius exemplo liberi hominis a latrone vel pi- num. 2. rata capti, qui, quantumvis in seruitutem abreptus, non tamen fit seruus; adeoque nec libertinus est, si manumittatur, sed ingenuus. Quid vero interest inter eum qui iniustum bellum gerit et latronem? Recte Scythae Alexandrum M. vocabant latronem gentium.

§. 2.

§. 2.

NUM. 1. 1. Idem Grotius illustrat exemplis. Aequi et Volsci vicinos iniuste spoliauerant; Lucretius Rom. Cos. eos fudit, et praedam recepit, et eam omnem publice exposuit, ut quisque suum abduceret. Liv. lib. III. Eandem aequitatem seruauit Postumius dictator, teste Liv. lib. X. Immo quid celebrius exemplo Abrahami, qui victis quinque regibus, qui Sodomam spoliauerant, et recepta praeda, iurauit conceptis verbis se ne corrigiam quidem ex praeda retenturum; sed omnia regi Sodomorum restituit, quamuis ipse illa concedere vellet Abrahamo. Gen. 14. 16. seq.

§. 3.

NUM. IV. 2. Sed quaeritur, an non aliquid deduci possit a tertio possessore, e. g. si bona fide rem a victore emerim, an non si restituiam, pretium repetere possim? Resp. Grotius:

1. Mala fidei possessor nihil deducet iure: e. g. si sciat victorem bellum iniustum gerere, et tamen ab eo praedam emat.

2. Bonae fidei possessor deducet 1. aliquid, si ipse victus a victore sine impensis quibusdam rem recuperare non potuisset. 2. Deducit impensas, si bello vel vi victori res extorsit. Ita ipse Abrahamus, quamuis vero domino omnia redderet, deduxit tamen decimam Deo dandam, et praemia sociorum.

§. 4.

Aequitas eadem iubet, ut et populi victi ab hoste nostro sibi suaeque libertati reddantur. Non enim, ut diximus, potest successor verum dominium habere, quod is non habuit, a quo causam habet. Et hinc inquit Romani, qui Mithridate victo, qui Seleuco Syriam iniusto bello eniperat, repetenti Seleuco illam restituere noluerunt.

§. 5.

Quid vero si praescriptio obstat? Eam hac in re notum est producere ius externum, sed non internum; 1. quia est ex iure mere ciuili; 2. quia plerumque victus rem suam recuperare non potuit. Non valenti agere, ne iure quidem ciuili currit praescriptio.

§. 6.

§. 6.

Quid si causa belli dubia? Eo casu res ad transactionem redit, cuius elegans exemplum ipse addert Grotius.

CAPVT XVII.

DE HIS, QVI BELLO MEDII SVNT.

§. 1.

Medii bello dicuntur, qui neutri belligerantium suppetias ferunt, adeoque plane extra bellum sunt.

His nihil omnino eripiendum esse tradit. 1. Quia in pacatos nihil licet, nisi urgente necessitate, quae hic nulla est. 2. Quia necessitas quidem excusat si sumamus, non si sine pretio sumamus. 3. Quia ius belli non nisi contra eos, qui bellum gerunt, locum habet.

§. 2.

Id suo more exemplis illustrat Grotius, ut doceat, gentes in hanc doctrinam consensisse. Sed quid opus exemplis gentium, dum ipsa ratio hanc doctrinam probat? Non ergo ea repetamus, quae ab vnoquoque legi possunt, sed praecipue tantum delibabimus, quae vim probandi habent. Horum praecipuum est, quod §. 4. adiertur dictum Joannis Baptistae: *A concussione a calumniis in quosvis abstinete, contenti estote stipendiis vestris.* Luc. 2. 14. Haec disciplina militaris diuina est, tam rationi consentanea, ut vel solum hoc dictum sufficiat ad hanc doctrinam demonstrandam.

§. 3.

Quemadmodum ergo pacificos laedere non licet, ita nec iis licet villo modo laedere belligerantium alterum, aut vni plus, quam alteri fauere. Hinc

1. aut neutri aut vtrique aequis conditionibus concedendus transitus.

Heineccii Prael. Groe.

C c c c

2. Vtri-

2. Vtrique petenti dandus commeatus aequo pretio: si vero essent edicta de non aduehendis mercibus prohibitis, neutri.

3. Subditos prohibere ne militent alterutri. Hinc parum ex fide fecit rex Galliae, qui quum Regi Hispaniae promississet, se causam Lusitanorum non suscepturum maximam exercitus partem dimisit, sed clandestinis mandatis instructam, vt stipendia faceret Lusitanis.

num. 2. Ratio est, quia qui hostem meum iuuat, hostis est, ex quo sequitur, vt qui alterutri belligerantium plus fauet, non sit neutrarum partium, sed hostis, adeoque ei, si hostis loco habeatur, non fiat iniuria.

num. 3. Sub finem id temperamentum commendat Grotius, vt foedus cum vtroque belligerante ineatur, quod vocant *Neutralitäts-Tractaten*.

Huius foederis ea vtilitas est, 1. vt non possint cogi ad arma pro alterutro sumenda. 2. Vt eo magis ad liquidum perdudatur, quid facere liceat durante bello, vel non liceat. 3. Vt commerciorum libertati consulatur.

CAPVT XVIII.

DE HIS, QVAE IN BELLO PRIVATIM FIUNT.

§. 1.

num. 1. **H**ostis in hostem in infinitum omnia licent in bello publico, id est, in praeliis, in expugnationibus urbium, terra marique, sed saepe hosti et extra bellum privatim damnum inferri potest, e. g. si subditi nostri subditos hostis spolient, occidant, cet. si priuatorum naues nauibus hostilibus iniurias stuant, cet. Quaeritur itaque, an id iuris sit?

Negabant Romani eum iure cum hoste pugnare, qui sacramento militari se non obstrinxisset. Hinc Cato filium missione impetrata negavit cum hoste iuste pugnare, nisi nouo sacramento se obstringeret. Sed Grotius considerat, sintne arma priuatorum iusta iure gentium et naturali.

num. 2. Quod ad ius gentium, i. e. mores gentium attinet, nihil prohibet

prohibet, et priuatos hosti nocere, 1. quia bellum gerit tota res publica, adeoque et singuli inter se hostes sunt. 2. Quia declarationibus belli plerumque additur adhortatio, vt subditi arma corripiant, et se suaeque tueantur, et quocumque modo hosti incommodent.

Hinc quae Cato ad filium scribit, non sunt ex iure gentium, sed ex disciplina militari Romanorum, cuius tam tenaces erant, vt Manlius Cos. ideo filium securi feriret, quod priuata auctoritate, se absente hostem esset adgressus.

At ius naturale concedit quidem, inquit Grotius, vt priuati hostibus incommodum adferant, non autem, vt res captas sibi vindicent. Cuicumque enim nihil debetur, iste nihil potest sibi eripere. Sed tamen ne cui ea occasione ius sit homicidia praeter ius et fas committere, hodie non temere id permittitur, nisi praecedat mandatum rei publicae.

Id vel generale vel speciale est. Generale locum habet 1. ^{num. 4.} in periculo subitaneo. Quicumque rem publicam saluam esse volunt, me sequantur. 2. In defensione. Hinc in bello, si cohors hostilis pagum vel oppidum inuadat, et ciuibz licet se suaeque tueri.

§. 2. 3.

Speciale mandatum habent 1. stipendiis conducti; 2. suo ^{num. 1. 2.} sumtu militantes, *les volontaires*; 3. qui naues armant suo sumtu et consentiente re publica, vt is hostibus insidientur. Qui id singulare habent,

1. quod iis pars praedae pro sumtibus concedatur.

2. Quod ipsi contra partem praedae debeant fisco vel rei publicae.

3. Quod si naues amittant, vel capiantur ipsi, indemnitate a re publica exigere nequeant.

§. 4.

Haec iure naturae et gentium recepta. Iam quid Christiana caritas suadeat, Grotius commendat hanc moderationem,

1. ne innocentibus ista praedatio noceat, sed hostili rei publicae, vel eius principi.

2. Vt ea omittatur, si hostium vires eo ipso non insigniter occidantur.

C c c c 2

3. Ne

3. Ne crudelitati indulgeant victores.

Leges probae et Christiano doctore dignae, sed quae plerumque silent inter arma.

§. 5.

Observat porro Grotius, *aliquando occasione belli publici priuatum nasci*; id sit, 1. si quis in hostes inciderit, e. g. si nauis mercatoria ab hostibus impugnetur, si iter faciens a cohorte hostili petatur. Tunc quaelibet honesta est ratio defensionis. 2. Si tempore belli damnum insigne passi a magistratu impetrent ius repressaliarum.

Sed posterior casus vere non priuatum est bellum sed publicum, quia non priuata auctoritate, sed publico arbitrio geritur.

§. 6.

At quaeritur sub finem, *si quis priuata auctoritate hosti damnum intulerit, ad quid obstrictus sit?*

Resp. aut sine necessitate id fecit, et tunc ad restitutionem non tenetur, quia hosti non facta iniuria, sed ad poenam, quia leges rei publicae violauit.

Sin iusta causa defensionis adfuit, et poena cessat, et restitutionis obligatio, ob ius inculptae tutelae, quae cuius tempore pacis, adeoque multo magis tempore belli promittenda est.

CAPVT XVIII.

DE FIDE INTER HOSTES.

§. 1.

num. 1. **C** Aput hoc 1. probat, *hostibus quoque seruandam esse fidem*; §. 1-6. et 2. *in quibus rebus habenda sit*, docet, §. 7. ad fin.

1. Prius Grotius demonstrat 1. variis testimoniis, Siliu Italici, Xenophontis, Aristidis, Ciceronis, quae tamen in se illustrant potius quam probant.

num. 2. 2. *Fides est vinculum*, non solum ciuitatum, sed et totius humanae

humanae societatis. Atqui hostes etiam pertinent ad humanam societatem. Ergo fides ipsis habenda.

3. Hosti in hostem in infinitum omnia licent, immo cum stratagematibus quoque et falsiloquiis circumuenire licet, cum supra diximus, verum dum eo agimus, tamquam cum hoste. At si cum eo paciscimur, cum eo non agimus tamquam cum hoste, sed tamquam cum amico et pari. Ergo obligatio hic manet, ut fidem seruemus.

4. Denique et ab absurdo probari potest. *Bella geruntur, ut pax fiat.* Pax vero numquam fieri posset, si nullum pactum inter hostes initum obligaret. Ergo obligat omnino.

§. 2.

Sunt tamen qui id negant. Et hi maxime vtuntur exemplo num. 1. praedonum et latronum, quibus negant fidem esse seruandam. Talis est sententia ipsius Ciceronis et Senecae.

Idem vti solent exemplo tyrannī, cui nihil deberi ait MICH. ERHESIUS in *Comm. ad Aristotelem*, adeo, ut nec in eius uxorem adulterium committi putet.

Denique et ad Iudaeos prouocant, quorum magistri alienigenarum coniugia pro nullis habent, et aduersus eos negant violari posse fidem.

Sed respondetur, 1. quod ad latrones, distinguendum esse, num. 1. an pactum nobis vi et metu extorserint, an sponte iis quidquam promiserimus. Si prius: nulla est obligatio, non quod cum praedonibus vel latronibus pacti sumus, sed quod pactum debet esse consensus liber. Sin posterius, obligatio omnino valida producitur, e. g. si magistratus praedonibus impunitatem promiserit. Quod fecit Pompeius in bello piratico. 2. Quod ad tyrannos, absurda est sententia. Tyrannus est, sed homo tamen, et quis homini neget fidem esse seruandam. 3. Iudaeorum sententia de alienigenis falsa est, nec ex Scriptura S. sed ex magistrorum lacunis fluit. Ergo nihil probat.

§. 3.

Equidem sunt qui obiciunt: *latrones a quouis puniri possunt.* num. 1. 2. Ergo et a quouis possunt dolo circumueniri, ut puniantur, adeoque fides iis impune non seruatur. Ita Cicero.

C c c c 3

Resp.

Resp. 1. falsum est, latronem a quouis puniri posse. Poena est superioris. Occidi potest, sed per modum defensionis, non puniri.

2. Non sequitur, puniri potest, ergo et pactis decipi. Puniri enim potest, si occidat in manus magistratus; magistratus vero impunitatem promittens renunciauit iuri suo, adeoque eum punire amplius non potest.

3. Decipi potest latro, si eum tamquam hostem persequamur, tunc licet stratagematibus quibuscumque vti: non autem si eum illo paciscimur.

§. 4.

Atqui ipsi falsi sumus, *promissum metu extortum non valere*. Quid vero latronibus promittitur, annon metu extortum est? An non magistratus ideo promittit, quia metuit, ne latro plures homines occidat?

Resp. Promissum metu extortum liberat promittentem, si illi ipsi promittenti vis illata. Hic autem latro vim non intulit magistratui, sed priuatis quibusdam. Ergo magistratus dicere non potest promissum sibi meum extortum esse.

§. 5.

Addit Grotius, et *promissum metu extortum seruandum esse, si iusiurandum accesserit: quia, quamuis homini non teneatur promittens, teneatur tamen Deo, cui iuraris*.

Sed hoc, quod probe notandum, 1. falsissimum est, et nititur falsa iuris canonici doctrina, quod iusiurandum nouam producat obligationem, quum tamen tantum accessorium sit obligationis. Si ergo accessorium est, sequitur suum principale. Ergo si obligatio nulla est, per iusiurandum nulla introducit. Deinde 2. iureiurando obligamur Deo, si acceptat iusiurandum. Quis vero dixerit, Deum acceptare iusiurandum vi et metu extortum?

§. 6.

Inde ergo colligit Grotius, etiam *fidem habendam esse subditis bellum cum rege gerentibus*. Bellum enim gerunt aut iustum cum tyranno, aut iniustum tamquam rebelles. Si prius: quis negauerit iis fidem seruandam, qui iusti hostes sunt? Sin posterius,

sterius, sane nulla ratio denegandi fidem subditis rebellibus, quam ne latronibus quidem denegari posse demonstrauimus.

§. 7.

Obiiciunt, quod ad subditos dominium eminens. Eo iure possunt agere omnia principes, quae exigit rei publicae utilitas. Ergo et pacta cum rebellibus inita possunt rescindere, si fas rei publicae exigat.

Resp. 1. Dominium eminens est ius, non ergo verti debet in iniuriam. 2. Locum non habet nisi in casu extremae necessitatis. 3. Iuri in suum fauorem introducto unusquisque potest renunciare. Ergo et princeps. Renunciat vero, dum paciscitur cum rebellibus.

§. 8.

Inprimis id obseruare oportere ait, quod promissum est rebellibus, si iusiurandum vel principis vel ciuitatis acceperit, cuius eadem est ratio, quod ita non rebellibus, sed Deo obligentur. ^{num. 1. 2.}

Sed id quoque nihili est. Iusiurandum enim nihil nouae obligationis introducere, iam paullo ante vidimus. Ergo aequè promissa rebellibus seruanda sunt, si iniurata sunt, ac si iureiurando firmata.

§. 9.

Verius est, quod hac §. ait Grotius, *multo magis valere promissum, si tertio interuenienti factum sit.* Nam tertio, qui metum nullum iniecit, exceptio quod metus causa ob stare non potest. Hinc e. g. quum Macedones bellum cum rege suo Philippo gessissent: Romanis pollicitus est rex, se subditos suos ob hoc bellum non persequuturum. An contra Romanos habebat exceptionem, pacta cum rebellibus inita, tamquam vi et metu extorta non obligare? Negatur. Romani enim, quibus promiserat, non erant rebelles, nec ii hoc pactum vi metuque iniusto extorserant.

§. 10.

Porro et ideo pacta cum subditis inita absurda non sunt; quia mutatio rei publicae non absurda est. Alio loco demonstrauimus, rem publicam vel ciuitatem pactis inter principem et sub-

subditos constitui. Quis vero negauerit, pactum contrario pacto tolli et mutari posse.

Ergo nec absurdum est, cum subditis, in quos antea imperans pleno imperio utebatur, ita pactum iniri, ut in posterum restrictior sit imperantis potestas, vel ut pars subditorum plane libera sit?

§. 11. 12.

III. 1. 2. Iam ex his quae dicta sunt colligit Grotius. *Si ergo pacta seruanda sunt latronibus et rebellibus, multo magis seruanda erunt hostibus iustis.*

Nam hic cessat exceptio, quod metus causa, quia hoc medium coercendi inter gentes aequae iustum habetur, ac inter ciues iudicia.

Quicumque vero non est iniustus, iste nec obligationem reddit irritam. Illustrari id potest exemplo ciuis a magistratu metu carceris adacti ut promitteret, se intra mensem quod debeat, soluturum. Hic sane exceptionem quod metus causa non habet. Ergo nec is, qui bello iusto adactus promissit.

Ergo hoc non pertinet ad promissa vi non bellica sed illicita extorta, e. g. si quis reginam victam metu stupri adegerit ad promittendum. Non enim vis bellica in stupris, sed in armis consistit.

§. 13.

III. 1. 2. Quaeritur, *an et perfidis seruanda fides?* Adfirmat Grotius, ideo laudans Romanos, qui fidem seruauerint Poenis, toties foedifragis, itemque eosdem vituperans, quod Lusitanos toties foedifragos, noua perfidia vlti sint.

Sed distinguendum, an in aliis pactis perfidi sint, an in hoc ipso. Si in aliis, id non prohibet, quo minus ipsis fides seruanda sit. Sin in eadem, perfidia alterius nos quoque liberat. e. g. Hannibal aliquoties deceperat Romanos. Iam hi cum illo inducias faciebant, an poterant eas ideo violare Romani, quia Hannibal antea fuerit perfidus? negatur. Sed si fingamus, Hannibalem contra has ipsas inducias fecisse: nihil prohibet, quo minus et Romani iam possent iis ruptis Hannibalem bello persequi,

§. 14.

Vidimus hactenus regulam : *hosti seruanda fides* : sequuntur exceptiones , quarum duae sunt , conditionis defectus et compensatio.

I. De conditionis defectu res clara est. Promissi enim condicionalis non praesens est obligatio , sed futura. Nec prius incipit obligatio , quam exstiterit. Ergo sequitur , vt si conditione non existente promissum non adimpleo , non perfidus sim ; sed iure meo utar.

Est vero conditio vel expressa vel tacita. Per tacitam hic non intelligitur ea , quam quis dicit se in mente retinuisse. Nam sic nulla obligatio valeret , quia vnusquisque dicere posset , se hanc vel illam conditionem in mente habuisse : sed talis , quae ex ipsa natura negotii fluit ; e. g. *dorem tibi dabo* : subintelligitur , *si tibi nupsero*. Dos enim sine nuptiis non intelligitur. *Adimplebo pacis conditiones* , subintelligitur : *si et tu adimpueris* , cet.

§. 15.

II. Altera exceptio est *compensatio* , quae est mutui debiti et crediti contributio. Valet 1. si debitum vtrunque liquidum est , 2. si mutuum est , 3. si certae aestimationis. Si ita fiat compensatio , tunc recte dicitur obligationem promissi cessare , si sit ius compensandi.

Hinc elegans casus. Titius a me mutuam sumsit pecuniam et iuratus promisit , se eam restituturum. Interea et ipsi tantumdem debere coepi ex vendito. Non soluit. An perius est ? Negatur , quia compensare est soluere.

§. 16.

Nec interest , vtrum ex eodem contractu nascatur debitum mutuum , an ex alio diuerso. Sufficit enim adesse debitum mutuum. Hinc paullo ante dedimus exemplum , vbi vnus ex mutuo , alter ex vendito debebat.

Obiici quidem posset , iure ciuili in quibusdam contractibus et causis locum non habere compensationem , e. g. in deposito. Sed facilis responsio : ius naturae gentium hoc discrimen non agnoscere , quippe ideo inuentum a legislatoribus , vt omnem praetextum non reddendi depositum excluderent.

Heineccii Prael. Grof.

D d d d

§. 17. 18.

§. 17. 18.

Immo et non interest, an alter mihi debeat ex contractu an ex delicto. Nam et ex hoc naturalis nascitur obligatio, tum ad restituendum, tum ad poenam. Sed id modo discrimen in statu civili observatur, 1. quod quum debitum ex contractu plerumque liquidum sit, ex delicto quod debetur, fere iudicis officio definitur. 2. Quod quum ex contractu priuatis aequae ac rei publicae deberi possit, multa plerumque hodie non priuatis sed rei publicae debeatur, excepta fere aestimatione, quam actione iniuriarum consequimur.

§. 19.

Quemadmodum ergo haec in statu civili locum habent, ita et inter gentes bellum gerentes observantur. Sed id tamen non intelligendum de controversia primaria, de qua bellum geritur, sed de aliis specialibus, quae durante bello incidunt. Sic e.g. si bellum geratur ob debitum 300. millionum, et subditi nobis tributa promiserint durante bello, non possunt nobis tributa negare sub praetextu, quod ipsi 300. milliones debeamus. Haec enim est controversia, de qua sub gladio iudice lis est. At si e.g. bellum geramus diuersis locis, et alio loco victores adegerimus hostes ad promittenda tributa, alio loco victi ipsi tributa promiserimus, nobis non soluentibus ipsi quoque sua iure compensationis merito retinent.

Addit et hic Grotius monita quaedam, veluti *generosi animi esse et compensationi renunciare*: id quoque *exigere aliquando Christianam caritatem* cet. Quae quidem vera sunt, sed in bello raro observantur, ubi plerumque sufficere creditur, si non iniuste agant belligerantes.

CAPVT XX.

DE PACE.

§. 1.

Proxime haftenus egimus de *bello*. Iam de *pace* agitur, vel de *pactionibus cum hoste*. Pactiones illae aut *expresse* sunt aut

aut *tacite*. De *fide tacita* agitur *cap. 24*. Expressae pactiones sunt vel *publicae* vel *privatae*. De *privatis* agitur *cap. 23*. *Publicae* sunt aut *summarum potestatum* aut *inferiorum*. De *pactionibus inferiorum potestatum* agitur *cap. 22*. Denique *superiorum potestatum pactiones* vel *bellum componunt*, quales *pactiones de pace*, de quibus *hoc capite 20*. vel *suspendunt belli actus*, ut *induciae*, de quibus *cap. 21*. De pace quaeritur,

1. *Quis eam inire possit?* §. 2-4.

2. *Quibus conditionibus?* §. 5-26.

3. *Quomodo pax violetur vel rumpatur?* §. 27-41.

4. *An et aliis modis finire possit bellum?* §. 42. fin.

§. 2.

Si quaeritur, *quis pacem possit inire?* resp. *summus imperans*. Qui enim habet *ius belli*, idem et *ius pacis*; 2. in pace quaeritur, de rebus reddendis, de cedendis *urbibus* et *prouinciis*. De his rebus nemo praeter *summum imperantem* statuere potest.

Ergo sequitur, ut in statu vere monarchico solus rex pacem faciat, quia solus *summus imperans*. Dicimus *vere monarchico*. Saepe enim rei publicae forma existit, ut rex nihil possit sine consensu statuum, ut in Polonia.

§. 3.

Quum vero pax ineatur per pacta: pacisci vero non possint *num. 1.* *impuberes*: quaestio est, *an rex impubes pacem facere possit? item an furiosus? denique an captivus?*

De *impubere* et *furioso* id negatur, quia, illius nullus consensus. Ergo aut cum tutore eius paciscendum, cuius plena est potestas, aut cum tutore et ordinibus imperii simul: aut, quod tutius, *induciae* fieri possunt, usque ad *pubertatem regis*.

De *captivo* incidit quaestio, quum Carolus V. cum Francisco I. Rege Galliae in carcere Madritano fecisset pacem. Et recte quidem negatur, *captivum pacem facere posse*, quia quamvis rex sit, exercitum tamen regii imperii cessat.

Ergo distinguendum, an *de rebus privatis* paciscatur, an de *num. 2.* *regno et re publica*. Priores pactiones valent, non posteriores.

§. 4.

In statu Aristocratiae procures pacem ineunt: in democra-

D d d d 2

tico

tico totus populus per suffragia in comitiis. Inde sequitur, vt

1. Dissidentibus proceribus vel ciuibus plura suffragia vincant pauciora.

2. Vt pacta tunc obligent et eos, qui non consenserunt.

3: Vt iisdem etiam profuit.

§. 5.

II. 1. 2. 3. Haftenus de personis paciscentibus, iam de rebus vel conditionibus, de quibus pacta ineuntur, quae vel publicae vel privatae.

Publica res est regnum eiusue pars, vnde quaeritur, an id vel totum vel ex parte per pacem alienari possit?

Distinguitur et hic, an regnum patrimoniale sit, an usufructuarium. Si usufructuarium, rex illud alienare non potest, adeoque nec per pacem concedere hosti, nisi accedat ordinum totius regni consensus.

Si pars hosti concedenda, distinguendum denuo an ea iam ab hoste armis occupata sit, an de nouo illi sponte concedenda. Si prius, sufficit in regno usufructuario consensus principis et ordinum regni, nec opus est consensu eorum, qui hosti conceduntur. Sin posterius, et rex, et ordines, et illi ipsi, qui alienantur, consentire debent.

Ratio ex pacto primaeuo, quo res publicae huiusmodi constituuntur petenda, quo sane facultas non alienandi sed regendi data est principi.

num. 4. Si vero regnum patrimoniale est: ipsa natura huiusmodi imperiorum docet, ea libere alienari, ita vt nec ordinum, nec partis alienandae consensu opus sit, sed sola sufficit principis voluntas.

§. 6.

Ex quo simul patet, quomodo decidenda quaestio: *an ex quatenus subditi regum pactionibus teneantur?* Nam eadem obtinet distinctio. Si regnum patrimoniale vel plane herile, quidquid pactus est rex, et subditos obligat. Sin usufructuarium, subditi tenentur, quatenus rex egit secundum leges fundamentales regni et imperii. Non enim plus habet huiusmodi rex, quam quod ipsi datum est.

§. 7.

§. 7.

Iam *de rebus priuatis* : An et de his valet *passio* ? e. g. si ^{num. 1. 2.} princeps praedia et agros priuatorum cedat hosti in satisfaci-
onem, an id ratum est. Resp. affirmando, quia imprantes in
subditorum rebus gaudent dominio eminente. Res publica ae-
que habet dominium in rebus ciuium ac ipsi ciues, si necessitas
rei publicae id exigat. Iam necessitas rei publicae id saepe
exigit, vt potius res priuatae, quam publicae hosti concedan-
tur. Ergo id potest res publica cuiusque victor.

Interim omnino et reliqui ciues his, quorum res hosti con-
cessae sunt, tenentur ad refarciendum damnum, 1. quia nec
reliqui ciues cum vnus damno fieri debent locupletiores, 2.
quia inter ciues debet esse aequalitas, nec vnus plus contribuere
debet ad tuendam rem publicam quam alter.

§. 8.

Noua quaestio est, *an si ciues nostri damnum ingens tempore
belli passi sunt, iis restitutio quaedam a re publica debeatur?*
Vasquius in controuerliis illustribus negat, ex ea ratione, quod
ius belli talia permittat. Sed id recte absurdum dicit Grotius.
Ius belli enim excusat, non quae ciuibz sunt, sed quae hosti
nocentur.

Ergo omnino reliqui ciues debent refundere damnum,
quod ex conciuibus vnus vel alter extra ordinem passus est, ex
eadem ratione, ob quam contributio fieri solet ex *L. Rhodia de
iactur.* si vnus merces in mare proiectae sint, vt aliorum res
feruentur.

§. 9.

Sunt qui distinguunt inter ea, quae iure gentium et quae
iure ciuili nostra sunt. Haec dicunt subesse arbitrio principis
vel rei publicae, ita, vt possit in illa dominium eminens exer-
cere. Illa non aequae. Quaeritur itaque, an recte ita distinguant?

Negatur. Nam 1. dominium ex quacumque causa nasci-
tur, est dominium. Non ergo ad causam domini, sed ad ef-
fectum respiciendum. 2. Quae iure ciuili nostra sunt, eo mi-
nus alterius arbitrio subesse debent, quia plerumque titulo one-
roso adquiruntur, quum quae iure gentium adquiruntur, ma-
ximam partem titulo beneficio.

D d d d 3

§. 10.

§. 10.

Ergo maneat hoc, rem publicam posse urgente necessitate de rebus etiam priuatis disponere, easque hosti tradere in satisfactionem. Sed distinguendum tamen ius hostis et nostri principis.

Hostis potest accipere salua conscientia, quae ipsi in satisfactionem offeruntur, siue sint publica, siue priuata.

Princeps vero noster, vel res publica, non potest promiscue res priuatorum tradere, sed 1. urgente necessitate, 2. oblata satisfactione dominis, qui rerum suarum iacturam patiuntur.

§. 11. 12.

Incidere hic solet quaestio de interpretatione conuentionum pacis. Interpretatio quum vel extensiva, vel restrictiua, vel declaratiua sit, quaeritur, quae hic locum habeat?

Inhaeret Grotius regulae vulgari: *Fauorabilia late, odiosa stricte sunt interpretanda*; quae et falsa, et hic adplicari nequit. Nos ita dicimus. Iura magis fauent iis, qui de damno vitando certant, quam qui de lucro captando.

Inde sequitur, vt pacis conuentiones ratione eius, qui inde lucrum habet stricte interpretandae sint, ratione eius, qui iis damnum patitur, late. Ex hac regula facile componi potuisset controuersia inter Gallos et Germanos, an pace Westphalica cum Alsatia etiam decem ciuitates imperii in Alsatia cessae essent?

Si neuter lucratur, regula plerumque est: *Vti possidetis; ita possideatis*; adeoque interpretatio in dubio pro possessore facienda.

§. 13.

Nonnumquam in pace conuenit, vt omnia restituantur in statum, qui ante bellum fuit; vbi tenenda regula: *Respicitur tunc ad possessionem ultimam, non anteriorem, quia de ea pacifices cogitasse non praesumuntur.*

Inde lucem capit art. 4. pacis Ryswicensis, Protestantibus tam infestus, vbi cautum vt status religionis in locis cessis et restitutus sit, qualis fuerit ante bellum. Id pontificii interpretabantur de religione antiquiore pontificia, protestantes de ea, quae proxime ante bellum fuerit, nempe Euangelica.

Interim

Interim antiquioribus possessoribus, si quod ius habent, solum debet esse ius, via iuris suum consequendi.

§. 14.

Fieri etiam solet, ut tempore belli populus liber alterutri parti belligerantium sponte se subiciat. Quaeritur itaque, an tunc in pace, si omnia ad priorem statum redire iubemur, etiam hic populus libertati suae reddendus sit?

Resp. distinguendum, an ita expresse convenerit, nec ne. Priore statu standum est pacto. Posteriore non praesumitur ita convenisse. Nam 1. hunc populum nemo possedit, adeoque nemini reddendus. 2. Ipse sui iuris sponte se nobis dedit, potuitque suo iuri renunciare. Ergo tertii nihil interest.

§. 15.

Quaeritur porro, an post pacem et damna inuicem resarcienda? Resp. aut ita convenit, tunc pacto standum: aut non convenit, et tunc damna sibi inuicem censentur remississe,

1. Quia bellum sine iis geri nequit.

2. Quia et in statu civili in dubio litis impensae compensantur.

§. 16.

Quid vero de priuatorum debitis, an illa quoque bello exspirasse censentur? e. g. si ante bellum Gallus mercator debuerit Amstelodamensi.

Negatur, ea bello exspirare, 1. quia liberatio a debitis priuatis non est belli causa, 2. quia belli ius debita non exstinguit, quamuis durante bello occasio exigendi debita cesset.

§. 17. 18.

Quid vero de poenis? Aut illae debentur ob delictum hosti illatum, tunc remittendae pace inita; aut ex alio quocumque crimine, tunc pax nihil mutat.

E. g. si cepimus hostilem piratam vel praedonem, qui nobis multum dampni intulit; vel proditorem, qui munimentum hosti tradidit, ei poena remittenda facta pace: non qui condemnatus ob furta, adulteria, caedes.

Ratio prioris decisionis est lex amnestiae, quae semper primum pacis articulum constituit.

§. 19.

§. 19.

Quaeritur porro *de praetensionibus, quae ante bellum urgebantur, an eae per pacem cessent?*

Resp. id ex ipsis articulis iudicandum. Aliquando illis sollemniter renunciatur, tunc res clara. Aliquando tacite, dum alterius ius agnoscimus, e. g. imperator in pace nupera agnouit ius regis Hispaniae; aliquando sibi referuat titulum, ut idem imperator dicitur rex Hispaniae; aliquando res dubia relinquitur, ut pace Ryswicensi controuersia inter ducem Aurelianensem et electorem Palatinum.

§. 20.

Aliquando contingit, ut pace nondum publicata exercitus noster urbem, homines, res capiat, quamvis vere pax contracta sit. Si ergo de istis in pace nihil conuenerit, an reddenda erunt? Adfirm. 1. quia per pacem expirauit belli ius;

2. quia cessante belli iure etiam cessat ius occupandi.

§. 21.

Plerumque etiam in pacis articulis conuenit, *ut res captae reddantur*. De his has regulas tradit auctor.

1. Mutua huius modi conuentio late, unilateralis stricte interpretanda, quia hic de lucro captando certat.

2. Restitutio hominum latius interpretanda, quam restitutio rerum. Quia pro hominibus captis militat misericordia.

3. Immobilium restitutio maioris momenti quam mobilium; quia dubiae aestimationis.

4. Restitutio a re publica magis urgenda quam a priuatis; quia hi plerumque titulo oneroso adquisuerunt.

§. 22.

Si res restitui iubentur, an et fructus?

Resp. Distingendum inter fructus a tempore possessionis, et a tempore pacis. Ili non restituantur, quia victor fuit bonae fidei possessor. Hi exiguntur, quia a momento pacis initae rem alienam possedit.

§. 23.

§. 23.

Si regio restitui promissa, an intelligendum antiquum an nouum nomen? Controuersia haec incidit inter Hispanos et Gallos, quum Neapolin inter se diuiderent, vbi Galli regiones nouo, Hispani antiquo nomine vocabant. GVICCIARDIN. *Hist. lib. V.*

Sed recte Grotius, nomina regionum accipienda esse ex vsu praesenti. Vfus enim interpretatur vocabula, quem penes est vis et norma loquendi.

§. 24.

Saepe in pace fit relatio ad pactum antecedens aut vetus. Quo facto, omnes conditiones videntur repetitae, quae non excipiuntur speciatim.

Saepe etiam promittitur factum, tunc quaeritur, an in mora sit, qui paratus est facere, quum per alterum stet, quo minus fiat? e. g. si promiserit rex regi copias 10000. et hic bellum non gerat.

Negatur. Quia facti promissum obligat tantum vt faciamus, si alterius interlit. Ergo vbi alterius non interest, vel vbi ipse, cui promissum factum impedit, cessat obligatio. Exemplum habemus in iure priuato. Titius si filiam meam vxorem duxerit, 1000. habeto. Ducere voluit, sed haec noluit, conditio pro adimpleta habetur.

§. 25.

Si vero in mora vere sit promittens, potestne illa mora purgari? e. g. promisit rex alteri suppetias, simulac bellum ingruat. Otto bello non mittit, sed exacto anno mittit, an mora purgata? Minime. Nam vbi non perinde est, quando promissum praestetur, ibi mora tardius praestando non purgatur. Atqui in promissis subsidii non perinde est, quando promissum praestetur, siquidem causa semel vulnerata, victori resistere non tam facile est, quam sub initium belli. Ergo mora tardius praestando subsidium, non purgatur.

§. 26.

Interpretatio contra quem fieri debet in dubio? an contra promittentem, an contra eum cui promittitur. Resp. contra eum cui promittitur, 1. quia hic conditiones exigit; 2. quia sibi imputat.

Heineccii Prael. Grot.

E e e e

re

re debet, quod clarius non sit loquutus; 3. quia quod non exegit, remisisse videtur. E. g. imperator Russiae victis Suecis condiciones pacis praescripsit, vt Liuania et Ingermania caderent, ipse Finnoniam redderet. Quaerebatur, an et Wiburgum reddi debeat? Procul dubio. In dubio enim contra eum fieri debet interpretatio cui promissum.

§. 27.

Sequitur tertia pars capituli, qua quaeritur, *quomodo pax rumpatur et violetur?* Primo ergo omnium distinguenda haec duo, *pax rumpatur, an noua bello causa praebetur.*

Noua bello causa praebetur, quoties controuersia nascitur, de qua superiore pace nihil plane decisum est. E. g. Bellum de successione Hispanica ex noua plane oriebatur controuersia, de qua pace Riswicensi nihil statutum. Ergo nec pax Riswicensis rumpi videbatur.

Pax contra rumpitur tribus modis, 1. faciendo contra id; quod omni paci interest, 2. faciendo contra condiciones pacis expressas, 3. faciendo contra id, quod tacite ex pacis conditionibus fluit.

§. 28.

I. Faciendo contra id quod omni paci interest. Omni paci hoc inest, vt sine noua causa bellum non moueatur, nec vis alteri vlla inferatur. Ideo enim pax initur, vt bellum ex ista priore controuersia natum cesset. Ergo si paciscens reuocat antiquam praetensionem, et ideo arma corripit, pacem procul dubio rumpit. Sic recte Romani arguebantur, quod pacem violarint, bello Punico III. moto. Pace enim antecedente controuersia fuerat definita, nec Carthaginenses contra pacem quidquam admiserant, sed Romani tantum prae se ferebant, quod securitatis suae causa vrbs esset destruenda.

§. 29.

Potest autem aliquis contra id, quod omni paci interest facere, 1. si vel ipse, vel socii, vel subditi vim inferant; 2. si vel nobis, vel subditis, vel sociis nostris vis inferatur.

Perinde est, siue ipse, qui nobiscum pactus, siue socii vim intulerint. Sed hic distinguendum tamen, an socii sint aequales; ita vt alter alterius imperio nullo modo subdit, an inaequales,

VF

vt alter alterius certo modo sit superior. Priore casu pax rupta non videtur a nobis, si socii nostri bellum moueant, e. g. si iam imperator bellum inferat Gallis, nec Britanni nec Belgae dici possent pacem rupisse, quamvis imperator sit eorum socius. At posteriore casu omnino pax rupta, si socium nostrum arma mouentem non prohibuerimus, e. g. socii Russorum sunt Cosaci, sed ita vt Russi sint superiores. Iam si Cosaci impressionem faciant in Poloniam, et illi non prohibeant, nemo dubitabit, quin Russi pacem ruperint.

§. 30.

Perinde quoque est, siue nos, siue subditi nostri laedant eos, quibuscum pacem iniimus. Sed hic denuo distinguendum: Aut iussu publico id faciunt, aut priuato ausu. Si iussu publico, tunc quod quisque per alium facit, illud ipse fecisse videtur; sin ausu priuato, tunc aut sciente aut ignorante imperante id factum. Si prius, et imperans sciens non impediuit, pacem rupit. Sin posterius, tunc tertio distinguendum, paratine sint imperantes ad satisfactionem, et supplicium a subditis sumendum, an illa denegent. Priore casu non rupisse censentur pacem, posteriore ruperunt procul dubio.

§. 31.

Quid si subditi nostri damnum intulerint, sed aliis militantes. E. g. Heluetii multi stipendia faciunt Gallis. Fingamus Gallos militibus istis Heluetiis vti ad inuadendam Germaniam, an Heluetii fractae pacis argui possunt?

Et hodie quidem distingui solet, an militia illa auspiciis publicis alteri stipendia faciat, an priuato consilio. Si prius: tunc denuo videndum, an id foederibus repugnet, nec ne. Si prius, pax rumpitur, non si posterius. Sic e. g. nullum exstat pactum, nullum foedus, quo Heluetii Germanis promiserint, se contra Germanos alteri non militaturos. Si priuato consilio, tunc pax rumpi non censetur, nisi simul sint e gente socia. Haec enim obstricta est ad milites illos hosti stipendia facientes, sub poena proditionis et confiscationis bonorum domum reuocandos.

§. 32.

Perinde porro est, siue nobis vis contra pacem inferatur, siue num. 1.2.

E e e e 2

subditis

subditis nostris. Vbi tamen distinguitur, an subditis nostris nocitum sit ultro, an defensionis causa. Si prius, pax rumpitur, nisi statim detur satisfactio. Sin posterius, non rumpitur, e. g. si subditi nostri exerceant piraticam, et alii eos capiant, nauibus spolient, cet.

§. 33.

NUM. T. 1.

Perinde porro est, *sive nobis sive sociis nostris vis inferatur.* Socii enim pace comprehensi nobiscum communem causam habent. Distinguendum tamen, an socii sint pace comprehensi, de quibus iam diximus, an tantum cognatione, affinitateve iuncti. Si prius, pax rumpitur, non si posterius, tametsi bellum inferatur cognato vel adfini.

§. 34. 35.

II. Rumpitur pax faciendo contra expressas pacis conditiones, siue id fiat faciendo, e. g. tributum imponendo sociis, quod non impositurum se promiserat.

Nec interest, conditio sit magni an parui momenti; non enim hic quaeritur, quantum damni feramus ex conditione pacis violata, sed an non-alter sit perfidus. Quemadmodum ergo in statu civili aequè iniustus est, qui 100. florenorum debitum non soluit, quam qui 10000. non soluit: ita et in pace violata perinde est, siue leuior, siue maioris momenti conditio violatur.

Alia quaestio est, *an caritas Christiana, an prudentia ferat, ob leuem quamuis iniuriam pacem pro rupta habere, et arma corrumpere?* Id enim nemo dixerit. Sed si quis tamen corripiat, ideo non iniuste egisse censetur.

§. 36.

Aliquando in eum casum poenam nobis stipulamur, si alter, quocum pacificimur, pacem rumpat, et tunc poenam committi, si quid contra pacis conditiones fiat, nemo dubitat. Poena enim huius modi non est satisfactio, quam exigit superior, sed quam per conuentiuem constituit ipse paciscens. Pacta vero et iure naturae seruanda sunt.

Quum vero exsequutio huius modi poenae conuentionalis admodum sit difficilis: ita stipulari solent principes et res publicae,

cae; vt huius modi summa interea apud tertium deponatur, donec conditionibus pacis ab vtraque parte satisfactum sit.

§. 37.

Quid si res casu perierit, quam in pacis conditionibus alter alteri promisit? Tunc alias quidem promittens speciem, iure ciuili liberatur, si species perierit: sed aliud iure gentium. Quia enim sic pax fieret inutilis, hinc inter gentes moribus receptum, vt aestimatio praestetur.

Ergo regula iuris ciuilis tantum valet, si quid promissum, quod aestimationem non recipit, e. g. restitutio captiuorum. His enim interim mortuis in captiuitate, ne aestimatio quidem debetur.

§. 38.

Obscruat hac §. auctor, integrum esse parti laesae, etiam post laesam ab altera parte fidem, pacem continuare; idque illustrat exemplo Scipionis, quem Carthaginensium perfidia non impediuit, quo minus ex sua parte pacem satis diu seruaret. Sed haec res dubio caret. Quod enim alter nobis in pacis articulis promisit, id in fauorem nostrum promissum est. Quisque vero potest iuri in fauorem sui introducto renunciare.

§. 39. 40. 41.

III. Rumpitur pax faciendo aliquid contra id, quod ex pacis conditionibus fuit. Sic e. g. ex pace fuit amicitia. Haec exigit,

1. vt legati vtriusque recipiantur, et amice tractentur.
2. Vt subditi vtriusque partis possint per vtriusque provincias tuto peregrinari et iter facere.
3. Vt non prohibeantur commercia mutua, si non repugnent foederibus et pactionibus anterioribus.
4. Vt iustitia administretur tam subditis exterorum, quam nostris.

Si quid ergo post pacem secus fiat, nec satisfactio offeratur, dubitari nequit, quia pax rupta sit.

§. 42.

Sequitur quarta pars: an non et aliis modis, quam pactionibus pax iniri possit? Sane veteres aliquando vsi sunt huius modi compendiis, de quibus iam disserit Grotius.

E e e e 3

I. Ali-

I. Aliquando gentes belligerantes rem forti commiserunt; id est, ita inter eos conuenit, ut de iure controuerso fortes iacerent, et cuicumque fors faueret, is pro victore haberetur.

Egregium sane compendium: 1. quia ita sanguini humano parcitur, et 2. res vere iudicio Dei committitur, cuius in manu fors est, teste Salomone.

Sed distinguendum tamen, an res de qua litigatur, sit in commercio et arbitrio imperantium, ut oppida, pagi, cet. an non sit, e. g. vita, pudicitia, libertas subditorum. Priore casu, forti locus est, non posteriore, quia obligantur imperantes potius ut haec defendant, quam ut submittant aleae.

§. 43.

num. 1. II. Aliquando pacem factam nouimus per bellum repraesentatiuum. Tale est, si ex utriusque partis exercitu, selecti quidam iuvenes congregiuntur, eo inter utramque rem publicam interposito pacto, ut utra pars vicerit, ista pro victrice re publica habeatur. Exempla iam collegit Grotius, sed nullum est sollemnius, quam bellum repraesentatiuum inter Curiatios Albanos et Horatios Romanos, apud LIVIUM.

num. 3. 4. 5. Quaeritur, an talia certamina sint licita? Distinguit Grotius inter ius gentium et naturale. Iure gentium id licitum esse concedit, non iure naturali, quod et supra Lib. II. cap. 1. §. 12. sequi docuerat. Videbimus rationes:

1. Peccare contra Deum, qui ob res, quibus carere possumus, hominem occidit.

2. Peccare in Deum et seipsum, qui vitam tam vili aestimat, ut eam exponat periculo.

Sed eadem rationes ipsum quoque bellum iniustum redderent. Ratio ergo, quae nimium probat, nihil probat. Potius dicimus:

1. Quae fieri possunt per plura, ea et per pauca possunt. Iam non est nefas, si res publica 100000. hominum vitam periculo opponat: ergo nec nefas erit, si tres homines mittat in certamen.

2. Quocumque medio innumerae strages et calamitates impediuntur, illud non est in se moraliter illicitum. Atqui hoc bello repraesentatiuo id fit. Ergo in se non est moraliter illicitum. Quod demum ipse Grotius n. 4. §. 5. concedit.

Alia

Alia quaestio est, *an prudentiae conveniens sit huius modi bellum?* id enim non dixerim, quia hic semel victus nullam spem reliquam habet, quae reliqua est in bello iusto.

§. 44.

Quid vero si rex ita pactus sit, ut controversia bello repraesentatio finiatur, an tunc subditi, si male res cesserit, pacto huius summi imperantis stare tenebuntur? Recte Grotius distinguit inter formas eorum. Regnum vel patrimoniale est vel usufructuarium. Patrimoniale rex pro libitu potest alienare. Ergo et huius modi pacto intercedente de eo pacisci potest. In usufructuario autem non valet huius modi compromissum sine consensu populi. Si regnum sit feudale, e. g. Neapolitanum, tunc et domini consensus requiritur.

§. 45.

Saepe in his praeliis, aequae ac in bello iusto, dubia est victoria: quaeritur ergo, *quis pro victore habendus?* Victi censentur,

1. Qui omnes amiserunt, e. g. Albani tres Curiatios, quos miserunt, amiserunt: ex parte Romanorum unus Horatius victor supererat.

2. Qui omnes in fugam acti, nec se stiterunt iterum. *Neuter victor est.*

1. Si nox ancipiti adhuc victoria pugnantes separat.

2. Si maiore imminente periculo, salvis viribus cessim se receperunt pugnantes. (*la retraite en bon ordre.*)

3. Si utraque pars paria damna passa discedat. Reliqua signa incerta sunt, e. g. spolia legere, campum in quo praelium factum occupare, cet.

Quod si ergo vere dubia victoria, res manet integra in eo statu, quo antea fuerat.

§. 46.

III. *Aliquando bellum finitur per arbitrium, si belligerantes num. 1. 2. compromittant in tertii sententiam.*

Arbitri vero duorum generum sunt, aut enim lecti, tamquam mediatores, quos vocant, seu conciliatores: aut tamquam iudices controversiae, ob quam bellum geritur. Effectu utrumque arbitrium ita differt, quod illius arbitrio non pareamus necessa-

cessario, sed quatenus aequa suadere videatur: huius sententiae abscessisse et absolute parendum.

Et de his hic sermo est. De his vnica obseruanda regula: *parendum esse ei, quod edixerint arbitri, qui virique parti placuerunt.* Est enim haec natura compromissi, vt quod ab initio fuerat voluntatis, id ex postfacto fieret necessitatis.

§. 47.

num. 1.2. Sed quaeritur; *quam normam tunc seruare debeant arbitri?* Resp. Distinguendum inter modos compromittendi. Aliquando enim illos eligimus, vt secundum certum ius iudicent, aliquando vt ex sola aequitate.

Si prius arbiter obligatus est, vt ex illo iure rationes decisionis suae ostendat: sin posterius, satisfecit officio suo, modo non aperta sit iniquitas.

§. 48.

An vero huiusmodi arbitri de possessione, an de causa primaria pronunciare debent? Resp. de causa primaria. Nam 1. diuisio indiciorum possessoriorum et petitoriorum ex iure ciuili est, eamque ius gentium plane ignorat. 2. Iure naturae et gentium, nemo est iure possessor, nisi qui dominus. Ergo si de dominio res ad liquidum perducta, de possessione etiam res clara est.

§. 49.

num. 1.2. IIII. Modus pacem constituendi est *deditio*, quae vel *pura*, vel *conditionata*, de qua §. 57. *Pura* dicitur, quando victus victori de se plenum arbitrium permittit. *Conditionata*, quando dedens se certas sibi conditiones stipulatur.

De *pura* ergo quaeritur, *quid tunc victor possit in deditos statuere?* Distinguit Grotius inter deditos et victores. De *deditis* existimat, quod omnia pati teneantur, quippe subditi. Hinc vitam, opes, libertatem in victoris arbitrio esse.

Sed id falsum videtur. Nam qui se etiam pure dedunt, id faciunt, vt vitam seruent. Ergo tacita deditioni huic inest conditio vitae retinendae, et victor dum deditos recipit sine iniuria vitam eis eripere non potest, licet se pure dediderint.

§. 50.

Quid vero victor salua conscientia potest? Recte hic Grotius. nn. 1. 1. 3. 4. 5.

1. Non potest ipsis eripi vita, nisi in iustam poenam, nempe si bellum ex insigni delicto natum sit. Iam vero victor est superior, ergo in subditos potest poenam statuere.

2. Non potest opes auferre. Sunt enim subditi. Subditos spoliare non potest princeps, nisi iterum in poenam.

3. De libertate et conditione eorum potest statuere, prout mereri videbuntur, neque iniuriam facit deditis, si ipsis paullo durius iugum imponat, quam ciuibus reliquis, e. g. plus tributorum pendere iubeat.

4. Clementia et caritas Christiana hic quoque suprema lex esto. Homines sumus. Hodie victor, cras fortassis victoris curam sequitur. Moderate ergo utendum victoria.

§. 51.

De *deditione conditionata* vna est regula, quae ex ipsa pacti natura fuit: *conditiones deditis concessae accurate seruandae sunt.*

§. 52.

Addit sub finem Grotius quaedam de *accessoriis pacis*, quaelia sunt *obsides* et *pignora*.

Obsides sunt homines, qui pro rei publicae sponsione in pignus traduntur. Si aut sponte se dant, aut inuiti dantur ab imperante. Quaeritur ergo, *an imperans possit subditum inuitum dare?* Affirm. quia imperans in casu necessitatis habet ius vitae et necis in subditos. Quemadmodum ergo iubere potest, ut omnes subditi arma corripiant, et ad extremum halitum pugnent: ita potest etiam subditum dare hosti in pignus.

Sed quum hoc ex dominio eminente fluat, sequitur ut res publica damnum huic obsidi datum repensare teneatur.

§. 53.

An vero obses occidi potest, si ciuitas pacto non steterit? Negatur. 1. Oppignoraui libertatem et bona, non vitam, quam ne potuit quidem oppignorare. 2. Crudele est consulere diutius in innocentes ob perfidiam alienam.

Heineccii Prael. Grat.

FFFf

§. 54.

§. 54.

An vero fugere licet obsidi? Distinguendum aut fidem dedit hosti, siue se sponte offerendo, siue postea paciscendo, ut la-
xius haberetur, aut fidem non dedit. Si prius fugere non po-
test ex pacto. Sin posterius, vix ratio est cur fugere nequeat,
quum nec ipse nec res publica eum ad id obligaret, ne fu-
geret.

Alia quaestio est, *an ciuitas fugientem obsidem recipere possit?*
Negatur. Nam pignus semel datum, licet furto creditori subre-
ptum quocumque titulo ad me redierit, reddendum est credito-
ri. Ita et obses si fugiat, et sui ipsius furtum faciat, et ad nos
reuertatur. Hinc Cloelia obses fugiens reddenda erat Porfennae.

§. 55-58.

Subnectit iam Grotius quaedam, quae ad *iura obsidum* per-
tinent, veluti

1. cessare obsidis obligationem, si satisfactum sit promisso pro
quo dati sunt; adeo ut ne ob aliam quidem causam retineri pos-
sint, quod iure ciuili licet in pignore.

2. Qui pro homine ob'es datur, e. g. pro captiuo, eo mortuo
liberatur. Quia enim, ut supra diximus, captiuus mortuus non
reddi potest, hinc et obligatio obsidis cessat.

3. Ergo et, qui pro *regis persona* datur, mortuo rege, libera-
tur. Pro *regis persona* dico, nam si pro rege, tamquam capite re-
gni, simul pro re publica datus censetur. Ergo etiam non potest
liberari rege mortuo.

§. 59.

Alterum pacis accessorium sunt *pignora*, similia quodammo-
do *obsidibus*. Sed hoc singulare et proprium habent, quod quum
obsidum obligatio stricte admodum interpretanda sit, in pigno-
ribus locus sit interpretationi extensivae. Pro hominibus enim
oppignoratis misericordia militat, non pro rebus.

§. 60.

Quaeritur postremo, *an ius luendi pignoris tempore expiret?*
idque negatur, 1. quia pignus datur in securitatem promissi.
Promisso praestito pignus ipso iure liberatur. 2. Quia si debitor
in mora sit, sufficit si vfuras praestet, nec aequum, ut simul pi-
gnus

gnus amittat. 3. Quia lex commissoria in pignore numquam aequa est, ob pretium pignoris debitum plerumque excedens.

CAPVT XXI

DE FIDE MANENTE BELLO, VBI DE INDV-
CIIS, COMMEATV, CAPTIVORVM REDEMPTIONE.

§. I.

Constat hoc caput 3. partibus. Et prima quidem agitur *de mun. r. 2* *induciis*, §. 1-13. secunda *de commeatu*, §. 14-22. tertia *de redemptione captiuorum*, §. 23-30. Omnia enim haec pacta in eo conveniunt, quod durante bello ineantur.

1. *Induciae* sunt pactum per quod actibus bellicis manente bello ad aliquod tempus abstinetur. Bellum enim est status societatum liberarum de iure controuerso per vim inter se certantium, aut certandi propositum retinentium. Si ergo vere inter se digladiantur, bellum est. Si non certant, sed tamen certandi propositum retinent, induciae sunt, sed tamen bellum.

Et inde facile deciditur quaestio, *sintne induciae ad pacem an ad bellum referendae*? Resp. ad bellum:

1. Quia pax ius controuersum decedit, adeoque bellum tollit, induciae id non faciunt.

2. Quia status esse potest sine actu. Sic e. g. seruus fugitiuus in statu seruitutis manet, quamuis actu non seruiat: febricitans manet in statu morbi, quamuis paroxysmus actu non addit; ita et bellum manet, quamuis actu inter se non certent belligerrantes.

Obiici posset, aliquando tamen inducias admodum diuturnas esse, e. g. centum annorum, *Liv. lib. I. cap. 21*. Sed resp. breuius aut longius tempus non variat rem. Inde tamen est, quod induciae diuidi solent in *bellicas* et *pacificas*.

Bellicae, vbi cessat certamen, sed manet tamen apparatus bellicus, exercitus, castra, cet. quod fit si breues sint admodum.

Pacificae, quando apparatus bellicus aequae ac in pace cessat,

F f f f 2

fat, e. g. si sint 100. annorum induciae. Vere tamen omnes induciae ad bellum pertinent.

§. 2.

Quaerit iam Grotius, unde vocabulum *induciae*? Duplicem adfert etymologiam: alteram GELLII lib. XVIII. c. 8. qui ab *endoitu*, id est *introitu*, deriuat, quia quasi introitus ad pacem sit; alteram ab *inde* et *otium*, quia inde, id est, a certo tempore otium sit, de qua etymologia prolixè. Inde ergo etiam confirmatur, quod diximus, *inducias ad bellum pertinere*. Non enim inde pax est, sed otium, manente bello, quale etiam esse solet hieme, si per frigus hostes intra hiberna continentur. Otium tunc est, non pax.

§. 3.

Quando ergo queritur, *an elapso induciarum tempore noua indictio belli opus sit?* id merito negatur. Nam

1. ubi bellum non cessat, ibi non nouum bellum incipitur, sed superius continuatur. Vbi superius continuatur, non opus est noua indictio.

2. Induciae sunt tantum impedimentum temporale actuum belli. Cessante impedimento, status belli ipso iure reuiuiscit.

Romani tamen aliquando, induciis finitis, de nouo indixere bellum, LIV. lib. III. Sed indictio illa fuit superfluum, et ideo procul dubio facta, ut Veientes, si viderent, nouum sibi bellum imminere, metu periculi deterrixi satisfactionem offerrent.

§. 4.

Sed quomodo tempus induciarum computandum?

1. Tempus aut generaliter per numerum designatum, e. g. centum dies, aut specialiter indicato die, quo finire debeant, e. g. usque ad Kal. Martias.

Si prius, tunc tempus computatur a momento in momentum, et centesimo die elapso, bellum reuiuiscit.

Posteriore casu queri solet an Kal. Martiae, tamquam terminus ad inducias adhuc referendae? an iam illo die bellum reuiuiscit? Et magis est, ut ad inducias pertineat, 1. quia magnus est induciarum fauor, 2. quia neutrius partis interest, eas die

die citius vel tardius rumpi, 3. quia vulgaris vsus loquendi terminum ultimum tempori coniungit. E. g. loco aedes ad Kal. Martii, nemo dixerit conductorem ipsi illis Kal. expelli posse.

§. 5.

Quando vero incipiunt induciae? Resp. a die scientiae, vel publicationis. Ergo sequitur

1. ut ipsos contrahentes statim obligent a momento, quo pactio perfecta est, quia statim sciunt.
2. Ut reliquas a loco pactiois remotiores demum obligent a die publicationis, adeoque
3. ut si quid interea post inducias hostile fecerint, id impune fecerint.

Ratio est, quia induciae, quoad ipsos paciscentes sunt pactum, at quod ad subditos paciscentium, sunt lex, qua edicit imperans, ut belli actus suspendantur. Lex vero non obligat, nisi a die publicationis.

§. 6.

Quaeritur porro, quid per inducias liceat? Resp. ex ipsa definitione patet, omnes actus belli suspendendos esse, perinde ac si pax esset. Ex quo sequitur

1. ut cessare debeat ius occidendi hostem, oppugnandi castra, vrbes spoliandi, praedas agendi.
2. Ut si res hostiles raptae sint, eae illis reddi, et raptores puniri debeant.
3. Ut liceat ultro citroque ire et redire, modo periculum non imminet ex multitudine, e. g. si aliquot hostium millia in castris nostris libere vagantur.

§. 7.

An et futurae defensionis curam gerere licet tempore induciarum? Omnino, quia bellum imminet post inducias. Ergo

1. exercitum possum introrsum in locum tutiorem reducere,
2. Moenia reficere,
3. Militem conscribere, cet. Si enim non sunt actus bellici, sed belli praeparatio, quae quum in ipsa pace licita sit, quidni et durantibus induciis?

Ffff 3

§. 8.

§. 8.

num. 1.1. *An et loca quaedam vel hostium praesidia inuadere licet?*

Resp. quaestio nimis obscura est. Distinguendum, sintne loca iam ab hoste occupata, et praesidiis custodia, an incustodita, et veluti nullius. Si prius, occupari nequeunt, esset enim hic actus billicus: posteriore possunt, quia locum nullius occupare non est hostile.

Ergo 1. perinde est, siue tempore induciarum proditione aliena inuadamus, siue armis. Vtrumque illicitum.

2. Non excusandi, qui loca hostium minus custodita, e. g. pagos, oppida, castella praesidiis nudata occupant. Requisiuimus enim, ut sit locus nullius, qualis est derelictus, e. g. si hostis oppidum nostrum tempore belli occupasset, idque tempore induciarum ultro desereret, tunc illuc praesidium nostrum inducere possumus, quia res pro derelictis habitae sunt nullius.

§. 9.

num. 1.2. *Quaeritur iam an is, qui tempore induciarum iter per hosticum fecit, et morbo alioque casu retentus ibi, donec induciae expirarent, ius ad suos redeundi habeat?*

Resp. negatur: idque probatur a pari. Nam si nouum bellum ingruit, omnes apud hostes deprehensi retineri possunt, et ius postliminii habent. Ergo et qui reuiuifcente bello ibi deprehenduntur.

Sed vi maiore et diuina impeditus est. Resp. atqui omne infortunium est a vi maiore, et diuina. Talis vero captiuitas non poena est, sed infortunium, ergo nihil interest, culpa accesserit nec ne.

§. 10.

Haecenus de *induciis generalibus*, quae omnes actus bellicos suspendunt. Sunt etiam *speciales*, quae illos actus suspendunt, qui certum finem impedire possent. e. g. *induciae sunt ad sepeliendos mortuos.*

Haec iuste interpretandae. Ergo nihil quidem tunc agere possumus, quos hostis cadauera sepeliens, impediatur, sed non prohibemur tamen interea alias vrbes inuadere, et aliis locis bellum persequi.

§. 11.

§. 11.

Quaeritur, si hostis inducias rumpat, an et nos obligatione liberemur? Affirmatur.

1. Perfidia enim vnus alterum obligatione absoluit in obligationibus bilateralibus.

2. Defensio vbique et semper licita, ergo multo magis, si me quis contra pacta vi adgrediatur.

3. Ita fructum ferret hostis perfidiae suae, dum nos defensionis iure destitutos, intra inducias opprimeret.

§. 12.

Paciscentes inducias addidere poenam conventionalem, si alteruter eas violaret. *Hostis violauit, poenam solui, an iam bellum continuare potest?*

Negatur. Nam poena additur, vt hostis violationem praeteritam luat, non vt in futurum impune perfidus esse possit. Et hoc fuit ex natura omnis poenae, tum iure superioritatis tum iure pacti inflictae. Ea enim punitur praeteritum delictum, non licentia peccandi in futurum conceditur. Sane absurdus esset fur, si putaret se iam impune impofterum furari posse, quia poenam fustigationis ob furtum sustinuerit.

§. 13.

An et ob priuati facinus rumpuntur induciae? Negatur, sed priuatus, qui violauit, ad poenam obligatus est. Potest tamen et priuati huiusmodi delictum imputari ipsi imperanti et pro ruptis induciis haberi, 1. si ratum illud habeat imperans, 2. si datum damnum rescire nolit, 3. si violentem inducias ad poenam poscamus, et imperans eum protegat.

§. 14.

II. Sequitur altera pars capitis de *Commeatu*. *Commeatus* est priuilegium, quo per scriptas litteras (*passports* vocantur) subdito hostis conceditur facultas ad nos commeandi, commercia tractandi, *et.*

Quaeritur an ipse *commeatus* late an stricte interpretandus? Late, inquit Grotius, quia priuilegium. Sed priuilegia potius stricte interpretanda esse omnes hodie consentiunt. Nos ergo po-

1108

tius strictae commeatus interpretationi fauemus. 1. Res enim est cum hoste. Ergo nihil ipsi indulgeri censendum, quam quod in litteris commeatus expressum. 2. Res periculo non vacat. Facile enim eiusmodi peregrinus per vrbes nostras impune vagatus, posset hosti enunciare statum prouinciae, proditores fouere, litterarum commercia cum hostibus inire, cet. Id ne fiat, nihil ipsi indulgemus, quam quod litteris expressum.

§. 15.

Quid si militibus commeatus datur? an et summi duces intelliguntur? an et nautici milites? Adfirmat Grotius, ex ea ratione, quod verbi proprietates eam significationem admittat.

Sed quia 1. iam §. 14. vidimus, commeatum stricte esse interpretandum, 2. quia in sensu strictissimo per milites nec belli duces intelliguntur, nec turba nautica, 3. quia res periculo non caret, si belli duces in regiones et vrbes nostras recipiantur, vt et occasionem et vires nostras speculari possint; magis est, vt commeatum militibus datum ad duces porrigi non debere dicamus.

§. 16.

num. 1.2. In litteris commeatus vti solent formula: *vt libere ire et redire possint.* Quaeritur itaque, quomodo haec verba intelligenda?

Per *itum* intelligitur tum iter ad locum, quo tendit, tum commoratio in illo loco, donec negotium finiatur, cuius causa pervenerit; per *redium* intelligitur iter a loco isto in patriam, vsque dum eo pervenerit, vbi in tuto sit.

Ergo 1. nec in itinere violari possunt, quod fecit Alexander, nec in loco, vbi aliquamdiu commorantur, nec vbi ad fines nostros pervenerunt.

2. Ergo si vel maxime omissa clausula, *vt redire possint*, ea tamen tacite inesse censetur. Alias enim sine effectu esset commeatus.

3. Contra si abitus concessus, non ideo data censetur libertas redeundi: nec cui itus, datus est facultas alium mittendi, quia stricte interpretandum esse commeatum, §. 14. ostendimus.

§. 17.

§. 17. 18. 19.

Quaeritur porro, *an et ad alias personas et res extendatur commeatus?* id est, an si cui ea libertas data, is alios quoscunque tamquam comites secum ducere possit? item an qualvis res secum ferre?

Resp. Quae ad iter necessaria sunt, ea simul concessa intelliguntur, si iter concessum. Hinc sequitur

1. filios, vxores eo commeatu non frui, quia et sine iis peregrinari solemus. At si ius commorandi vel ius domicilii Titio conceditur, etiam familiae concessum intelligitur, quia sine familia habitare non solemus. Hinc porro

2. Famuli an comitari debeant eum, cui commeatus datur, et quo numero comitari debeant, ex eius statu et dignitate iudicandum.

3. Bona ei conceduntur ad iter necessaria, veluti suppellex, esculenta, potulenta, vestes, pecunia, non item merces vetitae, (*de contrebande.*)

4. Si comites concessi, tamen non adsumendi, qui delicti causa odiosi sunt, vt proditores, piratae, exsules, transfugae, desertores.

5. Si gentis nomen expressum, e. g. Hispani, tunc comites ex alia gente adducere nequit. Quia strictam interpretationem in commeatu adhibendam diximus.

§. 20. 21. 22.

Quaeritur denique, quando cesset ius commeandi, semel datum? Resp. quando, qui accepit, in tuto esse coepit. Ergo

1. non cessat morte concedentis principis vel summi imperantis. Is enim non ratione personae concessit, sed ratione summae potestatis, quae est perpetua.

2. Si datus cum clausula: *quamdiu voluero*: potest quidem princeps, quandocumque libuerit, iubere, vt migret, sed tamen eum violare non potest, donec ad praesidia sua peruenit.

3. Si commeatus datus, is valet in omni territorio, ratione concedentis. Et hinc excusanda non esset, e. g. Gallorum perfidia, qui dato commeatu Germano, eum per Heluetiam euntem in itinere opprimerent.

Heineccii Prael. Grot.

G g g g

4. Ad-

4. Addendum tamen, quod omisit Grotius, ob nouum delictum cessare commeatum. Hinc si hostilis dux, qui in regnum commeatu instructus venit, homicidium ibi commiserit, vel prodicionem conflaguerit, commeatus cessat, 1. quia delictum omne privilegium tollit, 2. quia commeatus semper concessus intelligitur sub conditione, si pacifice et honeste se gesserit.

§. 23.

Sequitur III. pars capituli, de redemptione captiuorum: nam et de ea pacta durante bello iniri solent, quae vocantur *cartels*.

Hic 1. obseruat Grotius, redemptionem hanc esse summe fauorabilem, a) quia ex caritate Christiana fluit, b) quia captiui saepe in corporis et animae periculo versantur, c) quia et res sacrae per leges alienari possunt, vt redimantur captiui.

§. 24.

Hinc 2. quaerit, an ea redemptio lege publica probiberi possit? Id sane factum apud Romanos, qui numquam captiuos suos redimebant, etiamsi ab hoste offerrentur, vt ad fortitudinem inflammarent homines, eosque adsuefacerent, vti mori mallerent, quam capi. Vid. Liv. lib. XXII.

Sed hanc legem *trucem* merito adpellat Grotius 1. quia caritati Christianae repugnat, 2. quia non semper culpa captiuorum intercedit, quandoquidem et viri fortissimi capi possunt, 3. Quia huiusmodi lex ducit ad *εὐρυνομίαν*, vt homines ab hoste non occisi, se ipsos occidant, quae desperatio et absurda, nec rei publicae utilis est.

Non ergo huiusmodi lex excusari potest, nisi necessitate, vt docet Grotius; sed talis necessitas, quae iubeat huiusmodi legem ferre, vix potest excogitari.

§. 25. 26.

3. Quaeritur, si tertius captiuum redimat, an ius in captiuum consequatur? Idque affirmatur, si redemptus ipse non habeat, quo restituat pretium pro se solutum. Nam qui non habet in aere, merito operas debet, quibus pretium quocumque modo repensetur.

Ob-

Obiici quidem posset, apud nos tamen seruos non esse, et ne captiuos quidem seruos fieri. Triste ergo esse captiuum fatum, qui in conditionem deteriore detrudatur, et iam seruus fiat, quum captus esset liber.

Sed resp. falsum esse, quod in seruitutem detrudatur. Operas enim et sine seruli conditione praestari posse, vel mercenarii nostri docent.

Idem iuris est, si saepius captus, saepius redemptus sit, tunc enim pluribus in commune operas praestare tenetur.

§. 27.

4. Quaeritur, si captiuus pauper credidus leui pretio dimissus sit, an si locupletiore eum esse adpareat, retineri possu, et pretium intendi?

Negatur. 1. Quum enim aestimatio captiuum incerta sit, non potest dicere capiens, se laesum esse. 2. Pretium non ex diuitiis, sed ex statu aestimari solet, e. g. an miles gregarius sit, an centurio, an tribunus, cet. 3. Dolus hic non adest, quia nemo tenetur facultates suas alteri indicare, ne amico quidem, nedum hosti. Ergo pacta semel inita seruanda.

§. 28.

5. Sed annon bona captiuum captorem sequuntur? Resp. Negatur. Nam aut seruus sit captiuus, aut non sit. Si sit seruus, capite deminuitur, adeoque et dominium rerum domi relictarum amittit, idque nec domino captori acquirere potest. Si non sit seruus, vt hodie inter Christianos, cessat etiam ius acquirendi. Nec aliud dicendum de rebus quas secum fert captiuus, e. g. de numis aureis, quos in veste celauit. Ii enim manent captiuum, adeoque et illis se liberare omnino potest, quia seruus non fuit, adeoque nec dominium rerum suarum amisit.

§. 29.

6. Quaeritur, an heres debeat pretium, a defuncto promissum? num. 1. 2. Distinguendum, in carcere mortuus sit captiuus, postquam pretium promisit, an iam fuerit dimissus. Si prius nihil debetur, quia sub conditione promissum, nec conditio exstitit. Posteriori casu debetur 1. modo vere sit heres; nam si in seruitutem

G g g g 2 quis

quis redactus fuit, is heredem habere nequit, 2. modo non enorme sit pretium, et dolose promissum, vel vi metuque extortum,

§. 30.

Demum 7. quaeritur, *an in carcerem redire debeat, sub conditione dimissus, ut et alius pro eo dimittatur, si conditio haec non adimpleatur?*

Hic pro captivo militat, 1. quod numquam promissit se in carcerem reditum, 2. quod, qui factum tertii promittit liberetur, si praestiterit omnem diligentiam.

At contra eum militat, quod libertatem lucrifacere non debeat, quia ita numquam convenit, ut gratis liberaretur.

Ergo inde sequitur, ut non quidem redire teneatur in carcerem, sed tamen aestimationem captori praestare debeat arbitrio boni viri, eaque praestita plenam libertatem consequatur.

CAPVT XXII.

DE FIDE MINORVM POTESTATVM IN BELLO.

§. 1.

HAstenus *de pactis a summo imperante initis: iam de iis, quae a belli ducibus ineuntur.*

Quum duces a ducendo dicti sint: ita vocantur omnes, qui ordines ducunt, siue cum summo imperio, uti apud nos *Maréchaux de camps, Généraux d'armées*, siue vice summi ducis, uti Legati, *Lieutenans Généraux*.

Differunt tamen quoad praesentem materiam duces summi et eorum legati. Illi libere agunt, hi ex praescripto: illi semper, hi si ille absit aut impediatur. Ergo pactum a Legato cum hoste initum non valet, praesente summo duce, nisi hic vel iusserit pacisci, vel pactum ratum habuerit.

§. 2.

§. 2.

De his ergo pactis quaeritur, 1. *an summum imperantem obligent?* §. 2-9. 2. *an ipsos belli duces obligent?* §. 10. ad fin.

Quod ad I. quaestionem, praemittenda regula: *obligari per alios non possumus, nisi quatenus illum voluntatis nostrae magistrum constituimus, quod fit per mandatum.*

Mandatum duplex est, aut expressum, aut tacitum. Expresso mandato instructi paciscuntur legati, in aulis missi, si ipsis conditiones pacti praescribuntur: et haec absolute obligant principem.

Tacitum mandatum est, quod ex officio demandato colligitur. Quemadmodum enim e. g. qui insitorem tabernae praeposuit, voluit etiam ut emeret et venderet, quamvis id expresse non mandavit, ita et qui e. g. ducem belli constituit, tacite etiam mandasse censetur, ut paciscatur cum hoste, si bellum aliter geri non possit.

Ergo obligatur princeps, quando dux belli egit secundum officium, non obligatur, si eius limites excessit.

§. 3.

Aliquando et obligatur princeps, quamvis nec expresse mandavit, nec tacite, idque

1. Propter ratihabitionem, quia eius effectus retrotrahitur ad initium, adeoque perinde est ac si ab initio consenserit.

2. Propter rem ipsam, si ex pacto ducis sui commodum sensit princeps. Nemo enim tenetur cum alterius damno locupletior fieri. Sic e. g. singamus pactum initum esse de tradenda urbe, cum omnibus tormentis et nauibus, nos hosti promissimus, quod salui exituri sint. Princeps iam id negat se ratum habiturum, quum tamen nec naues, nec urbem, nec tormenta reddere velit. Absurdum!

§. 4. 5.

Quid vero si contra mandatum pactus sit dux? Resp. tunc *mx. 1. 2. 3.* ipse obligatur, non princeps. Ipse, quia principalis est contrahens, quando non mandatarius est, non princeps, quia ex promisso alieno nemo obligatur, nisi mandatum dederit, secundum §. 2.

Hinc supra multis diximus, huius modi pacta dictas esse spon-
siones, et si princeps vel res publica apud Romanos eas ratas
habere voluerit, tunc ducem illum sine mandato pacifcentem
hosti traditum esse nudum, reuinctis in tergum manibus.

§. 6.

Sed porro quaeritur, *an et ducum pactum obliget inferiores
magistratus?* Saepe enim belli duces in urbibus obsessis pacta
cum obsidentibus ineunt, et ciuibus vel aliquid stipulantur,
e. g. certam pecuniae summam; an tunc obligantur magistratus
inferiores?

Resp. Distinguendum an aliquid ipsis stipulatus sit dux,
tunc ex hoc pacto utilitatem capiunt, quia hostis ex promisso
suo tenetur: an eorum nomine aliquid promissum, tunc non
obligantur, nisi consenserint.

Obiici posset, magistratus tamen esse duce inferiores, supe-
riores autem pro inferioribus pacisci posse. Sed resp. Su-
periores sunt in iis quae ad defendendam urbem pertinent: non
ut possint illis pro lubitu tributa et onera imponere.

§. 7. 8. 9.

Quum vero supra dixerimus, *obligari principem, si dux pa-
ctus sit secundum officium: quaeritur. quae ergo pacta inire pos-
sit, quae non possit sine expresso mandato?*

Resp. 1. non potest sine mandato pacem inire, 1. quia
ut supra cap. 20. §. 1. diximus, qui bellum gerere, idem et
pacem facere potest. 2. Quia belli dux ad bellum adminis-
trandum mittitur, non ad pacem ineundam, 3. quia hic duci, si
pax offeratur non deest occasio, a principe suo mandata exi-
gendi. Hinc Caudina et Numantina sponsio Romanos non obli-
gavit, de qua supra.

2. Inducias dare potest dux, sed breues et speciales, e. g.
mortuorum sepeliendorum, vel morbi in castris grassantis cau-
sa, non autem generales et diuturnas, nisi mandato principis,
quia hic ducem non ocio sed belli gerendi causa misit.

3. Non potest de prouinciis, oppidis, agris bello quaesitis
pro lubitu disponere, quia eas non sibi, sed principi adquisiuit,
nec princeps eum rerum suarum arbitrum, sed belli ducem con-
stituit.

4. Potest tamen pacta inire de conditionibus deditionis, quia id mandatum sibi intelligitur.

§. 10.

II. *Quaeritur an ipse dux obligetur, si principem non obligat?*
 Resp. quatenus officium fecerunt, non obligantur paciscendo,
 1. non enim possunt alienam praestare perfidiam. 2. Non locum habet in pactis ducum interpretatio extensiva, ut ipsi se ultra promissum obligarint.

§. 11. 12.

Quid si ita pacti sint, ut principi rem integram seruarent?
 Id fit dupliciter, 1. per deditionem. Accipio vos in deditionem, et principi meo reservo arbitrium de vobis statuendi: 2. per conditionem rati. Promitto si princeps meus ratum habuerit.

Vtroque casu nec princeps obligatur, nec dux belli. Non princeps, qui nec promisit, nec promittere iussit, nec dux belli, qui disertis verbis principi suo omnia integra seruauit, nec cum pacto suo obligare voluit.

§. 13.

Ceterum et hic valet regula, *qui potest antecedens; potest et consequens*. Ergo quia duci belli fas est, tradere urbem obsessam, etiam sine speciali mandato, si res ad extrema peruenerit, poterit etiam praesidium dimittere, vel illud alio ducere.

CAP. XXIII.

DE FIDE PRIVATA IN BELLO.

§. 1.

SAcpe et priuati paciscuntur cum hoste; e. g. miles captus ante dimissionem iurat, se intra sex menses non arma gesturum, an tunc tenetur?

Fuere qui id negarent, maxime Icti celebres, Bartolus et Za-

Zisius, ex ea ratione, quia mandatum paciscendi non habeant a principe.

Sed confundunt hi quaestiones. Mandato opus est, si quis pro alio velit promittere vel stipulari. At nemo dixerit, priuatos pro principe suo pacisci posse sine mandato. Hic autem quaeritur, *an non pro se ipsis pacisci possint?* Id negari nequit, quia ad paciscendum de rebus priuatis mandato opus non est.

§. 2.

Addit Grotius et aliud argumentum a minore ad maius. Si latroni data a priuato fides, seruanda: multo magis iusto hosti. Sed eo argumento vti non possumus sine distinctione. Aut vltro aliquid latroni promittimus, non tamquam latroni, sed tamquam homini, tunc fides data seruanda. At si vi metuque nobis promissum extorqueat, non obligamur, quamuis iuramentum acceperit, quidquid videatur Grotio.

Hosti contra obligamur, siue vltro, siue metu adacti promiserimus, quia metus, quem hostis hosti incutit, non est iniustus.

§. 3. 4.

Rectius Grotius quaestionem, *an omnes priuati obligentur?* soluit. Obligantur omnes, quibus intellectus et voluntas. Ergo non obligantur furiosi, mente capti, infantes, impuberes. Obligantur vero 1. minores, a) quia intelligunt quid agant, b) quia beneficium minorum ex iure ciuili est, non ex iure naturae et gentium; nec 2. errantes, si error sit in essentia rei, non si erratum circa rei accidentia.

§. 5.

His, quae diximus, obici solet *publica utilitas*. Sed cadit ea obiectio, si dispiciamus, quousque se illa pacta priuatorum extendant. Nimirum pacisci non possunt

1. De rebus publicis, e. g. se tradituros urbem.
2. De factis, quae absolute debent rei publicae, e. g. se numquam principi suo tributa daturus tempore belli.
3. Non de factis prohibitis, e. g. se occisuros hominem;
4. Sed de iis, quae sunt in priuati cuiusque arbitrio, e. g. se nolle intra tantum temporis spatium arma ferre, se hosti ioco daturus.

Obiici

Obiici posset, militem in potestate non habere, an arma ferre velit, an nolit. Resp. verum id esse de milite, qui est in exercitu nostro : non de eo, qui ab hoste captus, quem et invito duce nostro cogere potest hostis, ne arma ferat, si nimirum eum non dimittat.

§. 6. 7. 8. 9.

His quatuor paragraphis sequuntur aliquot exempla *paclorum licitorum*, veluti

1. Si quis captivus promittat, se in carcerem rediturum, nihil enim promittit iniustum, quia iam in carcere est, nec promittit vi et metu iniusto adactus. Exemplo Attilii Reguli notum.

2. Si quis promittat se in certum locum non venturum. Id pactum valet ob easdem rationes.

3. Si quis captivus promittat, se non velle fugere, quod saepe faciunt duces bellici, capti, ut ex carcere dimittantur.

4. Non autem potest captivus cum tertio pactum deditiois inire. Dedere enim se potest liber et sui iuris. Talis non est captivus. Nec cuiquam invito ius suum auferre possum.

§. 10.

Quaeritur iam, quod effectum sit huiusmodi *paclorum* ? Resp. ut serventur. Sed si servare noluit, an a magistratu suo cogi possunt ? Et id affirmatur quia hosti quoque ius decendum. Et ita etiam obtinet inter gentes honestiores. Exemplo sunt decem captivi sub promissione reditus ab Hannibale dimissi, qui cum pactum servare vel redire nollent, a senatu invito duci iussi sunt.

§. 11.

Addit Grotius quaedam de *paclorum* huiusmodi interpretatione, et commodat regulas :

1. *Non recedendum esse sine ratione a proprietate verborum.* Nam verba explicanda ex usu.

2. *In dubio interpretationem faciendam contra eum, qui clarius loqui debuit.* Is enim tibi imputare debet, quod non perspicue mentem suam exposuit.

§. 12. *ad fin.*

Has regulas iam exemplis illustrat Grotius, et quaerit,

1. *an qui vitam sibi pactus est, et libertatem sibi pactus censeatur?* idque negat, quia in dubio interpretatio facienda contra eum, qui clarius loqui debuisset. Nec proprietates verborum patitur, ut per vitam libertatem intelligamus.

2. *Si quis vestes sibi pactus est: an et arma intelliguntur.* Negatur ob eandem rationem.

3. *Si quis dicat, se deditionem facturum, nisi auxilium venerit, an sufficit si copiae auxiliares in conspectu sint, an requiritur, ut et impressionem faciant?* Resp. sufficere prius, ob viam loquendi.

4. *An rediisse censeatur ad hostem, qui clam eo fuit, et clam discesserit?* Negatur, quia redire ad hostem ex viu vulgari dicitur, qui se eius potestati permittit.

5. *An pactum ideo cessat, si de exsequutionis modo quid convenit, quod iam adimpleri non potest, e. g. si quis solui promisit Heidelbergae, eaque interea in cineres conversa?* Negatur: sufficit enim si promissum in loco propinquo praestetur.

6. *An, si obsides dati, illi vi accessio obligationis primariae obligantur, an primario?* Resp. in dubio ut accessio, quia ita natura huius negotii exigit.

CAPVT XXIIII.

DE FIDE TACITA.

§. 1.

Pacta vel *expres*sa sunt, vel *tacita*. *Expres*sa, ubi vtrunque consensus per verba litterasue declaratur; *tacita*, ubi per alia signa, e. g. nutum; silentium.

Quemadmodum ergo hoc obtinet inter priuatos: ita et cum republica, immo et cum hostibus huiusmodi pacta possunt iniri: id quod iam exemplis quibusdam illustratur.

§. 2.

§. 2.

Primum exemplum est eius, qui se in rem publicam contulit, ibique vel civitatis ius impetrauit, vel saltem domicilium constituit. Quamvis enim is non expresse promiserit, quod velit secundum leges istius rei publicae vivere, nec quidquam contra statum illius agere: vel tacite tamen videtur se ad id obligasse: quum qui vult finem, vult etiam media.

§. 3.

Alterum exemplum est eius, qui colloquium cum hoste postulat. Quamvis enim iste non promittat, se alteri securitatem praestitutum, videtur tamen id tacite promississe: ob eandem rationem. Hinc nec Cn. Domitii nec T. Labieni facinus ferendum, qui hostium reges et duces in colloquium euocatos vinculis constrinxerunt.

§. 4.

An autem durante colloquio hostis uterque rem suam agere, castra mouere, munimenta absoluere, praelium committere potest? Distingue, an simul induciae factae, tamdiu duraturae, quoad colloquium finitum sit, an huiusmodi induciae factae non sint. Priore casu potest quidem uterque hostis castra mouere, munire, munimenta absoluere, sed non committere praelium. Posteriore casu et hoc potest, modo colloquentibus fides et securitas praestetur, nec illi vel eorum comites violentur.

§. 5.

Tertium exemplum est, quoties signis voluntatem sibi iniicem declarant hostes.

Talia signa olim erant virtutis et rami oliuarum, apud Romanos fersa capiti imposita, apud Macedones hastarum erectio: quibus indicabant, se ad deditionem paratos esse.

Hodie talia signa sunt

1. Vexillum candidum, quo petitur colloquium.
2. Certus sonus tympani (*la chamade*) quo se offerunt ad deditionem aequis conditionibus faciendam.
3. Proiecta arma, quibus se sine conditione dedunt.

§. 6.

Quantum exemplum est rei publicae tacite adprobantis spon-
sionem a ducibus factam.

1. Si sciat eam factam, nec contradicat.
2. Si conditiones quasdam adimpleat.
3. Si quod ea sponcione promissum, praestari sibi patiatur,
et quod ideo datur, acceptet.

§. 7.

An et poenae remissio ex sola dissimulatione colligitur? Nega-
tur, nisi accedat actus ex quo tale quid colligatur, e. g. si prin-
ceps delictum sciens delinquenti tamen officium vel honorem
contulit, si processum aduersus eum institutum aboleuit, etc.

CAPVT XXV.

CONCLUSIO CVM MONITIS AD PACEM.

§. 1.

III. I. 1. 3. **C**Aput hoc vltimum vere oratorium est, complectitur enim
paraenesis elegantem, *ad fidem seruandam*, §. 1. 2. *ad pa-*
cem, §. 2. ad fin.

1. Fidem et *hosti seruandam* recte suadet. 1. Quia vt vincu-
lum rei publicae est, ita et totius generis humani. 2. Quia lau-
dem conciliat bellum gerenti, et homines promouet, vt eo fa-
cilis se eius fidei permittant. 3. Quia perfidia Deo et homini-
bus inuisa est.

Cauere ergo debent reges, ne ministros perfidiam suaden-
tes audiant. Qui enim tale vitium suadent, ipsi eodem labo-
rant.

§. 2.

Deinde et 2. sapienter suadet, *vt in bello principes de pace*
cogitent. 1. Est enim pax suis belli, propter eam nisi bellum ge-
ritur;

ritur, ferarum more geritur. 2. Bellum semper aleae plenum et periculosum, pax semper tuta est.

§. 3.

Suadet, 3. *ut et pax non admodum pinguis bello praeferatur.* Respondeo, 1. est enim hic status statui Christiano accommodatissimus. 2. Pace etiam non pingui paruae res bene administratae crescunt; bello etiam triumphus pleno opes maximae dilabuntur.

§. 4. 5. 6.

Idem suadet vtriusque partis utilitas. Aut enim quis cladem bello passus est: tunc ipsi utilissima pax, quia periculosissimum cum valentiore certamen, et vana sine viribus ira: aut victoria reportant; tunc nullum fructum victoriae dulciorem expectare possunt, quam pacem, maxime, quum Martis fortuna admodum anceps et varia: aut denique adhuc pares sunt bellicgerantes, pares vtriusque vires: tunc optimum tempus est pacem faciendi, aequalque impetrandi conditiones.

§. 7.

4. Suadet Grotius, *ut pax semel facta religiose seruetur.* Nam 1. fide nihil sanctius, perfidia nihil homine et maxime rege indignius est. 2. Non potest sperare benedictionem Dei, qui fidem violat, ruptaque pace ad bellum ruit.

Triste exemplum Ludouici Hungariae regis, qui Cardinalis suam pacem cum Turcis sine ratione ruperat. Quum Turcarum imperator cum exercitu praelium initurus esset, prius instrumentum pacis sinu extraxit, sublatisque in coelum manibus: Deus, inquit, si vere Christianorum Deus es, in populo tuo vindica perfidiam. Paulo post rex cum vniuerso exercitu misere caesus est, et totum fere regnum Turcis cecidit.

§. 8.

Subiicit denique auctor elegans et pium votum, ut Deus haec monita inscribat cordibus imperantium, ut iis det mentem iuris diuini intelligentem, quaeque semper cogitet, reges regere homines, carissimum Deo animal, ne vilem existiment humanum sanguinem, ne bellum solius ambitionis, et cupiditatum

H h h h 3 causa

REMI

614 LIB. III. CAP. XXV. CONCLUSIO cet.
caussa gerant. Pium sane, votum, cui et nos ex animo subscri-
bimus. Nam

*Pax optima rerum,
Quas homini nouisse datum est, pax una triumphis
Innumeris potior.*

Det ergo Deus pacem in diebus nostris, det eam Deus pacis,
cui pro praestito auxilio exantlatoque hoc labore sit laus et glo-
ria sempiterna.

FINIS.



INDEX

INDEX CAPITVM.

PROOEMIUM.

pag. 1

LIBER I.

<u>CAP. I. Quid bellum? Quid ius?</u>	37
<u>II. An bellare vniquam iustum sit?</u>	52
<u>III. Belli partitio in publicum et priuatum, summi imperii explicatio.</u>	74
<u>IIII. De bello subditorum in superiores.</u>	117
<u>V. Qui bellum licite gerant.</u>	135

LIBER II.

<u>CAP. I. De belli causis, et primum de defensione sui, et rerum.</u>	137
<u>II. De his, quae hominibus communiter competunt.</u>	150
<u>III. De acquisitione originaria rerum, vbi de mari et fluminibus.</u>	166
<u>IIII. De derelictione praesumptis, et eam sequuta occupatione, et quid ab vncapione et praescriptione differat.</u>	180
<u>V. De acquisitione originaria iuris in personas, vbi de iure parentum, de matrimonii, de collegiis, de iure in subditos, seruos, cet.</u>	190
<u>VI. De acquisitione deriuatiua facto hominis, vbi de alienatione imperii, et rerum imperii.</u>	213
<u>VII. De acquisitione deriuatiua, quae fit per legem, vbi de successionem ab intestato.</u>	222
<u>VIII. De acquisitionibus, quae vulgo dicuntur iuris gentium.</u>	245
<u>IIII. Quando imperia, vel dominia desinant.</u>	256
<u>X. De obligatione, quae ex dominio oritur.</u>	266
<u>XI. De promissis.</u>	273
<u>XII. De contractibus.</u>	287
<u>XIII. De iureiurando.</u>	304
<u>XIIII. De eorum, qui summum imperium habent, promissis, contractibus, et iureiurando.</u>	318
<u>XV. De foederibus et sponsonibus.</u>	329
<u>XVI. De interpretatione.</u>	343
<u>XVII. De damno per iniuriam dato, et obligatione, quae inde oritur.</u>	361
<u>XVIII. De legationum iure.</u>	371
<u>XIIII. De iure sepulchrae.</u>	380
<u>XX. De poenis.</u>	387
<u>XXI. De</u>	

INDEX CAPITVM.

CAP. XXI. De communicatione poenarum.	Pa. 426
XXII. De causis iniustis.	441
XXIII. De causis iustis.	449
XXIII. Monita de non temere etiam ex iustis causis suscipiendo bello.	457
XXV. De causis belli pro aliis suscipiendi.	458
XXVI. De causis iustis, ut bellum geratur ab his qui sub alieno imperio sunt.	563

LIBER III.

CAP. I. Quantum in bello liceat, regulae ex iure naturae generales, ubi et de dolis et mendacio.	468
II. Quomodo iure gentium bona subditorum pro debito imperantium obligentur, ubi de repressaliis.	472
III. De bello iusto, siue sollemni, iure gentium, ubi de indictione.	487
III. De iure interficiendi hostes in bello sollemni, et alia vi in corpus.	494
V. De rebus vastandis eripendi que.	504
VI. De iure acquirendi bello capta.	507
VII. De iure in captiuos.	523
VIII. De imperio in victos.	528
VIII. De possimino.	530
X. Merita de his, quae sunt in bello iniusto.	540
XI. Temperamentum circa ius interficiendi in bello iusto.	544
XII. Temperamentum circa vastationem et similia.	552
XIII. Temperamentum circa res captas.	556
XIII. Temperamentum circa captos.	558
XV. De temperamento circa acquisitionem imperii.	563
XVI. Temperamentum circa ea quae iure gentium iure possimino carent.	567
XVII. De his, qui bello medii sunt.	569
XVIII. De his, quae in bello priuatum sunt.	570
XVIII. De fide inter hostes.	572
XX. De pace.	578
XXI. De fide manente bello, ubi de induciis, commentu, captiuorum redemptione.	595
XXII. De fide minorum potestatum in bello.	604
XXIII. De fide priuata in bello.	607

FINIS.

ANT
1318830



